



『永樂北藏』整理委員會

永樂北藏

綫裝書局

御製

天清地寧  
風雨調均  
烽警不作  
化醇俗厚  
外順內安  
善際光明  
大正統五  
年十一月  
十  
陰陽和順  
百穀常豐  
禮教興行  
一人皆慈  
一統皆善  
既往未  
俱登正覺  
七政明朗  
萬類咸暢  
子孝臣忠  
物靡害災  
九幽六道  
日登正覺

永樂北藏第一〇六冊目錄

- 四諦論 四卷 陳真諦譯 (逸七—九) ..... 一
- 辟支佛因緣論 一卷 失譯人名附秦錄 (逸十) ..... 一〇九
- 阿毗達磨大毗婆沙論 二百卷 唐玄奘譯 (本冊卷第一至卷第三十三 心一—疲三) ..... 一三九

四諦論卷第一

逸七

婆 藪 跋 摩 造

陳 三 藏 真 諦 譯

思擇品第一

般若徧諸法 逸七 大悲攝衆生 無相說正道

頂禮人天尊 大聖旃延論 言略義深廣

大德佛陀密 廣說言及義 有次第莊嚴

廣略義相稱 名理互相攝 我見兩論已

今則捨廣略 故造中量論 利益說受者

今正法久住 若人達四諦 四信處難動

不更視他面 永離四惡道 八等人天識

後必至苦際 故造四諦論 不由求慢等

緣起義多種 句味前後次 他難及救義

總別相應理 證義及譬喻 依此說四諦

願衆生知此 得天道涅槃

聖諦有四此言是經何因何緣佛世尊說如

此經云何聖諦有四不增不減云何聖義及

與諦義若以聖故名爲諦者前二不應名諦

若言聖家諦故名爲諦義則不定復有經說

諦唯是一無有第二云何四義而不破壞復

有經說一切行法是名為苦故唯二諦四諦  
義不成復次增一中說安立諸法從一至二  
乃至衆多云何諦義獨不增一復次四相既  
其不同云何一時而得並觀復次四相婆羅  
門諦及與聖諦有何差別持散偈曰

云何四聖諦 非諦不定境 唯二增並觀  
淨聖諦何別

云何諸佛於四諦中同有一意云何唯以四  
諦為諸佛上品正說云何同觀四諦為境智  
慧平等而果有差別云何阿羅漢於四諦中

智圓無餘不同諸佛得一切智若不同者於  
四諦中應有無明若一切法四諦中攝勝奢  
波葉譬經應須救解若不救解應有五諦若  
無五諦餘法非諦若苦等四名聖諦者又說  
一苦具足聖諦如是等經則不須說若四諦  
智說名為苦是義不然若知一諦亦知餘諦  
者後說三諦則為無用云何在先說於苦諦  
若未說因先說果者何得不違十二緣生云  
何說滅諦後說道諦持散偈曰  
一意上果異 一切智葉譬 四違一無用

先苦因緣滅

聖諦有四云何佛世尊說此經答有諸弟子應得聖道先在外道稟受邪法或事常行外道或不住一處道護命道相違道老聲聞道思瞿曇道鳥翅衣道事水道辮髮道事火道裸形道等如是諸道各讚己法唯有我法真實無餘諦不相違無死為果他法不爾聞此言已無決定智如是等法何者真實何者不實是諸弟子於諦非諦起無明惑為顯實諦是故大仙說如是經譬如有人為偽瓔珞之

所欺張令其得見真實瓔珞復次有諸別法說如此義若捨俗飾持沙門相住阿蘭若處行頭陀法值遇白法滅捨財物守護慚羞登上戒車控制根馬磨練鬪仗被服定鎧因此等行自謂我等是真實沙門是諸人等起沙門也七增上慢令其得見真實沙門故佛世尊說如是經為顯此義為通達四諦於聖法中成實沙門不由餘行如沙門經說若有如此具如經說實法門者由四諦觀故得成立不由世間修行究竟共得有流而名沙門如裸形偈

說復次已免九難前佛已生其獸離因法以善根香熏習其心已長聖道資種意行俱淨應通達聖諦是勤行心爲令服聖諦智藥故佛世尊而說是經如可治病醫則施藥復次聞惡道苦最極難忍生獸怖心爲如此人顯不墮惡道因緣故說此經何以故入地獄中受生衆生六方火燄之所圍遶舉體洞然如融金色其出入息皆是火燄受燒熱苦復有諸人飢食鐵丸渴飲銅汁或剉或斫或破或抽受種種苦有衆色狗及鐵嘴鳥等之所噉

食或受餓鬼生飢渴苦恒隨逼身咽如針孔恒欲食飲終無飽足渴行求水宿業所逼若近河邊便見河燥或見膿血屎尿臭穢徧滿值華果樹變成空林如偈說言

月炙如夏日 風觸如火燄 雨滴如洋錫

履地如熱灰

是故餓鬼受苦最劇或生畜生道恒被籠繫斫破鞭打互相吞食更相疑畏心恒不安受如此苦或生脩羅怨結慳悋慢觸犯受是等苦佛諸弟子聞諸惡道有如是苦畏自墮彼



欲顯四諦知是見不是墮因緣故說此經如人應墮海底施以船筏令其得濟如經中說若有眾生於如是苦能如實見則得解脫四種惡道及生老病一切諸苦復次為令眾生遠離五種邪欺誑語一能生眾惡二惡人受行三賢人遠離四能發起煩惱五欺誑為體此七為令他說利益眾生五分正語一自德相應二善人受行三生長善根四令離生死棘刺稠林五令至實樂離五邪言行五正語故說此經譬如舍偽寶取真實寶如經中說莫

說實邪惡言若僧聚集應行兩事一聖默然二聖正法言復次有諸凡夫各自執著諸別異諦我執是實他執為非由此執故互相鬪諍如生盲見象欲顯最勝無死鬪諍無更起無顛倒是聖諦智慧故說此經為現此意執著斷常說我諸人互相關諍見四諦人則不如是了達真空故如法多柯經說復次依正師長住空閑處受頭陀行減損生具守護六根節量飲食初後夜覺樂一心聽如理思量正說及誦端坐寂定數息觀門由此因緣成

熟相續心地靜細或聚動弱為如是人令得  
 通達故說此經如潤滑人施其利藥若真實  
 義唯以智根名為通達應知此根緣四聖諦  
 是通達經此中應說復次為破四惑顯兩方  
 便故說此經如偈所說

生起滅離闇

種種諸邪執

六十二種見

因果中無明

為破此等惑

欲顯不動理

及繫解脫緣

故佛說此經

復次梵等諸天仙等諸人婆利等脩羅道龍  
 等諸夜叉等神闇摩等護不見四聖諦故不

逸七

五

出三界獄如蠶處繭迴轉六道猶如車輪漫  
 走闇中墮深坑喻受大燒熱若見四聖諦則  
 破無明闇得智光明解脫四惡道則不仰觀  
 諸道由是四聖諦真實無二無倒無諍能成  
 如來出世勝用欲顯此義故說此經論主欲  
 顯四諦義無與等者故說首盧柯  
 知外諦不離 律理行勝負 不能度生老  
 死憂悲大海 則此聖智人 貪瞋引鬪諍  
 智者求解脫 外諦不應知 若人見聖諦  
 免惡道勝法 離過無染濁 常行四等心

衆苦所徧滿 解脫三界獄 聰慧求涅槃

應須見聖諦

持散偈曰

弟子及沙門 免難畏惡道 過失與邪執

師尊破顯梵

云何聖諦唯有四種不減不增答此問非問一切處如是無窮故復次身見斷見常見無事見為對治此四是故聖諦有四復次為對治四倒故說四諦猶如四念處復次為離四種邪執事故由一切衆生有四種邪執何者

為四謂果因解脫方便邪執一果邪執者我見念愛業所生陰界入等不淨臭穢猶如死狗三苦火隨燒無常金剛之所破壞我我所者使作者受者使受者之所遠離此中淨樂常我執是果邪執為離此執故說苦聖諦二遊七因邪執者謂世主梵王自在人六雙時自性定自然非因宿業亡藥曰宿藥地水火風隣虛空等此非因不平等因執為生因是名因邪執為離此執故說集諦三解脫邪執者歸五入毗紐體極入空至世俗住無苦上獨存離

我德三定果暫捨永捨如是等執解脫者非定非永名解脫執爲破此執故說滅諦四方便邪執者謂遠離五塵飲食衣服卧具住處風水華菓根芽枝葉米麩油滓牛糞以此等物爲飲食故樹皮茅勝板編草青鹿皮用此等物以爲衣服或復捨此地上並杵板刺灰聚卧此等上或首下脚上或隨向日熱炙身恒著濕衣恒住水中大行投巖赴火永沒水依時節業盡無因由此等行謂得涅槃是名方便邪執爲離此執故說道諦以事四故故

說四諦猶如聖道復次爲分別希有法故聖諦有四何以故取陰是衆生依著處故說苦應知不可依著由貪愛故無有寂靜貪愛滅故則有寂滅苦滅者我慢寂滅心苦對治故四修道故無明寂滅道能對治無明故復次一切求解脫人滅苦得樂是其勝用滅苦云何由集滅故得樂由修道故聖諦有故復次經論師說若人觀見生死過失觀涅槃功德則入正定聚生死過失云何謂受生識起失此識起因即是貪愛涅槃功德云何謂識不

起樂此識不起方便即是聖道故說四諦復次分別世出世因果故說四諦復次通達四種故復次依住四種故說四諦復次別相四種故說四諦問聖義及諦義云何答聖義有八一自在若繫屬他則不自在名為僕隸不名為聖諸佛及弟子於心及法二處自在故名為聖二免貪愛奴如許自在人出家三聖種生故名為聖人如生婆羅門種四於聖地生地者謂真實無生譬如生中國地五行離生死如婆羅門六不乘生死車如捨則無著

七不更生故猶如陳種八恭敬應往以福德故猶如皇帝持散偈曰  
自在離貪奴 聖種聖地生 行離不乘車 不生恭敬往

諦義有七一不倒是諦義譬如火相二寶有是諦義如經中說三無變異是諦義四無二行是諦義譬如樹提伽地耶達多行五不更起是諦義從此智不更起不同火輪智六不相違是諦義譬如業及聖戒七文義相稱是諦義何以故言著苦者必苦為義由此七義

名為諦

汝問若以聖故名為諦者前二不應名諦又若言聖家諦故名為諦者義則不定者答諦是聖因能生聖故譬如梵住故名聖諦如經中說四足為聖與義相應復次聖人所說故名聖諦如導師路如經中說若諸如來已正當說皆說四諦問若以聖說名聖諦者凡夫亦說應名凡諦答承佛神力說故成立佛正教故非凡諦如舍利弗行因緣復次聖人故先所了故譬如仙藥復次聖人依真實是故

名聖諦譬如世諦問凡人依不實義見應非聖非諦答無清淨眼則不能見譬如生盲擇真似寶如瞽眼人謬見多月凡夫醉狂不得見此譬如草頭百象復次智習論說以體聖故故說聖諦譬如烏虵赤米復次經中說無上聖慧所照了故故說聖諦汝問復有經說諦唯是一無有第二云何四義而不破壞者答以無倒義故一品類異故四譬如四倒復次由諦義故一譬如聖道事用異故四譬如道分復次法相通故一譬如色相別故四譬

如四大復次無我平等故一無我者一切平等譬如同異復次無變異故依心解脫說諦唯一更無第二何以故苦等聖諦皆有變異如經中說一切有為空虛是破壞法是一真實無壞心解脫如變異相相應皆實不虛四義亦爾是故聖諦有四汝問復有經說一切行法是名為苦故唯二諦四義不成者答分別部說意一切有為法無常故苦不由第一諦義故苦為離此故於世尊所修清淨梵行是名苦諦復當廣說是故四義不壞復次三

苦種說種經一切有為分分攝有為苦者說具足分如依苦苦說苦種苦根苦界苦受等依壞行苦說亦如是依一切受說苦若無常是苦故說一切有為或依行苦說生起是苦有生是苦色生即是苦生或說是苦諦以種種意說苦是故皆不相違復次無變異故依涅槃說一切有為苦苦由故苦相相應故依四諦義不失汝問復次增一中說安立諸法從一至二乃至眾多云何諦義獨不增一者答義真實故無顛倒故佛說一切皆名為

諦雖一二三名爲增一諦無增一爲分別諦  
觀故說有四爲安立智及相故如四念處如  
前因緣成立四諦是義應知爲知聖諦故四  
知苦有因即得見法如經中說若人見十二  
緣生名爲見法通達出世十六相皆由見諦  
故繫屬因緣是無常義譬如鼓聲以難陀經  
爲證若無常是苦若苦是無我若無我是空  
若人知此則得見法通達十六相得滅惑離  
苦以是義故聖諦有四復次最上品故不共  
智境界故故無增一如問復次四相不同云

何一時而得並觀者答由想故經中說修習  
無常想拔除一切貪愛是想境界即是苦諦  
一切貪愛即是集諦拔除即是滅諦無常想  
即是道諦以是義故雖四不同一時得見復  
次由思擇故如經言因無常等想思擇五陰  
貪愛未生不得生已生則滅此中五陰即是  
苦諦貪愛即集諦不生及滅即是滅諦無常  
等思擇即是道諦以是義故一時得見四諦  
復次由觀失故如經云觀結處過失貪愛即  
滅結處即苦諦貪愛即集諦滅即滅諦過失



觀即是道諦以是義故一時見諦復次一時見諦譬如火火者是可燒等物一時燒熟熱照觀諦亦爾害生靜出各各自相離滅證修同在一時復次譬如日日者是可乾等物謂水種闍華各各異相乾熟破開同在一時觀諦亦爾復次譬如燈燈者是可燒等物謂炷油闇物各各異相燒乾破照皆是一時觀諦亦爾復次譬如船船者是可到等不同相物謂彼此兩岸物流到離載斷皆在一時觀諦亦爾分別部說若聚苦相觀達生滅心獸有

為修無願解脫門若觀有為唯有生滅不見餘法修空解脫門若觀寂靜不見有為及生滅相修無相解脫門此中苦相即是苦諦相生是煩惱業即是集諦相滅即是滅諦是法能令心離相見無相即是道諦若見無為法寂離生滅遠七四義一時成異此無為十一寂靜是名苦諦由除此故無為法寂靜是名集諦無為法即是滅諦能觀此寂靜及見無為即是道諦以是義故四相雖別得一時觀後更思量故不廣說持散偈曰

相思擇過失 火日燈船譬 苦相脫門故  
一時觀四諦

汝問婆羅門諦及聖諦有何差別者答世尊  
眞聖眞婆羅門此諦故無差別譬如釋與天  
帝與復次婆羅門諦道諦所攝聖諦者道果  
對治道境界所攝復次一向善是婆羅門諦  
善惡無記是聖諦復次唯道是婆羅門諦道  
果是名聖諦汝問云何諸佛於聖諦中同有  
一慧者答通達無餘法相平等故譬如淨眼  
觀色復次證見法故譬如火熱明此事世間

一慧所共證故復次熟磨法鏡故諸佛通達  
法界知此一切三世皆如現在譬如衆多水  
鏡月面影一持散偈曰  
兩人一無異 道善果故異 無餘證見故  
法鏡故同慧

汝問云何唯以四諦爲諸佛上品正說者答  
能拔衆生度生死海譬如出世法復次諦中  
最勝故譬如諦勝復次能攝一切諸法眞實  
故猶如勝奢波葉譬復次梵釋等諸天不曾  
見故樂行健力毗搜細天等智足未履故智

勤遠行諸外仙人所得故復次無分別智境界故若能知此一切功德之所莊嚴如舍利弗等及佛世尊復次義具足故由不共故此說功德最勝是故四諦名上品正說汝問云何同觀四諦為境故智慧平等而果有差別者答不由境同故智慧同譬如定及貪欲等復次由智慧差別故果有差別譬由業差別故果有差別復次修道異故得果不同譬如種子不同果有差別復次觀過失下中上品故得果不同汝問若阿羅漢於四諦中

智同無餘與一切智則應無異若不然者於四諦中應有無明者答阿羅漢不知四諦外諸佛境界非是無明所以者何但有說故若阿羅漢不知四諦外言說非是無明如勝奢波乘譬經說復次佛世尊已決判故於苦等諦不知是名無明不知四諦外四皮陀皮陀分等不名無明復次正對諦智對治煩惱說名無明非是不知一切智者四種別說為無明何以故自苦一分識相續各各異依約無始生死阿羅漢亦不能見是心如生已生由

如此增上緣緣等及思惟等善惡無記等如是因所生緣所攝在如此地跡位時中次復第二心次復中移心如此方法始自刹那羅婆牟休多日夜半月一月時節年數生變及滅自相續中阿羅漢亦不能見何況能見一切一切種自苦若自苦尚其不見何況能見他苦是故阿羅漢不能見一切智境界四諦中總別非是無明復次離四諦無明對治智境界外復有餘法在聲聞境界有阿羅漢亦不能見如舍利弗言我不見有人天能見知

我入初定觀及稱量我今我退起唯簡世尊此寂定名乃至目連亦不能解是舍利弗所入所起乃至化度陀難陀耶婆羅門及其外甥優婆低舍如定智慧辯說修習等他不能及如舍利弗迦葉波亦爾是故離四諦無明等對治是名非智非是無明汝問若一切法四諦中攝勝奢波葉譬經應須救解若不救解應有五諦若無五諦餘法非諦者答自然滅等不出諦外識境界故非所觀故云何非所觀若知此法不得流盡及苦盡故不離仰

祝外道面故非諸見不能動如帝釋幢若通  
達此不得稱為微細通達如射破髮端不可  
徧行故是故不須修學復次餘論師說一切  
法由相故皆入諦攝雖然皮陀及皮陀分宿  
傳世本量判僧佉瑜伽實廣論欲塵論鞞世  
師論醫方論相論算數論時智論獸論鴟域  
論明論歌舞莊嚴論人舞論天舞論天仙王  
傳等論外道論常行外道等乃至九十六種  
復有草藥藤樹等皮根心華果葉等力熟德  
味等復有世間不可思議希有四大變異業

果報等有論能分別此佛依此論說勝奢波  
棄譬如是等義不為汝說不生功德故能起  
諸惑故增長有為故是故不說譬如毒藥相  
憎藥反質呪幻化皮多羅論等以損惱他故  
佛所不說非為四諦外故所以不說汝問若  
苦等四名聖諦者又說是苦具足聖諦如是  
等經則不須說又若汝言於苦諦是名苦者  
是義不然答是經說智為苦諦如境無分別  
故如說四量復次由境界安立故智得成立  
譬如六識復次由功能故智體唯一約能為

四如四正勤智亦如是復次四聖諦智為總  
故於四諦觀說智為勝由此義故說智如境  
復次欲顯決定出離是四諦功德故隨說一  
苦具足聖諦與義相應若了義說者苦等是  
了義諦何以故佛說苦諦有生等相故安立  
四種觀故若不如此唯有一觀名為修習若  
取此經分別諸諦唯有一諦所謂道諦說無  
為諦故是經非證此義依阿毗達磨及藏論  
故得成立汝問若知一諦亦知餘諦說後三  
諦則為無用者答我不說見苦諦即見餘諦

我說一時見四諦一時離一時除一時得一  
時修故說餘諦非為無用譬如說苦諦復有  
為境界數量故如說道數量復次四中隨知  
一已即通餘諦如知一粒則通餘粒是故四  
諦並皆有用復次入觀門故觀取陰即離捨  
愛念如知怨家取陰者是苦諦愛念即集諦  
諦離捨即滅諦知是道諦依苦觀門其義如  
此知貪愛已即捨由此苦不生貪愛即集諦  
所貪愛即苦諦苦不生即滅諦知即道諦依  
集諦觀門如此知有為寂滅已若人證此無

明即滅有爲貪渴即寂靜有爲寂滅即是滅諦此所離法即是苦諦無明貪愛即是集諦知即道諦依滅諦觀門如此知助道法即生修習煩惱障與其相違即捨由捨此故有更生助道者是道諦有即苦諦煩惱業即集諦捨此及有不生是即滅諦依道諦觀門如此由諸諦觀門故雖復觀一說於餘諦非爲無用汝問云何在先說苦諦者答爲止息苦修四諦觀及出家住於梵行故先說苦復次生老死等衆苦無邊念念恒逼行人觀此求覓

苦因譬如師子復次外緣不能治無始時節是根本病人觀此求覓病因譬如醫師復次徧滿三界災橫疾惱行人觀此求覓其因如尋毒樹復次麤故失故獸惡依止故驚怖處所故故先說苦汝問若未說因先說果者何得不違十二緣生者答生次第故十二緣生先因後果思擇次第故於四諦中先果後因是故二說皆不相違復次果中有迷緣因計果如經言若此有彼亦有由此生彼亦生若因中有迷緣果計因如經言老死等有何

法令有由此義故各有所破皆不相違逆順  
 說故二說不同逆說緣生是名四諦是故不  
 違十二緣生汝問云何先說滅諦後說道諦  
 者答有二種義一順二逆如經中說戒清淨  
 為心清淨心清淨者為慧清淨乃至解脫知  
 見及明解脫是名順說七逆說者解脫者以離  
 欲為緣離欲者厭惡為緣厭惡者以實見為  
 緣乃至無憂悔者以戒清淨為緣

略說品第二

問四諦次第云何答

麤橫重結取 依道怖事果 病火怨依債  
 渴毒逼害境  
 欲顯麤大境故說苦諦得苦相已此法何因  
 生故說集此法盡何處次說滅此法因何得  
 故次說道復次無始橫網是名苦橫根名集  
 永離橫根是名為滅能拔除者說名為道復  
 次極重名苦執重名集捨名滅能滅執名道  
 復次結處名苦是結名集結盡名滅觀過名  
 道復次取亦如是復次依處名苦世間凡夫  
 雖為取陰所害猶起依著如依怨家謬為親



友依所安愛名集因此安愛住三有獄不求  
出離譬如狂囚無依愛名滅無方所依止故  
如瞿提經說能滅依愛名道觀依過故如觀  
燒屋復次六道名苦以無樂故猶如穢廁業  
煩惱名集為道因故離道名滅假名物故  
譬如火滅如鹿頭經說能引十七出諸道故名為  
道如婆羅呵馬王經說復次怖畏名苦我愛  
名集無畏處名滅上寶樂故運至無畏處名  
道復次作事名苦事因名集拔除事因名滅  
能拔名道復次似果名苦似種子名集似種

子壞名滅似種子壞因名道復次苦如病集  
如病因滅如無病道如治病藥復次苦如火  
集如薪滅如火盡道如火盡因復次似怨名  
苦結恨名集除結恨名滅能除因名道復次  
似依名苦似塵名集塵淨名滅淨因名道復  
次苦如債集如貧滅如離貧道如財物復次  
苦如燒熱集如燒熱因滅如清涼道如涼具  
復次苦如毒發集諦如毒滅如離毒道如阿  
伽陀復次苦如逼惱集如能惱滅如離惱道  
如離惱因復次苦如殺害集如能害者滅如

離殺道如離殺因復次苦境應集應除滅應得為此三事故修聖道次第如此四諦體相云何偈曰

似真理足品 有為相影識 虛妄一切三  
逼有等十二

有諸法師說真似二諦生者貪愛果故名為真苦道者業果名為似苦生因貪愛名為真集牽六道業名為似集生因愛盡名為真滅六道因盡名為似滅能滅生因正智名為真道戒等方便能離道因說名似道又理足論

師說識為真苦與此相應色等亦名為苦自愛名真集與此相應業等亦名為集自愛盡為真滅由此盡故餘盡亦名為滅正見名真道若此不生餘不至滅由此生故餘亦名道又假名部說諦有三種一苦品二品諦三聖諦苦品者謂五取陰苦品諦者逼惱為相苦建七聖諦者是苦一味集品者謂貪愛集品諦者能生為相集聖諦是集一味滅品者謂沙門果滅品諦者寂靜為相滅聖諦者一味為相道品者謂八分聖道道諦者真離為相道聖

諦者一味為相又分別部說一切有為皆苦由無常故非初諦故苦為離此故於世尊所修淨梵行是苦聖諦一切因皆名集以能生故非第二諦故集為斷此故於世尊所修淨梵行是集聖諦一切有為寂離名滅由寂靜故非第三諦故滅為證此滅於世尊所修淨梵行是滅聖諦一切善法皆是道能出離故非第四諦故道為習此道於世尊所修淨梵行是名聖諦又說熱相為煩惱煩惱及煩惱所起業名集若從此有名集聖諦有生名

苦聖諦如此從第二諦生第一諦若心捨離執相達無相界由此因故煩惱煩惱所起業斷由此斷故無復因緣有不更生此不更生名滅聖諦此法能令心捨離執相證無相界是正見等名滅道聖諦如執相餘影似虛妄分別等亦如是又分別論中說世尊不依一切苦假說苦諦若爾何為為顯無記果執取陰性體相故假說苦諦假說苦因法為別離此故於世尊所修淨梵行是真苦諦不依一切因假說集諦為顯能生假有因性體相故

假說集諦假說集因法爲斷此故於世尊所  
修淨梵行是真集諦不依一切滅假說滅諦  
爲顯輪轉道斷性體相故假說滅諦假說滅  
因法爲證至故於世尊所修淨梵行是真滅  
諦不依一切道假說道諦爲顯能除惑道性  
體相故假說道諦因法爲修此故於世尊所  
修淨梵行是真道諦又藏論說略明苦有二  
種一與憎會二與愛離此二二處一身二心  
因愛三種故則成三苦集諦有三愛見及業  
愛見二惑名爲後集由此已有業麤妙集滅

諦有三一見一處惑滅二欲一處惑滅三有  
一處惑滅道諦有三一見道二修道三成守  
道此三即三根復說苦者逼相集者生相滅  
者寂靜相道者能出離相復說苦者有相集  
者能有相滅者離相道者能離相

分別苦諦品第三之一

何者爲苦諦略說如此已云何廣分別於苦  
聚中云何說生爲初云何爲生云何生相云  
何生事云何生緣生云何苦若生是苦三種  
樂生義則不成生之與起云何爲異阿羅漢

五陰未滅云何說生已盡云何為老云何老相云何老事云何老緣云何老苦齒落相等不皆徧有苦非不徧云何說老是苦聖諦有為不住念念滅故云何有老持散偈曰

分別初四生 苦三及差別 盡四老并苦

齒落等念滅

速七

二下

云何為病云何病相云何病事云何病緣云何病苦若由病故身恒苦者云何不違此偈無病第一利 知足為勝財 無疑為上親 涅槃無比樂

若天道無病一切眾生以病為法此言應救正道論說病為業果是業果苦非苦聖諦佛說苦名為病又偈說飢為第一病如此二說云何為異云何為死云何死相云何死事云何死緣云何死苦放逸死破戒死生緣死此二何異又有覺無覺死有悔無悔死有放逸無放逸死有著無著死有調伏不調伏死少分調伏死其義云何五陰念念自滅他害等死云何得成云何為怨憎會云何怨憎會相云何怨憎會事云何怨憎會緣云何怨憎會

苦若怨憎類有聚會者永不相離此義應至  
云何為親愛離云何親愛離相云何親愛離  
事云何親愛離緣云何親愛離苦老等聚會  
即怨憎會少壯等離即親愛離更說怨會愛  
離云何非重說耶云何所求不得云何求不  
得相云何求不得事云何求不得緣云何求  
不得苦欲塵即苦至得亦苦求之不得云何  
為苦以何因緣求之不得云何略說五取陰  
為苦略義云何諸陰何相陰有何義是色識  
等同有為相云何說五陰與取陰云何為異

云何說取陰為苦陰不名苦陰者何義隨正  
見一苦已即通達苦諦何用廣說諸苦相耶  
經中亦說色樂亦在樂處若取陰是苦經則  
相違云何此經獨說略言餘經說色苦乃至  
識苦取陰復何因緣苦總略義云何

汝問何者為苦諦略說如此已云何廣分別  
者答有諸弟子樂略正教如舍利弗等聞智  
受化是故略說有諸弟子樂聞廣說如難陀  
及弗迦婆等廣分別智故為廣說得次有諸  
弟子因力最彊如大迦葉已增長善根故為

略說緣力弱者如苾提等未增長善根故為  
廣說復次利根如鶻蠅摩羅等故為略說鈍  
根受化如蛇奴等故為廣說復次多聞弟子  
如阿難等能持聞藏是故略說少聞弟子如  
周羅般陀等智慧鈍弱故廣分別說復次當  
聖言勝德如離婆多等數習內觀故為略說  
未有聖言及勝德如闍那等未習內觀為廣  
分別說

汝問於苦聚中云何說生為初者答曰苦始  
故老病死等諸苦生為最初譬如無悔等世

出世法以戒為初如是老病死等生為足所  
故說生為初不相離故復次由生能故若生  
已有老病死等能害身根心等譬如火若火  
已成則有燒熟照等非不有火生亦如此是  
故先說復次不相離故假使眾<sup>退七</sup>生得離老病  
決不離生以行苦故是受果故道<sup>廿三</sup>所治故故  
先說生復次平等過失故一切眾生同受生  
害譬如無常殺鬼復次隨逐一切有分故生  
者徧無明等十二有分譬如毒乳復次徧三  
界故生者徧三界如牛同異故先說生復次

苦根故生者根苦老病死等為枝葉苦如經  
中說一切諸苦以生為本以生為因如經廣  
辨故先說生持散偈曰

苦始能不離 等失隨有分 徧三界苦根  
是故先說生

云何為生者答偈言

生五經等說 得陰初續心 生分與諸伴

胎位及五種

釋曰如經阿毗達磨藏論十二緣生等心思  
擇論中廣說生應知復次業增長品隨眠為

伴引接生因緣法聚集所得種種衆生處得

陰入界等是名為生復次臨續生時初識受

生是名為生如經說由識入故名色和合若

說生次第識初起名生復次餘論師說生分

初識與伴俱起是名為生復次生有多種謂

柯羅等胎位差別乃至出胎如受生經說復

次生有五種如偈言

得聖法名生 胎位姓家成 聚同異及有

唯有名為生

釋曰得聖法名生如經中說已免奴位從我



口生復次有已生聖法律中如鶩崛摩羅經說復次住胎位名生謂柯羅邏頰浮陀伽訶那等譬如種子芽莖枝等復次姓家成名生如金寶等刹利等生復次聚同異類名為生形相有異謂人象馬等譬如婆羅多羅等樹復次有名為生謂陰入界等有是名為生如說有華有子等此論唯說有為生何以故本故貪愛果故故言唯有名為生云何為生相云何為生事云何為生緣者答有顯是生相種種苦為事業有為生緣云何苦者答三苦

火所燒故是愛生處非所愛樂非福行果聚同異類苦苦所燒所受生處是所愛樂是福行果聚同異類壞苦所燒所受生處不動行果聚同異類行苦所燒譬如野火燒繞大樹故說生苦復次眾苦所依故若有生者身心眾苦之所依集非不生時譬如鹿苑眾仙所依復次陰入界等有顯名生處處生已斫破刺擘解折分離墮失等苦平等隨生以無常怨不可遮故如王子境及以坏器故說生苦復次生者是諸苦藏憂悲惱生非苦根本老

死因緣諸病發起痛入失類諸惡依止礙壞  
所踐疲極城門怨具庫府煩惱續流此生是  
闇非燈可治深坑難出無火大燒是怨難覺  
是枉不疑是痛無藥是縛非繩棘林無道無  
有光火嬰兒讚嘆慧人毀訾樂有所愛諸佛  
菩薩引大悲因有學速七所離無學十四除盡諸佛自  
覺立名為苦故說生為苦復次胎位苦故臨  
受生時赤白和合有識來託受雜穢苦次柯  
羅邏頰浮陀伽那卑尸等位受轉熟苦如癰  
熟苦既堅實已身分生時受迫大苦如大家

苦在胎卧時兩藏重逼譬如罪人下蒸上壓  
受大困苦由母飲食威儀失度若走若踣若  
行泗水伸屈役力被打痛惱服相違食由此  
威儀飲食故肢節如解受種種苦如犯王法  
受諸拷楚故生為苦臨出胎時其身柔軟如  
芭蕉心產門迤逼如壓油車受壓迤苦又初  
出胎時身如新瘡手水衣觸如熱灰灌如刀  
劍解受難忍苦故說生苦若生是苦三種樂  
生義則不成者答為分別業報異故為安三  
界差別故為顯有三受故由此應知三安樂

生行苦所攝故是苦諦故苦所逼故苦眾多  
故故生是苦復次有福行果故有三樂生如  
偈說

福德果報樂 隨意得成就 速得最寂靜  
如願般涅槃

無常惡毒所雜故苦如雜毒食雖具百味色

選七

廿五

香觸好若有食者決得死報一切生死亦如  
是雜無常毒故說為苦復次為生時樂住時  
樂故說樂生此安樂生壞時苦故聖人厭此  
壞苦如憎糞穢故說生苦生之與起云何為

異者答化生一名起餘三名生復次入胎名  
生出胎名起復次有分次第生名生一時具  
生名起藏論中說生者屬識託胎種子故起  
者屬業能散置識諸道中故阿羅漢五陰未  
滅云何說生已盡者答有既滅故說生已盡  
復次因緣滅故此生無後生法故說生盡譬  
如由貪愛滅故說苦諦滅復次為拔除生根  
本說已盡譬如樹已斷根故雖富華葉等  
亦說已滅生盡亦爾復次當來應盡故說生  
盡譬如山頂棄擲坏器雖未至地已說其破

生盡亦爾故說羅漢生盡云何為老者答少壯減失次第度位四大衰損諸行變異身緩節踈色形羸醜諸根羸弱念識智行無所能為歸向死門是名為老復次微細過根徧入物中後時方了減損變異此法名老何以故老若入齒則現落相若入皮中皮則緩皺百種驚黷若入毛髮則現脫白若入四大則踈弱若入根門則根無力若入身形體戰動舉止不安若入於心心則掉蕩忘失憶智若入背脊則僂屈若入肢節肢節蹉戾少壯

軟滑悉皆失故現故壞相復次老有二種一依減失二能依減失一依減失者諸大血肉骨骨體等稍就減失由此減失得相似果謂走跳跨洎伸屈去來勤力擔負等並皆損失二能依減失者謂眼耳等根見聞等用皆不分明由不分明得相似果念智意減心地勤力擔負等並皆損失如經及藏論十二緣生論中廣說是名為老云何老相云何老事云何老緣者答減變熟壞故等名為老相少壯損失軟滑去離憎惡事來名為老事陰界入

逸七

廿六

生是名老緣此老又為憂悲等之處云何老  
苦者答此能生衆生憎惡相已奪可愛色勤  
力增智引就死王如犯王法禁伺劓刑付殺  
者處老亦如是故說老苦復次衆生辯言身  
力根能取持思量棄擲識及智力無間無瞬  
老日逼奪如熱時日解脫五翳盛光普照小  
坑淺水皆悉乾竭老亦如是故說老苦復次  
老者令色形醜陋能奪愛德除滅少壯及無  
病樂勤力擔負念智忍門思識悉能損奪諸  
根羸弱無復勢用如羅刹女吸人精氣趣向

死處故說老苦復次少身蓮華親心所愛色  
形端正悅他心眼為老霹靂之所變異卷縮  
破壞自心不悅他人憎惡故說老苦復次能  
壞身根念智故說老苦由身壞故行住坐卧  
屈伸轉側等皆不自在由根壞故見聞嗅嘗  
觸等皆不分明又有說言我聞不明還似嬰  
兒白念壞故更事不憶不了所說曾見不識  
本故說為老猶如行相又跋私弗部說有為  
諸法實有暫住此住有異是有為相說名為  
老如經中說此身得住百年或說有四識住

以是義故說名為老苦有為法實念念滅少壯壯不成亦無命根云何為病者答曰身界不平等生長乖違不平等生長時說名身病若平等時說名無病如佛世尊因耆婆說如來身界今至平等復次自性更互相違不識恩養身界毒蛇觸忤名病復次病有二種一身二心身病復有二種一因界相違名緣內起二因他逼觸名緣外起是身病者由名因處有差別故品類多種名差別者謂漏癩癰疽氣味腫癬瘡風狂等因差別者謂瘵風膽

及等分病或單或二或三或四如是瘵等有六十二為病家因處差別者謂頭眼耳喉心腹等是名身病若廣解者有四百四心病者因邪妄起謂憂煩等此病亦有二種一緣內境名內門惑二緣外為境名外門惑由名因處有差別故品類多種名差別者謂貪瞋慢癡見疑諂曲欺誑等因差別者謂淨相失相有無等相為心病因處差別者謂色等六塵如經說色愛乃至法愛此中所明但論身病不說心病云何病相云何病事云何病緣者

答病者逼惱身為相苦憂為事本界不平等  
是緣云何病苦者答世間聰明人隨其自能  
欲有造作由疾病故並不成就違願故苦是  
故疾病能為苦因如火為燒因日為光因老  
死等亦爾為苦因故苦復次能害本故故說  
病苦譬如蕉竹蘆葦復次生痛受故能害命  
際今壽終故如火毒伏故說病苦復次苦苦  
所攝故生及相續中眾生不能忍受譬如象  
子落野火中是故病苦復次不得自在故若  
人遭病於四威儀及想皆不自在其身低垂

不能伸屈行動等事譬如木人關節斷絕復  
次能捨壽命故如人遭病不能忍痛求火毒  
服自捨壽命譬如陀尼柯羅漢復次一切何  
方便不可療治來命必終故故說病苦譬如  
頰底仙人斷刺湯藥復次所憎厭故逼害為  
性起長無明故智慧恐種故因苦為體故不  
安依處故無學墮忘由智壞故選擇取捨之  
所遠離不識是事非事猶如愚人以此義故  
故說老苦如大德佛陀蜜說諸佛世尊無量  
數劫生長善根具足十力有十自在勝破四

魔得四無畏平等能觀一切方便秋時淨空  
圓月可愛那羅延堅固身節身力形皮膚等  
相為老所損故說老苦此義佛在阿羅毗國  
優陀夷比丘依佛說偈

惡老汝可患 遠七 侵汙愛娼色 廿七 是心悅眾心

由汝故變異

四諦論卷第一

音釋

翅 施智切 翼也 辦 妍典切 交也 鞞 頻眉切 鞞也 鷗 么加切 鷗也 壁 厄博切 壁也  
剗 剗魚切 剗也 汨 徐由切 汨也 坏 鋪秋切 坏也 皴 側救切 皴也



四諦論卷第二第三同卷

婆 藪 跋 摩 造

陳 三 藏 真 諦 譯

逸八

分別苦諦品第三之二

齒落相等不皆徧有苦非不徧云何說老是  
苦聖諦者答徧滿遠八三界諸行變異說名為老  
是苦聖諦如壽命滅如經言一切衆生以老  
為法復次諸天身形微妙稍損變害前後異  
故非無有老細故難知猶如其身復次住前  
後異是有為相徧滿諸行說名為老如牛同

異有為不住念念滅故云何有老者答一切  
有為法刹那刹那滅實無有住依相續住故  
說老相如江燈雨是江水流念念不住見相  
續不斷世人說言此江流急或言江長燈雨  
亦爾復次生死中間說名為老何以故初五  
陰起是名為生最後陰壞是名為死是二中  
間諸陰變異病對治故死生校具故說病為  
苦若由病故身恒苦者云何不違此偈無病  
第一利等答冷熱等病來逼迫故說身恒病  
免癩漏等重疾病故遊戲威儀讀誦思修有

力有能故依此身說於無病為第一利復次  
行苦人所然故說身恒病暫離苦故說無病  
為第一利復次恒治助故說常病身界暫調  
故說無病為第一利若天道無病一切眾生  
以病為法此言應救答陰生為苦徧滿三界  
是天道病如經中說色生是苦生諸病依處  
故如色餘陰亦爾又經說比丘若說病者是  
五陰別名乃至癱刺等又餘師說天將退時  
身心羸動是名天病正道論說病為業果是  
業果苦非苦聖諦者答是業果報不離愛果

是故說業果報即說愛果貪愛不離業故如  
燈與光業愛我見識果苦為性故苦諦所攝  
故不相違佛說苦名為病又偈說飢為第一  
病如此二說云何為異者答若說病苦重中  
輕病皆悉被攝飢則不爾故二說有異復次  
不可治故說飢為第一病何以故飢苦難治  
治不窮故如間日瘡病若眼病等則不如此  
復次無止際故是飢病者從生至終永無暫  
息餘病不爾復次飢病恒須治故如朽弊屋  
相似無病如怨詐親徧一切處故搏食眾生

並患飢苦如地獄品說是故飢病最為第一  
云何為死者答命根斷絕說名為死徧一切  
衆生故由有火大能消飲食身界毒蛇相乖  
違故其性盡滅由此滅故諸根無食隨火而  
滅心及心法根為上緣以根滅故心法隨滅  
煖命及識捨離身根是時名死如偈說  
煖命及意識 若捨離於身 眠屍橫在地  
如枯木無知  
復次同聚所得陰界入等相續斷絕是名為  
死死有二種一自性死二橫死自性死者復

有二種一由業盡二由命盡橫死亦有二種  
一者自橫二者他橫復次死有三種一隨剎  
那死二橫死三因盡死隨剎那死者從託胎  
已來乃至柯羅邏等十一位無瞬無息剎那  
謝如偈說

從初夜衆生身入 愛託住於胎 無礙自然去  
一向往不迴

又如經說比丘汝等剎那剎那生老及死是  
名隨剎那死橫死者毒火刀仗等自作或他  
作因此命根斷是名橫死因盡死者感長壽

業盡滅無餘是死真實唯羅漢有猶如燈盡  
是名因盡死云何死相云何死事云何死緣  
答命根斷絕是名死相捨離本道是名死事  
生為死緣云何死苦者答怖畏苦故是人臨  
終為死金剛之所破壞應往他方非所究悉  
將離親友我之愛熱所護身屋崩破壞時永  
離所作生重怖畏故說死苦復次火燒熱故  
若人曾經作惡不樂行善將命終時破戒因  
故見未來生惡道相現起大憂悔身心焦惱  
如死法經說故名死苦復次劇胎苦故是人

在胎中時恒受重苦或母飲食相違威儀疲  
極他所逼苦雖受大苦而不失命若死苦來  
頓奪前苦命根即絕出胎亦爾雖受大苦亦  
不失命死苦若來奪此生苦命根即滅復次  
在少壯位受用六塵不知厭足與所愛親共  
住未久由少壯無病性力自在財物勝故恒  
起醉慢是時若死其苦無比若人過少壯位  
財寶巨富穀帛資生皆悉具足或被王重罰  
或遭因病作是思惟我必應死其心已決眼  
滿熱淚咽喉窒塞觀愛親屬目不暫瞬死至

將去何苦劇此是死至者如大山來行四方  
便亦不能制如大力怨不可摧伏食噉一切  
如馬口火燒曝一切如劫末日一切衆生所  
不能度如海水動不能過岸如金剛霹靂碎  
五陰山如大猛風拔倒身樹如迦樓羅吞噉  
陰龍如飲味鬼伺人過失如大怨賊恒奪命  
寶如重罪人心無安樂如惡國王重罰難謝  
如春等時必定當有以是義故說死名苦故  
逸死破戒死生緣死此三何異者答慧命斷  
故名放逸人死戒清淨命破裏失故名破戒

人死壽命根斷故名生緣死復次退墮正法  
名放逸死失比丘性名破戒死退聚同分名  
緣生死又有覺無覺死有悔無悔死有放逸  
無放逸死有著無著死有調伏不調伏死少  
分調伏死其相云何答行善凡夫聖及菩薩  
正起憶念捨壽命根名有覺死異此名無覺  
死破戒人死名有悔死持戒人死名無悔死  
由五醉故不恭敬行法律學處名放逸死異  
此名不放逸死於父母妻子等起愛著心而  
捨壽命名有著死異此名無著死阿羅漢等

在六恒住調伏六根捨壽命根名調伏死行惡凡夫散漫心死名不調伏死有學聖人捨壽命根名少分調伏死五陰念念自滅他害等死云何得成答諸陰實念念滅相續恒流依相續故他害等死得成如約相續故說燈滅復次諸根無事能故譬如破餅復次壽命根壞故有人說言壽命根非刹那刹那滅何以故若念念滅壽命亦無時死非時死他害死等皆不得成三種病亦不得成是故命根非念念滅云何為怨憎會者答怨憎親愛不

定故若塵是所憎怨是其聚會亦是所憎如人於豬食外曰若爾苦諦不成立以不定故答不為怨親塵不定故怨憎會所生苦不定如境界不定生善則定惡亦如是怨憎會苦亦復如是復次宿世惡業相似果聚集名怨憎會立名為苦復次怨憎會苦者約苦受及資糧說何以故一切眾生愛樂憎苦故是受會名怨憎會復次惡友共聚多過失故名怨憎會苦如偈所說  
與惡友共聚 非聚多過失 是功德最大

離則無憂悔 善友共聚價 我思難判決  
分離時是苦 是共聚等價  
復次修淨戒人觀細失怖畏犯受惡戒事是  
其怨憎生悔熱故惡覺觀起是修行人憎怨  
能枯滅善法故煩惱燒然是聖人怨能逆心  
靜故此中說惡業法煩惱果相應是名怨憎  
會云何怨憎會相云何怨憎會事云何怨憎  
會緣者答非所愛聚為相心憂為事業煩惱  
為緣云何怨憎會苦者答逼惱為體故如惡  
隣里為苦因故如獸見狼逼身心故如毒刺

在體瞋恚緣故如見本怨無安因故如無憂  
王傳復次與種種重苦品類相應能害自身  
故如阿難宿傳非愛相應多生求欲求欲因  
緣生種種苦如偈言受苦人求復次由惡友  
故生大驚怖如鹿見獵師如人坐卧天衣所  
覆寶牀燒赤鐵鍼以刺其身身心戰動生大  
困苦是故名為怨憎會苦若怨憎類有聚會  
者永不相離此義應至者答一時境界性用  
相續共生當知諸法恒相聚會怨憎聚會異  
此義故難不得成復次苦受是名怨憎此受

不離於心如是義者順難答如經中說如攝  
有多種會義亦然如持散偈言

一分具分心 道用類相應 勝處及自性  
經說名法攝

如攝有多種會亦如是謂一境不相離相對  
相著等是故此難違順皆得云何為親愛離  
者答是親愛塵或名眾生或非眾生與其別  
離名親愛離復次少壯無病壽命家色形富  
貴自在親友相離亦名愛別離復次善業果  
報六入觸攝是退失名愛別離如退天道復

次樂受破壞名愛別離何以故此樂受是愛  
著處由此愛著於色等境亦生愛著是樂受  
伴謂想行識等亦所愛著若論實義唯樂受  
壞名愛別離云何親愛離相云何親愛離事  
云何親愛離緣者答離愛類為相心憂悲為  
事遭敗為緣云何親愛離苦者答因愛別離  
是諸眾生憂悲內然猶如空樹野火燒復如  
經說若天退墮愛別離苦劇於地獄如目連  
宿傳復次若眾生疑聞見憶念親愛別離憂  
悲苦生是故名愛別離苦復次父母妻子所



愛眷屬別離因故如併失財懊悔失心如著  
鬼狂謾語啼哭悶絕顛掉如臨死人如失王  
位重苦所逼如無識無知癡亂默然如船舶  
破沒憂悲海故名愛別離苦老等聚會即怨  
憎會少壯等離即親愛離更說怨會愛離云  
何非重說者答老等聚會少壯等離如此二  
苦羅漢亦有唯無憎會如偈  
若一切永無 怨憎及親愛 無憂無染心  
是人得涅槃  
以此義故不名重說復次由老病等無分別

苦與羅漢共如前偈說惡老汝可患等怨憎  
會苦及愛別離因分別起皆屬心苦未離欲  
人則有此苦復由老病等名依內苦怨會愛  
離名依外苦故非重說何所求不得者答遠  
離苦與苦不會則得歡樂與不相離求此不  
得名求不得苦復次與生老病死等諸苦求  
不相會而不能得是生定法故故名求不得  
苦復次求與怨憎不會親愛不離既不能得  
故名求不得苦外四此苦在前二苦已顯現  
何用重說答非所愛共聚名怨憎會是所愛

分離名愛別離今求怨不會求親不離翻前  
二種立此為苦故非重說復次已得未捨與  
所憎塵共聚名怨憎會已得未捨與所愛塵  
不得共聚名愛別離未得未捨是所愛塵求  
不能得名求不得苦由三世安立故非重說  
云何求不得相云何求不得事云何求不得  
緣者答求不得者違逆意欲為相以憂渴為  
事現無功用宿不作善為緣云何求不得苦  
者猶如如意餅等破故失求王位等願復次  
苦因緣故是所求欲五塵由不能得欲火所

然如述波伽等燒然成灰故名求不得苦復  
次三時中能生苦故是所求利我應不得今  
不得已不得由此生憂悲等苦故名求不得  
苦命塵即苦至得亦苦求之不得云何為苦  
者答以不定故得者未必皆苦何以故若得  
信根不名為苦復次是厭憂依止故求不得  
者能生求者厭惡憂惱心得五塵利則不如  
是是樂想故復次如火壯身老為後故說名  
為苦如是得五塵利敗為後說名為苦如取  
陰為苦依止說名為苦得五塵利說名為苦

義亦如是以何因緣求之不得者答因緣不  
具故譬如種子若無有緣芽不得生由宿世  
慳悋嫉妬邪見瞋故壞大家因今求不得如  
鬱多羅比丘等宿傳因惡法故離苦受樂求  
不能得譬如阿鼻地獄衆生求不得者略說  
三因一無宿世善二自無功用三他不愛敬  
云何略說五陰為苦答為攝初中後苦故生  
為初苦死為後苦老等憂悲等名為中苦復  
次為攝有間苦故有間苦者如老病死等無  
間苦者恒隨一切有分復次為攝各各自相

無邊衆苦故說五取陰名通相苦何以故  
諸苦別類無邊故假使如來於無量劫廣說  
苦相亦不能盡復次生等諸苦如火五取陰  
如薪如燒然經說復次五取陰為生等諸苦  
田地何以故取陰生苦名生取陰變異苦名  
老取陰逼惱苦名病取陰破壞苦名死取陰  
非愛聚苦名怨憎會取陰親離散苦名愛別  
離取陰所須不遂名求不得略義云何答有  
三種一多二異三一處謂三世分散種類不  
同攝在一處故名為略復次略有二種一義

略以一義攝多義譬如真實二名句偈略能攝略義如真實器如是苦有多義多名但以一義一名攝之皆盡說名為略問諸陰何相陰義云何諸陰同一行相云何不立一陰陰及取陰二種云何答如是等問五陰論思擇品中已廣分別問云何說取陰名苦不直名陰苦答欲分別諦有四相故說取陰為苦若直說陰是苦則二諦不成何以故明陰戒定等五陰皆成苦諦故問取陰何義答愛欲是取義此陰能生取為取所生與取相應取所

隨逐能有取故故名取陰問隨觀一苦則通達苦諦何用廣分別諸苦相耶答行人須廣觀眾苦生厭離心生厭離心已能觀通苦得入正觀為此用故應須廣說復次為分別生老等苦生思擇智得此智已觀苦一義決無分別智因此得生此智以平等為境不勞功用自然而流無有覺觀名第八智依法境生如寶象譬問如經中說名為樂是樂依止云何而說取陰為苦答如偈言  
執對治樂故 顛倒欲故樂 經說為苦故

正見故無樂

此義如五陰論廣說於輕品苦中及苦對治中起於樂想實唯是苦問此經中云何略說餘經廣辨色為苦答為多聞慧人是故略說取陰為苦若無聞慧則為廣說色取等為苦如是為見光未見光人故廣略說問云何說取陰為苦答苦盛逼故人處七寶樓種種嚴飾可愛五塵能悅其心生大歡樂小針所刺即生苦受忘失前樂如鹹酸味復次苦最多故謂老病死愛別離怨憎會求不得憂悲

永樂北藏

四諦論

苦惱覓守失苦逼害苦等取陰中最多樂少虛妄如壞井水問略說八苦其義云何答眾苦依止故生名苦能令變壞故老名苦能逼困身故病名苦能滅諸根故死名苦非愛共聚故怨憎會名苦可愛相違故愛別名苦希望不遂故求不得名苦是眾苦相故取陰名苦譬如射棚復次有者是真實苦有即是生卷八生是何法謂名及色色為老病死所害名為別離怨憎會求不得苦所害取陰為眾苦所十一害復次老病死名為身苦以無分別故愛別

第一〇六册

離等三名爲心苦由分別起故生及取陰是身心二苦復次由生說行苦由死說壞苦所餘五句說名苦苦此三苦以取陰爲由復次取陰有起名生六道出現故身變熟名老以萎悴故身界不平等及憎長名病令相違故命終陰壞名死離本道故非愛受因共聚怨憎會乖意相應故愛受因相遠名愛別離與愛不共故所欲不遂名求不得如願不成故爲一切苦種本由故取陰名苦諸苦自生無功用故婆藪跋摩法師分別苦諦品究竟

思量集諦品第四

說苦諦已云何次第說於集諦集者何義云何自問及答是渴愛何者渴愛何相何事何緣是渴愛是言勝義云何渴愛即集此言自足說渴愛已何用復說能感後有能感後有其義云何能感後有決定喜欲相隨處處愛著云何作多種說喜欲何義隨義云何處處愛著重言云何有諸別惑能作集相云何但說渴愛爲集何因獨說渴愛爲集不說諸業若貪愛等亦是業煩惱集云何但說苦集耶

無明緣觀味緣三受緣等愛其異云何已說  
四大觸名色各為諸陰因復說渴愛為因此  
二說云何不<sub>送八</sub>相違渴愛無明我慢業食皆為  
苦因此等異相云何喜欲欲等其義云何藤  
林等是貪別名其義云何

汝問說苦諦已云何次第說集者答已<sub>十二</sub>決心  
信果未識信因令識信因故次說集為顯苦  
諦隨屬因緣復次為受化者迷十二緣生故  
說苦諦依因緣生復次苦諦猶如機關隨屬  
因緣故自性羸弱及無我相復次世間貪愛

堅鎖之所繫縛不能出離生死牢獄故顯所  
縛能縛復次有諸眾生作如是計此苦諦者  
無有始終難可除滅由此執故不修正勤是  
故佛說苦雖無始由因緣生故可除滅譬如  
種子故應修正勤汝問集何義者答平等聚  
生是名為集離此三義則不成因復次令起  
有本泉源能成能現遮因緣是名集義汝問  
云何自問及答者答有諸弟子不懈怖畏定  
心護此三事故佛自問答者為破難邪因顯  
立正因有諸異執謂梵王自在及天人時性

四大空隣虛等以為正因為破邪執欲顯正  
因故佛自問答復次於十二緣生等諸經已  
說多種集有諸弟子未知此經定以何法為  
苦集故佛自問答為欲令得決定智力復次  
為覆智受化不通達略教中義為令開覺故  
佛自答復次為勝智受化覺觀多故不執持  
令智堅固故佛自問答復次為智受化令  
得決定智力故佛自問答復次為分別智弟  
子令得了別猶如然燈故佛自問答汝問是  
渴愛何苦渴愛何相何事何緣者答是諸眾

生恒觀有為法功德依有用資糧心無厭足  
故名渴愛如飲鹹水如人盛夏晝日光照熱  
渴所逼周徧覓水來飲鹹海鹹海有竭此渴  
無盡如是世間凡夫常為生死資糧愛欲焦  
然其心邪妄分別令生熱渴一向專求五欲  
快樂眼耳身識及心憶持所受用物已得未  
得永無厭足故說此法名為渴愛復次不知  
厭足名為渴愛如火草薪華果酥蠟等是所  
燒然於取類中無有厭足世間凡夫貪愛然  
心於人天中上妙五塵念念受用不知厭足



如頂生王復次渴愛類見性別異故各為二  
種類異者於取陰中起我執我愛是名緣內  
類貪於非取類中起我所執是資糧愛名緣  
外類貪見異者依因有見願有勝生是名有  
愛依無有見願樂我斷名無有愛性異者貪  
愛倒起覆藏為事猶如雲網故名上心貪愛  
為隨眠隨逐為事猶如鼠毒名離心愛復次  
渴愛因依緣業別異故各為三種因異者願  
樂未曾得塵是愛名求覓苦因於已得塵心  
生貪著是愛名守護苦因於已失塵心生懊

惱此愛名憂悲內熱苦因依異者謂眾生處  
所受具眾生者樂得未來陰求欲生故名依  
眾生愛處所者樂三有道常求此處名依處  
所愛樂好聲觸色味香等塵境界求欲受用  
名依受具愛緣異者謂貪愛能作煩惱業苦  
緣及緣此三起業異者謂平等不平等相續  
渴愛平等愛者依道理求覓受用名平等愛  
翻此名不平等愛相續愛者隨眠貪愛無始  
相逐名相續愛復次渴愛取道對治資糧別  
異故各為四種取異者於欲界中欲喜迷悶

渴愛貪著名為欲取於我言見戒等中渴愛  
著亦爾道對治異者謂四聖性所對治故資  
糧異者謂飲食衣服卧具醫藥復次渴愛依  
三受別異故為五種於樂受中生二種愛謂  
聚集愛及不相離愛於苦受中亦生二種謂  
不聚會愛及相離愛於捨受中起無明愛復  
次渴愛以事異故離為五種謂未得求待以  
願為事二生願樂已求覓為事三求覓得已  
增長為事四增長已守護為事五既守護已  
後時失壞憂悲為事復次渴愛依五陰故五

依六根故六依六根各有三受故成十八復  
次依結及離結故三十六如是等是貪愛樹  
隨眠為根我愛資糧受為身榦三界貪愛為  
其高大六愛聚為枝愛行為茂葉八百愛為  
華生等為惡果如此渴愛為苦集通八因為苦生  
因名為渴愛此中應知渴愛相者心喜為相十五  
事者無厭足等十一種為事緣者觀有為功  
德為緣汝問是渴愛是言勝義云何渴愛即  
集此言自足者答渴愛多種若能感後生乃  
是定集餘則不取若不爾者聞正法等亦應

爲集復次是渴愛能感未來有若不能感則非所取復次是渴愛若與喜欲相隨則名爲集若不爾者則非所取復次爲欲簡除似集諦法故言是渴愛復次是守爲顯證量如現世苦因渴愛生證量所得當知去苦生不離渴愛如郁伽長者經說汝問說渴愛已何用復說能感後有者答渴愛者此言未了故說能感後有顯定渴愛若但說渴愛是集則阿羅漢渴愛水等亦應是集若有渴愛能爲滅渴愛依止亦應成集汝問能感後有其義云

何者答能令識等陰著後有故何以故我及我所是所執處如是渴愛能令識等執著此處如塵著濕衣種子著濕田復次能生未來有故如母生子復次能爲未來生食故如識食觸食復次能引能愛故說能感後有又有往昔耆舊諸師釋佛說渴愛有四因緣能感後有一能使相緣如經言隨眠貪愛未被拔除是苦恒生恒續猶如龍池二能攝諸道故如經言比丘若於色等境界起貪欲愛著是識隨依色住受想行亦如是三能結能續

如經言能結能縫不捨境故今未來世三有  
得生四能令受生如經於此四食處若有愛  
欲名色即生汝問能感後有決定喜欲相隨  
處處愛著云何作多種說者答此三句皆是  
渴愛別名譬如人手名為顛悉多亦名柯羅  
亦名波泥復次果伴境界別異是故多說能  
施未來果故說施未來果故說能感後有喜  
欲為伴故說喜欲相隨取種種境故說處處  
愛著復次有法但感後有不與喜欲相隨如  
隨眠貪愛有法但與喜欲相隨不能生有如

不隨界貪故應具說多名汝問喜欲何義者  
答喜者於有資糧中心生安樂說名為喜樂  
此中生欲名為喜欲譬如色欲復次喜種類  
欲名為喜欲譬如寶餅復次是樂有染名喜  
心著名欲合此二種故名喜欲譬如名色復  
次喜欲更互相生故名喜欲如菴羅子等汝  
問相隨義云何者答共義名隨此隨眠與上  
心為伴能生後有復次外愛共行故說內愛  
與喜相隨譬如愛取復次隨者得地為義復  
次分別部說相隨有四種一境界相隨二相

應相隨三間雜相隨四緣起相隨境界相隨者如經說若人起覺觀分別與色相隨相應相隨者如經言此心與慈相隨間雜相隨者如經言是人修習信根與慈相隨復次有經說染著憎恚相隨思惟相隨緣起相隨者如經言修習正見與無放逸相隨此論所明喜通入欲即是間雜相隨汝問處處愛著重言云何者答於三有中愛著種種諸界於諸界中愛著種種生處於諸生處愛著種種衆生聚於衆生聚中愛著種種諸根於諸根中愛著種

種諸塵於諸塵中愛著種種諸業復次心猴行境不定恒樂取塵隨逐渴愛種種諸有及有資糧由隨攝捨處處愛著復次觀著求處行不定故如偷稻牛復次棄取餘塵亦不離欲譬如五囚人母故說處處愛著汝問有諸別惑能作集相云何但說渴愛為集者答為最勝故若渴愛王所至之處一切惑衆皆同聚集復次由渴愛攝故若渴愛不令餘惑噉味餘惑則滅若諸惑不起貪愛亦不起何以故無分別依故復次設無餘惑但有貪愛生

死亦起如手搏濕沙復次難分別故由此渴  
愛亦入善法但觀口欲如內怨家復次至門  
不入故如阿那含至涅槃門由貪愛故不能  
得入成上流人間無明亦勝何故不立答不  
然無明盲人由渴愛故墮陰坑苦譬如盲象  
求欲後生故受來報不由無明譬如生盲人  
諸明以是義故說渴愛為集汝問何因獨  
說渴愛為集不說諸業者答煩惱勝故何以  
故貪愛等是實生因業不如此云何知耶業  
雖具在為貪愛盡故諸阿羅漢無復後生前

來已說有真似集貪愛等能為有因故是實  
集諦業為引有因故說為相似集復次貪等  
由道所滅業則不爾何以故諸佛等究竟修  
道已猶聞有殘業在復次業不墮界故不名  
真集汝問若貪愛等亦是業煩惱集云何說  
但為苦集者答有如是義此中為立四諦故  
諦為苦集何以故於聖諦中簡擇真實因故  
說渴愛等為苦諦集復次有及生陰渴愛為  
集是渴愛於現世中與生等諸緣共作煩惱  
業集不如渴愛獨為苦集故但說渴愛為苦

諦集復次定以隨眠渴愛為苦諦集為顯此  
義佛說偈言

如樹根未拔 雖斷猶更生 隨眠愛未除  
苦體恒相續

約緣內渴愛說緣愛起取約緣外渴愛說緣  
取起求覓業汝問無明緣觀味緣三受緣業  
愛其異云何者答經說無明為愛緣此愛為  
煩惱緣起緣說觀味見境起常邪等見因此  
起愛是愛為業緣起經說由貪愛故得三種  
受是愛為受緣起復次一切煩惱無明為緣

此貪愛緣無明起故說緣無明愛一切諸見  
為諸業緣緣此諸見起貪愛此愛名業緣愛  
一切諸苦三愛為體緣此起愛名苦緣愛復  
次不信了為因名緣無明愛觀有為法樂常  
等味邪智為因名緣觀味愛餘類為因名緣  
受愛此愛為緣起及果有三由境界有六汝  
問已說四大觸名色各為諸陰因復說渴愛  
為因此二說云何不相違者答為顯有因故  
說渴愛有已為顯等分因故說四大為顯種  
種因故說於觸為觸不一故受有三為堅信

因故說名色如大緣生緣說阿難若識不託母胎是迦羅邏得結實不不得世尊阿難若無迦羅邏是識能託胎不能世尊由此二法更互相持故得堅住復次無始時因名得愛一期因謂四大剎那因謂觸及名色具二因謂宿世因及現功用因復次五陰宿世因謂渴愛於受生中四大為初因如迦羅邏為顛浮陀等因俱起因名觸先時及俱起因名為色汝問渴愛無明我慢業食皆為苦因此等異相云何答渴愛為無別異因業為別異

因食為引持苦因無明及我慢為一切因復次渴愛能為有因業為道因食為平等因無明及我慢為更互因復次渴愛為苦真正因是苦根本故所餘因為資糧集助貪愛故汝問喜欲欲等其義云何答塵已到故心生歡喜由喜生愛故名喜欲求未得塵名欲因此生愛名為欲欲汝問藤林等是貪別名其義云何答欲塵為境界能染於心故說欲染貪著四定及果是名色欲貪著三摩跋提及果是名有欲能障涅槃行說名為刺能燒熱心



說名欲火能垢汙心說名欲塵能令心濁說  
名欲垢能纏繞心說名欲辯無思計故說名  
欲縛令癡迷故說名欲悶心沉名欲著隨有  
行故說名隨流常希望故說名無厭得無飽  
足故說名為貪障出離故說名為蓋能覆藏  
故說名煩惱令不離有故說為結不正思惟  
所觸惱故說名為錐能縈束刺故說名為藤  
向上轉增故說名大欲周普界道叢根塵勝  
樂等故說名為徧著種種塵起種種著說名  
愛著於生死資糧未得及得心生歡喜說名

喜欲無厭積聚欲塵利養名為渴愛如是方  
便輪迴送引不離生死說名欲將遊煩惱水  
結愛行繩說名欲網從上下流入生死海說  
名愛河譬如變異渴病所逼入塵海由此無  
有飽足故名渴如海吞流如火燒薪等此惑  
無滿說名無休能結死生前後無間故名為  
縫此渴愛在能令生死相續不斷或由自由  
他能受六道生死故於餘惑中說名為集具  
如大有品中廣說此名解貪愛有十一種應  
知一名二義三體四用五因六對治七淨八

不淨九生次第第十立難十一救義若行人識  
此起觀自行教他不迷道理故說此義思量  
集諦品究竟

四諦論卷第二

四諦論卷第三

連个

开一

婆 藪 跋 摩 造

陳 三 藏 真 諦 譯

分別滅諦品第五

經說苦滅云何此言何所因起何法為滅何

相何事何緣滅名何義無餘滅離滅捨斷棄  
此七義何異云何盡無餘名為滅諦不說念  
念滅等若渴愛滅名為滅諦無餘涅槃則非  
滅諦渴愛盡者應名集滅云何說苦滅若由  
渴愛盡故苦滅者無渴愛人即應無苦現見  
有苦此理云何十結惑中但說渴愛滅為滅  
諦安立四果云何得成十二緣生中說滅有  
十二種云何但說渴愛盡為滅持散偈曰  
何節及前義 七義與念滅 界地滅羅漢  
十結十二滅

汝問經說苦滅云何此言何所因起者答由是法生故是法有是法滅故是法無譬如燈復次已說苦諦渴愛為因今說由渴愛盡故顯苦滅譬如病緣滅故疾病不起復次是渴愛流徧滿三有無始時起欲對治有故故阿羅漢無渴愛滅為破外道如此邪執故說苦滅云何汝問何法為滅何相何事何緣者答滅有多種一中間滅二念念滅三相違滅四無生滅等中間滅者如施戒定三摩跋提能滅三有由此施等隨得免離所對治法謂貪

瞋等暫時不起名中間滅念念滅者一切有為隨剎那謝名念念滅相違滅者此有為法與相違因其性相乖相續滅故名相違滅此三名相似滅無生滅者有因滅盡故五陰應生不復得生此名真滅又餘師說因及有因渴愛後有不生名滅復次與渴共除煩惱愛業苦不生名滅復次是真實用經無所有離有離無是般涅槃名為滅諦如瞿曇傳說復次滅有二種一非擇滅二擇滅非擇滅者有為諸法自性破壞名非擇滅如空名墮擇滅

者由智火故惑薪燒是名擇滅如因火薪盡復次滅有三種一未有滅二伏離滅三永離滅若惑未生未得緣地名未有滅若惑已生已得緣地由世出世道現時不起名伏離滅若惑已伏離滅因滅無餘故未來決不生是名永離滅如經言未生欲欲未來永不復生亦知此滅又分別部說滅有三種一念念滅二相違滅三無餘滅譬如燈滅又餘師說滅有四種一自性滅二無生滅三中間滅四永離滅不由因滅名自性滅如偈言

諸行悉無常 生滅是其法 若有生還滅 此寂滅是樂  
 又經言若法有生是法必滅不由功用如物輕重自然浮沉名自性滅由因無故果不得生名無生滅如經言由無明滅故三行不起達八如七流中種芽田壞果則不生名無生滅由廿三定力者名中間滅如經言伏離上心惑名有時心解脫九種次第滅如難提柯比丘緣事為證名中間滅由八聖道滅名永離滅如經言若人修無常想能滅一切結及隨眠惑以

明生故無明永滅名永離滅猶如覆器及被  
然炬此論正辯永離滅何相何事何緣者無  
所有為滅相心不燒熱為事通達實際為緣  
大德說寂靜為相心安止為事極解脫知見  
為緣汝問滅名何義者答此滅名尼盧陀尼  
者訓無盧陀訓遮障渴愛等法能障此中永  
無故名尼盧陀相違法生起故渴愛流永不  
更生如熟燒坏赤色生故本青色相永不更  
生汝問無餘滅離滅捨斷棄此七義何異者  
答此皆是涅槃別名此七名依器故說如涅槃

槃有六十六別名復次止心及隨眠俱盡如  
樹拔根名無餘滅次第滅盡如芥柯喻故名  
為滅昔縛著處由道力故無有縛著如富貴  
人不著貧賤是名為離勝異昔退如聖人離  
惡盡故名為滅又如前義名尼盧陀是名為  
滅若法與惑相離譬如捨物是名為捨現世  
是與未來永不相續譬如內根是名為斷滅  
不更取如覆水器是名為棄復次一切渴愛  
品類淨盡故名無餘漸壞名滅由觀過去不  
起著心名為遠離行斷結盡緣起亦無故名

為滅解脫煩惱是名為捨緣智初惑永滅是  
名為斷先取我執今則置捨故名為棄汝問  
云何盡無餘名為滅諦不說念念滅等者答  
由無餘滅故未來苦不更生不由念念滅等  
故說無餘名為苦滅不說念念滅等若觀無  
餘滅寂靜等相能滅諸惑念念滅等則不如  
是復次隨屬道故勝餘法故真實善故不共  
得故煩惱不能壞故不違言故安心緣故故  
說無餘名為苦滅不說念念滅等汝問若渴  
愛滅名為滅諦無餘涅槃則非滅諦者答餘

論師說清淨梵行果故煩惱滅名為滅諦  
一切假名滅名無餘涅槃此論所說無餘涅  
槃界是真滅諦何以故為得此滅修淨梵行  
如富樓那七車譬經中說諸阿羅漢惑盡無  
餘而老病死寒熱飢渴害縛等苦猶尚未免  
是故無餘涅槃界是真滅諦此真滅諦由因  
盡故得故說渴愛滅是真滅諦優波及多道  
理足論說能令至無餘涅槃界故貪愛盡  
得名滅諦雖然有餘無餘二涅槃界皆名滅  
諦何以故因滅名為有餘果滅名為無餘由

因滅故故有因滅如燈盡故光盡是故二滅  
皆名滅諦汝問渴愛盡者應名集滅云何說  
苦滅者答苦火以渴愛為薪若無渴愛苦薪  
苦火即滅如薪盡火滅復次苦諦以愛食得  
住由愛食斷故苦諦即盡故說苦滅復次若  
舊師說不為離過去及現在苦於世尊所修  
淨梵行何以故過去自性已滅與現在決應  
相離未來有苦為令不生於世尊所修淨梵  
行是苦不生由渴愛盡故約後際苦盡說愛  
斷苦滅汝問若由渴愛盡故苦滅者無渴愛

人則應無苦現見有苦此理云何者答憂悔  
熱苦寂靜故如手長者經說復次永離心病  
故如已拔心刺復次求欲苦斷故如富足六  
塵由渴愛滅故諸阿羅漢永離心苦故不違  
理復次非過去未來現在苦名為苦諦亦非  
聖道所破何以故過去已盡未來未有與現  
世決定應相離故但由通達實際故渴愛滅  
盡由離渴愛故為後際苦不生修八聖道以  
是義故說阿羅漢無苦如渴病譬汝問十結  
惑中但說渴愛滅為滅諦安立四果云何得

成者答貪愛有四種須陀洹果道等所破由  
 此滅故餘結共起一時俱盡說名滅諦是故  
 安立四果於理不失復次同一相一味故若  
 說渴愛盡則說一切結盡如說八聖道即說  
 一切道品以同相故共成一事故復次有諸  
 餘惑亦能立集諦相而渴愛正能續未來生  
 能今後有以是義故獨說渴愛名為集諦如  
 是一切惑盡皆入滅諦相但有因滅盡是渴  
 愛滅名為滅諦汝問十二緣生中說滅有十  
 二種云何但說渴愛盡為滅者答如前問此

難自遣復次如道斷愛盡欲滅涅槃此五名  
 義一但更互相續是故由說渴愛盡故即說  
 十二道斷復次渴愛盡為通滅十二道等滅  
 名為別滅問涅槃別名有六十六句其義云  
 何答無為等一切句相貌讚歎因立對治違  
 反等應廣解釋何因如此是涅槃無生無長  
 無滅非因緣所作違反有為故說無為其一高  
 出三界離於偏低無與等者故說無下其二永  
 離諸流諸流不生非流跡處故說無流其三非  
 虛妄非顛倒非相違故說真諦其四不疑諸界



毒蛇怖畏窮三有際捨功用處度生死海故  
 說彼岸五其極智所了故說聽細六其如優曇花  
 世間希遇故說難見七其不老不破故說無壞  
八其無動本有故說恒在無爭九其對治除法體  
 不虧故說無失十其過眼境界無法與等故說  
 無譬十一其無有貪愛諸見慢執故無戲論十二其  
二惑火滅盡故說寂靜三過死王界故說甘  
 露四是極美味寂靜可愛故說極妙五寂靜  
 無苦故說為止六真實善法故說為安七無  
 燒熱渴故說愛盡八生他歎訝故說希有九

於生死中未至此德說未曾得十一老等諸橫  
 所不能害故說無枉二十內無所少外無惡  
 障故說無灾二十無後有生苦究竟安樂故  
 說涅槃三十異有無相故說難思四十與離  
 生過失樂相應故說不生五十四魔不至故  
 說不生六十四魔不至故說無跡七十不由  
 因成故說非作八十非悲行處故說無憂九十  
九一得不退故說名住十無法能似故說無  
 等三十永離取欲故說無求三十無前後際  
 故說無邊三十難可通達故說微細四十無

有可逼故說無損五十無惑染著故說離欲  
三十無諸過失故說名淨七十結縛皆斷故  
說解脫八十離依止故故說非住九十無有  
二法故說非對十四無等等故故說為等四十  
諸入沒處故說無害二十外人不得故說甚  
深三十離佛正教不可了知故說難解四十  
觀此功德令到彼岸故說能度五十上法之  
定上故說無上六十攢搜法海所獲真實上  
人所得故說為勝七十萬行所得最無上價  
故說聖果八十離恐怖因故說無畏九十聖

愛堅固故說不捨十五凡聖等有故說徧滿十五  
一功德難稱故說無量二十不屬六道故說  
無數三十體極貞固故說不破四十諸法無  
首故說為尊五十最淨可稱故說應讚六十  
衆聖所栖故說為舍七十能救衆苦故說歸  
依八十戰鬪寂靜故說無諍九十本有非作  
故說無假十離欲瞋癡故說無垢六十除無  
明闇故說為燈六十諸受寂靜故說為樂六十  
三免色等墜故說無墮四十四流不沒故說  
為洲六十散心不證故說不動六十遣蕩十

相說無所有七十無所依故說名無著經部  
問曰何法名思擇滅答結離名思擇滅問結  
離何法答是思擇滅若爾此二互相釋終不  
能顯二法體相是故應別方便說其體相聖  
人無分別證智所知是其體相如是可說為  
善異於餘物或說名結離八或說思擇滅諸經  
師說一切無為非是物有何以故不如色受  
有於別物何者唯以無觸名為虛空如經言  
闇中無礙無覆名為虛空由般若力與現在  
隨眠惑體性相違餘後不生名思擇滅離此

思擇因緣不具餘不得生是名非思擇滅譬  
如一期中間橫死殘果不續異部師說隨眠  
煩惱後不得生是思擇力故名思擇滅由緣  
不具後苦不生是中思擇無力故說非思擇  
滅論曰是義不然若離思擇此滅不成故知  
屬思擇滅又諸部說若法已生生後自滅自  
性滅故名非思擇滅若如此執非思擇滅應  
是無常何以故法未壞時未有滅故難曰若  
爾思擇滅亦應無常何以故思擇在先後得  
滅故答此滅不以思擇為先何以故未生法

不生。在思擇後無此義。故所以者何。未思擇時。未生不生。法本來已有。是法應生。思擇正起後。不得生。由思擇力。此惑昔來未有。生障今斷。其生思擇力外。曰。若定以不生為涅槃者。云何通釋。國譬經云。修數習多行信等逸八五根能滅過去現在未來苦滅者。名涅槃。不生唯屬未來。非現在過去。答有如此經義。不如文。何以故。能緣三世苦惑滅。故說苦滅。如餘經說。汝等應捨是色愛欲。由愛欲滅。汝等色陰則滅。離乃至識陰亦爾。以此義故。滅三

世苦。其義應爾。外曰。若說苦滅。其義可然。又國譬經云。修習五根能滅過去現在未來世惑。云何不違此經。答如前解釋。又有別解。過去惑者。宿世所攝。現世惑者。今生所攝。此二世惑於相續中。已成種子。能生未來惑芽。由此種子滅。故說三世惑滅。如果報盡。說業因盡。是未來苦及惑。由種子無故。永不更生。是故經中說。三世惑滅。若不如此。過去現在有何所滅。何以故。於已滅法。及向滅法。功用何施。外曰。上勝經說。一切有為無為法中。是

離欲法因是不有云何不有勝餘不有答我不說無為定是不有如我前說如是故有如世人言聲有先無聲有後無不由此有言使無物成有當知無為其義亦爾雖同是無而有無可讚勝於餘無如一切灾橫畢竟不生此無為勝最可讚歎為變化者起願求心故佛讚歎外曰若無為唯是無法是滅則成聖諦何以故無所有故答若爾諦是何義外曰無顛倒是諦義答是二法聖人觀皆無顛倒苦如相苦相無如無相以是義故何率聖諦

外曰云何無物為第二諦答立為聖諦已如前說依第二後次說故為第三外曰若無為唯是無法智勝虛空及與涅槃則無境界答我不說一切智以有法為境若緣有為非去來世則有物為境若緣餘法則無法為境外三十一曰若汝許無為有物何所有答若我許無為有物何所有外曰若汝許者我義被守答諸天應守若許可守汝許不實何以故是無為法不如色受其性可證不如眼等其事可見是物是滅云何可別是無為與有為事不相

關何以故互非因果故但違反渴愛是其道理如說是惑本無名因無為外曰若立無為是有由此惑至得斷故可說此滅是此惑滅若說無為是無法者此無為何因能決至得經言是比丘已至得現法涅槃若涅槃是無何可至得答由對治起得相續與惑後生畢竟相違故說至得現法涅槃又諸阿含說唯以無法是名涅槃經言是苦滅無餘捨窮盡及離欲苦不來續不生是靜是妙何者捨一切取并渴愛盡及般涅槃外曰何故不許於

中餘物不生說此不生名為涅槃答我見此執無有勝能汝謂於中餘物不生者為是有故餘物不生為由得故餘物不生若是有故餘物不生涅槃恒有三有應永不生若由得故餘物不生諸阿羅漢得證此時陰即應滅世入若如汝執有此過失故知但無所有世一名為涅槃如偈說譬是正道理偈言譬如燈光滅心解脫亦爾如燈光滅非是有物佛心解脫亦復如是分別滅諦品竟

四諦論卷第三

音釋

也切 瞬 目翰閉切  
 也 翊 動也薄弘切  
 射 射 薄弘切  
 也 鍼 與諸深同切  
 顛 顛 顛之膳切  
 掉 掉 徒四支切

永樂北藏

四諦論

第一〇六册

永樂北藏

四諦論

第一〇六册



四諦論卷第四

逸九

婆 藪 跋 摩 造

陳 三 藏 真 諦 譯

分別道諦品第六

經說道諦云何此言何所因起若道能滅渴

逸九

愛則不應說行至苦盡若不爾者是言相違  
若俱滅集苦云何經中不具足說若道能盡  
苦修道辦入應無品苦若不爾者則不應言  
行至苦盡若有為法於無為中無有行至云  
何說言行至苦盡正行義言正行者八聖道

是決言何用聖名何義云何但說道名為聖  
不說餘助道若道異分應說其相若言道唯  
是分則具分與分無有差別道名何義云何  
此經說於具分餘經不具若道是有為云何  
佛說本昔已有若是無為云何說言有為若  
道是一一人修時餘人應得譬如衣等若不  
爾者則不應說由此一道若諸聖人同得一  
道云何智慧不同若智慧不同云何解脫平  
等若道非心無情等物亦應有道若心非心  
法修則不具若是心法諸相違法云何一心

並有若道至除惑則相違法一心並有若不  
至者於他相續云何不除若分俱起則有多  
作意若次第起則但有一分云何止立八分  
不增不減云何不取欲等餘法云何一法作  
三種說中道能滅福惡行至盡苦云何說正  
見為初云何說先行正見有何義見者既無  
孰為能見正見與十善正見兩異云何若由  
正見一時見諦應有多境若不爾者非念念  
滅若正見已了諸諦餘分何用正覺何義云  
何三法成一若依二定證得流盡正覺不具

道分有關此義應救正言何義若有證言道  
修無定何以故佛說定以聲為刺若無不成  
道分正業何義一切分皆是正業云何說一  
名為正業若離名正業離則非作云何成業  
離過打業云何不說名為道分正業正命與  
十善正業正命兩異云何正命何義正命若  
身口業攝云何別立何者正精進何相何用  
何緣何義若但滅惡是善則無二精進若非  
善者滅諦則非善若一心修正勤即具足者  
則無四正勤若次第修者則助道修不成何

者正念何相何用何緣何義諸有爲法刹那  
不住云何成念何以故他見他憶無此義故  
若一切諸法皆是念處念根即是念處則義  
不相應若念獨自不能守一法者云何經說  
有念一守云何有時能憶有時不憶何者三  
摩提何相何用何緣何義正定若是定須陀  
洹人應無欲瞋若不爾者則違道理  
汝問經說道諦云何此言何所因起者答此  
問不爲開智人說何以故由聞其名已了義  
故從大悲所起辨涅槃道顯隱覆義欲廣設

言證爲分別智弟子故佛自問何以故由先  
問後解多有利益廣辨緣起已如前說復次  
受化弟子問諸外道聞種種道未能決了是  
道邪正爲除疑倒無明等心故佛自問自答  
何者爲道是八聖道如疑路三導之善道汝  
問若道能滅渴愛則不應說行至苦盡若不  
爾者是言相違者答聖人從初發心是修行  
用欲除滅苦爲此起道故說行至苦盡是苦  
盡由因滅得成是故除因譬如師子復次諸  
佛觀一切衆生墮於苦難發心修道爲除他

苦是修行用如國譬經說又餘經說苦盡是  
出家修梵行用如七車譬經又如來出世爲  
三事故令他苦盡是最第一故言行至苦盡  
復次一切有爲無常故苦離有爲法故說苦  
盡如筏喻經說法尚應捨何況非法復次由  
八聖道能除取陰是故通說二滅言不相違  
汝問若俱滅集苦云何經中不具足說者答  
是渴愛滅由苦盡得顯復次因盡非是正用  
以苦盡爲正復次聖道能滅有爲及與取陰  
故說苦盡通渴愛滅汝問若道能盡苦修道

辦人應無品苦若不爾者則不應言行至苦  
盡者答依因緣盡故說苦盡如說火盡名爲  
炭盡亦如根滅說爲樹滅復次聖道能滅邪  
分別苦而不除宿業報苦及界地反苦譬如  
氣噓旃陀羅及優波斯那等復次聖道於有  
餘涅槃能滅心苦於無餘涅槃能滅身苦復  
次聖道能滅後有陰苦但宿行所作隨逐未  
滅如輪及箭汝問若有爲法於無爲中無有  
行至云何說言行至苦盡者答涅槃無行道  
亦無行雖俱不行由歸向涅槃令得涅槃故

說行至苦盡譬如國路復次是方便言如說諸流行沒水滴行盡流及水滴於盡中無行而世說有行行至苦盡亦復如是汝問正行何義答由此了知實義故說正行又以進趣為行如說行一切處道又能住安隱處故說為正行復次正是不背義行是歸向義由此不肯歸向涅槃故名正行汝問正行者是入聖道是決言何用者答為反餘道為成一切處行道為顯不往餘處復次能窮一切道苦能遮一切煩惱業報燒熱能除自他惡罵

重罰惡道死等怖畏能除積骨如毗富羅山能乾乳血淚以此功用故說決言汝問聖名何義者答由體無流一味解脫衆生依此相續得名聖人譬如善法如經中說是聖正見復次聖人所行故名為聖譬如王路復次聖人所說故名為聖譬如師路復次聖衆所事故名為聖譬如牛路復次今至極聖故名為聖譬如國路如經說聖正解脫汝問云何但道名為聖不說餘助道者答同一相故皆名為聖譬如火性復次同一解脫味故譬如海

水同一鹹味復次八道最爲上首能攝餘助道如象跡譬經說汝問若道異分應說其相若言道唯是分則具分與分無有差別者答是具分與分差別之相亦可見可說譬如五分三昧亦如五分比丘住五分處道亦如是與分有異是分平等說名爲道何以故是八種分若至平等位能除煩惱若沉若起則不除惑猶如調絃復次是分因滿說名爲道能辦事故譬之如車雖然若真實義分中說具分譬如五分音樂及五分定道亦如是唯分

爲道今論所說唯分是道六義證成一說道經言五根是道行至涅槃此五根即是道分故知唯分爲道二爲經言三身攝道三身唯分三由滅經言正見行於滅離道無滅四由除經言若修習正見能除欲等若離於道則不能除五由出離經言正見等諸分能出離此若非道不能出離六由清淨道經言般若

是道爲得清淨般若即正見故知分是道汝問道名何義答道以求覓爲義何以故由此能得真實義故亦以行爲義故亦以行爲道

義如世間言此道行向舍衛國等道亦如是歸向涅槃復次真實義門方便行生理如此等皆是道義汝問云何此經說於具分餘經不具者答法藏論說假名有二種一自在假名二依他假名說自體諸分名是自在假名如正見等道分依他假者如念等門及餘助道分何以故此道品修非是散修復次為勝逼故念處等中隨一法勝逼故念處等中隨一法勝餘同一名譬如鹹酸等味有諸餘味隨勝得名又如諸界隨一勝故餘隨得名復

次於欲界中說道具分色無色界或五或四為滅自體四對治故餘或增減隨界地故此義故有具不具汝問若道是有為云何佛說是古昔道若是無為云何復說是有為法者答由此古言<sup>卷九</sup>道是有為何以故有為之法有新有故譬如穀等若是無為不應此言譬如虛空及以涅槃如說身是昔業而非無為如說聖種及法諸師是故由此古言道非無為今論所辨道是有為何以知之由廣分別故如諦相應經及答達磨塵那問由有為相

故如經言依正思惟若道未生得生已生得增長有生長故知是有爲由捨除故又如經言法尚應捨何況非法滅是無爲則不可捨緣內起故如經言是道依內起此歸依難得若是無爲不依內起由業名故如經言是道非黑白業能滅諸業若是業者非無爲法由有食故如經言七善提分以食爲因若無爲者不須食因此義故道是有爲汝問若道是一一人修時餘人應得譬如衣等若不爾者則不應說由此一道者答多道非一何以

故果不同故由道異故故果有異如路異故行異復次體異故道異謂見道修道等亦如四苦樂遲速復次根異故道異謂九學九無學辟支佛佛由根差別是故有異依種性故說由一道如世說一穀如經言三世諸佛若觀若說是此四諦而苦等三諦體實不常由一道言亦復如是汝問若諸聖人同得一道云何智慧不同若智慧不同云何解脫平等者答觀一切一切種境界得成正覺是故佛道不同二乘如經言若人當知一切一切種



境界當知是人名爲世尊通達平等道故唯  
滅本惑三乘人等如經言解脫五陰與解脫  
無異如多種火各燒然薪灰盡不異由火不  
同熱觸光明威德有異如是智慧差別所滅  
惑除解脫是同故佛定智威德及思由道差  
別難可思量如大輪經說汝問若道非心法  
無情等物亦應有道若心非心法修則不具  
若是心法諸相違法云何一心並有者答心  
是生死分是世間法道是出世法兩不相應  
如法非法故說道非心法依境名心求能名

道兩若一體則自性自知爲免此失故說道  
非心法譬如壽命及無想無心等定雖非心  
法而譬等中無道亦如是道雖有心非心處  
位達皆有故無不具修復次修有三種謂守  
習研故無不具然道亦可說是心法何以故  
與正思惟同生滅故譬如一心如經言以心  
作增上故得一心是名心定即是道分同一  
出離同成一事故共一心而不相違汝問若  
道至除惑則相違法一心並有若不至者於  
他相續云何不除者答道不至惑而能除惑

如道不至破戒能除自破戒不除他破戒除  
惑亦爾於自他相續雖俱不至但除自惑不  
能除他惑分別部說非至非不至此時除惑  
以不生為滅故譬如治病若受已至醫不能  
治何以故不可轉苦為樂故苦受未至醫亦  
不治何以故無所有故若爾為何所治但作  
違緣令未生苦永不得起道能除惑亦復如  
是汝問若分俱起則有多作意若次第起則  
但有一分者答由成一事故得俱起非緣別  
境故無多意相雜俱起由功能故差別可見

譬如欲等汝問云何止立八分不增不減者  
答此問不窮是故置答復次對治八邪分故  
說八分  
復次為攝三身復次為對治三刺三結三火  
三毒故說八分復次藏論中說能成八功德  
心故說八分由得正見故心清淨由得正覺  
故心解潔由得正言故心平坦由得正業故  
心無悔由得正命故心軟滑由得正精進故  
心隨教由得正念故心安住由得正定故心  
不動汝問云何不取欲等餘法者答但取勝

法或取強用或取能任重擔或俱攝盡正言  
正業正命是須陀洹分信為三攝故須陀洹  
具四智信欲即是信復次此信亦正見攝須  
陀洹人得智信故喜捨捨正定所攝是故八  
分攝諸分盡汝問云何一法作三種說或說  
中道能滅福惡行至盡苦者答由三勝事故  
譬如日能破闇名光能分別晝夜名日能分  
別剎那等故名時本聖道亦爾能離二邊故  
名中道能除黑白二業名滅福惡拔除身心  
苦故故說行至苦盡或除三世道故說行至

苦盡汝問云何說正見為初者答為上首故  
譬於王如經言一切有為法中般若最勝復  
次能作勝功德故若智慧勝諸德皆勝如舍  
利弗由正見故不觀他面如首羅長者由正  
見故其心難動如阿輸柯王由此正見他不  
能引如質多羅長者能拔除災橫本故如經  
言由明起故無明滅盡是故正見為初汝問  
云何說先行者答由得正見餘分得出世得  
無流得不共或說由正見力餘分得解脫道  
名如經言比丘之正見人身口意業為得可

愛勝美果故如經廣說故以正見為先行汝  
 問正見有何義者答謂不倒證照為見自所  
 依止真實種類無倒證照復次真如名正觀  
 名為見如實觀聖諦故名正見復次正者可  
 讚歎義見者光明義可讚光明故名正見如  
 經言諸光明中此光最勝所謂正見復次勝  
 德境智行是名正見行何以故是正定位說  
 名正見如種子譬經說復次理足論說由境  
 正故智正不由智正故境正有為有流相相  
 應故一切唯苦決定知此是名正見如佛為

大迦旃延說又藏論說對治無智疑智倒智  
 能度苦等真實此智名為正見汝問見者既  
 無孰為能見者答眾緣聚集共成此見無別  
 一物為其見者譬如華果又如偈說  
 有見無能見 何法為見者 從緣和合生  
 見色言是虛 是法集時見 合散無能見  
 但因緣所作 如戾人無著  
 法從緣生不可說屬一如佛為破求那說我  
 不說識為能識何以故此名具分假名所作  
 故汝問正見與十善正見兩異云何者答俗

智在十善真智在八正能感後生以苦為果  
觀業為境如此正見在十善法能滅三有涅  
槃為果緣諦為境如此正見在八聖道汝問  
若由正見一時見諦應有多境若不爾者非  
念念滅者答一時能成四事故說一時不為  
境異故理足論說修觀行人以聖智慧通達  
毛孔能斷諸惑又餘經說若通觀三受諸事  
已辦無更所作由通相法諦無我相是故一  
時通觀四諦如次第觀中緣無常苦無我一  
時通苦諦汝問若正見已了諸諦餘分何用

者答一切諸分能滅自對治各各有用如吐  
下方復次一切諸分於自事中各為上首共  
成一事譬如車分及車車分各有自事共成  
運載道分及道亦復如是汝問正覺何義者  
答未曾有計今日如生是名正覺復次是平  
等計由想行緣起故復次體相境界果共相  
扶合故名正覺復次如見隨擇不捨名為正  
覺如牛飼食汝問云何三法成一者答同一  
相故如餘道分復次善聽計平等故譬如定  
分復次緣涅槃為境如無相定故三成一汝

問若依二定證得流盡正覺不具道分有關此義應救者答若依二定修入正道但無初定覺觀分非無道分中覺譬如初定及三摩提無有覺觀復次由事成故說有正覺不由體在故如有覺五根復次能拔除對治故說有正覺譬如正言汝問正言何義者答永受誓不破名為正言如瞿師羅傳復次是言清淨由除願取垢滅故復次法然所得永善行是名正言正言戒有二種一不令知如經言是人離妄語等二令知如經言是人時語實

語等汝問若有語言道修無定何以故如佛說定以聲為刺若無不成道分者答道分故非刺譬如正覺喜覺分等復次聲刺不定如見女人經言數見女人為修梵行刺然非阿羅漢刺已除刺故又經言大象說在定行立等亦靜若觀行人正思說法心則有定不由有言故無定經部師說但離四言即是正言如世間說已離如正作如說此馬快行此人善讀汝問正業何義者答經說離身惡業名為正業又經說是身業不汙不流不斑自在

無取能生寂靜是名正業復次由觀過失遠  
離殺生不作不行遮止不樂是名正業汝問  
一切分皆是正業云何說一名為正業者答  
若離此名別名不顯如法界法入等非眼識  
等所緣故不令他知說名正業一切諸業所  
依止故譬如業基卷九汝問若說離作名為正業  
離則非作云何成業者答不作故起惡業作  
守護善應知是業如經言我說作我說不作  
復次能除黑白二業故說不作能作對治業  
故說名作復次正業亦名正業除由此名故

作不作義此名得成譬如由眼說見由眼亦  
說不見若不作云何知有此業答有多因緣  
此業可知由經言色有三種一有見有礙二  
無見有礙三無見無礙又說有無流色又說  
由七福德利故又說由教他亦有十業道又  
說比丘有法非十一入攝謂無見無礙不說  
無色復次若無此業八分聖道則不具足何  
以故正入觀時不行三業故難曰是義不然  
何以故在方便中已修三業故如經言是人  
如是見如是知是正見得修圓滿及正覺精

進正念正定先時正言正業正命先已清淨  
答依世間離欲道戒故說此言復次波羅提  
木义戒亦不應有何以故當受時有後在異  
心不應說名比丘比丘尼又經說此業名為  
堤塘能遮破戒故若無不能止惡經部師說  
此證殊多甚為希有義不如此何以故汝言  
由說三色故知有無作者是義不然諸觀行  
師目連阿尼樓駄等說有定境色由定力得  
此色非眼根境界故說無見不障處所故名  
無礙若汝言若爾云何名色者此與無作等

故還難汝義汝言由說無流色知有無作者  
是義不然此色亦是定力生由定無流故色  
亦無流又諸師解阿羅漢色亦是無流非流  
依止故難曰此義不然如經言何者有流法  
謂一切眼一切色等此色非流對治故說有  
流若爾此色或有流或無流答若爾何有難  
曰相相雜故答如有流相無流相不知有何  
相雜復次若色入一向有流云何經中偏簡  
擇說不通途說經曰有流色者謂有取心堅  
覆藏所依故名有流色汝言由七福德利故



知有無作者此義不然經部師說如汝受用  
施主施物由受者功德被利益故施主雖在  
異心由前施作意熏修相續次第轉勝由此  
勝故能生未來隨多少報依此相續說施主  
功德生長若汝言由他相續勝負及隨用故  
若在異心是相續轉勝云何得成者是義不  
然何以故與無作等故汝執無作由他相續  
勝負及隨用因他相續云何得成問不增長  
福德種類中無教云何恒生答由數習緣戒  
定作意故乃至眠中增長隨逐問若爾郁伽

長者經其義云何經言若比丘持戒行善受  
用施主衣食等已修無量心定身證此定入  
林中住由此受用施主福德善樂增流無量  
應當信知此中有何作意故知相續轉勝是  
正道理汝言若無作無教如人教他作業業  
道云何得成者經部師亦作此說此說由此教故  
他或離或受殺害等苦故能教者於微細相  
續善惡增勝由此轉勝能生未來隨多少報  
若人自作隨事成時相續轉勝名為業道是  
義應知果假因名故是身口事果假身口名

義亦如是如意身口無教有大德說依眾生  
取陰由三時作意作意得殺生罪謂當為我  
殺正殺殺已此解亦不殺雖有三意業道未  
必得成何以故未斷母等命根起三意人無  
逆罪故若人目害他命由此三意得罪可然  
難曰等不可見何故憎嫉誹謗無教而信受  
相續轉勝答無此憎嫉但由心運身業道事  
成若謂行者有別法異心我所不喜由心加  
行是事得成此事成故相續轉勝是義可喜  
何以故由心相續果得成故汝言法入佛不

說無色知有無教者此義已答如定境界色  
汝言若無此業八道不成故知有無教者此  
義應辨朋友汝應為說入諦觀人正言正業  
正命云何得有此人在觀為有言說作業求  
覓四事故有此三為當不爾答若不然何者  
正在觀時得此三種無教由此得故若出觀  
復不在邪言等中但在正言等是故因中假  
得果名故說無教名正言等論主答是中何  
不執如此若正在觀中離於無教得在如是  
意得如是依由得此故後出觀時不邪言等

中但住正言等是故因中假得果名故說相續轉勝名正言等以此義故道有八分又上座部說但不作惡名為三分何以故由聖道力法決定不作依止無流道故名無流未必一切處被數法皆真實有如八出法謂不得名無名譽毀樂若是中不得更無別法又餘師說波羅提木義戒是三道分依先方法作信受意由此作意能防身口遮所作惡說名波羅提木又戒若汝言人在異心則無守護者是義不然由數習故犯戒緣來作意即

至說此作意名為堤塘何以故由憶先誓善不作惡為有此用故須受戒復次若如汝立有別無教能遮破戒者則不應有失念犯戒不須廣辨若爾不爾決定應知八正道中戒有三分為道基故譬之如地以先行故譬如王能度生死棘刺稠林故譬足可愛香故如天檀葉清淨傳傳能到涅槃如七車譬又餘師說引經為證是道果故恭敬利養因緣故非守護對治故翻今知所得故知有此戒又餘師說云何無教是色而非身受答無教屬

身口業為色所攝身受者與心相應為名所攝復次無教是身業故屬身受是心法故屬心復次無教亦戒亦色色陰所攝身受心法受陰所攝今論所辨此法心業所作故由身口成就假得其名此法與受何異答受陰所攝此法通諸陰攝何以故依相續故汝問離卷九搥打等云何不說為道分者答有學聖人未十六寂靜故譬如制罪以不徧故如非梵行以不定故如布踈陀分為資糧故譬如施等今論所辨分明八戒此中說名三聖道分汝問正

業正命與十善正業正命有異云何者答可壞除不可壞除從出世正見起無流甘露為果從世正見起有流取陰為果能生福德是名業道能離福德名為道分汝問正命何義者答正命有二種一白衣離五種販賣二出家人出離五種邪命復次依理求覓受用衣食等四緣復次知足無失聖種所攝及守護身口復次先因智慧遠離身心邪見是名正命汝問正命若身口業攝云何別立者答通在二攝由義異故別立可知譬如諸陰通是

行攝由義異故別立四陰復次體有二故譬  
如身觀經言於身觀身住復次正命異前二  
分譬如惑數汝問何者正為精進者答行於  
處處隨地差別為得種種善法策起身心不  
捨荷負復次為滅惡法證於善法常行勇猛  
是名精進復次修行是處不倒身心勤力是  
名精進汝問何相何用何緣何義者答策起  
身心為相不退墮為用起精進類為緣藏論  
中說精進者勇猛為相不沉為用四正勤為  
緣勝利行為義若懈怠人行無勝利行

卷九

十七

復次難勝力故若人有精進於煩惱戰鬪有  
難勝力若懶墮人則無此事復次此行能散  
破除捨是精進義汝問若滅惡是善則無二  
精進若非害者滅諦則非善答滅惡者唯是  
無物善則不爾故精進有二復次滅惡名真  
實善所餘即三善何以故有四善故離破戒  
臭名為滅惡戒香發起名為生善譬如熱靜  
異於冷生汝問若一心修正勤即具足者則  
無四正勤若次第修者則助道修不具答一  
心得修四正勤譬如一心通觀四諦何以故

由此修故未生諸惡不得生已生諸惡不得住善法未生得生已生得堅住是故精進由體故一由用故四又分別部說若持戒觀行人為除定對治修四正勤已生之惡能障定由精進故滅未生破戒後不得生未生定得生已有淨戒得堅固住以是義故精進唯一事用有四復次有說四正勤次第起譬如得定何以故有正勤但能破上心惑有餘正勤能拔隨眠惑又有正勤能生未生根又有正勤能令已生堅固故道品修非是勤修有正

勤故汝問何者正念者答不忘先所知境是名正念猶熟取相如經言心覺心繫等是名為念汝問何相何用何緣何義者答境界後憶為相心境不離為用六念為緣自憶令憶名為念義譬如菩提自覺令覺復次藏論說心澄淨為相不忘失若夫還現復次能守境界是智依止故名為念復次念有四種一隨執名句味二能隨所執義三能隨所思義四能隨通達所思義今論所辨正明第四汝問諸有為法剎那不住念云何成何以故他見

他憶無此義故者答若知者異念則不成如張見王憶若智相續異念亦不成如見牛不憶馬等若智一念亦不成無後智故反此三義則名為念又釋若不相關則他見他不得憶如此人見彼人不憶若因緣相關則他見他得憶譬如童子少壯老弱智念得隨逐生復次譬如種子不相關故麥種不生穀芽若因果相關而有異者是穀類等種子芽莖枝節葉位得隨逐生若一念亦不成因果不立故如種子恒一芽則不生由相關不異不一

故念得成汝問若一切諸法皆是念處念根即是念處則義不相應答今論所辨念想即四念處但不以境界分別根故譬如智根智量復次念處有三種一自性念處但生憶念譬如王二雜念處若法能助於念亦名為念如王臣佐亦得王名三境界念處由念緣此起亦得名念如王在處是故念根即是念處義不相違汝問若念獨自不能守一法者云何經說有念一守者答念是守護中第一增上緣故說一守譬如王勝如經言一切諸法

念爲增上緣爲守護故復次一念能護一切行故說一守如經言是念行一切處復次一切念能守六根如當門人復次是念能錄一心如人手捻陰陽筒口復次能守一相續故名一守如護一子復次六根被繫於一念柱不散住自境如六衆生同繫一柱是故經言有念一守汝問云何有時能憶有時不憶者答有三因緣故能生念一數習由數習身口意如夢中見二相由順逆相憶似不似境三澄清由心澄清念即得起如淨器水得見面

像若反此三則不得憶又臨死及初生重苦所逼忘失本念故不憶宿命復次有六因緣能生於念如偈言

順逆及數習 一處共會聚 定力及因力  
此六爲念因

順者如見他似兒便憶自子逆者由觸熱故憶昔時冷數習者如所慣行事自然憶一處會聚者如人見菴羅樹憶其酸味定力者如得三明人憶宿往事因力者猶如聖人及大行善人憶過去生汝問何者三摩提答經說



心定住靜名三摩提又阿毗達磨藏說能攝  
法不散名三摩提復次是心相續煩惱惡風  
所不能動如密室燈復次三摩提有二種謂  
世間出世間世間者能生世間果報與覺分  
相離能伏上心惑出世間者能令變離世間  
與覺分相應能拔隨眠惑今論所辨是出世  
定汝問何相何用何緣何義者答心定住為  
相伏對治為用依心學為緣復次藏論說一  
心為相不散為用四定為緣安心令直為義  
如箭師調筈世間說為三摩提箭此言調直

箭如是調直心相續名三摩提如偈言  
心跳躑散動 難守亦難遮 智人使調直  
如箭師調筈

復次能安心平等譬如馭車取平坦路避嶮  
曲道觀行人亦如是能安置心於平等處門  
境相行能遮不平等惡故名三摩提復次五  
蓋病銷如人不病名三摩提汝問正定若是  
定須陀洹人應無欲瞋若不爾則違道理者  
答所對治定在由得果故驗其得定譬如五  
根復次專心向定故譬如蜂雖繫穢處心慕

蓮華故知恒在華處聖人亦爾雖處欲塵心  
樂寂靜故知恒在定復次如須陀洹人無明  
雖在而明不失復次如佛婆伽婆雖有覺觀  
不出散心恒在定故須陀洹人定亦爾故不  
違道理問聖道八分次第云何答由能依理  
觀聖諦故先立正見於所觀法執視不捨次  
立正覺從此立正言正業正命於所觀法  
為離為得次立精進於所離得永不忘失次  
立正念由念不失於所見境心不散動次立  
正定復次若八法俱起則無次第而次第說

不無道理若人欲起涅槃應先求正見如人  
欲行必須有眼如所見理執視簡擇次立正  
覺如所擇說次立正言何以故若有語言依  
覺觀故如言而行次立正業此二清淨次立  
正命是人住戒若起勤策次立精進有精進  
故則念不失次立正念由有念故心不散  
次立正定復次阿毗達磨藏說此行以智慧  
為根本何以故四諦境深非智不了故先立  
正見心觸此境次立正覺由此二分於四諦  
中對自令知次立正言由前二分知言發行

次立正業由前兩分口說身行受用四諦以立正命身心勤策為進諦理次立精進由此精進於四諦境心用澄淨次立正念由此正念於四諦境心及諸法永不散動次立正定復次由正見故是觀行人不墮增上慢中能

如實分別自所得故由正覺發起正言是自所得能傳至他由此正言能立能破能決令他信有智慧由有正業寧捨壽命不犯非法故令他信有聖所愛戒依法如量求用四緣故由正命令他信有聖種知足復次由正見

正覺及因正言能師子吼由正業正命能顯所說義由正精進未得令得未滅令滅由有正念沉起平時不忘三相故定無障由有正定滅除定障能引六通諸德故後俱解脫復次阿毗達磨藏說由正見故說信根信力及

欲何以故由有智慧信欲成故由精進故能攝正勤及精進根力覺分由正定故攝心如意足及定根定力喜猗捨定覺分等以是義故當知三十七品是八道內攝復次正見及正念是毗婆舍那分由此滅無明故慧解脫

為果所餘道分屬奢摩他分由此離欲故心  
 解脫為果是故略說道有二分一毗婆舍那  
 二奢摩他復次藏論說正言業命三為戒聚  
 由有此戒拔除瞋惡根本正覺精進正定三  
 為定聚由此拔除貪欲惡根正見正念二為  
 慧聚由此拔除無明惡根以此義故道有三  
 分復次道有四一方便道者由此無礙道生  
 無礙道前皆名方便二無礙道者正能除障  
 礙對治惑不礙故名為無礙三解脫道者  
 解脫無礙道所破之惑初起名為解脫四勝

道者從解脫道後所餘諸道皆名勝道問此  
 四云何名為道答由此進至涅槃故名為道  
 若爾解脫及勝云何名道答道種類故轉勝  
 故今前至後故能至無餘涅槃故說名為道  
 復次道有四種一苦道遲智二苦道速智三  
 樂道遲智四樂道速智樂道者謂依止四定  
 具分故定慧平等故無功用行故以是義故  
 名為樂道離此皆名苦道謂依止未來定中  
 間定三空定等不具分故定慧不等故有功  
 用行故未來定者有慧少定三空有定少慧

中間定者分不具故定慧皆少以是義故名  
爲苦道此之二道若信根入得名爲進行若  
智根入得名爲速行是八分聖道約定約根  
故有四行復次聖道或說三十七助覺何法  
爲覺以盡智無生智名之爲覺由三種人成  
三品覺謂聲聞菩提辟支菩提無上菩提能  
滅無明令無餘故是自事已作不復更作如  
實覺故是名爲覺助者三十七法隨從盡智  
無生智故名爲助由名故說三十七不由於  
體今論所辨體唯有十謂信精進念定慧喜

輕安捨戒覺阿毗達磨師說體有十一即開  
戒爲二所謂身口復有阿毗達磨師說體有  
十三謂足欲及心故經一切所得法皆是助  
覺但此十既勝故徧舉之言三十七者謂四  
念處四正勤四如意足五根五力八聖道七  
覺分問此七科助覺安立何處答凡有四位  
一初發行位二通達位三見位四修位問次  
第云何答是觀行人已住於戒已能了別生  
死過失涅槃功德離四諦觀無別方便能了  
知此過失功德爲攝多境散心令住一處爲

生對治伏四顛倒令心如理入四諦觀是故  
在先觀四念處由四念觀已別諸法可取可  
捨為取善捨惡故次修行正勤因四念觀正  
勤隨意住故次立四如意足由此定力於不  
疑為取善捨惡故次修行正勤意九因四念觀正  
勤得成由正勤觀惑障已淨助法已立十四心隨  
意位故次立四如意足由此定力於不疑境  
心有增上由此信故於不懈怠心有增上由  
此精進所得善心有助無障於不忘境心有  
增上由此念故攝在一境於無散中心有增

上由此定故如實觀境心有增上由當體增  
上故於不退位心有增上由不退故於通達  
分心有增上故次立五根是五根增長至最  
上品故下惑不能破故餘世間法不能勝  
故無流心次第緣故不退聖位故以是義故  
次立五力已見彼此得失已得真路已得決  
心已得眼已得足由五力故得出世行故次  
立八聖道由八聖道破見諦惑已得近盡智  
無生智故轉此道名七覺分是故次第立三  
十七四念處觀是初發行位即解脫分四正

勤名忍位四如意足是名位五根名相位五  
力名第一法位此四通名決了位八聖道名  
見位七覺分名修位盡智無生智名究竟位  
是果非因故不立為道復次此道或說名梵  
輪梵輪者佛世尊及弟子所轉故此聖道有  
六種義譬之如輪卷九一速疾行謂或一心或十  
二心或十五心徧行三界四諦故名速疾二  
捨此到彼謂捨世間到出世間等三上下行  
故謂或在法忍或在類忍等四從此至彼謂  
從師相續解至弟子相續解五轂輻輞相似

故戒有三分為轂正見正覺正精進正念為  
輻正定為輞六如聖王輪未伏能伏已伏能  
守護由無礙道能伏解脫道能守以是義故  
名為梵輪復次此八聖正見有五分戒有六  
種謂三業教無教精進有九分正念有八分  
正定亦八分此聖道若廣說則有三十七分  
若中說則有八分若略說或三分或二分偈  
言  
若人求涅槃 滅止及妙離 應常行精進  
聽思修四諦

四諦論卷第四

音釋

搥陟瓜切 苛古我切 跳他弔切 躑炙切  
也 躑也 躑也 躑也 躑也 躑也 躑也 躑也 躑也 躑也



辟支佛因緣論

逸十

失譯人名今附秦錄

波羅柰國王悟辟支佛緣一

輔相蘇摩悟辟支佛緣二

月愛大臣悟辟支佛緣三

王舍城大長者悟辟支佛緣四

波羅柰國王月出悟辟支佛緣五

拘舍彌國王大帝悟辟支佛緣六

波羅柰國王親軍悟辟支佛緣七

轉輪聖王最小子悟辟支佛緣八

波羅柰國王悟辟支佛緣第一

歸命一切智世尊了達三世大燈明

歸命無上出要法并及應真諸勝僧

我聞寂靜辟支佛悟解因緣之所行

心無瑕穢降煩惱善護禁戒常清淨

譬如秋天無雲翳憺怕自守林藪間

我今渴仰彼功德誠心敬順生信樂

雖於彼所欲懷疑彼力感我強令信

孰聞快士清真行而不生於敬信心

我今將說辟支佛功德妙行之少分

昔從先師相傳聞 唯述正言無偽說

大象行道象子隨 是故我今開顯示

問曰辟支佛以何因緣默然自守恆入捨心  
住於山林幽谷河側寂靜之處心行寂故亦  
無言說譬如犀角獨一之行何故如是又問

辟支佛有何功德答曰宿舊諸師咸作是說  
昔佛於三十三天宮殿說法將欲來下還閻  
浮提爾時帝釋勅毗首羯摩為佛作三道寶  
階還閻浮提此三道階下駐僧尸沙國如來  
爾時從彼天宮乘階而下時釋梵天王與其

眷屬兩華供養時蓮華比丘尼見佛來下即  
便化作轉輪聖王威儀形像七寶導從時眾  
人等覩其如是咸皆生疑怪未曾有各作是  
言頗復有能神力超絕踰勝於彼比丘尼不  
爾時世尊見諸時眾覩三道階深生竒特復  
見蓮華比丘尼作此神變成生渴仰為欲增  
長彼信心故即告時會有辟支佛神力過於  
彼比丘尼云何名勝彼快士者佛未出世則  
於中出為諸眾生而作利益示其色貌現有  
飢渴受取衣食為作福田莊嚴法行清淨寂

滅調伏離欲令諸衆生得見之者惡心永息  
捨離刀仗猶如犀角獨一之行傳從諸師得  
聞此事聞何事耶我昔曾聞迦葉佛時有人  
出家於十千歲修行梵行護持正戒修行忍  
辱經常精勤以修行故衆多比丘皆來親近  
時諸比丘咸作是言當教授我以教習故是  
等比丘心皆甘樂以衆鬧故不得見諦臨終  
之時而作是念我見十力其所說法微妙深  
遠難可得聞然我得聞以放逸故不獲道果  
我雖清淨持戒能行忍辱以教化衆人憤鬧

永樂北藏

辟支佛因緣論

之故侵毀定心如彼霜雹害於善苗是故令  
我不獲道果即說偈言  
我今溺三有 衆惡煩惱中 猶如老瘦象  
沒於深淤泥 如彼辟支佛 獨處於林間  
譬如犀一角 遠離諸徒衆 如避猛熾火  
應當獨修行 遠離於憤鬧 願我常遠離  
徒黨衆憤鬧  
發是誓願命終生天天上受樂福盡命終生  
迦尸國波羅柰城中梵摩達王第一夫人胎  
中入胎之時夫人身體譬如清池有柔軟華

爾時夫人覺有娠已以偈白王

我覺有娠來 歡悅生恩惠 此必是兒志

宜應赦有罪 時王聞歡喜 尋即赦天下

又復白王言 復應廣布施 王聞益歡喜

尋即開庫藏 賑賜貧窮人 無不充足者

爾時夫人生太子已端正殊特如似滿月年

始八歲聰明慈仁其父王崩國人愛樂如盛

滿月時有輔相名曰言說言說輔相即立太

子以紹王位雖復年稚本誓願力不作衆惡

體性賢善於諸衆生有深悲愍雖處王宮志

求閑靜雖處華堂猶如塚間雖處憤鬧修行

禪思猷患生死稱量其過以道修心喜捨王

務諸臣諫曰今日大王專行道行不理國事

若如是者衆惡必起敗王風化譬如渡海若

無船師必為諸難之所敗壞即說偈言

王承祖先嗣 藉地如法得 唯垂理萬民

願莫放捨國 若王正法治 諸善無過者

人帝應當知 護國福最勝

爾時其王聞是語已歎息思唯說偈答曰

我若不理國 吾國必當敗 我力能護國

邊惡不敢侵 若我治國者 王務塵我心  
若有犯罪者 必須加毀害 當言繫閉彼  
當截彼手足 彼應入罪死 彼應挑其眼  
如今濁惡世 必當須刑戮 若行刑戮者  
即是旃陀羅

時王即告所親愛臣汝今且聽吾所食者不  
過一味吾所衣者不過一襲所坐卧處不過  
容身自此而觀何用多求而無厭足王位所  
以稱尊者以其教令必行無不承肅唯有此  
事取異眾庶又告輔相王者所重唯此一事

我今付汝汝今應當畏於後世正法治國賦  
斂依舊莫違常限即說偈言  
我雖生王宮 承籍祖先後 而我未習學  
刑戮搥罰事 我今怖畏故 不能造此業  
汝今莫劾我 但當育民庶 世人皆愚癡  
各自作愆過 於所犯罪中 復生其恐怖  
汝當以正法 撫育施無畏 當依於正法  
化導於民庶  
時王說偈已即便以國付此大臣而此大臣  
既得國已於二年中寬縱無度不恤萬民恣

心極意作諸非法漸漸經久榮位深重便生  
僞逸行誦非法如河暴長多所損壞城中富  
有一切稅奪時城內人皆諫之曰莫爲此事  
聞他忠言倍生瞋恚慳慳作色而作是言汝  
等何敢發如是語諸人懼畏不敢應王由是  
之故所行無道日日轉盛如火得乾薪其燄  
轉熾姪荒暴亂所爲悖逆王所愛婦亦復妻  
掠時王夫人見其如是懊惱垂淚而往白王  
瞋心猛盛脣口瞬動言不解了猶如嬰兒以  
此情事具向王說王聞是已即召令來而語

之言我之妃后汝尚隱忍能行非法況復萬  
民王即教誡自今已後更莫如是時彼輔相  
見王嫌已并民厭患即便棄國逃至他土將  
彼國王及其軍眾還向本國規欲討伐時本  
國中諸舊輔相將兵逆拒破其軍眾生擒將  
還舊輔相等復白王言彼人侵毀於王即將  
彼臣詣于王所王時見其顏色既變有慚懼  
相王曰怪哉生死即說偈言  
愚癡覆蔽心 不覺後大苦 為小樂緣故  
今受此慚恥 譬如上饍食 色香皆具足

其中雜毒藥 愚人不觀察 貪味故取食  
食消則成害

王告諸輔相彼之愆過雖復尤重然我意者  
不欲加害復說偈言

一切皆愛壽 宜速赦彼罪 不見害他命

而得安樂者 犯罪深重者 應向生慈心  
彼自招罪害 當宜生哀矜 若害於彼命  
自毀所愛法

諸舊臣等即白王言我等今者雖違王勅必  
當加害終不縱捨即於王前拔劍斬之王見

殺已即生獸惡見前境界便見過去修忍之  
心尋時開解悟辟支佛道如優鉢羅華開敷  
之時踊身虛空一切臣佐合掌仰瞻辟支佛  
獸生死者證道如是我今所得持戒果報即  
說偈言

我雖服瓔珞 送十 心修淨梵行 大 檢身調伏根  
憚怕常寂滅 於一切人所 而捨刀兵仗  
修於獨一行 如犀牛一角

說是偈已鬚髮自落時淨居天即奉袈裟尋  
即飛空詣雪山中時彼山中有辟支佛而問

之言汝處王位獸惡何事悟斯道跡即說上  
 偈而用答之是故如來為不能修行忍故故  
 說忍辱因緣以貪親近憤鬧故故說不親近  
 因緣欲使解辟支佛功德故故說辟支佛因  
 緣佛為諸天於善法堂上說辟支佛因緣佛  
 於三十三天使諸天生獸惡故故說斯事婆  
 四吒辟支佛於毗舍離說捨身入涅槃今現  
 有塔名優陀耶

輔相蘇摩悟辟支佛緣第二

堅持禁戒不毀行 諸有智者得解脫

不從他學不惱彼 獨一之行如犀角  
 曾從諸師聞如是說迦葉佛時有一比丘於  
 十千歲修行梵行坐禪得忍修持禁戒離於  
 憤鬧具頭陀行命終生天於天宮中受五欲  
 樂從天壽盡生娑翅多城輔相夫人提婆胎  
 中爾時夫人說偈逸十白夫  
 我今有娠心甚愛樂 必有福人來為我子  
 由是之故乃於一切常生悲愍又我今者放  
 逸心息更無欲想譬如海中摩黎大山能截  
 水波我今欲息亦復如是我今畏於妄言常



思實語又如功德善人畏於缺失今我慎懼亦復如是我今見酒如觀毒藥畏他財物如畏火聚如是衆惡今悉捨離皆由我胎福德之子姪欲既除用爲快樂爾時輔相即語婦言今恣汝意修行五戒夫人爾時修行衆善滿十月已而生其子字曰蘇摩漸漸長大一切經論六十四藝無不明達端正殊妙猶如滿月能使父母情願滿足遂至盛年輔相請王我今年老當爲後世聽我修福時王答言我今不能放汝修福而爲障礙汝子蘇摩使

代汝處以供給我任汝修善輔相歡喜王以蘇摩用爲輔相給賜爵賞倍勝於父衆人愛敬同於往古牛王大臣能生一切女人愛敬時王夫人愛著蘇摩語蘇摩言汝今若能稱我願者能使舉國并及於王盡隨從汝又能使汝不得惡名其所施教與王無異爾時蘇摩執志堅固而不怯弱以偈答言  
請聽所說莫見嫌責我聞此語如滲入地譬如羸馬困乏之時騎入戰陣不堪前進我見他婦情無染著心意不開如夜竊華

凡在所敬與母無異況在夫人是我所尊  
 我堅持心敬事所尊我為臣子不應為逆  
 又我情欲發動之時見他婦女自然休息  
 彼暴水起多諸波涌我如秋水自然潔清  
 爾時夫人人心自念言彼若斷我親昵意者  
 我必於彼遠十而生誹謗即白王言輔相蘇摩  
 舉意無理欲侵辱我  
 時王意惑疑審爾不爾時蘇摩往至園苑見  
 兩牛耕輓在項上極大疲苦生厭惡心時王  
 奔惑信夫人讒言即便遣使往殺蘇摩爾時

蘇摩如馬被射箭徹于骨即自思惟人富貴  
 時所愛之色盡來在前如雜毒食極為香美  
 食欲消時身則壞敗如人貪五欲其味甚妙  
 譬如金屋為火所燒人貪其色入中被害命  
 欲盡時心意擾亂即自安慰而自念言我持  
 淨戒無有毀缺我之持戒如犛牛愛尾我守  
 禁戒猶如貧人得地伏藏勤加守護而說偈  
 言  
 羸澀嶮惡道 我已得度之 我遭急危事  
 護戒而不捨 猶如大海潮 不失於期限

今我守持戒 其事亦如是

說是偈已爾時諸天并諸善神見此輔相誓願如是皆生歡喜時諸惡鬼尋著夫人夫人狂發即於王前為鬼所著而說偈言

我今自壞破 我應身受死 彼是純善人

不應加傷害 我之癡嬰愚 口吹須彌山

不能令動搖 彼實無穢行 我妄生是謗

時彼輔相於園苑中思惟厭惡得辟支佛踊昇虛空鬚髮自落時淨居天即奉袈裟爾時諸人勸請之言願莫捨我而上天上時辟支

佛說如上偈以答諸人飛至雪山見諸辟支佛亦如上事而具說之

月愛大臣悟辟支佛緣第三

海潮不過限 犛牛守尾死 如月性自冷

不可變令熱 調伏諸根者 守護戒亦爾

是名獨一行 如犀角無二 往昔諸大師

展轉相教授 我從先勝聞 今欲顯說之

過去世時有辟支佛名曰月愛於婆伽婆迦葉佛所種諸善根善修戒行恒以智慧觀於諸陰皆悉無常於彼佛所竟不獲得沙門道

果於彼命終即生天上以宿善力受天快樂  
天壽盡已下還人間生瞻婆國中長者家  
初生沖雅恒依戒禁而自修身觀其善行過  
於宿老亦不輕躁無有瞋嫌所有資財周給  
貧乏隨家豐約與眾共分以戒瓔珞而自莊  
嚴其父命終順法治家彼城人民見其忠謹  
深生敬信同於師長其年盛壯姿貌端正諸  
少婦女一切見者無不敬愛諸商估客以其  
忠實咸來依附于時北方有諸估客多乘好  
馬至瞻婆國時瞻婆國王盡取其馬王心暴

虐不依正法王自思惟我今多取彼馬云何  
當得不與價直而得其馬即與佞臣集議此  
事佞臣白王言若酬其價庫藏竭盡王即答  
言我於今者若不與直我之惡名流布天下  
一切國民當患於我復當斷絕四方商估佞  
臣復言為王計者不須錢財而得其馬復能  
令王惡名不出國民不患今王國內月愛大  
臣為一切人之所體信彼若來索王但當言  
我遣月愛送金付汝時彼估客有萬匹馬其  
一一馬各直一萬金錢若王但言月愛大臣

與其直者國內人民必生疑惑或疑於王或疑月愛王之惡名不必彰露亦復不為萬民獸患諸商估人來白王言歸我馬價我欲還家王即答言我先不使月愛償爾價耶寧可再過無爾直乎諸估客等即答王言此月愛者從先已來實不與我馬之價直而彼忠信寧捨身命終不妄語言與我價即說偈言

假使月雨火 日雨於冷水 壓沙得膏油  
鑽水而得酥 火中生蓮華 欲令彼月愛  
作麤獷妄語 終無有是處

諸估客等復白王言人中之天設使月愛審如王勅言與我者我終不恨時王即召月愛而語之言汝先不在我前我與汝金償一估客耶王即動目現作詭相汝不從我我定殺汝時月愛臣知自思惟我於今日為從實語十一為用王言復自惟忖為取法身勝耶此身勝耶即自決計我今寧捨此身終不捨於戒法身即說偈言

我今自思惟 於此二身中 為當捨何身  
復諦自觀察 寧損鄙穢形 終不捨戒律

若當捨法身	惡名即流布	若處善衆手
為彼所嚮持	若我為惡者	我自不甘樂
心生悔熱火	捨此穢身已	當趣於地獄
自毀禁戒行	終不得安樂	但為一形樂
虧損無量身	若當護戒者	無量身安樂
是故我應當	覆護於法身	不令有毀壞
為利正法故	當斷於妄語	

月愛大臣即白王言願王開恩莫忿於我我實不憶見王與彼價時王即大怒扣劍而言云何不見月愛大臣自定其意而作是念

寧為聖法死 不為愚癡生 一切諸有生  
誰有不死者 我今若受死 為法故喪身  
決定生天上 何足生驚畏

即答王言假使王今切害我身碎如胡麻所受禁戒終不放捨今我住於仙聖道中若以此舌作妄語者非我所宜我今若當為王故作妄語後墮地獄何所恃怙王時羞愧倍增瞋忿怒眼視之如熾然火月愛爾時心生歡喜今正是我生定意時今正是我秉持法時更於何處欲求聞法今日此即為我說法令

我為法乃至捨命今王於我真大親友如是  
念法即時開悟得辟支佛躡身虛空令破戒  
者見其如是皆生慚愧為修善者增長信行  
為實語者現實事果於虛空中鬚髮自落時  
淨居天奉其法服飛往香山與諸辟支佛共  
集一處說偈如上卷十

王舍城大長者悟辟支佛緣第四

譬如稠林中 欲挽大樹出 枝柯相妨礙  
求出將無由 在家如稠林 眾務如枝柯  
雖欲求出家 縛著永無因 靜處於林野

觀境修其心 解脫眾緣務 離諸所親愛  
修於一獨行 如犀角無二 先師相傳授  
我得聞斯事

昔有辟支佛於過去五佛所恒修諸善為優  
婆塞樂著家事雖覩諸佛不求出家然其專  
心持在家戒無有毀犯善根漸增於迦葉佛  
所出家學道樂修頭陀六物具足厭惡於欲  
於彼命終得生天宮從天壽盡生王舍城大  
長者家此長者家財富無量倉庫盈溢以漸  
長大遂至盛年父命終後縱意快樂如毗沙

門子那羅究伏羅在已家中樂諸緣務生育  
 男女各三十人庫藏僕從其數甚眾男女婚  
 娶其事眾多但營目前忘所修法為緣務所  
 縛不捨家業於僕從所聞諸親戚多有死喪  
 汝某甲舍既遭喪禍又失鞍馬廣聞如是喪  
 失之聲愁毒懊惱連十如似百箭十三一時入心亦聞  
 美善可愛之語家之估客大獲珍寶安隱還  
 歸其子某甲產生男兒又聞已女生於福子  
 復生歡喜聞向衰利憂喜交集猶如作伎所  
 旋之輪與一親友至園苑中適行遊觀到一

林間見有一人斫於大樹枝柯條葉繁美茂  
 盛使多象挽不能令出斫一小樹無諸枝柯  
 一人獨挽都無滯礙即挽出林見斯事已即  
 自思惟而作是言我於今者得見因緣即說  
 偈言

我見伐大樹	枝葉極繁多	稠林相鈎挂
無由可得出	世間亦如是	男女諸眷屬
愛憎繫縛心	於生死稠林	不可得解脫
小樹無枝柯	稠林不能礙	觀彼覺悟我
斷絕於親愛	於生死稠林	自然得解脫



即於彼處得辟支佛道時彼親友即語之言  
日已向暮可共還家答親友言汝自歸家我  
向家因今已斷竟親友問言汝云何斷答言  
我昔由愛故著居家今我已斷如此愛業人  
所愛者妻子眷屬小子稚孫恩愛憍恣若見  
父時弄聲不了疾走攀緣戀眷此事故生愛  
著我於妻子及以眷屬如此之事愛心永息  
我本在家管理眾務或出或入或言與彼或  
言取此或言應作或言不應作如此之事我  
今已斷已捨欲樂獲解脫樂伐愛樹根閉諸

趣門滅大暗障我於赤子反似怨家等無有  
異今我如是云何而當復還家耶時其親友  
即還家中語其男女男女大小聞其不來悉  
往就看眷屬既至但見其父沙門法服飛昇  
虛空男女白言今以何事厭惡眷屬處虛空  
中即說上偈以答男女既說偈已十四即時飛至  
雪山之中與諸辟支佛共集會已還來到本  
得道園中捨身涅槃時其眷屬為造塔廟時  
人因名為多子塔凡諸智人善根成熟以少  
因緣便得開悟

波羅奈國王月出悟辟支佛緣第五

妻子親友財 生死中過患 處林寂解脫

猶如犀一角 從善逝所聞 傳至於我師

我復從師聞 今當演說之

昔有辟支佛於迦葉佛所萬二千歲修行梵

行恒修忍辱慈悲衆生乃至微戒不曾毀犯

命終生天彼天命終下生人間波羅奈國

王之家月出時生因名月出以漸長大立為

太子其父王崩繼紹王位以宿善力作正法

王治國遣輔相子典領小國以女妻之此輔

相子勇力絕倫多有眷屬自恃憍豪越逸過

度時國王子以輔相子是姊妹夫極成親昵

因其私屏開宴之處陰搆讒計語王子言爾

之叔父兄弟眷屬其數甚多而世人多用婦

語爾之父王一旦傾覆爾之諸母或生讒諂

自用其子以此推之汝父王位必不至汝曼

王未覺宜早圖之夫王位者天下之尊極樂

之處與天無異一切世人無不信伏若為國

主以法治國命終之後必得生天譬如美肉

衆皆嗜之王位亦爾無不貪者即說偈言

譬如水未至 宜預造橋梁 瀑流若卒到  
不得有所為 王位亦如是 宜應先圖之  
擒獲在汝手 爾乃可自安 兄弟更相嫉  
後求甚不易 王子思惟言 如此親友者  
將欲陷墜我 如灰覆熾火 現在既無樂  
來世獲大苦

爾時王子具以上事往白父王王聞子語  
慙怒眼目如赤銅王當是時勅語使言曼其  
未洩急追將來時王子聞輔相子來即便出  
迎既相見已尋時遇患使還白王言王子病

極成委篤王聞是事即自出看既觀其子所  
患困篤命在危憊四大苦痛見此事已便自  
思惟此王位者甚為大惡然彼輔相子陰教  
我子悖逆反常欲為不軌而我王位非彼能  
得我子今者患苦垂命一切世人皆生貪嫉  
以此而言當知王位惡鄙弊處何故鄙弊以  
王位故捨其善行為王位故害父及祖為親  
厚者作大過惡捨於慚愧能使僥逸為少樂  
故不畏後世即說偈言  
如蛾投熾火 貪國盲亦爾 深著於得失

作以及不作 沒國事淤泥 不得寂定處  
作是思惟時 身行極清淨 逮得厭惡心  
即獲辟支佛

復有師云此王見兒患已即便還宮有一隣

國親厚之王為賊所逼即遣使來求索援助

此王聞已尋將兵眾往救彼王既到彼國連

兵交刃極相殺害乃至婦人胎中小兒剝而

殺之王見斯事深於王位生於厭惡即說偈

言

貪國微小樂 沒溺欲泥中 欲忿既增長

鬪戰生是非 以貪財利故 互共相殺害

不求勝解脫 盡滅於王位 如大熾火中

飛蛾投而死 怪哉生死中 所作事顛倒

極作劬勞業 反獲其苦殃 如彼高山巖

崖傍有蜜蜂 愚人貪火味 不覺墮墜苦

如是自思惟 即得辟支佛

即告子言汝能不用惡人之言無悖逆意汝

若治國必以正法我今以國付囑於汝吾將

欲去子及輔相一切眷屬聞王此語悉皆懊

惱涕泣流淚合掌白王不審大王欲何處去

爾時父王踊身虛空在日出山上說如上偈  
著沙門服作十八種變國人見者無不歡喜  
譬如調馬若見鞭影即便調順智人亦爾見  
他受苦心即調順

拘舍彌國王大帝悟辟支佛緣第六

父母及妻子

德十 穀帛財寶等

十七 智者深觀察

暫過如客舍

棄捨於愛欲

獨行如犀角

我昔從諸師

傳授聞此事

昔有曾於迦葉佛所作比丘智慧聰敏柔和  
忍辱於日中常觀諸法真實體性所謂觀

陰苦空無常無我猶如芭蕉熱時之燄如幻  
如夢如水泡沫能善觀察自修其心命終生  
天於天壽盡下生拘舍彌城為國王子名曰  
大帝其父王崩承嗣先業紹繼王位如劫初  
諸王善修戒行正法治國爾時城中有大長  
者財富無量與大帝王少為親舊極相厚昵  
彼大長者身嬰重疾王聞其疾躬自往問見  
長者病形容萎悴王心不樂低頭愁慘時彼  
長者以七寶鉢盛滿中金用奉獻王王言長  
者汝今疾苦極困篤耶長者對曰願王顧視

聽我所說

我家大巨富

猶如毗沙門

愛語及財寶

心如得禪者

一切有生類

深悟諸苦患

多集親友眾

妻子與眷屬

僮僕諸走使

無有哀愍者

一切世間人

病常惱患人

我皆恣所欲

待遇極豐厚

今我死時至

都不生厭畏

言此我妻子

決定入死道

無一為我伴

王即慰勞言

此語極真實

此是我財賄

彼親厚於我

我親友於彼

汝子與諸親

財寶眾庫藏

及我勇健力

意為癡所病

橫作如是想

大災患在前

象馬車步兵

雖有如是等

無能救拔者

愚盲而不覩

上來諸所親

無能我濟者

我等諸親友

見汝遇苦患

但有慰喻言

於此正思惟

即獲辟支佛

憂愁流涕淚

及汝命將絕

無能救濟者

王之所親内外眷屬見王得道絕棄世事為

唯當自恃汝

由來所作善

王諦觀其病

愛別離火之所燒然生大惱熱時辟支佛身

昇虛空作十八種變說如上偈

復有說云此王為王子時入園苑中見諸盲者更互相捉聞王子出謂有飲食在於道側不見道路墮大深坑有即死者有頭破者手脚折者身體碎壞爾時王子見是眾苦厭患思惟而作是言此覺悟我如是盲人亦曾富貴由縱逸故今得是苦我於今者觀是事已宜好檢行不應放逸即說偈言

譬火燒金鬘 而用為首飾 金鬘雖珍妙 熾火終成害 王位亦如是 當慎莫放逸

永樂北藏

辟支佛因緣論

第一〇六册

此盲覺悟我 不宜自寬縱 因此王位故

身起大憍慢 威迫國人民 皆令生苦惱

後自受苦時 苦劇百千倍 因覩他受苦

云何能自安 此即是我師 示我眾苦患

作此思惟時 即獲辟支佛

爾時王子大賜逸十盲者錢財珍寶沙門法服身十九

昇虛空現諸神變語諸親言而我今者不以

瞋恚怖畏憂愁故不嫌汝等故我捨親愛國

土人民都無怨親財錢寶物如上說偈

戲笑眾樂具 棄捨如涕唾 忍樂於出離

斷滅於諸苦 能盡貪愛癡 其心得解脫  
 由得解脫故 獨一如犀角 曾從先師所  
 得聞如是事

昔有辟支佛於過去佛所修諸善根於最後  
 身生拘舍彌國為拘舍彌王其國土內有大  
 災變大旱惡風五星倒錯王即召太史占相  
 之徒說偈問言

何緣有是災 大旱不降雨 虛空無雲翳  
 觀日無威光 食肉諸惡鳥 烏鷲及鷄梟  
 迴翔虛空中 見者生恐怖 咸言如是災

是誰之所作 能使諸妖異 恠變乃如是  
 爾時太史即答王言隨我所知今當為說如  
 我意者一切國民必有逼迫苦惱之事王復  
 問言當以何方禳此災患太史白言王若欲  
 令國安隱者當隨我語即說偈言

王若能退位 脫服與餘人 具足滿六月  
 微服而行乞 災患自消除 王當如滿月  
 王隨彼語即捨其位微服行國漸漸經歷行  
 到婆翅多城到彼城已有異國王與軍來伐  
 婆翅多王為國樂故興兵往拒兩陣交戰二



王俱死婆翅多城諸王子等競共爭國復大戰  
關毗羅仙王見是事已唱言怪哉即說偈  
言

王位雖尊豪 其樂甚輕微 云何為是故

具受諸苦毒 競心生鬪戰 樂著隨眾惡

如蠅貪食蜜 著蜜無不喪 人亦復如是

為貪小樂故 鬪戰自傷害 王位可鄙賤

多集諸苦惱 患害欲至滅 如飲雜毒漿

毒消身敗喪 為一己身故 多有所傷害

愚貪王者樂 樂少苦甚多 我從今永止

更不求此樂 而此國事務 憂怖充其中

榮樂須臾頃 憂患苦延長 譬如妙金屋

火焚燄熾然 智者畏燒害 不應入其中

作是思惟時 即悟辟支佛 以神通力故

鬚髮自然落 即作沙門形 躡身昇虛空

尋於虛空中 即說如上偈

即飛至雪山諸辟支佛所時彼辟支佛問言

以何因緣得悟道果具說上偈答之

波羅柰國王親軍悟辟支佛緣第七

世間戲笑樂 及愛我所 悉皆放棄捨

心意得解脫 諸根悉寂定 獨行如犀角  
我昔從先師 傳聞如此事

過去波羅柰城王名曰親軍有二夫人心甚  
愛悅樂著欲事恒為放逸耽荒如醉亦如香  
山逸象香流出時入摩黎山自縱欲事時二  
夫人更相妬嫉各相伺便其一夫人便以毒  
藥與其親信親信賣藥與彼夫人夫人得藥  
狂悶而卧甚大苦毒尋便命終第二夫人見  
其命終詐現懊惱自散其髮椎胸而哭舉宮  
哀感王聞其死生大苦懊夫人左右所有直

人所著嬰珞嚴身之具悉皆挽絕以土塗身  
憂毒入心如彼群鴿為鷹所逐如金翅鳥驚  
諸龍女宮中采女為死所驚亦復如是爾時  
宮中譬如塚間又如黑塵掩蔽光明諸宮人  
等為憂所蔽亦復如是王聞宮人如是憂苦  
心中驚動天冠嬰珞著身服飾皆棄于地入  
到喪邊見諸姝女哀苦理極王見是已生大  
愁惱而自思惟即說偈言

譬如盛暑日 能炙好華萎 死日消人形  
面色變青黑 脣齒塵垢穢 眼陷鼻角戾

歌舞妙容儀	蠢直如木石	先者能令我
愛著極樂處	云何卒今日	能生我怖畏
可惡生死患	不淨極臭穢	如夢虛不實
亦如芭蕉心	無有堅實相	如幻泡燄沫
暫現如水波	智慧所厭患	不知觀察者
橫生樂著想	於此不淨中	橫生於身想
迷悶而守著	猶如睡眠者	
如是思惟未久之間	燒夫人屍喪事已竟第	
二夫人為藏已過食	好飲食詐自懊惱言欲	
斷食現作哀慘然恐	其過彰露發覺心中愁	

結以愁結故飲食不消	即成大病王見病已	倍增懊惱即生厭惡	如此皆是生死過患即	說偈言
如女能生愛	生累極衆多	人中無不爾		
因愛生於樂	還復生大惡	愛為苦根本		
見愛合會時	必知是無常	我所愛樂者		
端正與盛年	一旦死來集	以是故當知		
云何有是樂	誰有智慧人	思愛合會時		
而當生喜樂	畏老病死患	是故我永離		
作此思惟時	即得辟支佛			

即著王者衣服瓔珞飛昇虛空於虛空中說  
如上偈變成沙門飛到雲山中諸辟支佛所  
轉輪聖王最小子悟辟支佛緣第八

過去無量劫時有一轉輪聖王千子具足其  
最小子見父乘金輪寶七寶具足四兵翼從  
鼓蓋容飾悉皆具備其最小子即問母言我  
當何時得是蓋等種種容飾母即答言汝至  
骨朽亦不得是兒即問言何以不得汝有九  
百九十九大兄應得紹位計其次第都不至  
汝兒即思惟我既不得如是容飾生必有死

形骨腐敗以是種種思惟生死過患即時覺  
悟得辟支佛身昇虛空作十八變母即復請  
願莫遠去園苑中住受我供養時辟支佛受  
諸母請即住後園日日供養經歷多時時辟  
支佛厭是有身即便棄捨而入涅槃諸母戀  
念大積香薪以燒其身卷十收其舍利廿三盛著寶餅  
即於後園為起大塔時轉輪王遊四域還到  
後園中見有大塔怪而問之時守園者即白  
王言是王最小之子得辟支佛於此涅槃諸  
母於此為其起塔時轉輪王即召其母而問

之言我子云何死而起此塔時其母等具以  
 上事而白於王王責其母我兒欲得何不語  
 我今雖涅槃以王容飾置於塔上由是因緣  
 無量劫中恒為轉輪聖王食自然福至今不  
 盡若處生死應二千五百世為轉輪聖王由  
 成佛故得二千五百寶蓋阿闍世王上佛五  
 百寶蓋毗舍離律車子上佛五百寶蓋海龍  
 王上佛五百寶蓋阿須羅王亦上佛五百寶  
 蓋天帝釋亦上佛五百寶蓋爾時世尊唯不  
 受一蓋何以故為將來弟子若乏衣食供養

以此福力當使人天自然供給以是因緣當  
 知賢聖福田深廣無量

辟支佛因緣論

音釋

擔怕擔徒敢切怕薄陌 賑之刃切 顰感  
 賓切慈子六 昵尼質切 輓乙華切 犛莫交  
 切犁感慈貌 昵近也 輓車輓也 犛切長  
 也牛 讒鋤咸切 剗空胡切 挽挽武遠切  
 也悅切 全蒲問切 真昌六切  
 斷也全塵瀟也 真昌六切

永樂北藏

辟支佛因緣論

第一〇六册

阿毗達磨大毗婆沙論卷第一 心一

五百大阿羅漢等造

唐三藏法師玄奘奉詔譯

問誰造此論答佛世尊所以者何以一切種所知法性甚深微妙非佛世尊一切智者誰能究竟等覺開示若爾此中誰問誰答或有說者尊者舍利子問佛世尊答復有說者五百阿羅漢問佛世尊答有作是說諸天神問佛世尊答有餘師說化苾芻問佛世尊答所以者何諸佛法爾所知法性於諸世間定應

開示然無問者爾時世尊化作苾芻形容端正眾所樂見剃除鬚髮服僧伽胝令彼請問佛世尊答猶如徵問義品因緣問若爾此論何故傳言尊者迦多衍尼子造答由彼尊者受持演說廣令流布是故此論名稱歸彼然是佛說復有說者此論即彼尊者迦多衍尼子造問豈不前言以一切種所知法性甚深微妙非佛世尊一切智者誰能究竟等覺開示云何彼尊者能造此論耶答以彼尊者亦有微妙甚深猛利善巧覺慧善知諸法自相

共相通達文義及前後際善解三藏離三界染成就三明具六神通及八解脫得無礙解獲妙願智曾於過去五百佛所積修梵行發弘誓願我於未來釋迦牟尼佛般涅槃後造阿毗達磨故如是說一切如來應正等覺弟子眾中法爾皆有二大論師任持正法若在世時如尊者舍利子若般涅槃後如尊者迦多衍尼子故彼尊者以願智力觀法所益而造此論問若爾佛說阿毗達磨何者是耶答世尊在世於處處方邑為諸有情以種種論

道分別演說阿毗達磨佛涅槃後或在世時諸聖弟子以妙願智隨順纂集別為部類是故尊者迦多衍尼子佛去世後亦以妙願智隨順纂集造發智論謂於佛說諸論道中安立章門標舉畧頌造別納息制總蘊名謂集種種異相論道制為雜蘊集結論道制為結蘊集智論道制為智蘊集業論道制為業蘊集大種論道制為大種蘊集根論道制為根蘊集定論道制為定蘊集見論道制為見蘊猶如一切鄔陀南頌皆是佛說謂佛世尊於



處處方邑爲種種有情隨宜宣說佛去世後  
大德法救展轉得聞隨順纂集制立品名謂  
集無常頌立爲無常品乃至集梵志頌立爲  
梵志品此亦如是阿毗達磨本是佛說亦是  
尊者隨順纂集又若佛說若弟子說不違法  
性世尊皆許苾芻受持故彼尊者展轉得聞  
或願智力觀察纂集爲今正法久住世故制  
造此論復次諸佛出世皆說三藏謂素怛纜  
毗奈耶阿毗達磨如是三藏有何差別或有  
說者無有差別所以者何一切佛教從一智

海之所生故隨一覺海之所出故等力無畏  
所攝受故同一大悲所等起故復有說者亦  
有差別且名即差別謂此名素怛纜此名毗  
奈耶此名阿毗達磨復次依處亦有差別謂  
若依增上心論道是素怛纜若依增上戒論  
道是毗奈耶若依增上慧論道是阿毗達磨  
問於一切中一切可得謂素怛纜中亦有依  
增上戒增上慧論道毗奈耶中亦有依增上  
心增上慧論道阿毗達磨中亦有依增上心  
增上戒論道如是三藏應無差別答依增勝

說謂素怛纜中依增上心論道增勝毗奈耶  
中依增上戒論道增勝阿毗達磨中依增上  
慧論道增勝有作是說素怛纜中依增上心  
論道是素怛纜依增上戒論道即毗奈耶依  
增上慧論道即阿毗達磨毗奈耶中依增上  
戒論道是毗奈耶依增上心論道即素怛纜  
依增上慧論道即阿毗達磨阿毗達磨中依  
增上慧論道是阿毗達磨依增上心論道即  
素怛纜依增上戒論道即毗奈耶故由依處  
亦有差別復次所顯亦有差別謂素怛纜次

第所顯謂素怛纜中應求次第何故世尊此  
品無間宣說彼品若毗奈耶緣起所顯謂毗  
奈耶中應求緣起世尊依何緣起制立彼彼  
學處阿毗達磨性相所顯謂阿毗達磨中應  
求諸法真實性相不應求彼次第緣起或前  
或後或無緣起俱無過失復次等流亦有差  
別謂素怛纜是力等流毗奈耶是大悲等流  
阿毗達磨是無畏等流復次所說亦有差別  
謂種種雜說是素怛纜說諸學處是毗奈耶  
分別諸法自相共相是阿毗達磨復次所為

亦有差別謂未種善根者令種善根故說素  
但纜已種善根者令相續成熟故說毗奈耶  
相續已成熟者令得正解脫故說阿毗達磨  
復次分位亦有差別謂依始業位說素但纜  
依已串習位說毗奈耶依超作意位說阿毗  
達磨復次進趣亦有差別謂未入正法令入  
正法故說素但纜已入正法令受持學處故  
說毗奈耶已受持學處令通達諸法真實相  
故說阿毗達磨是故三藏亦有差別問何故  
世尊造此論耶答爲饒益他故謂彼尊者作

是思惟云何當令諸有情類於佛聖教無倒  
受持精進思惟籌量觀察由此無量煩惱惡  
行不現在前便得悟入甚深法性故造斯論  
譬如有人爲饒益他故於黑暗處然大明燈  
令有目者見種種色尊者亦爾爲饒益他於  
佛滅後製造此論令有智者入深法性又如  
諸佛爲饒益他開示演說十二分教一契經  
二應頌三記別四諷頌五自說六緣起七譬  
喻八本事九本生十方廣十一希法十二論  
議所以者何諸有情類雖有因力若無緣力

而覺發者終不能修勝進之行要遇緣力乃  
 能修行譬如池中雖有種種喞鉢羅等眾妙  
 蓮華若日月光不照觸者則不開發出種種  
 香要日月光之所照觸乃得隨類開發出香  
 又如暗中有種種物若無燈照終不可見要  
 假燈照乃得見之有情亦爾雖有因力若無  
 緣力廣說如前如有頌言  
 譬如暗室中 雖有種種物 無燈暗所隱  
 有目不能見 如是雖有智 不從他聞法  
 是人終不能 分別善惡義 譬如自有者

因燈見眾色 有智依多聞 能別善惡義  
 多聞能知法 多聞離不善 多聞捨無義  
 多聞得涅槃  
 又如經說有二因緣能生正見一外聞他法  
 音二內如理作意又契經說有四法人多有  
 所作一親近善友二從他聞法三如理作意  
 四法隨法行復有經言若我弟子一心屬耳  
 聽聞正法能斷五蓋及能修行七覺分滿故  
 如諸佛為饒益他說十二分教如是彼尊者  
 為饒益他製造此論復次為破無明暗故如

燈破暗能發光明阿毗達磨亦復如是破無  
明暗發智慧明故彼尊者製造此論復次爲  
顯無我像故譬如鏡面極善磨瑩種種色像  
皆於中現阿毗達磨亦復如是分別諸法自  
相共相令無我像分明顯現故彼尊者製造  
此論復次爲度生死河故如牢船筏百千衆  
生依之無畏從河此岸度至彼岸阿毗達磨  
亦復如是無數諸佛及諸有情依之無畏從  
生死此岸至涅槃彼岸故彼尊者製造此論  
復次爲照契經等故如人執燈入諸暗室於

見衆色而無迷亂如是行者以阿毗達磨照  
契經等義而無迷惑故彼尊者製造此論復  
次爲觀察善等諸法故如別寶人能善觀察  
金剛等寶阿毗達磨亦復如是能善分別善  
等諸法故彼尊者製造此論復次爲顯阿毗  
達磨諸大論師不傾動故如妙高山踞金輪  
上一切猛風搖鼓飄擊不能傾動阿毗達磨  
諸大論師亦復如是住淨尸羅諸惡見者輕  
毀邪論不能摧伏故彼尊者製造此論復次  
尊者以三因緣製造此論一爲增益智故二

爲開覺意故三爲遮計我故增益智者謂於  
內外諸經論中令智增益無有能如阿毗達  
磨開覺意者謂諸有情無明所昏如睡未覺  
不能了知何者是遍行何者非遍行何者自  
界緣何者他界緣何者有漏緣何者無漏緣  
何者有爲緣何者無爲緣云何爲攝云何相  
應云何因云何緣誰成就誰不成就何者順  
前句何者順後句何者四句何者如是句何  
者不如是句於如是等所知境中令諸有情  
開發覺意無有能如阿毗達磨遮計我者尊

者所造阿毗達磨未曾說有補特伽羅恒顯  
諸行空無有我以如是等種種因緣故彼尊  
者製造此論問阿毗達磨自性云何答無漏  
慧根以爲自性一界一處一蘊所攝一界者  
謂法界一處者謂法處一蘊者謂行蘊若兼  
相應及取隨轉<sup>七</sup>三界二處五蘊所攝三界者  
謂意界法界意識界二處者謂意處法處五  
蘊者謂色蘊乃至識蘊如契經說此藥义天  
於長夜中其心質直無有諂誑諸有所問皆  
爲了知不爲僥亂我以甚深阿毗達磨恣彼

意問此中何者甚深阿毗達磨謂無漏慧根  
又契經說此筏蹉氏及善賢外道并梵壽婆  
羅門皆於長夜其性質直無諂無誑諸有所  
問皆爲了知不爲燒亂我以甚深阿毗達磨  
恣彼意問此中何者甚深阿毗達磨謂無漏  
慧根又如佛告西你迦言我有甚深阿毗達  
磨難見難覺不可尋思非尋思境惟有微妙  
聰睿智者乃能知之非汝淺智之所能及所  
以者何汝於長夜異見異忍異欲異樂此中  
何者甚深阿毗達磨謂空無我及如實覺所

以者何以彼外道恒妄計我空無我性非彼  
所及又如佛告鄔陀夷言汝是愚夫盲無慧  
目云何乃與上座苾芻共論甚深阿毗達磨  
此中何者甚深阿毗達磨謂滅定退及如實  
覺又如佛告阿難陀言我有甚深阿毗達磨  
謂諸緣起難見難覺不可尋思非尋思境惟  
有微妙聰睿智者乃能知之此中何者甚深  
阿毗達磨謂因緣性及如實覺又契經說我  
有甚深阿毗達磨謂緣性緣起此處甚深難  
見難覺不可尋思非尋思境惟有微妙聰睿

智者乃能知之復有甚深阿毗達磨謂一切  
依皆永捨離愛盡離染寂滅涅槃此最甚深  
難見難覺廣說如前此中何者甚深阿毗達  
磨謂因緣性及彼寂滅并如實覺又如佛告  
阿難陀言復有甚深阿毗達磨謂有餘法相  
似甚深我於其中自覺正說此中何者甚深  
阿毗達磨謂諸見趣及如實覺又契經說我  
有甚深阿毗達磨謂一切法甚深故難見難  
見故甚深此中何者甚深阿毗達磨謂一切  
法性及如實覺雖此等經中隨別意趣作種

種異說然阿毗達磨勝義自性惟無漏慧根  
即由此故發起世間修所成慧謂煖頂忍世  
第一法以能別觀四聖諦故亦得名為阿毗  
達磨又由此故發起殊勝思所成慧謂不淨  
觀持息念等以能別總觀諸蘊故亦得名為  
阿毗達磨又由此故發起殊勝聞所成慧分  
別諸法自相共相建立諸法自相共相害實  
物愚及所緣愚以於諸法不增減故亦得名  
為阿毗達磨又由此故發起殊勝生處得慧  
以於三藏十二分教能受能持思量觀察不



謬轉故亦得名為阿毗達磨復由如是資糧  
 攝持無漏慧根轉得明盛是故亦名阿毗達  
 磨問若阿毗達磨惟無漏慧根為自性者何  
 故此論復名阿毗達磨答阿毗達磨具故亦  
 名阿毗達磨如處處經中於彼彼具立彼彼  
 名此亦如是謂如於樂具立以樂名如伽他  
 說  
 食所乞食樂 衣隨得衣樂 經行山林樂  
 栖隱巖窟樂  
 飲食衣等體實非樂勝義樂者謂諸樂受或

永樂北藏

大毗婆沙論

有說者亦輕安樂然衣食等是樂具故於伽  
 他中亦說為樂又如於垢具立以垢名如伽  
 他說  
 女是梵行垢 女損害衆生 苦梵行所淨  
 非由水能洗  
 女實非垢勝義垢者謂貪瞋癡然伽他中說  
 女為垢是垢具故又如於漏具立以漏名如  
 說七漏是損害是燒然是苦惱根等實非漏  
 是漏具故立以漏名勝義漏惟三謂欲漏有  
 漏無明漏又如於隨眠具立隨眠名如契經

第一〇六册

說苾芻當知色是隨眠隨增隨死若隨增即隨死若隨死即隨取若隨取即隨縛色非隨眠勝義隨眠惟有七種然經說色是隨眠者隨眠具故又如於味具立以味名如契經說苾芻當知眠味妙色色是魔鉤眠實非味勝義味者謂所生愛然契經說眠味色者是味具故又如於欲具立以欲名如契經說欲者是何謂五味欲又如頌言  
如是五妙欲 可愛可欣樂 可意欲所牽 能令心染著

色等非欲勝義欲者謂於彼愛然經頌說彼是欲者是欲具故又如於退具立以退名如契經說有五因緣令時解脫阿羅漢退一營事業二樂戲論三和諍訟四好遠行五遇長病非營事業是能退體勝義退者謂一切不善有覆無記法然契經中說營事等是能退者謂退具故又如於業具立以業名如契經說有三種意故思惡不善業若作增長感非愛異熟謂貪欲瞋恚邪見非貪欲等是實意業勝義意業謂意俱惡思然契經中名意業

者謂是不善意業具故又如於異熟因具立  
異熟因名如彼尊者無滅所說我由一食異  
熟因故七生天上七生人中於最後身得盡  
諸漏非即一食是異熟因勝義異熟因者謂  
諸不善善有漏法然彼尊者即說一食爲異  
熟因是彼具故如於此等處處經中以彼彼  
名說彼彼具此論亦爾是阿毗達磨具故亦  
名阿毗達磨如是勝義阿毗達磨自性惟是  
無漏慧根一界一處一蘊所攝若兼相應及  
取隨轉三界二處五蘊所攝餘資糧等皆是

世俗阿毗達磨是名阿毗達磨自性如說自  
性我物自體相分本性應知亦爾已說自性  
所以今當說以何義故名阿毗達磨阿毗達  
磨諸論師言於諸法相能善決擇能極決擇  
故名阿毗達磨復次於諸法性能善覺察能  
善通達故名阿毗達磨復次能於諸法現觀  
作證故名阿毗達磨復次法性甚深能盡原  
底故名阿毗達磨復次諸聖慧眼由此清淨  
故名阿毗達磨復次能善顯發幽隱法性故  
名阿毗達磨所知法性無始幽隱離此無有

能顯發故復次所說法性無有乖違故名阿毗達磨若有能於阿毗達磨自相共相極善串習必無有能如法問難令於法性有少違故復次能伏一切外道他論故名阿毗達磨阿毗達磨諸大論師邪徒異學無能敵故尊者世友作如是說常能決擇契經等中諸法性相故名阿毗達磨復次於十二支緣起法性能善覺了故名阿毗達磨復次以能現觀四聖諦法故名阿毗達磨復次善說修習八聖道法故名阿毗達磨復次能證涅槃故名

阿毗達磨復次能於諸法以無量門數數分別故名阿毗達磨大德說曰於雜染清淨繫縛解脫流轉還滅法以名身句身文身次第結集安布分別故名阿毗達磨脇尊者言此是究竟慧此是決斷慧此是勝義慧此是不謬慧故名阿毗達磨尊者妙音作如是說求解脫者修正行時能為分別所未了義謂此是苦此是苦因此是苦滅此是趣滅道此是加行道此是無間道此是解脫道此是勝進道此是向道此是得果能正分別如是等義

故名阿毗達磨法密部說此法增上故名阿毗達磨如有頌言

慧於世間尊 能決擇趣向 以正了知故 老死盡無餘

化地部說慧能照法故名阿毗達磨如契經

說一切照中我說慧照最爲上首譬喻者說

於諸法中涅槃最上此法次彼故名阿毗達

磨聲論者言阿謂除棄毗謂決擇此法能除

棄決擇故名阿毗達磨何所除棄謂結縛隨

眠隨煩惱纏何所決擇謂蘊界處緣起諍食

及沙門果菩提分等尊者佛護作如是說阿

毗者是助言顯現前義此法能引一切善法

謂諸覺分皆現在前故名阿毗達磨尊者覺

天作如是說阿毗者是助言顯增上義如增

上慢者名阿毗慢增上覺者名阿毗覺增上

老者名阿毗老此亦是此法增上故名阿

毗達磨尊者左受作如是說阿毗助言顯恭

敬義如恭敬稽首者名阿毗稽首恭敬供養

者名阿毗供養此亦是此法尊重可恭敬

故名阿毗達磨問何故此論名發智耶答諸

勝義智皆從此發此為初基故名發智復次  
 此論應名智安足處諸勝義智此為根本依  
 此而立是故名為智安足處復次諸勇健智  
 此最能發發勇智緣故名發智復次諸智彼  
 岸依此能到故名發智開發諸法自相共相  
 無有能妙此論者故復次世出世智皆依此  
 發智之妙門故名發智問此論勝利其相云  
 何答隨順解脫斷除繫縛順空無我違我我  
 所顯無我理遮數取趣開覺意息昏迷遣愚  
 癡生智慧斷疑網與決定背雜染向清淨訶

流轉讚還滅捨生死得涅槃摧破一切外道  
 邪論成立一切佛法正論此論勝利其相如  
 是

阿毗達磨大毗婆沙論卷第一 說一切有部發智

阿毗達磨大毗婆沙論卷第二

心二

五百大阿羅漢等造

唐三藏法師玄奘奉詔譯

雜蘊第一中世第一法納息第一之一

云何世第一法如是等章及解章義既領會

已次應廣釋問何故作此論答為欲分別契經義故謂契經中佛世尊說若有一類於諸行中不能如理思惟能起世第一法無有是處若不能起世第一法能入正性離生無有是處若不能入正性離生能得預流一來不

還阿羅漢果無有是處若有一類於諸行中能如理思惟起世第一法斯有是處乃至廣說契經雖說世第一法名而不廣辯世第一法義契經既是此論依處彼所不顯示者今應廣分別之由是因緣故作斯論問何故作論依契經耶答彼作論者意欲爾故隨彼意欲而作此論不違法性何煩徵詰復次一切阿毗達磨皆為解釋契經中義以廣分別諸經義故乃得名為阿毗達磨故彼尊者於諸經中纂集種種不相似義分別解釋立為雜

蘊乃至纂集種種見趣分別解釋立爲見蘊  
然於所立八種蘊中皆具分別一切法相問  
何故尊者論初先說世第一法爲順次第說  
諸功德爲逆次第說諸功德爲依順決擇分  
先後次第而說耶設爾何失若順次第說諸  
功德者應先說不淨觀或持息念等次說念  
住次說三義觀次說七處善次說煖次說頂  
次說忍然後應說世第一法若逆次第說諸  
功德者應先說阿羅漢果次說不還次說一  
來次說預流次說見道然後應說世第一法

若依順決擇分先後次第而說者應先說煖  
次頂次忍然後應說世第一法如尊者妙音  
生智論說云何煖云何頂云何忍云何世第  
一法若不依此三種次第即所造論有雜亂  
失如佛在世尊者大迦多衍那成就無邊希  
有功德於無量法自相共相無障礙智隨欲  
現前勇猛精進恒無斷絕已能善入阿毗達  
磨文義大海無邊覺慧不可傾動如妙高山  
爲大論王能伏他論自所立論無能當者今  
尊者迦多衍尼子亦復如何故造論先說



世第一法耶答諸師於此種種異說謂或有說今於此中非順次第說諸功德非逆次第說諸功德亦不依彼順決擇分先後次第而說但作論者意欲爾故隨彼意欲而作此論不違法相何煩徵詰有作是說阿毗達磨性相所顯非如契經寧求次第阿毗達磨以廣論道決擇諸法真實性相此既繁雜不應於中求其次第若求次第文但增繁於義無益復有說者不應詰問作論者意以經先說世第一法廣說如前今此論師依經造論故亦

先說世第一法問置作論者何故經中世尊先說世第一法答觀所化者分齊說故謂佛觀所化者已得下中品忍未得上品忍及世第一法欲令得故說如是言若有一類於諸行中不能如理思惟能起世第一法無有是處乃至廣說此中如理思惟顯上品忍世第一法正說自名故佛世尊觀所化者修行分齊作如是說或有說者為止於此多誹謗故謂他於此世第一法起多誹謗是故先說多誹謗者謂於自性及於名界現前退中皆起

誹謗於自性起誹謗者謂或有說信等五根以爲自性於名起誹謗者謂或有說此名種性地法不應名世第一法於界起誹謗者謂或有說此是欲色界繫或復有說此色無色界繫或復有說此是三界繫或復有說此是三界繫及不繫或復有說此非三界繫亦非不繫於現前起誹謗者謂或有說此法多念相續現前於退起誹謗者謂或有說此法可退爲止如是種種誹謗是故先說世第一法有餘師說諸有漏法皆不牢固如糞掃淤泥

誰於此中牢固最勝譬如醍醐謂世第一法是故先說有說此法隨順無我是故先說謂此論中讚歎出離解脫涅槃隨順無我非如外典讚歎受用諸欲樂具隨順我執世第一法有法聲故旣順無我與此論同非如煖等無有法聲不同此論隨順無我故此先說世第一法有說此法世法中勝是故先說謂諸論中此論最勝世第一法世法中勝與此論同是故先說有說若有住此法時名佛出世真實利益彼於爾時得無障礙受用勝義聖

法財故謂佛出世衆生入法凡有二種一者世俗二者勝義世俗者謂剃除鬚髮被以法服正信出家勝義者謂世第一法無間引生苦法智忍世俗入法有二種過一者破戒二者歸俗勝義入法無如是過隨其種性自在證得大乘功德無退失故有說若有住此法時無始時來聖道門閉今創能開捨未曾捨諸異生性得未曾得所有聖道是故先說世第一法有說若有住此法時捨異生名得聖者名捨異生數得聖者數捨異生分齊得聖

者分齊捨異生種性得聖者種性是故先說世第一法有說若有住此法時得心不得心因得明不得明因得受不得受因餘心所亦爾是故先說世第一法有說若有住此法時捨曾習緣得未曾習緣捨共得不共捨世間得出世間捨有愛味得無愛味捨耽嗜依得出離依是故先說世第一法有說爲斷疑異生性是故先說世第一法謂或有疑此異生性既無有始應亦無終今顯其有終即世第一法有說若有住此法時異生過患異生變

異異生虛誑異生剛強悉不復起煖頂忍位  
或有起者是故先說世第一法有說異生起  
此法已要至非異生位方得命終如異生非  
異生如是未見諦已見諦未得果已得果未  
入正性離生已入正性離生未起現觀已起  
現觀住不定聚住正定聚無聖道有聖道無<sup>五</sup>  
證淨有證淨應知亦爾煖頂忍等即不決定  
是故先說世第一法有說若有起此善根惟  
一刹那必無停滯煖等不爾是故先說世第  
一法有說若有住此法時異生身中念住等

行修至究竟煖等不爾是故先說世第一法  
有說若有住此法時說名最初有漏心斷無  
漏心續餘位不爾是故先說世第一法有說  
此法能令異生可傾動身而不傾動是故先  
說如妙高山踞金輪上四方猛風不能傾動  
如是異生安住此法四倒惡見不能傾動餘  
異生位即不如是有說此法猶如明相能表  
始終是故先說謂如明相表晝分始及夜分  
終世第一法亦復如是顯聖道始及異生終  
如表始終如是能表正度已度趣入已出加

行究竟應知亦爾餘位不然有說顯此住同  
法中能有異相是故先說謂世第一法雖苦  
諦攝而無間引生初滅苦道雖有世間流轉  
老死薩迦耶攝而能引生初滅彼道煖等不  
然有說顯此雖是世間緣而能無間引初出  
世緣餘位不爾是故先說如世間出世間緣  
如是有垢無垢有過無過有毒無毒有濁無  
濁有身見事無身見事有顛倒事無顛倒事  
有愛事無愛事有隨眠事無隨眠事緣應知  
亦爾是故先說有說若有住此法時有勢有

力能有所作猶如健夫謂於爾時無間引起  
聖初止觀及起聖見慧首創冠餘覺支鬘餘  
位不爾是故先說世第一法有說此法其用  
最勝能捨異生性得聖性捨邪性得正性無  
間能入正性離生餘法不然是故先說世第  
一法有說行者住此法時能捨輕動過妬羅  
綿柳氎絮等諸異生性能於聖教安住不動  
如天帝幢是故先說世第一法有說行者住  
此法時捨無始來令心心所成不質直煩惱  
惡見得未曾得令心心所成質直性無漏聖

道有說行者住此法時捨五補特伽羅同分  
謂五無間者得八補特伽羅同分謂四向四  
果是故先說世第一法有作是言世第一法  
由三事故論先說之一順經說二止多謗三  
此刹那得初聖果順經止謗如前廣說即此  
刹那得初聖果者謂彼與世第一法爲無間  
士用果以如是等諸因緣故此論先說世第  
一法有餘師言尊者於此依逆次第宣說諸  
法問若爾此論即應先說阿羅漢果次說不  
還次說一來次說預流次說見道然後應說

世第一法何故先說世第一法耶答此中逆  
說異生身中淨染諸法非說一切初說云何  
世第一法廣說乃至云何爲煖此則逆說異  
生身中清淨品法次作是說此二十句薩迦  
耶見廣說乃至若無有見此則宣說異生身  
中雜染品法此二品法誰能了知七謂無我智  
是故第二智納息中作如是說頗有一智知  
一切法乃至廣說此無我智何由而生謂覺  
緣起是故第三納息作如是說一補特伽羅  
此生十二支緣起乃至廣說此緣起覺何由

而起謂愛及敬是故第四納息作如是說云何愛云何敬乃至廣說如是愛敬何因而生謂慚及愧是故第五納息作如是說云何慚云何愧乃至廣說如是慚愧何由而有爲解法相是故第六納息作如是說色法生老無常乃至廣說此解法相何由而得謂捨無義修習有義是故第七納息作如是說諸修劣苦行當知無義俱乃至廣說誰捨無義修習有義謂能正思正思惟者是故第八納息作如是說云何思云何思惟乃至廣說雜蘊法

覺由何明淨謂由結斷是故次說第二結蘊如是結斷由何而證謂由諸智是故次說第三智蘊誰能生起斷結諸智謂無業障補特伽羅是故次說第四業蘊諸業多分依誰而生謂四大種故次第五說大種蘊大種所造勝者是何謂眼等根是故次說第六根蘊諸根清淨由何勢力謂得諸定是故次說第七定蘊有得定已起邪推求便復引生諸惡見趣爲今識相能速斷除故最後說第八見蘊雖於如是一一蘊中具攝諸法而隨增勝制

立蘊名故作是說由逆次說異生身中淨染諸法非說一切是故先說世第一法云何世第一法答若心心所法爲等無間入正性離生是謂世第一法有作是說若五根爲等無間入正性離生是謂世第一法問誰作此說答是舊阿毗達磨者說問彼何故作此說答爲遮餘部故作是說不必惟說五根爲性謂分別論者執信等五根惟是無漏一切異生悉不成就問彼部何故作此執耶答彼由契經故作此執謂契經說若有五根增上猛利

平等圓滿多修習故成阿羅漢諸漏永盡從此減下成不還者次復減下成一來者次復減下成預流者若全無此信等五根我說彼住外異生品由此經故彼執五根惟是無漏爲遮彼意故舊阿毗達磨者說世第一法以五根爲自性世第一法在異生身故知五根亦通有漏異生定不成有爲無漏故問若執五根體惟無漏有何過失答便違契經如契經說我若於此信等五根未如實知是集是沒是味是過患是出離未能超此天人世間



及魔梵等乃至未能證得無上正等菩提乃至廣說非無漏法可作如是品類觀察分別論者作如是言世尊此中說自相觀謂我於此信等五根未如實知集等自相未能超此天人世間及魔梵等乃至廣說云何觀無漏九是集自相耶謂此必因親近善士聽聞正法如理作意法隨法行而集起故云何觀此是沒自相謂要未知當知根沒已知根起已知根沒具知根起故云何觀此是味自相謂此亦是愛所緣故若爾無漏愛所繫耶不爾如

仁許無漏法是煩惱境而非所繫我宗亦然愛緣無漏而不能繫斯有何失云何觀無漏是過患自相謂觀無漏是無常故云何觀無漏是出離自相謂涅槃時必棄捨故如契經說般涅槃時一切有爲皆悉棄捨彼言非理所以者何謂此經說我若於此信等五根未如實知是集沒味過患出離未能證得諸漏永盡無上菩提非自相觀能盡諸漏故彼所說決定非理由此五根非惟無漏又執五根惟無漏者復違經說如契經說惟願世尊演

說法要所以者何有諸有情處在世間或生或長有利根者有中根者有軟根者乃至廣說又契經說必芻當知我昔未轉正法輪時曾以佛眼觀諸有情處在世間或生或長有利中軟諸根差別善容貌善調伏薄塵垢若不聞法退失勝利信等五根若惟無漏應利根者是阿羅漢中根者是不還軟根即是一來預流若爾世尊未轉法輪應已名轉一切聖者於諸世間已充滿故復轉法輪應成無用分別論者作如是言此中根名說所依處

不說根體於我何違彼如是言亦不應理違餘經故謂餘經說生聞梵志往世尊所而白佛言喬答摩尊說根有幾佛言我說二十二根所謂眼根乃至廣說彼經豈亦說根所依彼此二經根聲不異一謂根體一謂所依非所極成是自妄執故定應許信等五根亦通有漏問若通有漏彼所引經當云何釋答信等五根實通有漏彼經一向說無漏者所以者何依無漏根建立聖者有差別故有說彼經惟說聖道所以者何聖者差別依聖道說

非世俗故問彼經又說若全無此信等五根  
我說彼住外異生品復云何通答斷善根者  
名外異生謂諸異生總有二種一內二外不  
斷善根說名為內斷善根者說名為外彼經  
意說若全無此信等五根我說名為斷善根  
者故所引經於我無失或說此是經部所說  
謂經部師亦為遮遣分別論者如前所執故  
作是言世第一法五根為性非惟爾所有說  
此是犢子部宗彼部師執世第一法信等五  
根以為自性惟此五根是自性善餘雜此故

言得善名由此五根建立一切賢聖差別不  
由餘根如契經說若有五根增上猛利平等  
圓滿多修習故成俱解脫從此減下成慧解  
脫次復減下成身證次復減下成見至次復  
減下成信解次復減下成隨法行次復減下  
成隨信行問今此論宗與犢子部何相關預  
而叙彼說答為令疑者得決定故謂彼與此  
所立義宗雖多分同而有少異謂彼部執世  
第一法惟以信等五根為性諸異生性一向  
染污謂欲界繫見苦所斷十種隨眠為自性

故隨眠體是不相應行涅槃有三種謂學無學非學非無學立阿素洛爲第六趣補特伽羅體是實有彼如是等若六若七與此不同餘多相似勿有疑彼與此皆同故叙彼宗遮顯有異今應問彼若惟五根是自性善所餘善法自性是何若謂彼是不善無記雜五根故亦名善者如是五根與彼相雜何故不名不善無記然信等五與所餘法同一所依同一行相同一所緣一起一住一滅一果同一等流同一異熟而言五根是自在善餘相雜

故假立善名但順妄情不應正理勿有此過故應說言世第一法根非根性尊者法救作如是言諸心心所是思差別故世第一法以思爲自性尊者覺天作如是說諸心心所體即是心故世第一法以心爲自性彼二尊者作如是言信等思心前後各異無一並用信等五根爲等無間入見道者約容有義故作是言信等五根能入見道謂或有用信思信心爲等無間入於見道乃至或用慧思慧心爲等無間入於見道若爾應用不相应法爲

等無間入於見道彼作是言許亦何失如他宗說心體前後雖不相應而有所緣能為無間入於見道我宗亦爾信等思心雖復自體無相應義而有所緣能為無間入於見道斯有何失有大過失所以者何若信思心為等無間入見道者既無精進及念定慧應有懈怠忘念散亂惡慧能入見道如是乃至若慧思心為等無間入見道者既無有信精進念定應有不信懈怠忘念散亂能入見道如是豈不成大過失為遮如是種種異執故復說

言於此義中若心心所法為等無間入正性離生是謂世第一法於此義中者謂於此不顛倒此宗此論此蘊此納息此品類此順契經我及諸餘同梵行者所許義中如是尊者迦多衍尼子欲顯自宗世第一法以根非根相應俱有心心所法為其自性問世第一法與苦法智忍為等無間緣名入見道為此滅已方名入者何故此中不言已入若此住位即名入者異生聖者應成雜亂有作是言滅已

名入問若爾此文應說已入爾時見道名已  
生故答應言已入而說入者此於究竟說加  
行聲如今來聲說已來事如世間說大王今  
者從何處來彼雖已來而說今來此亦如是  
又如已斷而說今斷如契經說斷樂斷苦乃  
至廣說離欲染時若根已斷今離第三靜慮  
染樂根斷時乃說爲斷豈非已斷而說今斷  
又如已解脫而說今解脫如契經說心解脫  
欲漏有漏無明漏離欲染時心於欲漏已得  
解脫今離非想非非想處染心於有漏無明

漏得解脫時乃說爲解脫亦於已解脫而說  
今解脫又如已受而說今受如契經說受樂  
受時如實知受樂受乃至廣說彼亦已受而  
說今受非於受時可了知故此亦如是雖是  
已入而說今入有餘師說此文應言無間而  
入正性離生彼言無理等無間入無間而入  
義有何異如是說者世第一法住時名入問  
若爾異生應即聖者入聖道故答無如是過  
世第一法至住位時苦法智忍在正生位未  
成就故不名聖者苦法智忍雖未已生以在

正生名等無間世第一法爾時爲彼等無間緣故名爲入由此故說若心心所法爲等無間入正性離生是謂世第一法問若心心所法已入正性離生或當得入亦是世第一法不答亦是問若爾此中何故不說答若說正入當知則說已入當入若說現在當知則說過去未來其相一故思心差別論者作如是言若信思心爲等無間入見道者惟信思心但爲同類等無間緣如是乃至若慧思心爲等無間入見道者惟慧思心但爲同類等無

間緣相似相續論者作如是言心心所法但爲同類等無間緣謂心與心非心所心所與心所非心諸心中受與受非餘想等亦爾然諸心所非恒相應遇別緣起謂若欣前境起樂受苦心三厭前境起苦受若於境中庸起不苦不樂受若欲有所領納生受若欲取像生想若欲有所作生思乃至若欲有所決擇生慧故諸心所非恒相應若爾已起心心所法應不皆作等無間緣彼作是言一切能作等無間緣然非無間如他宗許出無想時雖五

百劫無心心所而用入位心心所法爲今出位等無間緣我宗亦爾雖同類法多時間斷而前爲後等無間緣斯有何失彼言無理所以者何有心無心義各別故又相應法有即與果有未與果不應理故未生心等非等無間預作彼緣不應理故又彼違害品類足說如說云何心等無間法謂心無間餘心心所法或已生或正生及無想定滅盡定或已生或正生又若爾者復有別過謂若從有尋有伺地心心所法無間無尋惟伺地或無尋無

伺地心心所法現在前前地已起心心所法應非後地等無間緣不相似故乃至若從無尋無伺地心心所法無間無尋惟伺地或有尋有伺地心心所法現在前說亦如是善不善無記等心心所法展轉無間其過亦爾前十五若非後等無間緣後既無緣應不得起若謂後起由前隔越同類諸法等無間緣此亦然在有心位隔越爲緣不應理故又初無漏及無始來曾所未起殊勝有漏彼既無有前起同類等無間緣應不得起又彼所言有大



過失謂貪無間應常起貪無時伏貪起不淨  
觀若瞋無間應常起瞋無時伏瞋起慈悲觀  
若癡無間應常起癡無時伏癡起因緣觀起  
我見等如理應知執異類起無近緣故又此  
勝善曾未起故是則善心無由得起若爾則  
無得解脫義勿有如是種種過失是故應許  
前生心聚爲後生聚等無間緣若等不等前  
於後生開避力同如穀豆聚問世第一法現  
在前時所修未來心心所法彼法亦是世第  
一法不有說彼非世第一法所以者何以此

中說若心心所法爲等無間入正性離生是  
謂世第一法彼未來者既不能作等無間緣  
是故彼非世第一法又彼若是世第一法則  
世第一法應有多心便違後文世第一法應  
言一心非衆多心如是說者彼法亦是世第  
一法若彼法非世第一法便與智蘊所說相  
違如說若有未曾得道現在前時修餘未來  
彼種類道若執彼非世第一法云何名爲彼  
種類道問彼不能作等無間緣如何可名世  
第一法答彼雖不作等無間緣而能隨順由

起得故譬如苾芻與僧欲法謂如僧眾布灑  
 他時有諸苾芻雖不在眾由與欲故得布灑  
 他諸餘僧事亦得成立如是未來所修種類  
 雖不能作等無間緣而起自得顯相隨順設  
 彼不起顯相順得此不能作等無間緣此能  
 為緣由彼順力彼於聖道起不礙力強故問  
 若彼亦是世第一法此中本論何故不說答  
 應說而不說者當知此義有餘復次若有能  
 作等無間緣此中即說彼不能作等無間緣  
 是故不說復次若行世者此中說之彼不行

世是故不說復次若能取果與果此中說之  
 彼不能取果與果是故不說復次若因長養  
 得而亦在身者此中說之彼雖因長養得而  
 不在身是故不說復次若有勢力能修未來  
 此中即說彼無修力故不說之復次若心彼  
 因彼心此果此中即說彼法不爾故不說之  
 復次若法酬因亦能取果在身緣境此中即  
 說彼法不爾故不說之復次若具二修此中  
 即說彼惟得修無行修義故不說之復次若  
 有作用此中說之彼無作用是故不說問若

爾何故此後文說世第一法非多心耶答彼  
說現世有作用者惟有一心非說一切若說  
一切實有多心未來世中有多品種類同  
故雖非所修尚得名為世第一法況所修者  
而非是耶故有問言頗有相應世第一法而  
不與苦法智忍作等無間緣耶答有謂即未  
來所修種類問世第一法隨轉色心不相應  
行為是世第一法不有作是說彼非世第一  
法由此中言若心心所法為等無間入正性  
離生是謂世第一法彼不能作等無間緣是

心二

十七

故不名世第一法如是說者彼法亦是世第  
一法問彼既不作等無間緣云何得名世第  
一法答彼雖不作等無間緣而能隨順由彼  
與此心心所法一起一住一滅一果一等流  
一異熟極親近故問若爾此中何故不說答  
應說而不說者當知此義有餘復次若法能  
作等無間緣此中即說彼法不爾故不說之  
復次若法因長養得而有所緣此中即說彼  
法不爾故不說之復次若法相應有所依有  
行相有所緣有警覺此中說之彼法不爾是

故不說故有問言頗有現在世第一法非苦  
法智忍等無間緣耶答有謂此隨轉色心不  
相應行

阿毗達磨大毗婆沙論卷第二

說一切有部發智

阿毗達磨大毗婆沙論卷第三

心三

五百大阿羅漢等造

唐三藏法師玄奘奉詔譯

雜蘊第一中世第一法納息第一之二

問已知世第一法隨轉生住老無常亦是世

心三

第一法彼得為亦是世第一法不設是或非俱有何失若彼得亦是世第一法者得聖果已順決擇分應重現前若彼得非世第一法者何故沙門果得是沙門果而世第一法得非世第一法耶答彼得定非世第一法得聖

果已順決擇分不重起故問何故沙門果得是沙門果而世第一法得非世第一法耶答沙門果成就所顯故沙門果得是沙門果世第一法等無間緣所顯彼得既非等無間緣亦不隨順如彼生等故彼得非世第一法煖頂忍得亦非煖等勿得聖已重現前故有作是說彼得亦是世第一法問若爾得聖果已順決擇分應重現前答許彼一分現前亦無有過謂相應者不重現前不相應者有重現前煖頂忍得亦復如有餘師說彼俱起得

亦是世第一法後起者非故無前失煖等亦爾評曰若彼俱起若後起得一切皆非世第一法種類同故煖等亦爾是故初說於理爲善問何故世第一法生住老無常亦是世第一法而得非耶答生等與彼同一果相隨行不相離常和合無前無後相與所相未嘗相離由此亦是世第一法得與彼法不同一果不相隨行性相離不和合或前或後得與所得有時相離譬如樹皮或時離樹是故得非世第一法煖頂忍得亦復如是問世第一法

爲幾念住答現在惟一雜緣法念住未來具四似見道故問世第一法爲幾緣答爲四緣謂因等無間所緣增上緣爲因緣者謂與彼相應俱有同類等法爲因緣爲等無間緣者謂與苦法智忍爲等無間緣爲所緣緣者謂與能緣此心心三所法爲所緣緣爲增上緣者謂除自性與餘一切有爲法爲增上緣問世第一法有幾緣答有四緣有因緣者謂此相應俱有同類等法有等無間緣者謂已生增上忍有所緣緣者謂欲界五蘊有增上緣者

謂除自性餘一切法問文雖不說義必應有云何出世第一法耶答苦法智忍是謂此能持一切聖道故有餘師說金剛喻定是謂此能得一切結盡遍知果故有作是說初盡智是謂此能持一切無學法故或有說者阿耨多羅三藐三菩提是謂於一切有為法中此最勝故復有說者涅槃界是謂於一切有為無為法中此最勝故有說阿羅漢最後聖道刹那是謂如異生位最後刹那心名世第一法如是阿羅漢最後刹那無漏心名出世第

一法有說阿羅漢最後心是謂如異生位最後心是世第一法如是阿羅漢最後心是出世第一法評曰彼不應作是說以阿羅漢最後心非出世法故此諸說中初說為善由此能任持一切聖道故何故名世第一法乃至廣說問何故作此論答前雖說世第一法自性而未說彼立名因緣今欲說故譬如有人世稱最勝理應說彼立名因緣為以族姓為色為力富貴眷屬名最勝耶此亦如是故作斯論何故名世第一法答如是心心所法於

餘世間法爲最爲勝爲長爲尊爲上爲妙故名世第一法此心心所於餘世法爲都勝故說名第一爲分勝故名第一耶設爾何失若都勝故名第一者此豈能勝現觀邊世俗智然現觀邊所修世俗智是見道眷屬隨屬見道慧力殊勝此法不爾又此豈勝雜修靜慮然彼等至及所感生不共異生此法不爾又此豈勝初盡智時所修善根然修彼時離一切障所依清淨此法不爾又此豈勝空空無願無願無相無相三三摩地然彼尚能厭惡

聖道況於有漏此法不爾若分勝故名第一者煖頂忍等應亦名第一各勝彼彼下位善根故有作是說此法都勝故名第一然約能開聖道門說非據一切謂現觀邊世俗智等雖有如前所說勝事然皆無力開聖道門此法獨能是故都勝或有說者此法於餘一切事勝故名第一謂現觀邊世俗智等所有勝事皆由此成所以者何彼諸勝事若無此法開聖道門體尚不修況有勝用要由此法開聖道門方修彼體乃有勝用彼諸勝事既由



此成故此於餘一切事勝有餘師說此法分  
勝故名第一問若爾煖等應亦名第一各勝  
彼彼下位善根故答彼於二分中俱非最勝  
故謂世善法總有二分一依異生二依聖者  
世第一法雖於聖者世俗智者等不名最勝而  
於異生所得靜慮無量解脫勝處遍處乃至  
所得第一有思及不淨觀持息念諸念住三  
義觀七處善煖頂忍中皆悉最勝煖等不爾  
故此獨稱世第一法問此何義故名第一耶  
答此最勝故能引第一故得第一果故趣第

一性故是第一義有作是說此能摧伏第一  
有故是第一義有餘師說此是異生最後心  
故如高幢頂更無有上是第一義問此中所  
說為最為勝為長為尊為上為妙有何差別  
或有說者無有差別皆是讚述第一義故復  
有說者亦有差別且名則差別謂此名最乃  
至名妙復次對諸善根亦有差別謂此對聞  
所成名為最對思所成名為勝對不淨觀持  
息念念住等名為長對煖名為尊對頂名為  
上對忍名為妙復次約所依地亦有差別謂

此依未至定名為最依初靜慮名為勝依靜  
慮中間名為長依第二靜慮名為尊依第三  
靜慮名為上依第四靜慮名為妙復次依義  
不同亦有差別謂此至邊頂故名為最上品  
攝故名為勝作吉祥故名為長體昇進故名  
為尊性堅牢故名為上滿所願故名為妙復  
次體用有異亦有差別謂此能作苦法智忍  
等無間緣故名為最超過一切異生善根故  
名為勝映奪一切世俗善根故名為長能建  
勝德故名為尊無二分故名為上似無漏故

名為妙復次相用有異亦有差別謂是異生  
最後心故猶如樹端名為最能開聖道門故  
名為勝根猛利故名為長以於一切順決擇  
分此最上故名為尊折伏一切煩惱怨故名  
為上引愛果故名為妙有餘師說如是六句  
以後釋前故有差別謂此最故名第一勝故  
名最長故名勝尊故名長上故名尊妙故名  
上由此故名世第一法復次如是心心所法  
為等無間捨異生性得聖性捨邪性得正性  
能入正性離生故名世第一法捨異生性者

謂此心心所法能捨異生性問誰正能捨異  
生性耶爲世第一法爲苦法智忍設爾何失  
若世第一法正能捨異生性者云何住彼能  
捨彼耶若苦法智忍正能捨異生性者此在  
何位爲生時捨爲滅時捨若生時捨者云何  
未來能有所作若滅時捨者彼性已捨復何  
所捨有作是說世第一法正能捨異生性問  
此既是異生法云何住彼而能捨彼答住彼  
捨彼亦無有過如調御者乘象調象乘馬調  
馬乘船御船乘車御車如勝怨士昇怨害怨

如伐樹人昇樹伐樹世第一法亦復如是依  
異生性而能捨之或有說者苦法智忍正能  
捨異生性謂正生時捨異生性於正滅位能  
斷欲界見苦所斷十種隨眠如燈生時發明  
破暗滅時燒炷熱器盡油問云何未來能有  
所作一法二用心三豈應然答於義無違六許亦  
何失謂一切法能於未來有作用者總有三  
類一者內法如苦法智忍二者外法如日等  
光明三者內外法如諸生相一燈多用世所  
共知苦法智忍二用何失有餘師言世第一

法苦法智忍更互相資捨異生性謂世第一法與異生性雖恒相違而力劣故不能獨捨由此引生苦法智忍共相助力捨異生性譬如羸人依因健者更相助力能伏怨家由此因緣世第一法如無間道苦法智忍如解脫道捨異生性是故世第一法與異生性成就得俱滅苦法智忍與異生性不成就得俱生得聖性者謂此心心所法能得苦法智忍以能任持一切聖法故且說彼以爲聖性又餘聖道雖亦聖性攝然非此所得故不說之有

說見道皆是聖性有餘師說一切聖道皆是聖性若不爾者修道無學道中應不成就聖性是則不應名爲聖者問世第一法惟能引得苦法智忍於苦法智尚不能得況能得餘云何乃言此得聖性答一切聖道能成聖者皆名聖性種類同故世第一法得彼一分亦名爲得如說燒衣捨邪性者謂此心心所法能捨三種邪性一業邪性二趣邪性三見邪性業邪性者謂五無間業趣邪性者謂三惡趣見邪性者謂五顛倒見問於此位中業趣

邪性先不成就道類智時捨見邪性乃得究竟如何可說此位能捨三邪性耶答由三緣故此位名捨一由不作故名捨謂業邪性二由不往故名捨謂趣邪性三由不行故名捨謂見邪性問增上忍時三緣已具何故此位乃說捨耶答今破彼依故說捨彼問何謂彼依答無覆無記異生性是謂諸煩惱依異生性害諸有情令於生死受諸苦故如師子王依止無覆無記窟穴能害種種傍生等類世第一法能捨彼依異生性故說名捨彼有餘

師說苦法智忍是彼對治世第一法引之令生故說捨彼問業趣邪性是修所斷苦法智忍如何能治答苦法智忍能為五種對治謂捨斷持不作不往對治捨對治者謂此能捨異生性故斷對治者謂此能斷欲界見苦所斷十隨眠故持對治者謂此能持一切後位諸聖道故不作對治者謂此能令畢竟不作五無間故不往對治者謂此能令畢竟不往三惡趣故得正性者謂此心心所法能得苦法智忍以能任持一切正法故且說彼以為

正性又餘聖道雖亦正性攝然非此所得故  
不說之有說見道皆是正性有餘師說一切  
聖道皆是正性若不爾者修道無學道中應  
不成就正性是則不應名為聖者問世第一  
法惟能引得苦法智忍於苦法智尚不能得  
況能得餘云何乃言此得正性答一切聖道  
離顛倒故皆是正性種類同故世第一法得  
彼一分亦名為得如說燒衣能入正性離生  
者謂此心心所法能入見道問一切聖道皆  
是正性亦是離生何故此中獨說見道答一

切煩惱或諸貪愛令諸善根不得成熟及令  
諸有潤合起過雖皆名生而見所斷於此所  
說生義增上見道能為畢竟對治是故見道  
獨說離生諸不正見要由見道能畢竟斷故  
名正性世第一法無間引起故說能入正性  
離生復次一切煩惱或諸貪愛能令善根不  
得成熟及令諸有潤合起過皆名為生見道  
起已摧彼勢力令不復為增上生過由此見  
道獨名離生入正性言義如前說由此義故  
尊者妙音作如是說諸有情類善根成熟能

入見道是故見道名為離生復次見所斷惑  
令諸有情墮諸惡趣受諸劇苦譬如生食久  
在身中能作種種極苦惱事是故此惑說名  
為生見道能滅故名離生入正性言亦如前  
說復次有身見等剛強難伏如獸懽悞故說  
名生見道能滅故名離生入正性言亦如前  
說復次此中生名顯異生性能起暴惡諸惑  
業故見道捨彼故說離生餘如前說復次見  
修所斷諸煩惱聚展轉相助引無窮生見道  
起已摧彼勢力令不能招無窮生過是故見

道獨謂離生餘如前說復次異生身中煩惱  
惡業極不調順故說為生諸瑜伽師於此論  
沒見道拔彼置聖位中故名離生餘如前說  
復次見所斷惑猶如根栽生無窮過見道未  
拔故名離生餘如前說有餘師說此文應言  
入正性決定所以者何謂於此時從不定聚  
出入正定聚故復次行者爾時捨邪定聚所  
依異生性入正定聚所依見道是故名為入  
正性決定復次行者爾時捨五同分入八同  
分五同分者謂諸異生所有同分依彼能造

五無間故八同分者謂諸聖者所有同分依彼能得四向果故彼於爾時捨邪定分入正定分是故名入正性決定復次所入見道非邪定聚故名正性非不定聚故名決定有作是言此聲顯入正性任持以此尼夜摩聲亦顯任持義故如牛馬等所防飲處任持彼類不令放逸諸瑜伽師亦復如是住見道已終不放逸故說世第一法名入正性任持譬喻部師作如是說此聲顯入正性離繫以夜摩聲亦顯繫義尼謂遮止亦顯離義一切聖道

永離繫縛名尼夜摩餘如前說聲論者言此聲顯入正性不往以夜摩聲亦顯往義尼謂遮止亦顯不義諸瑜伽師得聖道已畢竟不往不善事趣是故聖道名尼夜摩餘如前說或有說者此文應言入正性如理一切聖道與理相應故名如理餘如前說復有說者此文應言從平等位入於正性平等位即是世第一法時正性言顯示苦法智忍等世第一法能從自位入於見道故名爲入問諸平等者亦正性耶答此應作順後句謂諸正性皆



是平等有是平等而非正性此體即是世第一法問何故世第一法是平等非正性耶答無始時來心心所法由諸煩惱惡行倒見所惱亂故成不正直世第一法伏除彼故令心心所轉成正直故名平等然是有漏有隨眠故不名正性復次佛及獨覺聲聞種性同於此位住上品故名平等餘如前說復次現行等故說名平等謂諸行者於此位中皆一刹那而現行故復次世第一法處在中位如懸稱繩故名平等如稱稱物繩懸其中若輕

重有偏則低昂不等世第一法亦復如是處在聖者異生中間若苦法智忍已生則偏住聖者品若增上忍正滅則偏住異生品是故惟此是平等位問爾時猶是異生位攝何故乃名住平等位答爾時雖在異生位中而背異生趣求聖位故名平等餘則不然復次世第一法與苦法智忍有四事等故名爲平等一者地等謂依此地起苦法智忍即依此地世第一法二者根等謂若苦法智忍與此根相應世第一法相應亦爾三者行相等謂若

此行相苦法智忍即此行相世第一法四者  
所緣等謂若緣此境起苦法智忍亦即緣此  
境起世第一法尊者世友作如是說有誦名  
入正性離生謂諸聖道永滅顛倒故名正性  
離隔生故復名離生謂無始來見修所斷二  
分煩惱展轉和合作諸惡事性剛強故說名  
爲生見道起已斷彼一分令彼展轉永乖離  
故世第一法爲此一分等無間緣故名爲入  
有誦名入正性決定謂見道位無漏相續必  
無餘隔故名決定後位不然餘如前說世第

一法當言欲界乃至廣說問何故作此論答  
雖已說彼立名因緣而未分別在何界繫今  
欲分別如人言勝已說勝因而未知彼所居  
國邑此亦如是故作斯論復次爲止他宗差  
別執故謂大衆部執世第一法通欲色界繫  
所以者何彼謂若地有現觀邊諸世俗智此  
地即有世第一法若犢子部執世第一法通  
色無色界繫所以者何彼謂若地有諸聖道  
此地即有世第一法若化地部執世第一法  
通三界繫所以者何彼謂若地有盡智時所

修善根此地即有世第一法若法密部執世  
第一法通三界繫及不繫所以者何彼謂如  
是世第一法既名世故通三界繫名第一故  
亦通不繫即彼部中復有別執世第一法非  
三界繫亦非不繫所以者何彼謂如是世第  
一法名第一故非三界繫以名世故亦非不  
繫為止如是他宗別執顯示已宗故作此論  
世第一法當言欲界繫色界繫無色界繫耶  
答應言色界繫此即顯示世第一法惟色界  
繫雖有此言而更應說其所以何故此法不

應言欲界繫耶答非以欲界道能斷蓋制纏  
令欲界纏不復現起乃以色界道能斷蓋制  
纏令欲界纏不復現起若以欲界道能斷蓋  
制纏令欲界纏不復現起如是世第一法應  
言欲界繫然非以欲界道能斷蓋制纏令欲  
界纏不復現起乃以色界道能斷蓋制纏令  
欲界纏不復現起是故世第一法不應言欲  
界繫此中斷制不復現起言顯示畢竟斷制  
不起義以欲界道不能畢竟斷蓋制纏令不  
復起是故無有世第一法色界不然故於彼

有問何故欲界無有畢竟斷制不起道而色界有耶答欲界非定地非修地非離染地是故無有畢竟斷制不現起道色界是定地是修地是離染地故有此道復次欲界不善根強善根弱故無此道色界善根強無不善根故有此道復次欲界不善勝因長養善不爾故色界善法勝因長養無不善故復次欲界不善如主有力善法如客無勢力故色界善法如主有力無不善故復次欲界不善能斷善根善不爾故色界善法斷不善根無不善

故復次欲界威儀不相敬難如夫妻故色界威儀共相敬難如母子故復次欲界威儀無所忌憚譬如王子與長者子同囹圄故色界威儀有所忌憚譬如王子與執惡子同囹圄故復次欲界善根與欲界惑必同一縛無力斷彼如人被縛不能自解況能害他此亦是色界善根與色界惑有不同縛地有別故尚能斷自界沉不能斷下復次欲界善根必為欲界愛所染著不能永棄如人親友雖劣不捨色界善根有非色界愛所染著地有別

故於自界愛尚能永斷況不能斷下地諸愛  
復次以有漏道斷煩惱時欣修自地厭斷於  
下欲界無下可厭斷故無有能畢竟斷制不  
起道色界有下可厭斷故得有能畢竟斷制  
不起道有餘師說此中斷制不起言顯示暫  
時斷制不起義以欲界道尚不能暫時斷蓋  
制纏令不復起況能畢竟是故無有世第一  
法色界不然故於彼有如暫時斷制不起畢  
竟斷制不起如有片無片有影無影有隨  
縛無隨縛摧枝幹拔根本伏纏垢害隨眠應

知亦爾問欲界可無畢竟斷制不起道豈亦  
無暫時斷制不起前耶答雖有此道而不可  
信所以者何以不堅牢不久住不流注非增  
上不相連續不久隨轉心於所緣速取速捨  
無勝熱 心三 諸煩惱故不能入正性離生如  
池水上有浮萍等蝦蟇小石投擲其中雖初  
暫離後即隨合如是欲界雖有暫時斷蓋等  
道而不可信廣說如前於色界中非惟有彼  
畢竟斷制不現起道而亦有彼暫時斷制不  
現起道深可保信所以者何以彼道堅牢久

住流注增上相連續久隨轉心於所緣不速  
取捨有勝勢力伏諸煩惱故能趣入正性離  
生如池水上有浮萍等龍象大石投入其中  
經久離散難可還合如是色界亦有暫時斷  
蓋等道而可保信廣說如前是故應知欲界  
無有斷蓋等道色界不爾由此應言世第一  
法惟色界繫非欲界繫問世第一法不能斷  
結何故乃言若以欲界道能斷蓋制纏令欲  
界纏不復現起如是世第一法應言欲界繫  
等答世第一法雖不斷結而此善根勝妙第

一在深遠處宜應與彼能斷結道同在一地  
是故應以此道證之復次世第一法引生見  
道定與見道同在一地見道既能斷諸煩惱  
故斷結道可爲此證復次世第一法既於欲  
界極生厭患應與能治欲界惑道同在一地  
故可引彼證此法有問若爾世第一法惟應  
在未至地惟未至地能斷欲界諸煩惱故上  
地應無答對治有二種一斷對治二厭壞對  
治未至地於欲界具二對治上五地於欲界  
雖無斷對治而有厭壞對治故彼亦有世第

心三

十五

一法尊者妙音作如是說色界六地於欲界  
惑皆得具有二種對治上五地道非不能斷  
由未至地先已斷故雖有斷力而無可斷譬  
如六人同一怨家而共議言隨於何處獲者  
便害於中一人先獲害之其餘五人雖有害  
力而無可害又如六人各持一燈相與次第  
入一暗室初燈入時諸暗皆破餘雖有力無  
暗可除又如日光初中後分無不皆與夜暗  
相違日初出時破暗皆盡餘雖有力無暗可  
破如是六地於欲界惑雖皆能斷廣說如前

問云何得知色界六地於欲界惑具二對治  
彼作是言依上五地入見道者於欲界斷分  
別作證別起無漏離繫得故若上五地於欲  
界惑無斷對治此事應無評曰不應作如是  
說彼於欲界煩惱畢竟無有能斷者故誰言  
彼地有無漏得於欲界斷分別作證而復引  
彼證此義耶是故前說於理為善問因論生  
論世第一法何故不能斷諸煩惱答世第一  
法彼於爾時善根微小法身未長而有威勢  
以善根微小法身未長故不能斷惑有威勢

故不爲煩惱故所摧伏如師子子身小未長而有威勢以身小未長故不能害獸有威勢故不爲諸獸之所侵害或有說者世第一法惟一刹那故不能斷問苦法智忍亦一刹那云何能斷答苦法智忍雖一刹那而有相續起故能斷惑世第一法無如是事故不能斷有餘師言世第一法加行道攝故不能斷要無間道方能斷故於此義中復有分別問何緣世第一法惟在色界繫耶答以彼色界能爲三道三地三根等無間緣又能引發初法

智品次類智品餘界不然故世第一法惟是色界繫問世第一法何緣定非欲界繫耶答欲界非定界非修界非離染界要定界修界離染界乃有世第一法故復次欲界是卑賤界是羸重界是下劣界要尊勝界細輕界勝妙界乃有世第一法復次若世第一法是欲界繫者便有能緣自性過故謂彼若是欲界繫者爲緣自性爲不能緣若緣自性有違理失自性不能取自性故若不能緣便違本論如後文說若緣此法起苦法智忍即緣此法



起世第一法苦法智忍遍緣欲界五蘊為境  
此亦應然是故世第一法決定非欲界繫

阿毗達磨大毗婆沙論卷第三

四三

部說一切有  
發智

音釋

評符兵切劇甚也  
不謂繩索也  
圍巨切圍丁切圍獄名  
龍力董切快郎  
計切龍快多惡

永樂北藏

大毗婆沙論

第一〇六册

永樂北藏

大毗婆沙論

第一〇六冊

阿毗達磨大毗婆沙論卷第四

心四

五百大阿羅漢等造

唐三藏法師玄奘奉詔譯

雜蘊第一中世第一法納息第一之三

何故此法不應言無色界繫耶答入正性離生先現觀欲界苦為苦後合現觀色無色界苦為苦聖道起先辦欲界事後合辦色無色界事若入正性離生先現觀無色界苦為苦後合現觀欲色界苦為苦聖道起先辦無色界事後合辦欲色界事如是世第一法應言

無色界繫然入正性離生先現觀欲界苦為苦後合現觀色無色界苦為苦聖道起先辦欲界事後合辦色無色界事是故世第一法不應言無色界繫此中入正性離生先現觀欲界苦為苦後合現觀色無色界苦為苦者謂見道中先別現觀欲界苦諦為苦行相後合現觀色無色界苦諦為苦行相問見道位中具觀四諦何故但說觀苦諦耶答見道位中先觀苦諦以相麤顯是故偏說問四種行相皆現觀苦何故但說苦行相耶答理應具

說而不說者當知此中是有餘說有說此文但應作如是說先現觀欲界苦後合現觀色無色界苦不應言爲苦而復言爲苦者有何意耶答四行相中苦最居首故且說苦類顯餘三有說以苦行相久遠所傳過去如來應正等覺皆於諦首標苦名故有說以苦行相惟屬苦諦故偏說之非常行相通屬三諦空非我行相屬一切法故有說此苦行相能違諸有能棄生死勝餘行相順厭心故乃至嬰兒雖得種種上妙飲食適欲食時有人語言

此食有苦即便棄捨是故偏說有說以苦行相易可信受謂内外道老少愚智皆信有苦是故偏說有說苦相麤顯易以智知纔說即了是故偏說如智於所知覺於所覺行相於所行根於根義能緣於所緣應知亦爾問何故行者見道位中先現觀欲界苦後合現觀色無色界苦耶答麤細異故謂欲界苦麤易可觀察故先現觀色無色界苦細難可觀察故後現觀如習射人先射麤物後射毛端此亦如是問若爾色界苦麤無色界苦細何故

行者俱時現觀答以觀行者於定不定二界差別起現觀故謂欲界苦不定界攝故別現觀色無色界苦俱定界攝故合現觀如定不定界修不修界離染不離染界應知亦爾有說欲界苦於觀行者現為逼惱猶如重擔故先現觀色無色界苦於觀行者則不如是故後現觀有說欲界苦是觀行者現所執受故先現觀色無色界苦則不如是故後現觀有說欲界苦於觀行者現生痛惱故先現觀色無色界苦不爾故後現觀有說欲界苦行者

現見故先現觀色無色界苦不爾故後現觀問若色無色界苦不見見者行者云何於彼現觀答現見有二種一執受現見二雜染現見彼觀行者於欲界苦具二現見於色無色界苦但有雜染現見猶如商人有財兩擔一自擔之二使人擔於自所擔具二現見謂輕重現見及財物現見於他所擔惟有一種財物現見此亦如有說欲界苦近故先現觀色無色界苦遠故後現觀如近遠與身俱不與身俱在自身在他身亦爾有說欲界苦有

三種謂善不善無記故先現觀色無色界苦  
但有二種謂善無記故後現觀有說修觀行  
者將入聖時必成就欲界異生性不成就色  
無色界異生性現觀法爾於成就者先起於  
不成就者後起有說見欲界苦時斷二種結  
謂不善無記故先現觀見色無色界苦時惟  
斷無記結故後現觀如不善無記有異熟無  
異熟生二果生一果無慚無愧相應無慚無  
愧不相當知亦爾有說如異生位謗苦諦  
時先謗欲界苦後謗色無色界苦今入聖位

信苦諦時亦先信欲界苦後信色無色界苦  
如謗信迷悟疑決應知亦爾是故於欲界苦  
先別現觀於色無色界苦後合現觀聖道起  
先辦欲界事後合辦色無色界事者謂見道  
中先別辦於欲界所應作事後合辦於色無  
色界所應作事問現觀辦事有何差別有作  
是言此無差別現觀即是所辦事故或有說  
者亦有差別且名即差別謂此名現觀此名  
辦事復次通達所緣是現觀斷諸煩惱是辦  
事復次現觀者謂智現觀辦事者謂事現觀

復次現觀者謂智遍知辦事者謂斷遍知如智遍知斷遍知智作證明行作證明解脫道果應知亦爾復次現觀者謂無間道所作辦事者謂解脫道所作如無間道所作解脫道所作斷繫得證離繫得除過失修功德出下賤入勝妙捨無義得有義盡愛膏油受無熱樂應知亦爾復有說者刹那是現觀相續是辦事如刹那相續入數入應知亦爾若入正性離生等者及舉非理順成是義問如於色界苦非先現觀而世第一法是色界繫如

是於無色界苦雖非先現觀何妨世第一法  
是無色界繫答以色界中有遍緣智能緣自  
地及緣上下故於色界苦雖非先現觀而世  
第一法得是色界繫無色界中無遍緣智雖  
緣自上而不緣下故世第一法非無色界繫  
復次入無色定除去色想非除色想能知欲  
界若緣此法起苦法智忍即緣此法起世第  
一法問此中復次理不應說應但說言入無  
色定除去色想乃至廣說所以者何是一門  
故有餘於此以義正文應作是言何故此法

不應言無色界繫答入無色定除去色想乃至廣說所以者何此於所問義是根本答故應作是說而不說者有何意耶答夫設言論法有二種一者方便二者根本先所說者是方便言論今所說者是根本言論根本異方便故復次言方便法在前故應如文說有作是說論道有二一者開縱二者遮奪此中前門是開縱論道後門是遮奪論道由此本文於義無失有餘師說此中前門顯苦法智忍但緣欲界後門顯世第一法與苦法智忍同

一所緣故彼定非無色界繫以無色定有除色想必不緣下有漏色故除色想定在四無色及彼上三近分地攝問有多處說除色想言謂此處說入無色定除去色想乃至廣說大種蘊說云何除色想謂有苾芻起如是勝解乃至廣說波羅衍拏亦作是說諸有除色想 能除一切身 於內外法中無有不見者 衆義品中亦作是說 於想有想非即離 亦非無想非除想



如是平等除色想 無有染著彼因緣

如是諸說義有何異答此蘊中說不緣下地  
流轉諸色名除色想大種蘊說遺積集色令  
不現前名除色想波羅衍拏眾義品說斷色  
界愛名除色想有說此處除色想者通四念  
住大種蘊說除色想者惟身念住波羅衍拏  
眾義品說除色想者惟法念住有說此處除  
色想者在七地攝謂四無色上三近分大種  
蘊說除色想者在第四靜慮攝波羅衍拏眾  
義品說除色想者亦在七地攝謂未至中間

四靜慮空無邊處近分有作是言大種蘊說  
除色想者是不共惟內道有故餘三是共有  
餘師說此蘊所說除色想者是共內外道俱  
有故餘三是不共如是名為諸說異於此義  
中復有分別問何緣世第一法非無色界繫  
耶答非田等故謂無色界於世第一法非田  
非器非地不能生長世第一法故於彼無復  
次若地有餘順決擇分彼地可有世第一法  
無色界無餘順決擇分是故無有世第一法  
復次若定容有遍觀三界四諦善根彼定可

有世第一法於無色定無此善根是故無有  
世第一法復次若定容有緣一切法無我行  
相彼地可有世第一法無色定中無此行相  
是故無有世第一法復次若地能修現觀邊  
世俗智彼地可有世第一法無色地中無如  
是事故彼無有世第一法復次若地有見道  
可有世第一法無色界中無有見道是故無  
有世第一法問因論生論何故無色界無見  
道耶答如前所說無世第一法因亦爲此證  
復有別義謂無色界奢摩他增故要毗鉢舍

那增地能有見道有餘於此雙遮二界謂欲  
界極麤故無色界極細故俱無世第一法復  
次欲界善根極羸劣故無色界善根極沉昧  
故俱無世第一法復次欲界極喧動故無色  
界極寂靜故俱無世第一法復次若地有遍  
緣智及斷結道心四彼地容有世第一法欲界雖  
有遍緣智而無斷結道無色界雖有斷結道  
而無遍緣智是故俱無世第一法問頗有二  
聖者同生一處於世第一法一成就一不成  
就耶答有謂一依初靜慮入正性離生一依

第二靜慮入正性離生彼俱命終生第二靜  
慮依初靜慮者不成就世第一法越地捨故  
依第二靜慮者猶成就世第一法生自地故  
問頗有二阿羅漢俱在欲界於世第一法一  
成就一不成就耶答有謂一依初靜慮入正  
性離生一依第二靜慮入正性離生彼俱命  
終生第二靜慮中有未離欲界俱得阿羅漢  
果依初靜慮者不成就世第一法越地捨故  
依第二靜慮者成就世第一法生自地故世  
第一法當言有尋有伺乃至廣說問何故作

此論答雖已說彼在色界繫而未分別彼在  
何地今欲分別如已知人所居國邑而未知  
彼所居宅等此亦如是故作斯論復次為令  
疑者得決定故謂先說言世第一法惟色界  
繫然色界中有三種地一有尋有伺地二無  
尋惟伺地三無尋無伺地而未顯示世第一  
法定在何地有諸善根惟有有尋有伺地如  
辭無礙解有諸善根惟在無尋無伺地如淨  
解脫後四勝處前八遍處有諸善根在有尋  
有伺及無尋無伺地如喜無量有說亦如初

二解脫前四勝處勿有生疑世第一法惟在一地或在二地今成立彼定在三地故作此論世第一法當言有尋有伺無尋惟伺無尋無伺耶答應言或有尋有伺或無尋惟伺或無尋無伺問何故顯示世第一法在三地耶答爲止餘部執此善根惟在一地謂或有執世第一法惟有尋有伺有相有警覺非等引屬異生緣諸行惟有尋有伺者思構轉故有相者緣名起故有警覺者有功用故非等引者非等引者相續轉故屬異生者異生得故

緣諸行者緣有爲故爲止彼執顯此善根通在三地云何有尋有伺答若依有尋有伺三摩地入正性離生彼所得世第一法謂依未至及初靜慮入正性離生者所得世第一法問此中依言欲顯何法有作是說此俱生定說名爲依謂世第一法相應定以依聲說此俱生依有成文證如智蘊說若依空三摩地入正性離生彼於苦法智忍相應定以依聲說此亦如是有餘師說此等無間緣定說名爲依謂增上忍相應定以依聲說如是說者

即彼三地說名爲依後所說依應知亦爾云  
何無尋惟伺答若依無尋惟伺三摩地入正  
性離生彼所得世第一法謂依靜慮中間入  
正性離生者所得世第一法云何無尋無伺  
答若依無尋無伺三摩地入正性離生彼所  
得世第一法云云謂依第二第三第四靜慮入正  
性離生者所得世第一法若依未至定入正  
性離生彼修一地見道一地世第一法二地  
現觀邊世俗智若依初靜慮入正性離生彼  
修二地見道一地世第一法三地現觀邊世

俗智若依靜慮中間入正性離生彼修三地  
見道一地世第一法四地現觀邊世俗智若  
依第二靜慮入正性離生彼修四地見道一  
地世第一法五地現觀邊世俗智若依第三  
靜慮入正性離生彼修五地見道一地世第  
一法六地現觀邊世俗智若依第四靜慮入  
正性離生彼修六地見道一地世第一法七  
地現觀邊世俗智有餘師說若依初靜慮入  
正性離生彼修二地見道二地世第一法三  
地現觀邊世俗智若依靜慮中間入正性離

生彼修三地見道三地世第一法四地現觀  
邊世俗智所以者何以彼三地皆一地故一  
隨眠故此中善法互爲因故依餘地如前說  
評曰彼不應作是說所以者何若作是說則  
依靜慮中間入正性離生者應得二地世第  
一法謂有尋有伺及無尋惟伺若爾便違此  
文所說云何有尋有伺若依有尋有伺三摩  
地入正性離生彼所得世第一法云何無尋  
惟伺若依無尋惟伺三摩地入正性離生彼  
所得世第一法勿有此過是故前說於理爲

善問何故見道修自他地世第一法惟修自  
地耶答見道無漏解脫離繫世第一法不如  
是故復次見道雖在地而不墮界世第一法  
在地亦墮界故復次見道由三緣故修一因  
長養故二同辦事故三同對治故因長養者  
謂六地見道展轉爲因同辦事者謂上地見  
道所應作事下地見道亦能辦之同對治者  
謂上地見道所對治惑下地見道亦能對治  
修道亦以如上所說三緣故修自地他地因  
長養者謂九地修道展轉爲因又如法智離

欲界染亦修類智此但由一緣謂因長養故  
同辦事者謂上地修道所應作事下地修道  
亦能辦之又如苦智所應作事乃至道智亦  
皆能辦同對治者謂上地修道所對治惑下  
地修道亦能對治又如一念此智現前能於  
未來修無量念世第一法非因長養諸地不  
能互為因故亦非同辦事於煩惱斷不能證  
故亦非同對治以不能永斷諸煩惱故復次  
世第一法繫屬相續見道不如是故復次世  
第一法能辦異熟見道不如是故復次世第

一法為愛所繫見道不如是故復次世第一  
法有垢有過有毒有刺有染有濁見道不如  
是故復次世第一法依異生身異生身法不  
修他地見道惟依聖者身聖者身法修自他  
地故問世第一法與現觀邊諸世俗智同是  
有漏何故彼智自他地修世第一法十一惟修自  
地答現觀邊世俗智是見道眷屬依見道修  
如見道修自他地彼智亦爾世第一法不如  
是故復次現觀邊世俗智依聖者身聖者能  
修自地他地世第一法不如是故復次現觀

邊世俗智依隨信隨法行身彼能具修自地  
他地世第一法不如是故復次現觀邊世俗  
智有怨敵無勢力有怨敵故自他地修無勢  
力故依他力修世第一法無怨敵有勢力無  
怨敵故惟修自地有勢力故依自力修復次  
現觀邊世俗智不用功得隨見道力自他地  
修世第一法用功而得是故惟能修於自地  
問何故六地所起見道上能修下下不修上  
答上地法勝現在前時則能修下下地法劣  
現在前時不能修上如劣朝勝非勝朝劣此

亦如是復次下地力劣依上而修如力劣人  
依附強者上地力勝不依下修如力勝人不  
依附劣復次下地屬上故上能修下上地不  
屬下故下不能修上如人屬他受他驅使不  
屬他者他不能役復次若依上地入正性離  
生彼於下地已得離染故能修下若依下地  
入正性離生彼於上地未得離染設已離染  
不得自在以不依彼入正性離生故由此下  
地不能修上復次若於上地入正性離生彼  
於下地已得故能修若依下地入正性離生



彼於上地未得故不修設已得者而不自在  
 以不依彼入正性離生故復次下地求上故  
 上修下上地不求下故下不修上復次下地  
 能斷上故上能修下上地不斷下故下不修  
 上復次下能辨上事故上須修下上不能辨  
 下事故下不修上復次猶如六種守護法故  
 謂三十三天懼阿素洛安布六軍而自守護  
 一依海住龍二堅手天三持鬘天四恒憍天  
 五四大王眾天六三十三天若阿素洛從自  
 宮出欲與諸天興戰諍時依海住龍先與戰

諍若龍能勝阿素洛者餘五天軍無事而住  
 若不能勝堅手天軍即助其力若二能勝餘  
 四天軍無事而住若不能勝持鬘天軍復助  
 其力若三能勝餘三天軍無事而住若不能  
 勝恒憍天軍復助其力若四能勝餘二天軍  
 無事而住若不能勝四大王軍復助其力若  
 五能勝三十三天無事而住若不能勝三十  
 三天與前五軍相助戰諍令阿素洛退敗馳  
 走如是見道為欲對治見所斷惑安布六地  
 一未至定乃至第六第四靜慮若依未至定

入正性離生未來惟修一地見道即能永斷見所斷惑其餘五地無事而住若依初靜慮入正性離生未來便修二地見道相助永斷見所斷惑其餘四地無事而住若依靜慮中間入正性離生未來便修三地見道相助永斷見所斷惑其餘三地無事而住若依第二靜慮入正性離生未來便修四地見道相助永斷見所斷惑其餘二地無事而住若依第三靜慮入正性離生未來便修五地見道相助永斷見所斷惑第四靜慮無事而住若依

第四靜慮入正性離生未來便修六地見道相助永斷見所斷惑故依上地能修於下依彼下地不能修上復次猶如依山六重池故謂從山頂乃至於下有六泉池連次流注其最上水流遍六池第二遍五第三遍四乃至第六惟遍一池如是六地所起見道上能修下下不修上問頗有世第一法或尋相應非同或同相應非尋或尋同俱相應或尋同俱不相應耶答有尋相應非同者謂未至定初靜慮同同與自性不相應故同相應非尋者

謂尋及靜慮中間除伺餘心心所法尋伺俱相應者謂未至定初靜慮中除尋伺餘心心所法尋伺俱不相應者謂靜慮中間伺及上三靜慮心心所法并一切隨心轉色心不相應行問頗有世第一法非有尋有伺非無尋惟伺非無尋無伺耶答有謂未至定初靜慮伺彼非有尋有伺所以者何如品類足說云何有尋有伺法答若法尋伺相應彼伺雖尋相應而非伺故亦非無尋惟伺所以者何如品類足說云何無尋惟伺法答若法伺相應

非尋彼伺惟尋相應非伺故亦非無尋無伺所以者何如品類足說云何無尋無伺法答若法尋伺不相應彼伺惟伺不相應非尋故問頗有世第一法尋伺不相應非非伺耶答有謂靜慮中間伺彼雖尋伺不相應而非非伺所以者何伺自性故問頗有世第一法在有尋有伺地與伺相應非尋耶答有謂尋彼惟與伺相應故問頗有世第一法在無尋有伺地是相應法非伺相應耶答有謂靜慮中間伺彼與自性不相應故問頗有世第一法

在有尋有伺地而有三種謂有尋有伺無尋  
惟伺無尋無伺耶答有有尋有伺者謂未至  
定及初靜慮除尋伺餘心心所法無尋惟伺  
者謂尋無尋無伺者謂隨心轉色心不相應  
行問頗有世第一法在無尋惟伺地而有二  
種謂無尋惟伺無尋無伺耶答有無尋惟伺  
者謂靜慮中間除伺餘心心所法無尋無伺  
者謂彼地伺及隨心轉色心不相應行世第  
一法當言樂根相應乃至廣說問何故作此  
論答雖已說彼依地差別而未分別與何相

應今欲分別如已知人所居宅等而未知彼  
朋友伴侶此亦如是故作斯論有作是說雖  
已顯示世第一法通在三地而未說彼通在  
六地今顯彼與三根相應欲令知彼通在六  
地分明現見如掌中果由是因緣故作此論  
世第一法當言樂根相應喜根相應捨根相  
應耶答應言或樂根相應或喜根相應或捨  
根相應先已說彼非欲界繫即知不與憂苦  
相應是故惟依三根作論雖總說彼三根相  
應而未顯示相應差別故應復說差別之相

云何樂根相應答若依第三靜慮入正性離  
生彼所得世第一法然第三靜慮世第一法  
或樂根相應或不相應樂根相應者謂除樂  
根餘心心所法不相應者謂即樂根及隨心  
轉色心不相應行今且說餘心心所法故說  
彼與樂根相應云何喜根相應答若依初二  
靜慮入正性離生彼所得世第一法然初二  
靜慮世第一法或喜根相應或不相應喜根  
相應者謂除喜根餘心心所法不相應者謂  
即喜根及隨心轉色心不相應行今且說彼

餘心心所故說彼與喜根相應云何捨根相  
應答若依未至第四靜慮入正性離生彼所  
得世第一法問何故不說靜慮中間答此文  
應作是說若依未至靜慮中間第四靜慮入  
正性離生彼所得世第一法而不爾者有何  
意耶答已說未至應知亦說靜慮中間所以  
者何以未至聲亦顯彼故俱是未至根本地  
故如大種蘊說大種依何定滅答依四或未  
至故然此三地世第一法或捨根相應或不  
相應捨根相應者謂除捨根餘心心所法不

相應者謂即捨根及隨心轉色心不相應行  
 今且說彼餘心心所故說彼與捨根相應問  
 頗有世第一法不與樂根喜根捨根相應耶  
 答有謂彼隨心轉色心不相應行問頗有世  
 第一法是相應法而不與樂喜捨根相應耶  
 答有謂即三根以彼不與自性他性根相應  
 故

阿毗達磨大毗婆沙論卷第四

說一切有部發智

音釋

警居影切 構古候切

阿毗達磨大毗婆沙論卷第五

心五

五百大阿羅漢等造

唐三藏法師玄奘奉詔譯

雜蘊第一中世第一法納息第一之四

世第一法當言一心多心耶乃至廣說問何

故作此論答雖已說彼相應差別而未顯示

現前多少今欲顯示惟一刹那故作斯論復

次為欲遮遣他宗義故如分別論者執世第

一法相續現前彼說相續總有三種一時相

續二生相續三相相似相續世第一法雖無前

二而有後一今欲遮遣彼所執義顯世第一

法惟一念現前復次為令疑者得決定故謂

先已說若心心所法為等無間入正性離生

是謂世第一法勿有生疑如心所法既有多

種心亦應然為令彼疑得決定故顯心所法

雖有多種而心惟一由此因緣故作斯論世

第一法當言一心多心耶答應言一心問如

前已說未來修者亦得名為世第一法是則

此法應有多心而言一心斯有何意答此中

但說現在前者故言一心問今於此中何故

不說未來修者答應說而不說者當知此義有餘此中復有多復次釋前已說故今不說之雖說一心而未釋義何故此法非多心耶非但有言義則可了答從此心心所法無間不起餘世間心惟起出世心世間心者謂有漏墮有心即所遮止第二念等世第一法出世心者謂無漏斷有心即所引起苦法智忍相應之心若當起餘世間心者為劣為等為勝無有是處為分別故假設斯問劣等勝者對前刹那但有三故若當劣者應不能入正

性離生何以故非以退道能入正性離生故謂非衰退萎悴墜落破壞之道能入正性離生要以勝進增盛勇猛堅固之道能入正性離生故若當等者亦不能入正性離生何以故先以此類道不能入正性離生故謂此初後品類相似如初刹那有障礙有留難無勢力故不能入正性離生後諸刹那亦應如是如初刹那不能無間引起聖道後諸刹那亦應如是品類同故則應究竟不能證入正性離生如是應無解脫出離若當勝者先應非



世第一法後方是世第一法以世第一法聲  
顯最勝等義故問先者既非世第一法爲是  
何法答是增上忍問何故見道惟勝加行無  
間引生於修道中引生聖道通劣等勝答以  
見道是未曾得道要多功用加行作意方能  
現前是故惟勝加行引起修道既是未曾得  
道不多功用加行作意而現在前故劣等勝  
皆能引起然世第一法與第一法爲因緣增  
上緣因緣者有三因謂相應因俱有因同類  
因此是總說若別說者過去與過去爲二因

謂相應俱有與未來爲一因謂同類未來與  
未來爲二因謂相應俱有現在與現在爲二  
因謂相應俱有與未來爲一因謂同類增上  
緣者謂不礙生及惟不障世第一法當言退  
不退耶乃至廣說問何故作此論答雖已說  
彼一心非多而未分別爲退不退今欲分別  
故作此論復次爲止他宗顯正義故謂或有  
執世第一法亦有退者爲止彼意顯示此法  
決定不退故作斯論世第一法當言退不退  
耶答應言不退雖有此說應更顯示不退因

緣非但有言義便顯了何故此法定不退耶  
答世第一法隨順諦趣向諦臨入諦此彼中  
間無容得起不相似心令不得入聖諦現觀  
問云何名爲隨順諦趣向諦臨入諦耶有說  
此中現觀說名爲諦謂世第一法隨順現觀  
趣向現觀臨入現觀有說此中道諦說名爲  
諦謂世第一法隨順道諦趣向道諦臨入道  
諦有說此中見道說名爲諦謂世第一法隨  
順見道趣向見道臨入見道有說此中苦諦  
說名爲諦謂世第一法隨順苦諦趣向苦諦

臨入苦諦有說此中苦法智忍名諦謂世第  
一法隨順苦法智忍趣向苦法智忍臨入苦  
法智忍然於此中隨順有二一趣向隨順二  
臨入隨順世第一法於苦法智忍具二隨順  
爲等無間緣引生彼故此彼中間無容得起  
不相似心者謂此世第一法彼苦法智忍中  
間無容得起有漏墮有不相似心令不得入  
聖諦現觀者謂令苦法智忍不得現前問世  
第一法既有漏與無漏心可不相似何故  
乃說有漏墮有心名不相似無漏斷有心名

相似耶答世第一法獸惡有漏趣向無漏故  
說有漏名不相似無漏名相似背此向彼故  
猶如有人爲自親里之所苦惱依附他人以  
爲救護於自親里作他人想於他人處作親  
里想此亦如是復有說者世第一法以與苦  
法智忍同辦心五一事謂捨異生性等故說有漏  
名不相似無漏名相似同辦一事故爲於前  
義乃至愚夫亦能解了故說現喻譬如壯士  
度河度谷度山度崖中間無能迴轉彼身還  
至本處或往餘處先所發起增上身行未至

所趣必不止息世第一法亦復如是隨順諦  
趣向諦臨入諦此彼中間無容得起不相似  
心令不得入聖諦現觀此中度河者謂從此  
岸往趣彼岸度谷者謂從此邊往趣彼邊度  
山者謂從此峯往趣彼峯度崖者謂從高趣  
下或如有人從屋脊墮未至地頃便起是心  
我當騰踴却還本處彼如意不無如是事假  
使彼人或以神力或以咒術或以藥物還至  
本處可有是事然從世第一法未至苦法智  
忍中間能起不相似心令不得入聖諦現觀

無有是處爲令此義轉得明了故今復舉第二現喻如瞻部洲有五大河一名菟伽二名閻母那三名薩洛瑜四名阿氏羅筏底五名莫醯如是五河隨順大海趣向大海臨入大海中間無能迴轉彼流還至本處或往餘處彼決定能流入大海世第一法亦復如是隨順諦趣向諦臨入諦彼此中間無容得起不相似心令不得入聖諦現觀問前喻今喻有何差別又前於義有不盡而更須說第二喻耶有說二喻於義無別欲令前喻所顯義

理轉復增明故說今喻有說二喻亦有差別前喻爲遮不如理事後喻爲顯如理事故復次前以內分具足爲喻後以外分具足爲喻復次前喻爲止內分留難後喻爲止外分留難如五大河流入大海無能迴彼還至本處謂令還入無熱惱池無能轉彼往趣餘處謂使傍流或左或右前喻迴轉准此應知彼五大河未入海頃頗有能令不入海不無如是事假使有人或以神力或以呪術或以藥物令至本處可有是事然世第一法未至苦法

智忍中間能起不相似心令不得入聖諦現  
觀無有是處尊者造此發智論時住在東方  
故引東方共所現見五河爲喻而實於此瞻  
部洲中有四大河眷屬各四隨其方面流趣  
大海謂即於此瞻部洲中有一大池名無熱  
惱初但從彼出四大河一名菴伽二名信度  
三名縛芻四名私多初菴伽河從池東面金  
象口出右繞池一帀流入東海次信度河從  
池南面銀牛口出右繞池一帀流入南海次  
縛芻河從池西面吠瑠璃馬口出右繞池一

帀流入西海後私多河從池北面頗胝迦師  
子口出右繞池一帀流入北海菴伽大河有  
四眷屬一名閻母那二名薩洛瑜三名阿氏  
羅筏底四名莫醯信度大河有四眷屬一名  
毗跋奢二名藹羅筏底三名設但茶盧四名  
毗但娑多縛芻心五大河有四眷屬一名筏刺弩  
二名吠但刺尼三名防奢四名屈惹婆私多  
大河有四眷屬一名薩梨二名避魔三名捺  
地四名電光如是且說有大名者然四大河  
一一各有五百眷屬并本合有二千四河隨

其方面流趣大海如是所說二千四河未入海頃頗有能令不入海不無如是事假使人或以神力或以呪術廣說乃至令不得入聖諦現觀無有是處復次世第一法與苦法智忍作等無間緣無有一法速疾迴轉過於心者可於爾時能作障礙令不得入聖諦現觀是故此法決定不退此中復次難釋如前謂此前文但是方便開縱論道今所說者乃是根本遮奪論道故應言復次及如本文說此中意說世第一法與苦法智忍作等無間

緣此正滅位取果與果彼苦法智忍次必現前若法與彼法為等無間緣正滅位中取果與果若法若有情若呪術若藥物若佛若獨覺若到彼岸諸聲聞等能作障礙使第二念不現前者無有是處此中所言無有一法速疾迴轉過於心者應知即是苦法智忍相應之心此心必定速疾現前無有餘法速疾迴轉過於此故如世尊說苾芻當知我不見一法速疾迴轉猶如心者乃至廣說彼契經文如後定蘊當廣分別以佛說心速疾迴轉過

餘法故世第一法無間刹那苦法智忍必現  
在前是故此法決定不退於此義中復有分  
別問何緣世第一法定不退耶答加行廣大  
故安足堅牢故加行廣大者謂彼所習施戒  
聞思修所成善悉以迴向解脫涅槃心無所  
著施者即是莊嚴心施戒者即是別解脫戒  
聞所成者謂於聖教決擇文義思所成者謂  
不淨觀持息念念住三義觀七處善修所成  
者謂煖頂下中忍安足堅牢者謂增上忍由  
世第一法加行廣大安足堅牢故定不退復

次以此法後總證三界見所斷斷非於三界  
見所斷斷有還退者是故不退復次以此法  
後總證非想非非想地見所斷斷非於非想  
非非想地見所斷斷有還退者是故不退復  
次以此法後必起忍智非於忍智有還退者  
是故不退復次以此法後必起見道以爲重  
鎮決定無有退見道者是故不退問因論生  
論何緣見道定不退耶答以彼見道是速疾  
道無留難道非中起道是故不退復次以彼  
行者墮在見道大法駛流爲流漂激無容可

退其心慢緩方可退故如人墮在山谷暴流  
爲流所漂無得暫住行者亦爾是故不退復  
次退者多起煩惱現前住見道時無覆無記  
有漏善心尚不得起何況得起煩惱之心是  
故不退復次以住見道總證三界見所斷斷  
非於三界見所斷斷有還退者是故不退復  
次以住見道總證非想非非想地見所斷斷  
非於非想非非想地見所斷斷有還退者是  
故不退復次若從見道有還退者應見諦已  
還不見諦應得果已還不得果應現觀已還

不現觀應入正性離生已還不入正性離生  
應成聖者已還作異生應住定聚已還住不  
定聚勿有如是衆多過失是故見道決定不  
退有作是說以此善根惟一刹那無有能退  
半剎那者是故不退或有說者以此善根似  
無間道非住無間道可有退者是故不退復  
有說者以此善根是順勝分非住順勝分可  
有退者是故不退然有三種順決擇分一順  
退分二順住分三順勝分謂順退者名順退  
分若順住者名順住分順昇進者名順勝分



煖具三種頂亦具三有說惟二除順住分以頂位是進退際故忍亦有二除順退分世第一法惟順勝分是故此位定無退理問此中三分一切皆是順決擇分善根所攝與後定蘊所說四分有何差別答所依各異謂此但依隨順見道心五總立一種順決擇分九於中義別復開三種後定蘊中總依有漏修所成善建立四分若順退者名順退分若順住者名順住分若順昇進者名順勝進分若順聖道者名順決擇分是故此彼所依各異問頗有世

第一法緣有所緣法耶緣無所緣法耶緣有所緣法亦緣無所緣法耶非緣有所緣法亦非緣無所緣法耶答有緣有所緣法者謂若世第一法緣心心所法緣無所緣法者謂若緣無所緣法者謂若世第一法緣心心所法及緣色心不相應行非緣有所緣法亦非緣無所緣法者謂隨心轉色及隨心轉心不相應行世第一法問頗有住一刹那頃當得緣有所緣法世第一法耶緣無所緣法世第一

法耶緣有所緣法亦緣無所緣法世第一法  
 耶非緣有所緣法亦非緣無所緣法世第一  
 法耶答有謂住增上忍時當得如上所說四  
 句世第一法問頗有住一刹那頃當得世第  
 一法非彼所緣耶當得彼所緣非世第一法  
 耶當得世第一法及彼所緣耶不當得世第  
 一法及彼所緣耶答有住增上忍時應作此  
 四句且依未至定入正性離生者住增上忍  
 時當得世第一法非彼所緣者謂未至定所  
 攝世第一法中除緣當現在前所依世第一

法諸緣所餘境世第一法當得彼所緣非世  
 第一法者謂上五地所攝世第一法中緣當  
 現在前所依世第一法當得世第一法及彼  
 所緣者謂未至定所攝世第一法中緣當現  
 在前所依世第一法不當得世第一法及彼  
 所緣者謂上<sup>五</sup>地所攝世第一法中除緣當  
 現在前所依世第一法諸緣所餘境世第一  
 法如依未至定入正性離生者住增上忍時  
 作此四句依上五地入正性離生者住增上  
 忍時應知亦爾問頗有成就世第一法不成

就彼離繫得耶答應作四句成就世第一法  
不成就彼離繫得者謂若依此地入正性離  
生彼未離此地染成就彼離繫得不成就世  
第一法者謂若依此地入正性離生彼命終  
生上地成就世第一法亦成就彼離繫得者  
謂若依此地入正性離生彼已離此地染不  
命終生上地不成就世第一法亦不成就彼  
離繫得者謂若未能入正性離生位有餘依  
彼有漏離繫得作如是言問頗有聖者成就  
世第一法不成就彼離繫得耶答應作四句

成就世第一法不成就彼離繫得者謂若依  
此地入正性離生彼未離此地染成就彼離  
繫得不成就世第一法者謂若依此地入正  
性離生彼命終生次上地成就世第一法亦  
成就彼離繫得者謂若依此地入正性離生  
彼已離此地染不命終生上地不成就世第  
一法亦不成就彼離繫得者謂若依此地入  
正性離生彼命終超次上地生餘上地有餘  
依一切世第一法及彼一切離繫得作如是  
言問頗有成就世第一法不成就彼離繫得

耶答應作四句第一句者謂若依未至定或初靜慮靜慮中間入正性離生彼未離初靜慮染第二句者謂若依此地入正性離生彼命終生上地若未得世第一法生欲色界已離初靜慮染及生空無邊處第三句者謂若依此地入正性離生已離初靜慮染不命終生上地第四句者謂除前相尊者此中七門分別世第一法謂初云何世第一法乃至第七世第一法當言退不退耶於中前三門是根本論後四門是因生論世第一法由此七

門分別顯示極爲明了云何頂乃至廣說問先應說煖後方說頂如何於此先說頂耶答如前已說此中逆說異生身中淨染諸法故先說頂後方說煖問若爾此中應先說忍何故於此超說頂耶答先已說忍而不彰顯謂先已說若當勝者先應非世第一法後方是世第一法先者是何謂增上忍既已說忍故今說頂問尊者何故覆相說忍而不彰顯廣說忍耶答亦應彰顯廣說忍相謂云何忍何故名忍忍當言何界繫及因生論皆應廣說

而不說者有何意耶答是作論者意欲爾故  
謂作論者隨自意欲或顯或隱或廣或略而  
作此論不應徵詰尊者此中彰顯廣說世第  
一法隱略說忍於頂及煖顯略而說有餘師  
說若契經中顯了說者尊者於此彰顯而說  
忍於經中不顯了說心五是故於此覆相說之問  
豈不經中顯了說忍如世尊說若有一類成  
就六法於現法中必不能得遠塵離垢於諸  
法中生淨法眼云何六法一不樂聞法二雖  
聞說法而不囑耳三雖囑耳聽而不安住奉

行教心四於未證善法不勤求證五於已證  
善法不勤守護六不成就順忍應知白品與  
此相違忍於此經既彰顯說尊者何故覆相  
說耶彼作是言經中雖說順忍而不說順諦  
忍故非顯說問順忍順諦忍有何差別義無  
異故應知前說為善問因論生論何故此忍  
獨名順諦非煖頂耶答亦應說順諦煖順諦  
頂而不說者當知此是有餘之說義皆有故  
復次言順諦者謂極隨順聖諦現觀忍極隨  
順聖諦現觀煖頂不爾故偏說忍復次忍隣

近見道煖頂不爾故復次忍與見道相似煖  
 頂不爾故謂見道位惟法念住恒現在前忍  
 位亦爾煖頂不然謂彼初位雖但起法念住  
 而增進位亦得起餘三念住故復次忍位必  
 有不出意樂趣入聖道煖頂不爾故復次修  
 觀行者於忍位中樂別觀諦於頂位中樂別  
 觀寶於煖位中樂別觀蘊故復次煖止緣諦  
 下愚頂止緣諦中愚忍止緣諦上愚故復次  
 煖止緣諦麤愚頂止緣諦中愚忍止緣諦細  
 愚故復次煖起緣諦下明頂起緣諦中明忍

起緣諦上明故復次煖起緣諦麤明頂起緣  
 諦中明忍起緣諦細明故復次煖得緣諦下  
 信頂得緣諦中信忍得緣諦上信故復次煖  
 得緣諦麤信頂得緣諦中信忍得緣諦細信  
 故復次以忍位中或時以十六行相觀察聖  
 諦或時以十二行相觀察聖諦或時以八行  
 相觀察聖諦或時以四行相觀察聖諦煖頂  
 位中但以十六行相觀察聖諦故復次以忍  
 位中無雜作意煖頂位中有雜作意故謂煖  
 頂位數數復起欲界善心觀欲界苦為間雜

已復能引此善根現前忍位不爾復次以忍位中惟別作意別觀諸諦煖頂位中不如是故謂煖頂位雖別作意別觀諸諦而於中間修總行相總觀諸諦謂觀一切有漏皆苦觀一切行皆是無常觀一切法皆空無我惟觀涅槃是真寂靜復次以忍位中有時相續有一刹那觀察聖諦煖頂位中惟有相續觀聖諦故復次以忍位中漸略觀諦極能隨順趣向涅槃如適他方以多買少煖頂位中不如是故以如是等種種因緣忍名順諦煖頂不

爾問世第一法何故不立順諦名耶答雖復此位一切皆勝而於四諦不遍觀察故不建立順諦之名問忍為幾念住答現在惟一雜緣法念住未來具四似見道故問忍為幾緣答為四緣謂因等無間所緣增上緣為因緣者謂與彼相應俱有十五同類等法為因緣為等無間緣者謂與世第一法為等無間緣為所緣緣者謂與能緣此心心所法為所緣緣為增上緣者謂除自性與餘一切有為法為增上緣問忍有幾緣答有四緣有因緣者謂此

相應俱有同類法有等無間緣者謂已生頂  
 有所緣緣者謂四聖諦有增上緣者謂除自  
 性餘一切法問忍當言何界繫答應言惟色  
 界繫問忍當言有尋有伺無尋惟伺無尋無  
 伺耶答應言二種問忍當言樂根相應喜根  
 相應捨根相應耶答應言三根相應問忍當  
 言一心多心耶答應言或多心或一心以增  
 上忍一剎那故問忍當言退不退耶答應言  
 不退如是等義依上所說世第一法如理應  
 知問緣何諦忍後入正性離生耶有作是說

緣道諦忍後入正性離生問若爾云何所緣  
 行相不成倒錯若倒錯者云何不與入正性  
 離生而作留難答此於所緣行相雖有倒錯  
 而於入正性離生不作留難所以者何已慣  
 習故謂修行者於此慣習已成徑路自在現  
 前如見道中緣欲界忍智後緣有頂忍智現  
 在前緣有頂忍智後緣欲界忍智現在前緣  
 若諦行相後緣集諦行相現在前緣集諦行  
 相後緣滅諦行相現在前此等所緣行相雖  
 有倒錯而於現觀不作留難已慣習故此忍



亦爾若作是說緣道諦忍後入正性離生者則有三心同一所緣同一行相謂世第一法苦法智忍苦法智相應二心同一行相不同一所緣謂苦類智忍苦類智相應二心同一所緣不同一行相謂集法智忍集法智相應餘心不同一所緣不同一行相如是說者緣苦諦忍後入正性離生所以者何見道是無漏善根有大勢力雖所緣行相有倒錯而於現觀不作留難忍是有漏善根無大勢力若所緣行相有倒錯者則於入正性離生便作

留難故修行者忍位中所緣行相先廣後略由此得入正性離生謂彼先以四行相觀欲界苦次以四行相觀色無色界苦次以四行相觀欲界諸行因次以四行相觀色無色界諸行因次以四行相觀欲界諸行減次以四行相觀色無色界諸行減次以四行相觀欲界諸行道後以四行相觀色無色界諸行道齊此名下忍從此以後漸漸略之謂復以四行相先觀欲界苦次觀色無色界苦乃至最後觀欲界諸行道漸次略去色無色界諸行

道復以四行相先觀欲界苦次觀色無色界  
 苦乃至最後觀色無色界諸行滅漸次略去  
 一切諸行道復以四行相先觀欲界苦次觀  
 色無色界苦乃至最後觀欲界諸行滅漸次  
 略去色無色界諸行滅復以四行相先觀欲  
 界苦次觀色無色界苦乃至最後觀色無色  
 界諸行因漸次略去一切諸行滅復以四行  
 相先觀欲界苦次觀色無色界苦後觀欲界  
 諸行因漸次略去色無色界諸行因復以四  
 行相先觀欲界苦後觀色無色界苦漸次略

去一切諸行因復以四行相觀欲界苦漸次  
 略去色無色界苦彼於欲界苦以四行相相  
 續觀察復漸略之至一行相二刹那觀察如  
 苦法智忍及苦智齊此名中忍彼復於欲界  
 苦一刹那觀察如苦法智忍此名上忍從此  
 無間復一刹那觀欲界苦名世第一法從此  
 無間生苦法智忍展轉乃至生道類智譬如  
 有人欲從已國適於他國多有財產不能持  
 去遂以易錢猶嫌其多復以易金猶嫌金重  
 復以貿易大價寶珠持此寶珠隨意所往行

者亦爾先廣觀察上下諸諦後漸略之乃至  
 惟以一刹那心觀欲界苦次生世第一法次  
 生苦法智忍展轉乃至生道類智若如是說  
 緣苦諦忍後入正性離生則有四心同一所  
 緣同一行相謂增上忍世第一法苦法智忍  
 苦法智相應二心同一行相不同一所緣謂  
 苦類智忍苦類智相應二心同一所緣不同  
 一行相謂集法智忍集法智相應餘心不同  
 一所緣不同一行相問世第一法亦如忍有  
 三品耶答一相續中則無多相續中則有謂

佛種性是上品獨覺種性是中品聲聞種性  
 是下品依六種性三根說亦爾

阿毗達磨大毗婆沙論卷第五 說一切有部發智

音釋

萎悴 萎於為切枯也悴秦醉切憔悴也  
 春 資昔切  
 跋 布火切  
 恣 疾也

永樂北藏

大毗婆沙論

第一〇六册

阿毗達磨大毗婆沙論卷第六

心六

五百大阿羅漢等造

唐三藏法師玄奘奉詔譯

雜蘊第一中世第一法納息第一之五

云何頂答於佛法僧生小量信問何故名頂

答如山頂故謂如山頂人不久住若無諸難

便過此山更至餘山若有諸難即還退下如

是行者至頂位中必不久住若無諸難便進

至忍若有諸難還退住煖有說此應名為下

頂以在最下順決擇分煖法上故有說此頂

應名為中以在下煖上忍中故尊者妙音作如是說順決擇分總有二種一欲界繫二色界繫欲界繫中下者名煖上者名頂色界繫中下者名忍上者名世第一法此於欲界順決擇分中勝故名頂彼不應作是說此四皆是定地修地行聖行相色界法故應作是說順決擇分總有二種一可退二不可退可退中下者名煖上者名頂不可退中下者名忍上者名世第一法此於可退順決擇分中勝故名頂問何故此信名小量耶尊者妙音作

如是說欲界名小以下劣故此在欲界故名  
小量有說此信應名異量量謂決定信順印  
可故名爲量煖是第一頂是第二此異於前  
故名異量有說此信應名少量以頂位中不  
久住故如露懸枝不久停住應作是說此頂  
但應名小量信在可退位樂觀寶故此中於  
佛僧生小量信者說緣道諦信於法生小量  
信者說緣滅諦信問此頂善根具以十六行  
相緣四聖諦何故此中但說緣滅道諦非若  
集耶答依勝說故謂四諦中滅道是勝出生

死故復次滅道二諦清淨無垢離過微妙是  
可信事是生信處是所歸依是故偏說復次  
滅道二諦非惟可信亦是可求難可證得極  
可欣故苦集不爾是故不說復次爲受化者  
生信樂故若佛爲彼說苦集諦便作是念我  
無始來爲此鄙劣煩惱惡行及所得果擾亂  
逼迫寧可信樂若說滅道便深信樂不欲捨  
離故於此中偏說滅道有說於佛僧生小量  
信者說緣道諦信於法生小量信者說緣三  
諦信以頂具緣四聖諦故問緣滅道諦可爾

是可信事是生信處是所歸依應信樂故緣  
苦集諦云何可爾煩惱惡行及所得果猶如  
糞穢深可厭患不應於中生信樂故答信有  
二種一者信可二者信樂於滅道諦具二種  
信於苦集諦雖無信樂而有信可故緣苦集  
亦生於信如人掘地求水寶等具二種信一  
者信可謂信地中有水寶等故二者信樂謂  
信水等是可欣樂故脇尊者言為厭患苦集  
故稱讚滅道謂此滅道寂靜美妙止息對治  
下劣鄙穢苦集法故如人風雨所逼惱故稱

讚舍宅故於四諦皆可生信然於道諦亦非  
一切具二種信謂隨信行者於隨法行道具  
二種信謂信可彼信樂彼故隨法行者於隨  
信行道惟有一信謂雖信可彼而不信樂彼  
故信勝解者於見至道具二種信見至者於  
信勝解道惟有一信六時解脫者於不時解脫  
道具二種信不時解脫者於時解脫道惟有一  
信佛於佛道具二種信於二乘道惟有一  
信獨覺於二道具二種信於聲聞道惟有一  
信聲聞於三道皆具二信此中尊者欲令前

義得成立故復引契經如世尊爲波羅衍拏  
摩納婆說

若於佛法僧 生起微小信 儒童應知彼  
名已得頂法

問此頂善根十六行相觀四聖諦何故世尊  
爲摩納婆說信三寶答彼於三寶愚惑不信  
然三寶希有難可值遇欲令信解故爲說之  
有說彼摩納婆爲苦所逼欲求出要來詣佛  
所說是頌言

爲苦所逼諸衆生 不知出要來詣佛

惟願爲說除衆患 如熱所逼入涼池  
出苦之要無過三寶故佛爲說於三寶信有  
說欲令所化於佛法中深生信重故佛爲說  
於佛法僧生微小信若佛爲說四聖諦者所  
化有情便作是念我等何用信重如是煩惱  
惡行顛倒見趣及所得果苦集諦爲若佛爲  
說佛法僧寶彼便踊躍深生信重有說隨修  
行者樂別觀故謂修行者於煖位中樂別觀  
蘊於頂位中樂別觀寶於忍位中樂別觀諦  
故於頂位說信三寶如世尊告阿難陀言吾



今爲汝等說頂及頂隨謂聖弟子於五取蘊起作有爲緣生法中思量觀察此是無常苦空無我彼即於如是思量觀察時有忍有見有欲樂有行解有見審慮忍如是名爲頂問何故世尊爲波羅衍拏說信爲頂爲諸新學心六苾芻說慧爲頂耶答佛善知法相及善知根器應爲說者即爲說之餘無此能故不應問復次波羅衍拏住初業地未慣習所作未得奢摩他未入聖教未修漸次諸有所作皆藉他緣聞他天神讚佛功德於佛生信來詣佛

所爾時世尊依頂等流說信爲頂新學苾芻與彼相違是故爲說頂之自性復次佛隨所闕而爲說故謂波羅衍拏有慧闕信故爲彼說信爲頂新學苾芻有信闕慧故爲彼說慧爲頂復次爲止諂曲及愚癡故謂波羅衍拏是婆羅門種雖有智慧而闕淨信無信之慧增長諂曲爲止彼諂曲故說信爲頂新學苾芻是釋迦種雖有淨信而闕智慧無慧之信增長愚癡爲止彼愚癡故說慧爲頂復次世尊所化有利根者有鈍根者爲利根者說信

爲頂爲鈍根者說慧爲頂如利根鈍根因力緣力內分力外分力內如理作意力外從他聞法力無癡增相續力無貪增相續力應知亦爾云何頂墮乃至廣說問何故此中但說頂墮不說煖耶答應說而不說者當知此義有餘復次說勝有墮已顯劣故謂頂善根是五六勝尚退況煖善根劣而無退有說不應詰問尊者不說煖退因緣所以者何契經說故謂契經中但說頂墮不說煖墮尊者依經而造此論故不應責有說從頂退時生大憂惱退

煖不爾故不說之謂如有人見寶伏藏滿中珍寶見已歡喜作是思惟我今永絕貧窮根本適欲取時忽然還滅彼人爾時生大憂惱如是行者住頂位中自念不久入於忍位永捨惡趣生大歡喜後退此頂還住煖時生大憂惱失勝利故設從煖位進得頂時彼猶未能永捨惡趣故從彼退不大憂惱有說住頂位時多諸留難住煖不爾是故偏說故如是說於三時中諸業煩惱極與行者而作留難一從頂入忍時能感惡趣諸業煩惱極爲留

難義言行者若入忍位定不復受諸惡趣生  
我於誰身受異熟果二聖者離欲染時能感  
欲界諸業煩惱極爲留難義言行者若離欲  
染於欲界生定不復受我於誰身受異熟果  
三得阿羅漢果時能感後有諸業煩惱極爲  
留難義言行者若得阿羅漢果定不復受一  
切生死我於誰身受異熟果有說頂不久住  
是進退際故煖位不爾故不說煖墮有說住  
頂位時將獲大利猶如聖者得不墮法得忍  
異生亦復如是如室路拏二十俱胝九十一

劫不墮惡趣從頂退時失此大利故說頂墮  
退煖不爾故不說之云何頂墮答如有一類  
親近善士聽聞正法如理作意信佛菩提法  
是善說增修妙行色無常受想行識無常善  
施設苦諦善施設集滅道諦彼於異時不親  
近善士不聽聞正法不如理作意於已得世  
俗信退沒破壞移轉亡失故名頂墮問何故  
作此論答前雖說頂自性而未說頂云何得  
云何捨今欲說之故作此論親近善士者謂  
親近善友聽聞正法者謂屬耳聽聞如理所

引訶毀流轉讚歎還滅順瑜伽法如理作意者謂自內正解信佛菩提法是善說增修妙行者顯信三寶色無常受想行識無常者顯信五蘊善施設苦諦善施設集滅道諦者顯信四諦此中信佛菩提乃至信善施設道諦皆共顯示法隨法行此及前三即是顯示四預流支是名得頂問佛爲何等所化有情於頂位中顯示三寶復爲何等顯示五蘊又爲何等顯示四諦答爲愚寶者顯示三寶爲愚蘊者顯示五蘊爲愚諦者顯示四諦復次爲

初業者顯示三寶爲已慣習者顯示五蘊爲已超作者顯示四諦復次爲鈍根者顯示三寶爲中根者顯示五蘊爲利根者顯示四諦復次爲疑行者顯示三寶爲我慢行者顯示五蘊爲諸邪見損覺慧者顯示四諦有作心六是說爲樂廣者顯示三寶爲樂略者顯示四七諦爲樂廣略者顯示五蘊是名三種所爲差別已說得頂云何捨頂彼於異時者謂彼散亂時不親近善士者謂親近惡友不聽聞正法者謂作意聽聞非理所引讚歎流轉訶毀

還滅違瑜伽法不如理作意者謂自內邪解於已得世俗信退沒破壞移轉亡失者謂於已得即頂位中頂等流世俗信退沒破壞移轉亡失此中尊者欲令頂墮義得成立故復引契經爲證如佛卽爲波羅衍拏摩納婆說若人於如是 三法而退失 我說彼等類應知名頂墮

問何等名爲頂墮自性答頂墮自性是不成就無覆無記心不相應行蘊所攝有說信時名得頂不信時名頂墮如是則說不信爲頂

墮自性有說諸煩惱纏能令頂墮如是則說諸染汙法爲頂墮自性有說若法隨順退彼法名頂墮如是則說一切法爲頂墮自性以退頂時一切法皆是退頂增上緣故譬喻者言此但假說無實自性謂相續中先成就頂今時退失說爲頂墮如何求覓頂墮自性如人有財名爲富者若賊劫去卽名貧人他問汝貧以何爲性彼答我昔多有珍財今被劫去惟名貧者當有何性又如有人先著衣服後賊奪去卽便露形他問汝今露形以何爲

性彼答我先有衣今賊奪去惟露形住當有  
何性又如有人衣服破壞他問汝衣破壞以  
何為性彼答我衣本完今已破壞惟名衣破  
當有何性如是行者先成就頂今時退失說  
名頂墮無別自性評曰初說為善此即攝在  
復有所餘如是類法不相應中不相應行有  
多種故

云何煖乃至廣說問何故名煖答智於境轉  
故有勝智煖生能燒諸煩惱薪故名為煖猶  
如鑽火上下相依有火煖生能燒薪等有說

諸有相依故有隨有智煖生能令諸有皆悉  
痿悴故名為煖猶如夏時聚華為積華生煖  
氣還自痿悴又如夏時積聚糞壤中生煖氣  
還自腐爛有說諸蘊相依故有墮蘊智煖生  
能燒蘊林令其永滅故名為煖如竹葦等相  
摩煖生能燒彼林令為灰燼尊者妙音作如  
是說依求解脫有善根生是聖道日前行前  
相故名為煖如日將出明相先現復次依求  
解脫有善根生是聖道火前行前相故名為  
煖如火將然煙為前相云何煖答若於正法

毗奈耶中有少信愛即信名愛故名信愛於  
正法中有信愛者說緣道諦信於毗奈耶中  
有信愛者說緣滅諦信問此煖善根具以十  
六行相緣四聖諦何故此中但說緣滅道諦  
非苦集耶答依勝說故謂四諦中滅道是勝  
出生死故餘如頂中廣說有說於正法中有  
信愛者說緣三諦信於毗奈耶中有信愛者  
說緣滅諦信以煖具緣四聖諦故問緣滅道  
諦可爾是可信事是生信處是所歸依應信  
愛故緣苦集諦云何可爾煩惱惡行及所得

果猶如糞穢深可厭患不應於中生信愛故  
答信有二種一者信可二者信愛於滅道諦  
具二種信於苦集諦雖無信愛而有信可故  
緣苦集亦生於信餘廣說如頂問諸於正法  
毗奈耶中有少信愛者彼皆得煖耶答不爾  
所以者何煖是色界定地修地十六行相所  
攝善根此中說有如是信愛非餘信愛故言  
不爾此中尊者引經為證如世尊為馬師并  
宿二苾芻說此二愚人離我正法及毗奈耶  
譬如大地去虛空遠此二愚人於我正法毗

奈耶中無少分煖此經文句雖已隱沒而作  
論者以願智力引之為證問此煖善根殊勝  
微妙住寂靜地世尊何故名少分耶答此於  
所餘順決擇分最微小故得少分名有說此  
於正法毗奈耶中觀事不共微小善根後邊  
生故說名少分問諸有未得煖善根者皆如  
此二被訶擯耶答不爾所以者何世尊所化  
總有三種一於佛法有意樂二於佛法息意  
樂三於佛法無意樂此二苾芻於佛正法全  
無意樂故佛訶擯諸如是類亦被訶擯非餘

未得煖善根者有說此二苾芻捨離親愛歸  
佛出家然於正法毗奈耶中全無信愛可以  
攝受故佛訶擯非餘未得煖善根者  
即彼經中世尊先告馬師并宿二苾芻言吾  
當為汝說四句法汝欲知不當恣汝意二苾  
芻言我今何用知尊法為問此中何者是四  
句法有說四聖諦是所以者何彼不見諦造  
惡行故有說四念住是所以者何彼由顛倒  
造惡行故有說四正斷是所以者何彼由懈  
怠造惡行故有說四神足是所以者何彼闕



勝德造惡行故有說四聖種是所以者何彼  
貪利養造惡行故有說四沙門果是所以者  
何彼實未得四沙門果而稱我得造惡行故  
有說四無量是所以者何彼由貪瞋嫉妬增  
上造惡行故有說四靜慮是所以者何彼由  
欲界煩惱增上造惡行故有說四善巧是謂  
界善巧處善巧緣起善巧處非處善巧所以  
者何彼愚因果造惡行故有說即四種順決  
擇分善根是所以者何佛說彼二人無少分  
煖故有說即增一阿笈摩中四法迹是一無

永樂北藏

大毗婆沙論

貪法迹二無瞋法迹三正念法迹四正定法  
迹有說即雜阿笈摩中四句法是如彼頌言  
賢聖法中善言最 二常愛言遠不愛  
三常實言離虛誑 四常法言遠非法  
如是說者四聖諦是彼愚諦理背聖教故問  
佛深知彼不堪受法如何以法而恣彼耶答  
佛欲自顯無過失故勿有謂彼無教化者故  
造惡行而自毀壞是以如來舉手告言諸教  
化事我皆能作而汝不受自行邪行以自損  
壞非我過也有說為止釋種不信心故若不

第一〇六册

以法而恣彼者無量釋種生不信心云何義成於自親族心懷慳嫉不欲教化將恐彼人與已相似由佛以法而恣彼意是諸釋種不信心息有說為止外道誹謗業故若不以法而恣彼者無量外道便誹謗言云何名為得大悲者若諸弟子隨順恭敬便為說法若諸弟子違逆不敬則不教化由佛以法而恣彼意是諸外道誹謗便息有說令彼證知過在已故佛以軟語而責彼言汝本及今恒造惡行我常教化都不信受今復為汝欲說法要

汝言何用知尊法為汝之過失汝自為證有說令彼後時種善根故佛知彼二今雖不能受我正法而命終已生龍趣中便自憶念昔大悲者恣我正法而我不受今生惡趣受諸苦惱由此便起悔俱善根以此因緣速脫惡趣有說為護佛法令不壞故佛知彼二從此命終當生龍趣劇苦所逼作是念言我從何沒來生於此即自憶念從人中來復自念言昔作何業便自觀見昔曾出家不能正行墮在此處次作是念佛不化我故令我今生此

惡處便起瞋恨欲來人中破宰堵波壞僧伽  
藍殺諸苾芻苾芻尼等令如來法殄滅無餘  
當於爾時佛神力故有如來像住立其前而  
告之言馬師井宿吾當為汝說四句法汝欲  
知不當恣汝意時二毒龍即便自憶昔佛亦  
作如是告我我時不受是我自咎非如來過  
由此因緣瞋纏遂息生大慚愧護持佛法由  
如是等種種因緣佛以正法而恣彼意問何  
故二人作如是說我今何用知尊法為答彼  
二自知造諸惡行非正法器故說是言彼自

思惟於生天論我尚非器況極微細解脫論  
耶有說彼二自知數犯禁戒惡行煩惱損壞  
相續焦塿瓦等可令生芽我等聞法生解脫  
芽無有是處故作是說我今何用知尊法為  
有說彼二自知造作增長惡趣定業故作此  
言有說彼二身中惡相現故謂彼自見於十  
指端有十道水將欲流出便作是念我等決  
定當生龍中於是時何用更知世尊正法  
故作是說何用知為有說佛記彼二已種獨  
覺善根於當來世定成獨覺彼作是念

我等現世終不能入正性離生得果漏盡故  
 作是說我今何用知尊法爲由此世尊復作  
 是說此二愚人離我正法及毗奈耶譬如大  
 地去虛空遠此二愚人於我正法毗奈耶中  
 無少分煖若諸弟子能以財食供給其師而  
 共住者尚不應以麤言拒逆況彼不能以此  
 同住而作如是違戾語耶問有多種毗奈耶  
 謂時毗奈耶方毗奈耶種姓毗奈耶家毗奈  
 耶明毗奈耶罰羅毗奈耶犯毗奈耶聖毗奈  
 耶貪毗奈耶瞋毗奈耶癡毗奈耶此中意說

何毗奈耶有作是說此中說罰罪毗奈耶或  
 有說者此中說犯毗奈耶復有說者此中說  
 聖毗奈耶如是說者此中說貪瞋癡毗奈耶  
 問何故尊者七門分別世第一法頂惟二門  
 忍之與煖但說自性答是作論者意欲爾故  
 隨彼意欲而作此論或略或廣不應徵詰復  
 次如以七門分別世第一法亦應以七門分  
 別餘三如西方尊者以十七門總分別四種  
 順決擇分此亦應爾總以七門分別四種而  
 不爾者當知此是有餘之說復次世第一法

微細難見難可覺知以不分明不現見故七  
門分別餘三不爾故略說之復次世第一法  
多諸誹謗故以七門分別遮止餘三不爾故  
略分別復次世第一法惟一刹那其相難了  
須廣分別餘三相續故略說之如是四種順  
決擇分謂煖頂忍世第一法問如是四種自  
性云何答皆以五蘊爲其自性尊者妙音作  
如是說順決擇分有欲界繫有色界繫欲界  
繫中下者名煖上者名頂此二自性惟有四  
蘊欲界中無隨轉色故色界繫中下者名忍

上者名爲世第一法此二自性皆具五蘊色  
界中有隨轉色故如是說者此四善根皆是  
色界定地修地行聖行法故四自性皆具五  
蘊問若此四種皆色界繫云何建立四種別  
耶答此四善根雖同色界而有可動有不可  
動有有留難有無留難有可斷有不可斷有  
可慮有不可慮有可退有不可退諸可動有  
留難可斷可慮可退中下者名煖上者名頂  
諸不可動無留難無斷無慮不可退中下者  
名忍上者名爲世第一法故此四種雖同色

心六

十四

界繫五蘊為自性而有差別如說自性我物  
自體相分本性亦爾已說自性當說所以問  
此何故名順決擇分答決擇者說聖道如是  
四種是順彼分順彼分中此四最勝是故名  
為順決擇分即此四種亦名行諦亦名修治  
亦名善根行諦者謂以無常等十六行相遊  
歷四諦故修治者謂為求聖道修治身器除  
去穢惡引起聖道故猶如農夫為求子實修  
治田地除去穢草此亦如是善根者謂聖道  
涅槃是真實善此四與彼為初基本為安足

處故名為根問此四善根為有幾品答總有  
三品謂下中上煖是下品頂是中品忍及世  
第一法是上品有說煖有二品謂下下中  
頂有三品謂下上中下中忍有三品謂中  
上上下上中世第一法惟一品謂上上若以  
三品攝之煖惟下品頂下中品忍中上品世  
第一法惟是上品尊者妙音說曰煖有三品  
頂有六品忍有八品世第一法惟上上品若  
以三品攝之煖惟下品頂下中品忍通三品  
世第一法惟是上品尊者覺天說曰煖有三

品謂下下中下上頂有三品謂中下中中  
中上忍有二品謂上下上中世第一法惟一  
品謂上上若以三品攝之如初說尊者世友  
說曰煖有三品謂下下中下上頂有二品  
謂中下中中忍有三品謂中上上下上中世  
第一法惟一品謂上上若以三品攝之煖惟  
下品頂惟中品忍中上品世第一法惟是上  
品問此四善根有何差別答所說品異即是  
差別復次名亦差別謂此名煖乃至此名世  
第一法復次念住爲等無間名煖煖爲等無

間名頂頂爲等無間名忍忍爲等無間名世  
第一法如等無間無間趣入加行亦爾復次  
樂別觀蘊名煖樂別觀寶名頂樂別觀諦名  
忍由此發生世第一法復次煖止緣諦下愚  
頂止緣諦中愚忍止緣諦上愚由此發生世  
第一法復次煖止緣諦麤愚頂止緣諦中愚  
忍止緣諦細愚由此發生世第一法復次煖  
生緣諦下明頂生緣諦中明忍生緣諦上明  
由此發生世第一法復次煖生緣諦麤明頂  
生緣諦中明忍生緣諦細明由此發生世第

一法如生明生信亦爾是謂差別順決擇分  
 善根中煖亦得亦捨得者由加行故捨者或  
 由退故或由越界地故或由捨眾同分故捨  
 此煖已亦作無間業亦斷善根亦墮惡趣有  
 何勝利能與涅槃作決定因謂得煖者如吞  
 鈎魚已得決定涅槃法故頂亦得亦捨得者  
 由加行故捨者或由退故或由越界地故或  
 由捨眾同分故捨此頂已亦作無間業亦墮  
 惡趣復有何勝利謂能畢竟不斷善根問若  
 爾天授應未得頂彼起邪見斷善根故伽陀

所說當云何通如說  
 愚夫眾所識 是名為失利 自法皆滅壞  
 應知從頂墮  
 此頌世尊為天授說是則天授從頂退已而  
 斷善根云何乃言捨此頂已必不斷善答依  
 未得退說頂墮言提婆達多已修得煖不久  
 得頂著名利故還退失煖復斷善根於頂應  
 得而不得故說名頂墮非已得退有作是說  
 世尊如頂於佛作惡而墮惡趣故名頂墮有  
 餘師說佛法如頂彼壞佛法便自退落故名



頂墮忍亦得亦捨得者由加行故捨者或由越界地故或由捨眾同分故不由退故復有何勝利謂畢竟不退不作無間業不墮惡趣世第一法亦得亦捨得者由加行故捨者由越界地故不由退故亦不由捨眾同分故復有何勝利能為等無間入正性離生有餘師說煖亦得亦捨如前說捨此煖已亦作無間業亦墮惡趣有何勝利能與涅槃作決定因及能畢竟不斷善根若爾天授應未得煖彼起邪見斷善根故頂亦得亦捨如前說捨此

頂已亦墮惡趣復有何勝利不作無間業忍亦得亦捨如前說復有何勝利畢竟不退不墮惡趣不執著我問若爾鄔波離室利趨多指鬘諦語等應未得忍彼執有我抗拒佛故答彼欲論議假立有我實不執著世第一法得捨等事皆如前說

阿毗達磨大毗婆沙論卷第六

說一切有部發智

永樂北藏

大毗婆沙論

第一〇六册

阿毗達磨大毗婆沙論卷第七

心七

五百大阿羅漢等造

唐三藏法師玄奘奉詔譯

雜蘊第一中世第一法納息第一之六

西方尊者以十七門分別此四如彼頌言

意趣依因所緣果 等流異熟及勝利

行相二緣慧界定 尋等根心退為後

問煖有何意趣答先所修集一切善根謂從

布施乃至七處善皆以迴向解脫是其意趣

問煖依何而起答依自地定問煖以何為因

答前生自地同類善根問煖誰為所緣答四  
聖諦問煖以何為果答以頂為近士用果問  
煖誰為等流答後生自地同類善根問煖誰  
為異熟答色界五蘊問順決擇分亦能牽引  
眾同分不有說不能所以者何獸背有故謂  
此善根獸背諸有於眾同分但能圓滿不能  
牽引有說亦能謂此善根雖獸背有而能牽  
引隨順聖道眾同分果謂此所招眾同分果  
增上熾盛微妙殊勝無有突橫順勝善品問  
煖有何勝利答能與涅槃作決定因有說得

煖定不斷善問煖有幾行相答十六行相問  
煖爲緣名爲緣義答名義俱緣問煖爲聞所  
成爲思所成爲修所成答惟修所成問煖爲  
欲界繫爲色界繫爲無色界繫答惟色界繫  
問煖爲在定爲不在定答惟在定問煖爲有  
尋有伺爲無尋惟伺爲無尋無伺答具三種  
問煖爲樂根相應爲喜根相應爲捨根相應  
答三根相應問煖爲一心爲多心答多心問  
煖爲可退爲不可退答可退頂意趣者謂從  
布施乃至煖果者以忍爲近士用果勝利者

不斷善根有說亦不作無間業餘如煖說忍  
意趣者謂從布施乃至頂果者以世第一法  
爲近士用果勝利者不退不作無間業不墮  
惡趣有說亦不執或餘如頂說世第一法意  
趣者謂從布施乃至忍所緣者惟苦諦果者  
以苦法智忍爲近士用果勝利者爲等無間  
入正性離生行相者苦諦四行相一心多心  
者當言一心餘如忍說初煖緣三諦法念住  
現在修未來修四念住一行相現在修未來  
修四行相俱同類修非不同類緣滅諦法念

住現在修未來亦惟修法念住一行相現在  
修未來修四行相亦同類修非不同類所以  
者何非初觀蘊滅能修緣蘊道故增長煖緣  
三諦四念住隨一現在修未來修四念住此  
同類修亦不同類一行相現在修未來修十  
六行相緣滅諦法念住現在修未來修四念  
住一行相現在修未來修十六行相問何故  
初煖惟同類修非不同類增長煖能修同類  
不同類耶答初煖未曾得種性初學觀諦故  
惟修同類增長煖已曾得種性慣習觀諦故

同類修亦不同類初頂緣四諦法念住現在  
修未來修四念住一行相現在修未來修十  
六行相增長頂緣三諦四念住隨一現在修  
未來修四念住一行相現在修未來修十六  
行相緣滅諦法念住現在修未來修四念住  
一行相現在修未來修十六行相初及增長  
忍緣四諦法念住現在修未來修四念住一  
行相現在修未來修十六行相問何故忍初  
及增長皆惟法念住現在修煖頂不爾答忍  
近見道與見道相似如見道中惟起法念住

忍亦如是尊者妙音作如是說初忍及增長  
忍如初煖及增長煖說於色界善根未曾得  
種性及已曾得種性故彼不應作是說此四  
善根皆是色界修所成故忍近見道如見道  
起法念住故問增長忍一切時修十六行相  
耶答不爾或時十六或時十二或時八或時  
四所以者何如如漸次略所緣諦如是如是  
略修行相由此漸能近於見道如見道故世  
第一法法念住現在修未來修四念住一行  
相現在修未來修四行相惟同類修非不同

類問世第一法已曾得種性慣習觀諦何故  
但修同類非異類耶答世第一法惟有爾所  
行相可修無餘行相如人惟有一衣奪已更  
無可奪此亦如是故不應問復次世第一法  
隣逼見道似見道故復次世第一法開見道  
門導生見道如見道故問初煖頂忍於四聖  
諦爲相續觀爲不相續有說相續如見道中  
十五心項於四聖諦相續現觀此亦如是有  
說不相續謂觀欲界苦聖諦已即便止住次  
起加行觀色無色界苦聖諦已復便止住餘

諦亦爾如是說者此不決定或相續觀或不  
相續隨彼加行勢力轉故問何等作意無間  
引起煖耶答色界定修所成行相攝有厭離  
有渴仰有惡賤有思慕作意無間引起煖煖  
無間引起頂頂無間引起忍忍無間引起世  
第一法問已離欲染者可爾未離欲染者云  
何答欲界亦有似彼作意思所成行相攝有  
厭離有渴仰有惡賤有思慕未離欲染者此  
作意無間引起煖餘如前說問修煖滿已將  
欲起頂遂便命終彼餘生中為即起頂為從

本起答若遇明師隨彼應起分齊說者即能  
起頂若不爾者還從本起然能速起非如初  
修問若餘生中即起頂者從何作意無間起  
耶答如起煖時所有作意如說從煖起頂從  
頂起忍亦爾問若爾何故說煖無間起頂頂  
無間起忍耶答依一身中相續起者作如是  
說然非一切問若退煖已還生煖時為得先  
時曾得煖不答應言不得隨爾所度退已還  
生即爾所度新新而得所以者何極難得故  
未曾習故用功成故如別解脫戒隨爾所度

捨已復受即爾所度新新而得此亦如是如說煖頂亦爾依根本靜慮所起煖頂亦必不退以所依定自在堅牢故依未至定靜慮中間所起煖頂則不決定以可退故問煖頂忍位依下生中依中生上中上品後起下中不答決定不起所以者何居勝進位於先所得不欣尚故問起煖以後為離染不有作是說不樂離染所以者何彼寧起頂不樂發起第一有思況下地定如是說者此則不定若彼行者自知有方能生頂者即便起頂若知無

力能生頂者則求離染所以者何若得離染當生勝處離下界故煖頂忍等種類差別有七十三其事云何謂於欲界染具離有十具縛為一離一品染乃至離九并前為十於初靜慮染離一乃至離九為九無別具縛即是欲界第十攝故後位亦爾如是乃至於無所有處染離一乃至離九為九於此諸位所起煖等有七十三種類差別問隨一所起與餘所起為一為異有說是一問若爾何故說七十三種類差別答體雖是一而位有異依位



差別故說爾所有說各異謂具縛者所起異離一品者所起異廣說乃至離無所有處第九染者所起異然具縛者於具縛者所起煖等亦得亦在身亦成就亦現在前於離縛者所起煖等不得不在身不成就不現在前離欲界一品染者於離欲界一品染者所起煖等亦得亦在身亦成就亦現在前於具縛者所起煖等得而不在身成就不現在前於餘所起不得不在身不成就不現在前廣說乃至離無所有處第九品染者於自所起煖等

亦得亦在身亦成就亦現在前於餘所起煖等得而不在身成就不現在前依根本靜慮起煖等者現身必入正性離生所以者何彼由聖道引煖等故依未至定靜慮中間起煖等者此則不定所以者何彼由煖等引聖道故問若依此地起順決擇分即依此地入正性離生耶有作是說若依此地起順決擇分即依此地入正性離生如是說者此則不定或即依此地或復依餘地或即依此地者謂聲聞種性若依未至定起煖即依此地起頂

忍世第一法入正性離生乃至若依第四靜  
慮起煖即依此地起頂忍世第一法入正性  
離生或復依餘地者謂聲聞種性若依未至  
定起煖彼依初靜慮起煖頂忍世第一法入  
正性離生乃至第四靜慮亦爾若依未至定  
起煖頂彼依初靜慮起頂忍世第一法入正  
性離生乃至第四靜慮亦爾若依未至定起  
煖頂忍彼依初靜慮起忍世第一法入正性  
離生乃至第四靜慮亦爾有說若依未至定  
起煖彼依初靜慮起頂忍世第一法入正性

離生乃至第四靜慮亦爾若依未至定起煖  
頂彼依初靜慮起忍世第一法入正性離生  
乃至第四靜慮亦爾若依未至定起煖頂忍  
彼依初靜慮起忍世第一法入正性離生乃  
至第四靜慮亦爾有說若依未至定起煖頂  
彼依初靜慮起煖頂忍世第一法入正性離  
生乃至第四靜慮亦爾若依未至定起煖頂  
忍彼依初靜慮起煖頂忍世第一法入正性

離生乃至第四靜慮亦爾問順決擇分中上品後不起下中云何爾時作如是說答同地不起異地得起如是等說聲聞種性問菩薩云何有作是說菩薩若依未至定起煖依初靜慮乃至第三靜慮起煖頂忍依第四靜慮起煖頂忍世第一法入正性離生若依未至定起煖頂依初靜慮乃至第三靜慮起煖頂忍依第四靜慮起煖頂忍世第一法入正性離生若依未至定起煖頂忍依初靜慮乃至第三靜慮亦起煖頂忍依第四靜慮起煖頂

忍世第一法入正性離生問順決擇分中上品後不起下中云何爾時作如是說答同地不起異地得起有說聲聞不起菩薩能起有餘為離如是過失作如是言菩薩若依未至定起煖乃至第四靜慮亦爾若依未至定起頂乃至第四靜慮亦爾若依未至定起忍乃至第四靜慮亦爾即依第四靜慮起忍世第一法入正性離生如是說者菩薩惟依第四靜慮起煖頂忍世第一法入正性離生所以者何菩薩一切殊勝功德惟依第四靜慮引

起謂從不淨觀乃至無生智問獨覺云何答  
麟角喻獨覺如菩薩說部行獨覺不定如聲  
聞說問菩薩昔餘生中曾起順決擇分善根  
不設爾何失若曾起者何故說言菩薩所有  
殊勝善根謂從不淨觀乃至無生智皆一坐  
得若不起者菩薩九十一劫不墮惡趣是誰  
威力耶有作是說菩薩昔餘生中曾起順決  
擇分由忍力故九十一劫不墮惡趣問若爾  
何故說言菩薩善根皆一坐得答昔所起者  
是他種性非自種性一坐得者說自種性故

不相違有說不起所以者何菩薩善根不經  
歷世菩提樹下一坐得故問若爾菩薩九十  
一劫不墮惡趣是誰力耶答能障惡趣不必  
要由順決擇分所以者何或施或戒或聞或  
思或煖或頂能障惡趣若鈍根者得忍方能  
然諸菩薩行一施時亦攝戒慧行一戒時亦  
攝施慧行一慧時亦攝施戒由此能障那庾  
多惡趣況三惡趣而不能障耶如是說者菩  
薩所有殊勝善根謂從不淨觀乃至無生智  
皆此生中依第四靜慮一坐引起尚非此生

餘位何況前生鱗角喻獨覺亦爾部行獨覺善根不定如聲聞說

煖頂忍世第一法各有六種種性差別謂退法種性思法護法住法堪達不動法種性此中轉退法種性煖起思法種性煖乃至轉堪達種性煖起不動法種性煖轉聲聞種性煖起獨覺或佛種性煖轉獨覺種性煖起佛或聲聞種性煖佛種性煖定不可轉如說煖說頂亦爾轉聲聞種性忍起獨覺種性忍非轉聲聞獨覺種性忍能起佛種性忍所以者何

忍違惡趣善薩發願生惡趣故亦非轉獨覺種性忍能起聲聞種性忍所以者何忍不退故有說轉聲聞種性煖頂忍能起獨覺種性煖頂忍若起獨覺種性煖頂亦不能起餘乘煖頂所以者何獨覺善根始從不淨觀乃至無生智一坐得故評曰彼不應作是說所以者何鱗角喻獨覺種性善根雖一坐得部行獨覺種性不定如聲聞說故世第一法六種種性及三乘種性皆不可轉一刹那故問順決擇分何處起耶答欲界能起非色無色界

於欲界中人天能起非三惡趣勝善根故人  
中三洲能起非北俱盧天中雖能起而後起  
非初謂先人中起已後退生欲天中由先習  
力續復能起問何故天中不能初起答彼處  
無勝厭離等作意故問惡趣中有勝厭離等  
作意何故不起此善根耶答惡趣中無勝依  
身故若有勝厭離等作意亦有勝依身者則  
能初起此類善根欲天中雖有勝依身而無  
勝厭離等作意惡趣中雖有勝厭離等作意  
而無勝依身人中具二故能初起問色無色

界何故不起此善根耶答若處能入正性離  
生彼處能起色無色界既不能入正性離生  
故不能起問因論生論何故色無色界不能  
入正性離生耶答非田非器乃至廣說復次  
若處能起忍智<sup>心七</sup>彼處能入正性離生色無色  
界雖能起智而不起忍故不能入正性離生  
復次若處能起法智類智<sup>心七</sup>彼處能入正性離  
生色無色界雖起類智而不起法智故不能  
入正性離生復次若處有勝依身及有苦受  
彼處能入正性離生色無色界雖有勝依身

而無苦受故不能入正性離生問此煖頂忍  
世第一法依何身起答依男女身問依女身  
得女身所起煖為亦得男身所起煖耶答得  
如得煖得頂忍亦爾問依男身得男身所起  
煖為亦得女身所起煖耶答得如得煖得頂  
忍亦爾女身於女身所起煖亦得亦在身亦  
成就亦現在前於男身所起煖得而不在身  
成就不現在前如說煖說頂忍亦爾男身於  
男身所起煖亦得亦在身亦成就亦現在前  
於女身所起煖得而不在身成就不現在前

如說煖說頂忍亦爾女身所起煖與女身所  
起煖為因與男身所起煖亦為因如說煖說  
頂忍亦爾男身所起煖與男身所起煖為因  
不與女身所起煖為因所以者何勝非劣因  
彼是劣故如說煖說頂忍亦爾問依男身起  
順決擇分善根已更可受女身不答更可受  
惟前三非世第一法所以者何一刹那故問  
起順決擇分善根已更可受扇搥半擇迦無  
形二形身不答更可受惟煖頂非餘所以者  
何若得忍已便違惡趣彼扇搥等身形鄙陋

是人中惡趣若得忍等殊勝善根必更不受  
彼類身故問得忍異生於命終位既捨衆同  
分亦捨忍不設爾何失若捨者應墮惡趣何  
故乃言若得忍者不墮惡趣又若捨者何故  
異生命終時捨聖者不然若不捨者何故業  
蘊及大種蘊俱不說耶如說異生住胎藏等  
但成就身不成就身業答此應言捨有說不  
捨有說不定或捨不捨此中一一廣釋所以  
如後業蘊害生納息中說如是說者異生命  
終定捨於忍善根劣故異生依此地起此類

善根若有命終還生此地捨同分故尚決定  
捨況此善根是色界法經欲界生而當不捨  
問修煖加行其相云何答以要言之三慧爲  
相謂聞所成慧思所成慧修所成慧問云何  
修習聞所成慧答修觀行者或遇明師爲其  
略說諸法要者惟有十八界十二處五蘊或  
自讀誦素怛纜藏毗奈耶藏阿毗達磨藏令  
善熟已作如是念三藏文義甚爲廣博若恒  
憶持令心厭倦三藏所說要者惟有十八界  
十二處五蘊作是念已先觀察十八界彼觀



察時立爲三分謂名故自相故共相故名者  
謂此名眼界乃至此名意識界自相者謂此  
是眼界自相乃至此是意識界自相共相者  
謂十六行相所觀十八界十六種共相彼緣  
此界修智修止於十八界修智止已復生獸  
倦作如是念此十八界即十二處故應略之  
入十二處謂十色界即十色處七心界即意  
處法界即法處彼觀察此十二處時立爲三  
分謂名故自相故共相故名者謂此名眼處  
乃至此名法處自相者謂此是眼處自相乃

至此是法處自相共相者謂十六行相所觀  
十二處十六種共相彼緣此處修智修止於  
十二處修智止已復生獸倦作如是念此十  
二處除無爲即五蘊故應略之入於五蘊謂  
十色處及法處所攝色即色蘊意處即識蘊  
法處中受即受蘊想即想蘊餘心所法不相  
應行即行蘊彼觀察此五蘊時立爲三分謂  
名故自相故共相故名者謂此名色蘊乃至  
此名識蘊自相者謂此是色蘊自相乃至此  
是識蘊自相共相者謂十二行相所觀五蘊

十二種共相彼緣此蘊修智修止於五蘊修智止已復生厭倦作如是念此五蘊并無為即四念住故應略之入四念住謂色蘊即身念住受蘊即受念住識蘊即心念住想行蘊并無為即法念住彼觀察此四念住時立為三分謂名故自相故共相故名者謂此名身念住乃至此名法念住自相者謂此是身念住自相乃至此是法念住自相共相者謂十六行相所觀四念住十六種共相彼緣此念住修智修止於四念住修智止已復生厭倦

作如是念此四念住除虛空非擇滅即四聖諦故應略之入四聖諦謂有漏法果分即苦諦因分即集諦擇滅即滅諦對治即道諦彼觀察此四聖諦時立為三分謂名故自相故共相故名者謂此名苦諦乃至此名道諦自相者謂此是苦諦自相乃至此是道諦自相共相者謂四行相所觀苦諦四種共相一苦二非常三空四非我四行相所觀集諦四種共相一因二集三生四緣四行相所觀滅諦四種共相一滅二靜三妙四離四行相所觀

道諦四種共相一道二如三行四出彼緣此  
諦修智修止於四聖諦修智止時如見道中  
漸次觀諦謂先別觀欲界苦後合觀色無色  
界苦先別觀欲界集後合觀色無色界集先  
別觀欲界滅後合觀色無色界滅先別觀欲  
界道後合觀色無色界道如是觀察四聖諦  
時猶如隔絹觀諸色像齊此修習聞所成慧  
方得圓滿依此發生思所成慧修圓滿已次  
復發生修所成慧即名為煖煖次生頂頂次  
生忍忍次生於世第一法世第一法次生見

道見道次生修道修道次生無學道如是次  
第善根滿足善根有三種一順福分二順解  
脫分三順決擇分順福分善根者謂種生人  
生天種子生人種子者謂此種子能生人中  
高族大貴多饒財寶眷屬圓滿顏貌端嚴身  
體細軟乃至或作轉輪聖王生天種子者謂  
此種子能生欲色無色天中受勝妙果或作  
帝釋魔王梵王有大威勢多所統領順解脫  
分善根者謂種決定解脫種子因此決定得  
般涅槃順決擇分善根者謂煖頂忍世第一

法此中應廣分別順解脫分善根問此善根以何為自性答以身語意業為自性然意業增上問此善根為在意地為五識身答在意地非五識身問此善根為加行得為離染得為生得耶答惟加行得有說亦是生得評曰前說者好加行起故問此善根為聞所成為思所成為修所成耶答聞思所成非修所成有說亦是修所成評曰前說者好惟欲界繫故問此善根於何處起答於欲界起非色無色界欲界中人趣起非餘趣人趣中三洲起

非比俱盧問此善根於何時種答佛出世時要有佛法方能種故有餘師說雖無佛法若遇獨覺亦能種此善根問此善根依何身起答亦依男身亦依女身問為因何事種此善根答或因施或因戒或因聞而不決定所以者何意樂異故謂或有人因施一搏食十五或乃至一淨齒木即能種植解脫種子如戰達羅等彼隨所施皆作是言願我因斯定得解脫或有雖設無遮大會而不能種解脫種子如無暴惡等彼隨所施皆求世間富貴名稱不

求解脫或有受持一晝一夜八分齋戒即能  
種植解脫種子或有受持盡衆同分別解脫  
戒而不能種解脫種子或有讀誦四句伽陀  
即能種植解脫種子或有善通三藏文義而  
不能種解脫種子問誰決定能種此順解脫  
分善根答若有增上意樂欣求涅槃厭背生  
死者隨起少分施戒聞善即能決定種此善  
根若無增上意樂欣求涅槃厭背生死者雖  
起多分施戒聞善而亦不能種此善根問若  
有種植此善根已爲經久如能得解脫答若

極速者要經三生謂初生中種此種子第二  
生中令其成熟第三生中即能解脫餘則不  
定謂或有人種順解脫分善根已或經一劫  
或經百劫或經千劫流轉生死而不能起順  
決擇分或復有人起順決擇分善根已或經  
一生或經百生或經千生流轉生死而不能  
入正性離生順解脫分亦有六種謂退法種  
性乃至不動法種性轉退法種性順解脫分  
起思法種性順解脫分乃至轉堪達種性順  
解脫分起不動法種性順解脫分轉聲聞種

性順解脫分起獨覺及佛種性順解脫分轉  
 獨覺種性順解脫分起聲聞及佛種性順解  
 脫分若起佛種性順解脫分已則不可轉極  
 猛利故問煖加行中有生滅觀此生滅觀加  
 行云何答諸瑜伽師將觀生滅先取内外興  
 衰相已還所住處調適身心觀一期身心七前生  
 後滅次觀分位次年次時次月次半月次一  
 晝夜次年呼粟多次臘縛次怛利那次復漸  
 減乃至於一切有為法觀二刹那生二刹那  
 滅齊此名為加行成滿次復於有為法觀一

刹那生一刹那滅此則名為生滅觀成問此  
 生滅觀觀生滅時為一心觀為二心觀若一  
 心觀者為作一解為作二解若作一解者如  
 觀生為生亦應觀滅為生觀生為生可名正  
 觀觀滅為生應是邪觀如觀滅為滅亦應觀  
 生為滅觀滅為滅可名正觀觀生為滅應是  
 邪觀如何一解亦正亦邪若作二解者應有  
 二體一心二體無有是處若二心觀者一心  
 觀生一心觀滅應無生滅觀云何名為生滅  
 觀耶答二刹那頃一心觀生一心觀滅依相

續說名生滅觀不依刹那故無有失有說一心雙觀生滅而無如前所說過失以見生時比知有滅以有生法必有滅故若見滅時比知有生以有滅法必有生故評曰彼說非理云何一心可有二解現比二量體不同故前說為善問此生滅觀為勝解作意十七為真實作意有說真實作意問若爾諸行實無來去見有來去云何真實答此觀未成見有來去成時但見生滅不見有去來相如舞獨樂緩見來去急則不見旋火輪喻陶家輪喻應知亦

爾有說勝解作意問若爾伽陀所說當云何通如說

若有知見能盡漏 若無知見云何盡

若能觀蘊生滅者 是則解脫煩惱意

非勝解作意能斷煩惱答依傳因說如子孫

法謂勝解作意引生真實作意由真實作意

斷諸煩惱故不相違

阿毗達磨大毗婆沙論卷第七

說一切有部發智

永樂北藏

大毗婆沙論

第一〇六册

音釋

扇撻梵語也此云生謂生來男根不滿也撻丑皆切



阿毗達磨大毗婆沙論卷第八

心八

五百大阿羅漢等造

唐三藏法師玄奘奉詔譯

雜蘊第一中世第一法納息第一之七

此二十句薩迦耶見幾我見幾我所見乃至

廣說問何故作此論答為欲分別契經義故

謂諸經中佛說有二十句薩迦耶見尊者舍

利子於池喻經中雖略分別此二十句薩迦

耶見而皆未說幾是我見幾我所見彼經是

此論所依根本彼所未說者今欲說之故作

斯論復次為止他宗顯正義故謂譬喻者作如是說薩迦耶見無實所緣彼作是言薩迦

耶見計我我所於勝義中無我我所如人見

繩謂是蛇見杙謂是人等此亦如是故無所

緣為止彼執顯示此見實有所緣故作斯論

問於勝義中無我我所云何此見實有所緣

答薩迦耶見緣五取蘊計我我所如緣繩杙

謂是蛇人行相顛倒非無所緣以五取蘊是

實有故此二十句薩迦耶見幾我見幾我所

見耶答五我見謂等隨觀色是我受想行識

是我十五我所見謂等隨觀我有色色是我  
所我在色中我有受想行識受想行識是我  
所我在受想行識中問如我見行相緣五取  
蘊有五我所見行相緣五取蘊亦應有五何  
故乃說有十五耶答我見行相緣五取蘊無  
差別故但有五種我所見行相緣五取蘊有  
差別故有十五種謂我眾具於一一蘊皆有  
三種差別相故然此薩迦耶見或應說一謂  
五見中薩迦耶見或應說二謂我所行相  
差別說為我見及我所見或應說三謂欲色

無色三界別故或應說五謂緣五蘊有差別  
故或應說六謂於三界各有我見我所見故  
或應說九謂從欲界乃至非想非非想處九  
地別故或應說十謂緣五蘊各有我見我所  
見故或應說十二謂緣十二處有差別故或  
應說十八謂於九地各有我見我所見故又  
緣十八界有差別故或應說二十謂分別緣  
蘊我具行相差別不分別所起處如等隨觀  
色是我我有色色是我所我在色中受想行  
識亦爾五蘊各四故有二十或應說二十四

謂緣十二處各有我見我所見故或應說三十六謂緣十八界各有我見我所見故或應說四十八謂分別緣處我具行相差別不分別所起處如等隨觀眼處是我我有眼處眼處是我所我在眼處中餘十一處亦爾十二處各四故有四十八或應說六十五謂分別緣蘊我具行相差別亦分別所起處如等隨觀色是我受是我瓔珞是我僮僕是我器如受有三想行識亦爾四三十二并觀色是我總有十三如觀色是我有十三受想行識亦

爾五種十三為六十五或應說七十二謂分別緣界我具行相差別不分別所起處如等隨觀眼界是我我有眼界眼界是我所我在眼界中餘十七界亦爾十八界各四故有七十二或應說四百八謂分別緣處我具行相差別亦分別所起處如等隨觀眼處是我色處是我瓔珞是我僮僕是我器如色處有三餘十處亦爾十一種三有三十三并觀眼處是我總有三十四如觀眼處是我有三十四餘十一處亦爾十二種三十四為四百八或

應說九百三十六謂分別緣界我具行相差  
別亦分別所起處如等隨觀眼界是我色界  
是我瓔珞是我僮僕是我器如色界有三餘  
十六界亦爾十七種三有五十一并觀眼界  
是我總有五十二十八種五十二為九百三  
十六如是緣蘊行相界地分別緣處行相界  
地分別緣界行相界地分別若以相續若以  
世若以剎那分別則有無量薩迦耶見此中  
且說分別緣蘊我具行相差別不分別所起  
處故但有二十句薩迦耶見問何故此中但

依緣蘊說二十句薩迦耶見非界處耶答彼  
作論者意欲爾故乃至廣說復次亦應依界  
處說而不說者當知此義有餘復次蘊在初  
故且依蘊說界處不爾復次此中不應問作  
論者以作論者依經造論佛於經中但依蘊  
說薩迦耶見有二十句故作論者依之造論  
問若爾置作論者應問何故世尊但依蘊說  
薩迦耶見有二十句非界處耶答觀所化故  
謂佛觀察所化有情若依蘊說薩迦耶見有  
二十句使得解了能辦所作非依界處說依

界處彼得解了能辨所作佛亦說之但不如是故不爲說復次薩迦耶見多緣蘊非界處故偏說之問何故此中但說薩迦耶見有二十句不說餘見耶答彼作論者意欲爾故乃至廣說復次應知此中是有餘說謂亦應說邊執見有二十邪見有八十見取亦爾戒禁取有四十而不說者當知有餘復次薩迦耶見於五見中最爲上首是以偏說復次薩迦耶見是十種空近所對治所以偏說十種空者謂內空外空內外空有爲空無爲空散壞

空本性空無際空勝義空空空間二十句者句是何義答是自性義謂此見有二十自性問等隨觀色是我受想行識是我者云何等隨觀色是我受想行識是我耶答諸所有色若四大種若四大種所造彼一切等隨觀是我乃至識隨所應當說問薩迦耶見惟有漏緣非無漏自界地緣非他界地自界地中亦非一切一時而緣何故言彼一切等隨觀是我耶答此一切言是少分一切非一切一切故無有失復次此一切言依自所行境界而

說是以無過問頗有於一蘊執我我所耶答  
有謂名蘊行蘊中各有多法執一爲我餘爲  
我所受想識蘊雖無多類而有種種差別自  
性是故亦得計一爲我餘爲我所等隨觀我  
有色乃至廣說者云何等隨觀我有色答於  
餘四蘊展轉隨執五八一是我已然後於色執爲  
我有如人有財有瓔珞等云何等隨觀色是  
我所答於餘四蘊展轉隨執一是我已然後  
於色執爲我所如人有侍有僮僕等云何等  
隨觀我在色中答於餘四蘊展轉隨執一

我已然後於色執爲我器我處其中如油在  
麻中膩在搏中蛇在篋中刀在鞘中酥在酪  
中血在身中等如等隨觀色有此三種乃至  
等隨觀識應知亦爾問執受等是我在於色  
中是事可爾以色是麤受等細故執色是我  
在受等中云何可爾以麤法不應在細中故  
脇尊者言理不應責無明者愚盲者墮坑有  
餘師說若執色是我在受等中者彼執色細  
受等是麤是故尊者世友說曰遍四大種造  
色身中隨與觸合皆能生受此說何義此說

身中遍能起觸亦遍生受彼作是念從足至頂既遍有受故知色我在於受中大德說曰一切身分皆能生受彼作是念受遍身有身之一分是我非餘是故受中得容色我如受乃至識亦如是問為有緣一極微起薩迦耶見不設爾何失若有者此應是正見非薩迦耶見所以者何要真實行智方見極微故若無者六法論說當云何通如彼論說極微是常各別住故此各別住非無常因是故極微決定常住彼說云何證此見緣極微彼說邊

執見緣極微為境證有身見亦緣極微身邊二見所緣一故答無緣一極微起薩迦耶見問若爾六法論說當云何通答彼論所說不順正理不可引證此緣極微謂彼論中更說多種不順理因不可為證有餘師說有緣一極微起薩迦耶見問若爾此應是正見非薩迦耶見答此約所緣故說有非約現起故說有評曰彼說非理所以者何如何此見能住所緣而不能起是故前說於理為勝問為有俱時總緣五蘊執為我不設爾何失若有者

六法論說當云何通如彼論說我體惟一無  
有五種若有俱時總緣五蘊執爲我者我應  
有五然蘊自相五種各別彼所執我相無差  
別以所執我無有細分無差別相常住不變  
生老病死不能壞故若無者諦語經說當云  
何通如彼經說諦語外道白佛言喬答摩我  
說色是我受想行識是我有作是說無有俱  
時總緣五蘊執爲我者問若爾六法論說便  
爲善通諦語經說當云何通答彼憍慢故作  
非理說實無此執復次彼欲試佛故作如是

不順理言謂彼聞佛有勝智見心不定信作  
是念言我今當試有此事不故作是說復次  
彼心驚怖故作如是不順理說謂彼先說多  
種方便來詣佛所欲興論議既見世尊身有  
殊勝大論師相謂領輪如師子眼睫如牛王  
其牙纖利具四十齒梵音深妙令人樂聞彼  
見是已恐墮負處生大怖畏故作是說復次  
佛威神力映蔽彼心故作如是不順理說謂  
彼外道爲論議故來詣佛所既見世尊威德  
熾盛梵釋護世尚不能覩見已驚惶故作是



說復次天龍藥叉威神力故令作如是不順  
理說謂有信佛天龍藥叉作如是念此惡外  
道結構言詞欲惱亂佛當以勢力擾亂其心  
令違理說速墮負處如鄔波梨欲來罵佛天  
神威力擾亂其心翻成讚歎此亦如是復有  
說者有於一時總緣五蘊而起我執問若爾  
諦語經說便爲善通六法論說當云何通答  
彼於五蘊起一合想執爲一我故無有失問  
若爾彼執何爲我所答若執內蘊爲我彼執  
外蘊爲我所若執外蘊爲我彼執內蘊爲我

所故亦無失問有五蘊外執有我不設爾何  
失若有者契經所說當云何通如契經說諸  
有沙門或婆羅門施設有我一切皆緣五聚  
蘊起若無者云何說有第六我見答無五蘊  
外執有我者問若爾云何說有第六我見答  
於思行蘊所起我見於餘行蘊所起我見各  
別建立故有六種問梵網經說六十二見趣  
一切皆以有身見爲本師子吼經說諸有沙  
門或婆羅門多種異見皆依二見謂依有見  
及無有見此二經說有何差別答依等起故

說諸見趣以有身見爲本依推求故說諸異見依有無有見復次薩迦耶見能引發諸見趣有無有見能守護諸異見是謂二經所說差別若非常常見於五見何見攝何見所斷乃至廣說問何故作此論答此諸見趣於生死中與諸有情作大繫縛作大衰患作大損伏由有此故令諸有情數於欲界色無色界受多苦惱輪轉生死遠離慧明入母胎藏住在生藏熟藏中間受諸迫迫如重罪人禁在囹圄欲令有情覺知如是見趣過失勤求解

脫故作此論猶如世間繫縛衰患損伏之處人若不知不能遠避人若知之即能遠避此亦如是此論雜蘊智蘊見蘊皆以二事尋求見趣一以自性二以對治以自性者謂如是見於五見何見攝以對治者謂如是見何見所斷生智論中亦以此一事尋求見趣如彼論說外道謗佛言沙門喬答摩是大约者誑惑世間然世尊道已超於幻彼言是幻者是謗道邪見見道所斷謗道邪見者顯彼自性彼謗世尊超幻道故見道所斷者顯彼對治

道忍智生永斷彼故又彼論說有作是言世尊何故慳阿羅漢然世尊道已超於慳彼言是慳者是謗道邪見見道所斷此中二事如前應知又於問論梵網經中復以一事尋求見趣謂如是見由何而起如是總說便以三事尋求見趣一以自性二以對治三以等起脇尊者言不應如是尋求見趣如不應責無明者愚盲者墮坑評曰應以三事尋求見趣所以者何若以三事尋求見趣則具縛異生亦畢竟不起如以聖道永斷遍知此中應廣

說實法師因緣謂昔在此迦濕彌羅國中有一阿練若處諸瑜伽師共會一處論說諸見作如是言聖者於此無量過患諸惡見趣永不現行甚為希有時彼眾內有一法師名達臘婆謂眾人曰聖者於此諸惡見趣已斷遍知永不現前有何希有如我今者具縛異生以此三事尋求見趣設我後際流轉生死如前際來所經劫數於此見趣更不現行乃為希有爾時眾中有阿羅漢作如是念具縛異生乃能於此賢聖眾中作師子吼甚為希有

吾當後時驗彼所言爲實非實然所積財必歸於盡一切高貴必當墮落一切合會必當別離一切壽命必歸於死此實法師後命終已還生本國婆羅門家彼阿羅漢天眼見之數往其家而問安不如是荏苒至年長大時阿羅漢爲試驗之取彼嚴具而問之言此是誰許彼默不答其母謂曰兒今何故不答師問彼白母言師所問者世間所無當云何答母曰世間無何等物彼言無我所以者何以一切行皆無我無有情無命者無補特伽羅

無生者無養育者無作者無受者惟空行聚故不應答時阿羅漢聞已歎言甚爲希有雖經生死而諸見趣猶不現行汝於前世賢聖衆中作師子吼具縛異生若以三事尋求見趣設經多劫亦不現前斯言有實是故應以所說三事尋求見趣有大饒益

若非常常見於五見何見攝何見所斷答邊執見常見攝見苦所斷問何謂非常答諸有爲法問何緣外道計彼爲常答由二緣故一見諸色法相似相續故二見心心所法憶本

事故見諸色法相似相續故者謂彼外道見老時色似小時色見今日色似昨日色便作是念即小時色轉至老時即昨日色轉至今日見心心所法憶本事故者謂彼外道見小時所作所習所受老時能憶見昨日所作所習所受今日能憶便作是念老時心心所法即小時心心所法今日心心所法即昨日心心所法由此二緣故彼外道於五取蘊妄計爲常尊者世友作如是說彼諸外道於五取蘊相似相續覆故不知非常威儀將攝覆故

不知是苦薄皮莊飾覆故不知不淨作用我執覆故不知無我由此外道起常等見此中邊執見常見攝者顯彼自性此於常斷二邊執中常邊攝故見苦所斷者顯彼對治見苦諦時永斷彼故謂於苦諦忍智若生如是種類不正尋思不正分別顛倒見不平等取永斷止息如草端露日照則消彼亦如是以迷苦生見苦便斷問善說法者亦說諸法常有實體性相我事何故所見不名爲惡外道亦然獨稱惡見答善說法者雖說諸法有實體

等而無作用外道所說兼有作用有說善說法者惟說諸法暫起作用彼說諸法數起作用有說善說法者宣說諸法爲生所生爲老所老爲滅所滅彼說諸法非生所生非老所老非滅所滅有說善說法者宣說諸法流轉三世彼說諸法不經於世有說善說法者宣說諸法依因託緣和合而生彼說諸法非因緣生有說善說法者宣說諸法生滅相應有因有緣有爲相合彼說不爾由如是等種種因緣善說法者所見非惡外道所起獨稱惡

見問若於非常起常見者決定誹謗無常因緣彼見云何不名邪見答無行相轉立邪見名彼見不然故非邪見有說壞實事者立邪見名彼乃增益故非邪見問何故此見名邊執見答執常邊故斷常乖中俱名爲邊執二邊見名邊執見如世尊告迦多衍那若以正智觀世是集言無所有則更不行無所有者即是斷見若以正智觀世是滅言有所有則更不行所有者即是常見謂觀有情未來蘊起故非是斷現在蘊滅故非是常復次起

我見者猶是邊鄙世所訶責況復於我執有  
斷常此執邊鄙極可訶故名邊執見

若常非常見於五見何見攝何見所斷答邪  
見攝見滅所斷問何謂為常答寂滅涅槃問  
何緣外道計彼非常答外道執有十二四種解脫

一名無身二名無邊意三名淨聚四名世間  
窄堵波無身者謂空無邊處無邊意者謂識  
無邊處淨聚者謂無所有處世間窄堵波者  
謂非想非非想處然四無色雖久還退彼作  
是念我等解脫既有退墮當知釋種所說涅

槃亦有退墮故於涅槃起非常見此中邪見  
攝者顯彼自性以彼撥無常涅槃故見滅所  
斷者顯彼對治見滅諦時永斷彼故餘如前  
說問為有邪見能於寂滅涅槃起非常行相  
不設爾何失若有者品類足說當云何通如  
彼說云何邪見謂謗因謗果謗作用壞實事  
諸忍樂慧觀見若無者此中所說當云何通  
如說若常非常見邪見攝見滅所斷答應作  
是說有此邪見問品類足說當云何通答彼  
說邪見行相不盡謂有所餘煩惱行相彼不

說故有說攝在彼所說中謂謗因者謗集諦  
 謗果者謗苦諦謗作用者謗道諦壞實事者  
 謗滅諦有說謗因謗果謗作用者各謗三諦  
 壞實事者惟謗滅諦有餘師說無此邪見問  
 此中所說當云何通答涅槃中有常相若謗  
 無涅槃亦謗此常相如指中有四處若撥無  
 指亦撥四處有說義准故作是說謂諸外道  
 惟執有蘊是常住法涅槃非蘊是故義准彼  
 定撥無由此說有常非常見然無邪見能於  
 寂滅涅槃實起無常行相

若苦樂見於五見何見攝何見所斷答取劣  
 法為勝見取攝見苦所斷問何謂為苦答諸  
 有漏法問何緣外道計彼為樂答愚於少時  
 適意事故如疲暫息寒暫得暖熱暫得冷饑  
 暫得食渴暫得飲便作是念我今受樂然諸  
 蘊中有少分樂如量而取亦非顛倒外道於  
 中增益而取同究竟樂故成顛倒此中取劣  
 法為勝見取攝者顯彼自性取苦苦等為妙  
 樂故見苦所斷者顯彼對治見苦諦時永斷  
 彼故餘如前說問何故取苦為樂名為見取



取無常為常非見取耶答取苦為樂者一向取劣法為勝故名見取取無常為常者非一向取劣法為勝故非見取以常法中勝不勝法同為一聚如虛空非擇滅是無記故不名勝法復有說者於諸蘊中有少分樂由觀彼故取苦為樂名為見取非諸蘊中有少分常可觀彼故取無常為常亦名見取所以者何色等五蘊剎那性故體虛幻故暫時住故臨滅壞故如說云何滅時法謂現在法故取無常為常住者名邊執見不名見取

若樂苦見於五見何見攝何見所斷答邪見攝見滅所斷問何謂為樂答勝義樂惟涅槃問何緣外道謂涅槃苦答彼作是說一根壞時尚生於苦況涅槃中諸根皆壞是故涅槃必是極苦對彼尊者世友說言根是苦因若一根在猶能生苦況有多根惟涅槃中諸根皆滅無苦因故乃是極樂此中邪見攝者顯彼自性謗涅槃故見滅所斷者顯彼對治見滅諦時永斷彼故餘如前說問道諦亦樂如契經說道依資糧涅槃依道由道樂故得涅槃

樂樂何故惟說見滅所斷答應知此中是有  
餘說謂應說言若樂苦見是邪見攝此有二  
種若謂滅為苦見滅所斷若謂道為苦見道  
所斷而不說者有別意趣謂無漏道雖亦是  
樂而屬二分屬樂分者得涅槃故屬苦分者  
是無常故如契經說無常故苦復有說者道  
諦非樂得涅槃故假說為樂如說由樂至樂  
涅槃故此惟說見滅所斷問為有邪見能於  
涅槃起苦行相不設爾何失此中難通廣如  
前非常說

若不淨淨見於五見何見攝何見所斷答取  
劣法為勝見取攝見苦所斷問何謂不淨答  
諸有漏法問何緣外道計彼為淨答愚於少  
時鮮淨事故如治髮爪口齒皮等令顯形色  
暫時鮮淨便作是念我身清淨然諸蘊中有  
少分淨如量而取亦非顛倒外道於中增益  
而取同究竟淨故成顛倒此中取劣法為勝  
見取攝者顯彼自性取糞穢等為真淨故見  
苦所斷者顯彼對治見苦諦時永斷彼故餘  
如前說問現見九孔不淨常流如何外道執

身是淨答彼作是念已流出者雖是不淨未流出者必應是淨如甄叔迦樹華紅赤似肉野干蹲下望之作如是念我於今者定當食肉須臾彼華有墮地者便走嗅之乃知非肉復作是念已墮地者雖非是肉餘未墮者必應是肉外道亦爾無明所迷故作是執諸有漏法由二義故說名不淨一由煩惱二由境界諸染汙法具由二義不染汙法但由境界問若爾云何有漏善法亦名清淨答少分淨故謂彼雖是有垢有過有毒有漏而違煩惱

不雜煩惱壞煩惱故復有說者諸無漏法是勝義淨有漏善法牽引順彼故亦名淨問善說法者於有漏法亦說有淨如三淨業而不名惡何故外道說彼爲淨便名惡見答善說法者惟說妙行爲淨外道總說妙行惡行爲淨復次善說法者惟說善根爲淨外道總說善不善根爲淨復次善說法者惟說對治結縛隨眠隨煩惱纏諸法爲淨外道亦說結等爲淨復次善說法者說有漏法有少分淨外道說彼爲究竟淨是故外道所說是惡善說

法者不名惡見

若淨不淨見於五見何見攝何見所斷答邪見攝此有二種若謂滅為不淨見滅所斷若謂道為不淨見道所斷問何謂為淨答滅道二諦問何緣外道計滅道諦為不淨耶答彼說煩惱是真不淨聖道斷之便成不淨道所得滅亦成不淨如以刀水割洗穢物便成不淨以此刀水割洗餘物亦成不淨穢道亦然故應不淨此中邪見攝者顯彼自性誑謗滅道是不淨故見滅道所斷者顯彼對治見滅

道時永斷彼故餘如前說問為有見能於滅道二諦起不淨行相不設爾何失此中難通廣如前說

阿毗達磨大毗婆沙論卷第八說一切有部發智

音釋

鞘仙妙切脅虛業切睫即涉切目荏苒荏苒荏如  
甚切荏而琰切荏苒荏如  
荏苒荏如

阿毗達磨大毗婆沙論卷第九

心九

五百大阿羅漢等造

唐三藏法師玄奘奉詔譯

雜蘊第一中世第一法納息第一之八

若非我我見於五見何見攝何見所斷答有

心九

身見攝見苦所斷問何謂非我答一切法問  
何緣外道於彼計我答愚去來等作用事故  
彼作是念若無我者誰去誰來誰住誰坐誰  
屈誰伸誰起誰卧誰見聞嗅嘗觸憶識以有  
我故有此等事故諸外道於彼計我此中有

身見攝者顯彼自性於五取蘊執有我故見  
苦所斷者顯彼對治見苦諦時永斷彼故餘  
如前說問薩迦耶見有二行相謂我行相我  
所行相即是我見我所見攝何故此中惟說  
我見非我所見答是作論者意欲爾故乃至  
廣說有作是說亦應說彼而不說者應知此  
中是有餘說復有說者此中已說我見故應  
知亦說我所見所以者何以有我故得有我  
所以有我見故得有所見以有已見故得  
有已所見以有五我見故得有十五我所見

以有我愛故得有所愛以有我愚故得有所愚有餘師說我見是根本是顛倒性故此中偏說我所見非根本非顛倒性故此中不說問善說法者亦說諸法常有實體性相我事而非惡見何故外道說有實我便是惡見答我有二種一者法我二者補特伽羅我善說法者惟說實有法我有性實有如實見故不名惡見外道亦說實有補特伽羅我補特伽羅非實有性虛妄見故名爲惡見問何故不說我非我見答我實非有若見非我便

爲正見此中惟說諸惡見趣是故不說我非我見  
若非因因見於五見何見攝何見所斷答非因謂因戒禁取攝見苦所斷問何謂非因答自在天等不平等因問何緣外道非因謂因答親近惡友聞說自在自性士夫時方空等生諸法故如農夫等秋多收實便作是言私多未度天等所與若生男女復作是言是難陀等天神所與信自在者若生男女便作是言毗瑟拏天矩陞羅等天神所與如是等類

非因計因然有情數名別業生非有情數共業所生非自在等邪因所生此中非因謂因戒禁取攝者顯彼自性執非親正因為親正因故然戒禁取略有二種一非因計因二非道計道此中但說非因計因見苦所斷者顯彼對治見苦諦時永斷彼故餘如前說問何故此見非見集斷答果處轉故問非因謂因者亦謗諸法因何故此見非邪見攝答無行相轉名為邪見此有行相轉故不名邪見復有說者壞實事轉名為邪見此乃增益轉故

不名邪見尊者世友作如是言若撥無因名為邪見此非因計因故不名邪見於非正因謂正因故

若因非因見於五見何見攝何見所斷答邪見攝見集所斷問何謂為因答業煩惱等問何緣外道執心九內外事無因而生答不了內外緣起法故彼作是念誰掘河海誰積山原誰織棘刺誰畫禽獸准此一切皆無因生故彼頌言

誰掘河海積山原 誰織棘刺畫禽獸

世無自在能作者 故知一切皆無因

此中邪見攝者顯彼自性誹謗諸法所從因  
故見集所斷者顯彼對治見集諦時永斷彼  
故餘如前說問何故此中謗因邪見見集所  
斷見蘊中說謗因邪見見集道斷答是作論  
者意欲爾故乃至廣說復次此非了義說彼  
是了義說此有餘意趣彼無餘意趣此說有  
餘緣彼說無餘緣此說依世俗彼說依勝義  
復次此說少分因彼說一切因此惟說苦因  
彼說苦及非苦因此惟說顛倒因彼說顛倒

及非顛倒因此惟說生果因彼說生果不生  
果因復次謗集邪見撥無因體亦撥因義謗  
道邪見惟撥因體不撥因義言涅槃無因是  
正非邪故此中惟說謗因邪見故見集所斷  
非見道所斷

若有無見於五見何見攝何見所斷答邪見  
攝此有四種若謂無苦見苦所斷若謂無集  
見集所斷若謂無滅見滅所斷若謂無道見  
道所斷問何謂爲有答四聖諦問何緣外道  
撥無四諦答彼執有我故便撥無四諦彼作



是言色等五蘊是我非苦便撥苦諦我無有  
因便撥集諦我常不滅便撥滅諦我無對治  
便撥道諦如善說法者知色等五蘊是苦非  
我便信苦諦此苦有因便信集諦此苦可滅  
便信滅諦苦有對治便信道諦此中邪見攝  
者顯彼自性撥無實有四聖諦故此有四种  
廣說乃至若謂無道見道所斷者顯彼對治  
見四諦時永斷彼故餘如前說應知此中謗  
苦諦者有二種謗一謗物體二謗果義謗集  
諦者有二種謗一謗物體二謗物義謗滅諦

者惟謗物體不謗果義有作是說亦謗果義  
謗道諦者惟謗物體不謗因義有作是說亦  
謗因義有作是說亦謗因果有作是說謗道  
諦者惟謗作用問何故邪見不緣虛空及非  
擇滅答若法是蘊是蘊因是蘊滅是蘊對治  
邪見則緣虛空非擇滅非蘊非蘊因非蘊滅  
非蘊對治故彼不緣復次若法是苦是苦因  
是苦滅是苦對治邪見則緣虛空非擇滅非  
苦非苦因非苦滅非苦對治故彼不緣如苦  
苦因等應知病癰箭惱重擔及彼因等亦爾

復次若法是雜染清淨事邪見則緣虛空非  
擇滅非雜染清淨事故彼不緣復次若法是  
無漏正見所緣邪見則緣虛空非擇滅非無  
漏正見所緣故彼不緣如無漏正見對治邪  
見應知無漏智明決定信等對非智等亦爾  
復次若法如此岸彼岸中流船筏邪見則緣  
虛空非擇滅非如此岸彼岸中流船筏故彼  
不緣復次若法有因果義邪見則緣虛空非  
擇滅無因果義故彼不緣復次若法是欣厭  
事邪見則緣虛空非擇滅非欣厭事故彼不

緣復次若法能為損益邪見則緣虛空非擇  
滅不能損益故彼不緣問撥無虛空非擇滅  
者為緣何法答即緣虛空非擇滅名所以者  
何撥無彼者無深重心如謗雜染清淨事故  
問此是何智答此是欲界修所斷中無覆無  
記邪行相智然諸有者有說二種一實物有  
謂蘊界等二施設有謂男女等有說三種一  
相待有謂如是事待此故有待彼故無二和  
合有謂如是事在此處有在彼處無三時分  
有謂如是事此時分有彼時分無有說五種

一名有謂龜毛兔角空華鬘等二實有謂一切法各住自性三假有謂瓶衣車乘軍林舍等四和合有謂於諸蘊和合施設補特伽羅五相待有謂此彼岸長短事等

若無有見於五見何見攝何見所斷答此非見是邪智問此若非見云何乃言若無有見有作是說此中應言若無有見於五見何見攝何見所斷答有身見攝見若所斷復有說者此中應言若無有慧於五見何見攝何見所斷答此非見是邪智或有說者此中應言

若無有見此非見五見中不說故如是說者應如文說所以者何為問答故為成問答雖無此理而作是說如十門品作是問言三無漏根諸無為法是幾隨眠之所隨增答言無有隨眠隨增此亦如是問此邪智是何答此是欲界修所斷中無覆無記邪行相智如於心九起人想及於人起杌想於非道起道想於道起非道想如是等有餘師說如是邪智亦有染汙能起慢類梵王住此作如是言我是大梵諸梵中尊我能造化能生世間為世間

父此說非理所以者何見所斷心不能發起  
身語業故由此前說於理爲善謂是欲界修  
所斷中無覆無記邪行相智問若爾智蘊所  
說當云何通如說云何邪智謂染汙慧答邪  
智有二種一染汙二不染汙染汙者無明相  
應不染汙者無明不相應如於杭起人想等  
染汙者聲聞獨覺俱能斷盡亦不現行不染  
汙者聲聞獨覺雖能斷盡而猶現行惟有如  
來畢竟不起煩惱習氣俱永斷故由此獨稱  
正等覺者染汙邪智由勝義故名爲邪智不

染汙者由世俗故得邪智名非由勝義煩惱  
邪法不相應故後智蘊中所說邪智是勝義  
者今說世俗故不相違

雜蘊第一中智納息第二之一

頗有一智知一切法耶如是等章及解章義

既領會已次應廣釋問何故作此論答爲止

他宗顯已義故謂或有執心心所法能了自

性如大衆部彼作是說智等能了爲自性故

能了自他如燈能照爲自性故能照自他或

復有執心心所法能了相應如法密部彼作

是說慧等能了相應受等或復有執心心所法能了俱有如化地部彼作是說慧有二種俱時而生一相應二不相應相應慧知不應者不相應慧知相應者或復有執補特伽羅能了諸法如犢子部彼作是說補特伽羅能知非智為止如是他宗異執顯自所說諸心心所不了自性相應俱有補特伽羅性不可得故作斯論復次勿為止他及顯已義然諸法相理應分別饒益有情故造斯論頗有一智知一切法耶答無若此智生一切法非

我此智何所不知答不知自性及此相應俱有諸法此中不知自性者即止大眾部執不知相應諸法者即止法密部執不知俱有諸法者即止他地部執言智能知即止犢子部執又於此中有問有答有難有通頗有一智知一切法耶者是問答無者是答若此智生一切法非我此智何所不知者是難答不知自性及此相應俱有諸法者是通問此中誰問誰答誰難誰通答分別論者問應理論者答分別論者難應理論者通有說弟子問師

答弟子難師通有說此中無別現問難者但  
本論師爲辯法相假設賓主此中一智者謂  
一刹那智由此不知自性相應俱有諸法若  
作是問於十智中頗有一智知一切法耶應  
答言有謂世俗智如是問於九八七六五四  
三二智中頗有一智知一切法耶答有謂世  
俗智若即於此世俗智中作如是問頗二刹  
那頃知一切法耶答有謂此智初刹那頃除  
其自性相應俱有餘悉能知第二刹那亦知  
前自性相應俱有法故答言有今此惟問一

刹那智故答言無問何緣自性不知自性答  
勿有因果能作所作能成所成能引所引能  
生所生能屬所屬能轉所轉能相所相能覺  
所覺無差別過是故自性不知自性有說自  
性於自性無益無損無養無害無成無壞無  
增無減無聚無散無因無等無間無所緣無  
增上諸法自性不觀自性但於他性能作諸  
緣是故自性不知自性有說世間現見指端  
不自觸刀刃不自割瞳子不自見壯士不自  
負是故自性不知自性尊者世友說曰何故

自性不知自性答非境界故復次若自性知  
自性者世尊不應安立二緣生於六識謂眼  
及色爲緣生眼識乃至意及法爲緣生意識  
復次若自性知自性者世尊不應安立三和  
合觸謂眼及色爲緣生眼識三和合故觸乃  
至廣說復次若自性知自性者世尊不應安  
立邪見謂彼邪見若能自知我是邪見便爲  
正見如說邪見若能自觀是邪見者應名正  
見非謂邪見復次若自性知自性者不應建  
立惡心遍體皆是不善以了自體非邪僻故

復次若自性知自性者不應建立能取所取  
能知所知能覺所覺境有境行相所緣根相  
義等復次若自性知自性者則四念住應無  
差別以身念住即法念住乃至心念住即法  
念住故復次若自性知自性者四聖諦智應  
無差別以苦智即道智乃至滅智即道智故  
復次若自性知自性者則宿住隨念智應不  
說有以彼即知現世事故復次若自性知自  
性者則他心智應不說有以彼亦知自心所  
故大德說曰若自性知自性者則應不知他

性於自性轉故若自性知他性者則應不知  
自性於他性轉故若知自性及他性者云何  
而知如知自性是自性知他性亦爾耶如知  
他性是他性知自性亦爾耶若知自性是  
自性知他性亦爾者則知自性是自性可是  
正知他性是自性應是邪若如知他性是他  
性知自性亦爾者則知他性是他性可是正  
知自性是他性應是邪若爾應無邪正二智  
體相差別若一時知自性是自性知他性是  
他性者則應一智有二解用解用別故體亦

應別體既各別應非一智一有情身二智並  
起不應正理勿有此失是故自性不知自性  
問若爾大衆部所說喻云何通答不必須通  
彼非素怛纜毗奈耶阿毗達磨攝故又不可  
以世俗現喻難賢聖法賢聖法異世俗法異  
故若必須通應說喻過喻既有過所喻不成  
如燈無根無所緣慮非有情數智亦應爾如  
燈是色極微所成智亦應爾既不如是云何  
爲喻又彼許燈是照性不若是照性復何須  
照若非照性體應是暗不應名燈破暗名燈



寧非照性故不應執燈能自照由此所喻亦不得成問何緣不知相應諸法答同一所緣俱時轉故謂一有情心心所法於一境界俱時而轉理無展轉互相緣義譬如多人集在一處或同觀下或共觀空理必不能互相見面心心所法亦復如是若智能知相應受者彼受爲能緣自體不若緣自體則有前說緣自性過若不能緣則心心所應俱時起不同所緣勿有此失故不能知相應諸法問何緣不知俱有諸法答極相近故如籌需取安繕

那藥置於眼中極相近故眼不能取此亦如是問何等名爲俱有諸法答此隨轉色及此隨轉不相應行西方諸師作如是說與慧俱生諸蘊相續自身攝者是俱有法彼說非理所以者何若爾眼識應不能取自身諸色餘識亦爾彼作是說五識能取自身中境意識不能若爾意識應不能取一切境界便爲非理復有餘過苦法智忍應不現觀自身俱生諸蘊相續若爾便爲於自諦境少分現觀彼作是言苦法智忍於自諦境少分現觀亦無

有失苦法智生盡現觀故如道法智忍於自諦境雖少分現觀而無有失道法智生盡現觀故彼言非理所以者何苦道現觀義各異故謂欲界繫見道所斷一一邪見總謗一切法智品道道法智忍設惟於一法智品道得現觀者亦能總斷能謗邪見況除自性相應俱有餘並現觀薩迦耶見於五取蘊執我我所或總或別苦法智忍若於自諦不盡現觀應有別緣薩迦耶見爾時不斷不現觀彼所執境故薩迦耶見若不斷盡彼爲上首見苦

所斷諸餘煩惱亦應不斷若爾不應名於白諦得真現觀若於苦諦不得現觀於集滅道亦應不得如是便無究竟解脫勿有此過故不應說苦法智忍不觀自身俱生諸法人若爾者便與本論前說相違如說若緣此法起苦法智忍即緣此法起世第一法世第一法既能總緣欲界五蘊苦法智忍何爲不能是故應知前說爲善問補特伽羅何緣不知答彼如兔角不可得故謂一切法無我有情補特伽羅命者生者能養育者作者受者惟空

行聚是故無有補特伽羅能知諸法頗有一  
識了一切法耶乃至廣說問何故作此論答  
爲止他宗顯已義故謂或有執識即是智惟  
長一字所謂毗也爲止彼宗顯識與智其體  
各別如契經言智相應識或執六識各別所  
緣如五識身所緣各別如是意識十二但緣法處  
爲止彼宗顯示意識緣十二處如契經說一  
切皆是意識所緣或有執智緣一切法識不  
能爾爲止彼宗顯識與智俱能總別緣一切  
法或有執智緣自相共相識惟緣自相爲止

彼宗顯智與識俱緣二相或有執智緣同分  
不同分境識惟緣同分境爲止彼宗顯智與  
識俱緣二分或有執智緣三世境及非世境  
識惟緣現在境爲止彼宗顯智與識俱緣三  
世及非世境或有執智通緣五蘊及非蘊境  
識惟緣色爲止彼宗顯智與識俱緣五蘊及  
非蘊境或有執智緣自相續及他相續識惟  
緣自相續爲止彼宗顯智與識俱緣自他或  
有執智緣內外處識惟緣外處爲止彼宗顯  
智與識俱緣內外或有執智緣有漏無漏識

惟緣有漏爲止彼宗顯智與識俱緣二種或有執智緣有爲無爲識惟緣有爲爲止彼宗顯智與識俱緣二種或有執智惟是道支識惟是有支如犢子部以契經說正見是道支行緣識故爲止彼宗顯智與識俱通二支十二但隨強說或有執智與識不俱如譬喻者爲止十三彼宗顯智與識有俱時生由此因緣故造斯論問何故此中智後說識答是作論者意欲爾故乃至廣說有說此是經論舊法謂契經說尊者摩訶俱瑟耻羅往詣尊者舍利子所

先問智者何故名智後問識者何故名識舍利子言能知故名智能了故名識品類足論先說所知後說所識先說智門後說識門達磨難提亦作是說若於是處有智識轉當知必有勝事成辦故此亦於智後說識有說俱是根本法故謂一切清淨品中智爲根本一切雜染品中識爲根本清淨品勝是故前說有說俱是上首法故如契經說明爲上首無量善法皆得生長識爲上首諸雜染法皆得生長諸善法勝是故前說有說俱是所依趣

故如契經說應依趣智不依趣識又說五根各別所行各別境界意根於彼所行境界俱能領受意根皆為彼所依趣智依趣勝是故前說有說俱是有所緣故十二處中二有所緣謂意處法處此中說智即總顯有所緣法處說識即顯意處法處法多是故前說有說此中說心心所法故謂若說智則總顯諸心所法若說識則顯心心所法多是故前說頗有一識了一切法耶答無若此識生一切法非我此識何所不了答不了自性及此相應

俱有識法此中破執問答難通釋本文等准前應說問此中所說緣一切法非我行相由何契經知有如是緣一切法非我行相耶答如契經說

若時以慧觀一切法非我爾時能厭苦

是道得清淨

經九

十四

由此契經知有如是緣一切法非我行相問此經為說緣一切法非我行相為說緣苦諦非我行相耶設爾何失若說緣一切法非我行相者云何復言爾時厭苦若說緣苦諦非

我行相者云何說觀一切法非我有作是言  
 此經中說緣一切法非我行相問云何復言  
 爾時默答此頌前半說緣一切法非我行  
 相後半說緣苦諦非我行相有說前半說修  
 觀時後半說現觀時有說前半說聞思修所  
 成慧後半惟說修所成慧有說前半說有漏  
 慧後半說無漏慧如有漏無漏世間出世間  
 有味無味耽嗜依出離依墮界不墮界順取  
 非順取應知亦爾有說前半說同相作意後  
 半說別相作意有餘師說此經但說緣苦諦

非我行相問云何說觀一切法非我答一切  
 有二種謂一切一切少分一切此中但說少  
 分一切餘處亦說少分一切如世尊說一切  
 熾然非無漏法有熾然義此中亦爾此中雖  
 不說緣一切法非我行相而餘經說如世尊  
 說一切行無常一切法無我涅槃寂靜如說  
 者評曰隨有經證或無經證然決定有緣一  
 切法非我行相謂瑜伽師於修觀地起此行  
 相故此中說問亦有空行相能緣一切法此  
 中何故不說耶答是作論者意欲爾故乃至

廣說有說應說而不說者當知此義有餘有說非我行相其義決定是故偏說謂空行相義不決定以一切法有義故空約他性故有義故不空約自性故非我行相無不決定以約自他俱無我故由此尊者世友說言我不定說諸法皆空定說一切法皆無我問若非我行相與空行相俱能緣一切法者此二行相有何差別答非我行相對治我見空行相對治我所見如對治我見我所見對治已見已所見五我見十五我所見我行相我所行

相我執我所執我愛我所愛我愚我所愚應知亦爾有說觀蘊非我是非我行相觀蘊中無我是空行相如觀蘊非我蘊中無我觀界界中觀處處中應知亦爾有說於非有觀非有是非我行相於有觀非有是空行相有說於無觀無是非我行相於有觀無是空行相有說觀自性空是非我行相觀所行空是空行相有說觀體不自在是非我行相觀內無士夫是空行相是謂二種行相差別問何故有漏非我行相緣一切法無漏非我行相惟

緣苦諦耶答有漏非我行相非煩惱對治故  
 能緣一切法無漏非我行相是煩惱對治故  
 不緣一切法非一切法順煩惱性故有說有  
 漏非我行相非顛倒對治故能緣一切法無  
 漏非我行相是顛倒對治故不緣一切法非  
 一切法順顛倒性故有說有漏非我行相無  
 分齊緣故能緣一切法無漏非我行相有分  
 齊緣故不緣一切法緣我見境為非我故有  
 說有漏非我行相修觀時勝故能緣一切法  
 以修觀時觀一切法為非我故無漏非我行

十九

十六

相現觀時勝故不緣一切法以現觀時但緣  
 苦諦為非我故現觀位中別觀諦故由此因  
 緣有漏非我行相能緣一切法無漏非我行  
 相但緣苦諦問有漏非我行相亦不能緣一  
 相法以不能緣自性相應俱有法故云何乃  
 言緣一切法答依多分說故無有過謂所緣  
 者猶如大地四大海水蘇迷盧山太虛空量  
 所不緣者猶如芥子大海一滴妙高一塵虛  
 空蚊處故無有失有說以此有漏非我行相  
 二剎那項緣一切法故作是說非如無漏非



我行相雖多刹那亦不能緣一切法盡有說  
 有漏非我行相一刹那頃亦緣一切所應緣  
 法自性相應俱有諸法非所緣故不應為責  
 由此因緣如是有漏非我行相雖言一切法  
 皆非我而非顛倒

心九

十七

阿毗達磨大毗婆沙論卷第九

說一切有部發智

永樂北藏

大毗婆沙論

音釋

許救切以  
鼻檻氣也  
反趣謂數也  
往來諸趣也  
互切交也  
 割 瞳 補 特 伽 羅 互  
其月切  
穿也  
徒古切  
紅切  
目瞳子也  
此梵語也  
云語也  
故胡數

第一〇六册

永樂北藏

大毗婆沙論

第一〇六册

阿毗達磨大毗婆沙論卷第十

心十

五百大阿羅漢等造

唐三藏法師玄奘奉詔譯

雜蘊第一中智納息第二之二

問緣一切法非我行相自體是何答慧為自

體如自體我物相分自性亦爾已說自體所

以今當說問何故名為緣一切法非我行相

答此慧行一切法起非我相故名緣一切法

非我行相界者此行相惟欲色界無色界中

亦有此行相而不能緣一切法後當廣說地

者此行相在七地謂欲界未至靜慮中間及  
根本四靜慮此則總說若別說者聞所成慧  
惟在五地謂欲界四靜慮思所成慧惟在欲  
界修所成慧惟在六地謂前說七地中除欲  
界四無色地亦有此行相而不能緣一切法  
謂空無邊處非我行相緣四無色彼因彼滅  
一切類智品道及四無色非擇滅一切類智  
品道非擇滅并一切虛空無為或欲令是一  
物或欲令是多物此行相盡能緣識無邊處  
非我行相緣上三無色彼因彼滅一切類智

品道及上三無色非擇滅一切類智品道非  
擇滅并一切虛空無爲或欲令是一物或欲  
令是多物此行相盡能緣無所有處非我行  
相緣上二無色彼因彼滅一切類智品道及  
上二無色非擇滅一切類智品道非擇滅及  
一切虛空無爲或欲令是一物或欲令是多  
物此行相盡能緣非想非非想處非我行相  
緣非想非非想處彼因彼滅一切類智品道  
及非想非非想處非擇滅一切類智品道非  
擇滅并一切虛空無爲或欲令是一物或欲

令是多物此行相盡能緣有餘師說空無邊  
處非我行相緣五地非擇滅謂四無色第四  
靜慮餘如前說乃至非想非非想處非我行  
相緣二地非擇滅謂彼自地無所有處餘如  
前說如是說者應知此中前說爲善問何故  
無色地無緣一切法非我行相耶答若地中  
有順決擇分及彼加行相似善根彼地可有  
緣一切法非我行相無色不爾故彼地無有  
說若地中有行諦善根彼地可有如是行相  
無色不爾有說若地中有現觀邊世俗智彼

地可有如是行相無色不爾有說若地中有見道及見道加行彼地中有如是行相無色不爾有說若地觀勝有此行相無色止勝故彼地無所依者此非我行相依欲色界身初起依欲界身行相者作非我行相所緣者緣一切法念住者是雜緣法念住智者是世俗智三摩地俱者非三摩地俱根相應者三根相應謂樂喜捨問亦有喜憂根能緣一切法何故此行相非彼相應答互相違故謂此觀行相轉彼感行相轉故不相應世者此行相

墮三世緣三世及離世善不善無記者是善緣三種三界繫不繫者欲色界繫緣三界繫及不繫學無學非學非無學者是非學非無學緣三種見所斷修所斷不斷者是修所斷緣三種緣名緣義者名義俱緣緣自相續他相續非相續者三種俱緣聞思修所成者通三種加行得離染得生得者可言通三種此則總說若別說者欲界聞思所成非我行相惟加行得色界聞所成非我行相可言加行得可言生得云何可言加行得謂若此間於

自共相善修習者生彼便得若不爾者生彼不得云何可言生得謂雖此間善修習已若未生彼終不能得生彼方得彼聞所成非我行相必依此間所修加行生彼得故色界修所成非我行相是加行得及離染得亦可言是生得問若欲界没生第二靜慮第二靜慮没生初靜慮彼得初靜慮非我行相不答若先善修習者得不爾者不得乃至生第四靜慮亦爾問若欲界没生無色界無色界没生初靜慮彼得初靜慮非我行相不有說不得

以極遠故如是說者若先善修習者得不爾者不得乃至生第四靜慮亦爾問若初靜慮没生第二靜慮第二靜慮没生初靜慮彼得初靜慮非我行相不答若先善修習者得不爾者不得生餘地亦爾問何等補特伽羅得此行相為但聖者為通異生有作是說惟聖者得非諸異生如是說者異生亦得問異生有二種謂內法外法何等異生得此行相有作是說內法者得非外法者得著我故不能修習空無我見如是說者外法異生亦得此

行相然與內別謂內法者亦加行得亦生得  
亦得亦在身亦成就亦現在前外法異生惟  
生得得而不在身成就不現在前以著我故  
問云何起非我行相耶答若生欲界起欲色  
界非我行相俱能緣一切法若生初靜慮起  
初靜慮非我行相不定者亦能緣一切法定  
者惟緣從初靜慮乃至有頂起上三靜慮非  
我行相亦惟能緣從初靜慮乃至有頂若生  
第二靜慮起第二靜慮非我行相不定者能  
緣一切法定者惟緣從第二靜慮乃至有頂

起第三第四靜慮非我行相亦惟能緣從第  
二靜慮乃至有頂若生第三第四靜慮如理  
應說若生欲界色無色界起無色界非我行  
相緣法分齊如前已說問欲色二界非我行  
相何者緣法多耶答色界非我行相若不定  
者所緣法與欲界等若定者則所緣法少於  
欲界謂不能緣自隨轉色欲界非我行相無  
隨轉色故能緣一切色故有說言有身念住  
緣一切色無有受心法念住緣一切受心法  
問此緣一切法非我行相為有漏為無漏耶

答是有漏非無漏所以者何有世俗非我行相尚不能緣一切法如順決擇分何況無漏非我行相能緣一切法耶以此行相別諦緣故如諸邪見尚無一時緣二諦者況緣多耶如所對治能對治亦爾問有漏非我行相能斷煩惱不答不能斷問若爾聖者何故起耶答令根轉利入聖道故復次由四緣故聖者起之一為現法樂住故二為觀本所作故三為遊戲功德故四為受用聖財故問此非我行相為欣作意俱為厭作意俱耶設爾何失

若欣作意俱者云何緣可厭法若厭作意俱者云何緣可欣法答應作是說欣作意俱問若爾云何緣可厭法答彼瑜伽師於可欣法生欣尚故設於無量可厭聚中有一可欣則生欣樂何況多耶如銅錢聚上置一金錢便於此聚總生欣樂此亦如是故無有失頗有二心展轉相因耶乃至廣說問何故作此論答為止他宗顯已義故謂或有執因緣無體為止彼宗欲明因緣實有體性或復有執一補特伽羅有二心俱生如大衆部為止彼宗



明一補特伽羅無二心俱生或有外道引世現喻執後爲前因彼作是說現見泉涌後遍於前今其涌泓此中後水爲前水因如是諸法行三世時未來世遍今入現在現在世遍今入過去故未來世爲現在因現在復與過去爲因爲止彼宗欲明後法非前法因若是因者便違內外緣起諸法違內法緣起者謂應行緣無明乃至老死緣生父母因子眼色因眼識乃至意法因意識又應羯邏藍因頰部曇乃至壯因於老如是等違外法緣起者

謂應種子因芽乃至華因於果如是等復有大過謂應未造業而受果受果已方造業其事云何應先受苦樂異熟後造善惡業先得律儀不律儀果後受律儀不律儀戒先墮地獄後造無間先作輪王後造彼業先得無上正等菩提然後乃修六到彼岸若未作業先受果者應已作業而便失壞是則應無解脫出離是故不可後爲前因由此因緣故作斯論頗有二心展轉相因耶答無所以者何無一補特伽羅非前非後二心俱生又非後心

為前心因此中無者即止撥無因緣實體謂無二心展轉相因然有餘法互為因義無一補特伽羅等者即止大眾部執一補特伽羅有二心俱生一補特伽羅者遮多補特伽羅非前者遮過去非後者遮未來此則顯示一補特伽羅現在一剎那頃無有二心有別誦言非曾非當非現一補特伽羅二心俱生此則顯示一補特伽羅三世一剎那頃皆無二心又非後心為前心因者此即止外道執後為前因顯示後法非前因義此中但依五因

作論故答言無若依六因應答言有以能作因皆遍有故無一補特伽羅等者遮相應俱有因義又非後心為前心因者遮同類徧行異熟因義皆不遮者謂能作因如說二心無互為因義如是二受二想二思二觸二作意二勝解二欲二念二定二慧等諸心所法二眼乃至二身等諸色法二命根二眾同分等心不相應行法同類皆無互為因義頗有二心展轉相緣耶乃至廣說問此中不應先作此論應先作此論何故無一補特伽羅乃至

廣說所以者何先說無一補特伽羅非前非後二心俱生雖作是說而未說其因緣故次應說何故無一補特伽羅乃至廣說而不先作是說者有何意耶答是作論者意欲爾故乃至廣說有說阿毗達磨爲顯諸法性相故說不應求其次第但不違法相若先若後俱不應責有說論有二種一根本論二傍生論此中頗有二心展轉相因根緣等者是根本論何故無一補特伽羅等者是傍生論二根本論理應先說一傍生論理應後說故此先

說頗有二心展轉相緣耶乃至廣說問何故作此論答欲令疑者得決定故謂前說無二心展轉相因勿謂亦無二心展轉相緣爲除此疑顯有二心展轉相緣復有說者爲止撥無所緣緣體者意顯所緣緣體性實有故作斯論頗有二心展轉相緣耶答有如有心疑無未來心即思惟此起第二心乃至廣說問此中但應總答言有不應更說如有等言所以者何如說若法與彼法爲所緣此法與彼法有時非所緣耶答無時非所緣故答雖總

言有於義已足而爲饒益諸弟子等令得明了故復重說如有等言如有心起無未來心即思惟此起第二心者謂先起一刹那邪見或惟謗未來邪見聚或總謗未來有漏諸蘊復起第二刹那邪見或惟謗過去邪見聚或總謗過去諸蘊<sup>之十</sup>彼二邪見相應心展轉相緣如邪見後生邪見於彼謗無如是邪見後生有身見於彼執我我所邊執見計斷常見取執第一戒禁取執能淨疑猶豫貪染恚憎慢自舉無明不了又邪見後或生正見於彼起

非常苦空非我因集生緣是有是實是性是分有因有起有處有事行相或生無覆無記心於彼起非如理非不如理行相是名邪見相應心與諸有漏心展轉相緣如邪見心餘染汙心應知亦爾此中但說邪見爲門同染汙故如有心起有未來心即思惟此起第二心問何故復作此論答前說邪見心與有漏心展轉相緣今欲說正見心與有漏心展轉相緣故作此論謂先起一刹那正見或惟於未來正見聚或總於未來有漏諸蕩起有行

相後起第二刹那正見或惟於過去正見聚  
或總於過去有漏諸蘊起非常等行相如正  
見後生正見於彼起非常等行相如是正見  
後或生邪見於彼謗無有身見執我我所廣  
說乃至無明不了又正見後或生無覆無記  
心於彼起非如理非不如理行相是名正見  
相應心與諸有漏心展轉相緣如正見心無  
覆無記心應知亦爾同不染故如有心起無  
未來道心即思惟此起第二心問何故復作  
此論答前說邪見心與有漏心展轉相緣今

欲說邪見心與無漏心展轉相緣故作此論  
謂先起一刹那邪見謗未來道後入正性離  
生起苦忍苦智或集忍集智於彼過去邪見  
聚起非常苦空非我因集生緣行相如是二  
心展轉相緣應知此中遮刹那遮流注不遮  
時分不遮衆同分不遮無始以來遮刹那者  
謂必無有前刹那起邪見謗聖道第二刹那  
即能入正性離生故遮流注者謂必無有一  
流注中先起邪見謗聖道後即能入正性離  
生不遮時分者謗初日分時起邪見謗聖道

中日分時即能入正性離生中日分時起邪見謗聖道後日分時即能入正性離生夜三分亦爾如是晝夜半月月時年諸位皆悉不遮況衆同分無始以來如邪見疑無明應知亦爾同緣道故如有心起有未來道心即思惟此起第二心問何故復造此論答前說正見心與有漏心展轉相緣今欲說正見心與無漏心展轉相緣故造斯論謂先起一剎那正見或惟於未來無漏心或總於未來無漏諸蘊起有行相後起聖道或惟於過去正見

聚或總於過去有漏諸蘊起非常苦空非我因集生緣行相如是二心展轉相緣應知此中諸有欲令惟共相作意無間起聖道者彼遮剎那不遮流注等遮剎那者此有未來道心行相是自相作意故諸有欲令三種作意無間皆起聖道者彼亦不遮剎那如有二知他心者彼二心展轉相緣問何故復作此論答前說自相續心與自相續心展轉相緣今欲說自相續心與他相續心展轉相緣故作斯論問此中說何等二知他心者彼二心互

相緣耶答此中說根等地等道等二知他心者彼二心展轉相緣根等者謂同利根中根輒根地等者謂同依初靜慮乃至同依第四靜慮道等者謂同有漏同無漏同法智品同類智品同學同無學問彼二心云何相緣答但緣彼心非彼心所緣及能緣行相若緣彼心所緣及能緣行相者則有自緣之過問亦有餘智俱心展轉相緣何故但說他心智俱答是作論者意欲爾故乃至廣說有說應說而不說者當知此義有餘有說此中但說明

了不雜易可知者餘智不爾問有多種他心智此中爲說何者答說加行得離染得者問何故不說餘耶答是作論者意欲爾故乃至廣說有說應說而不說者當知此義有餘有說此中但說名義勝者謂加行得離染得者是修所成通慧所攝四支五支勝靜慮果有說此智於境無有謬失餘則不爾是以不說今因此文動爾焰海如說二心展轉相緣應知受等諸心所法相緣亦爾又亦應說部界善等諸心相緣部者謂見苦所斷心與見苦

集修所斷心展轉相緣見集所斷心與見苦  
集修所斷心展轉相緣見滅所斷無漏緣心  
展轉相緣見道所斷有漏緣心展轉相緣見  
道所斷無漏緣心與無漏心展轉相緣應知  
無漏心亦展轉相緣修所斷心展轉相緣修  
所斷心與無漏心展轉相緣應知修所斷心  
與見苦集所斷心展轉相緣者謂善無覆無  
記與無漏心展轉相緣者惟善界者欲界心  
與欲色界及不繫心展轉相緣色界心與色  
無色界及不繫心展轉相緣無色界心與無

色界及不繫心展轉相緣應知無色界心與  
色界心展轉相緣者謂空無邊處近分善等  
者謂善不善無記心各與三種心展轉相緣  
惟除不善異熟以彼惟在五識身故餘無覆  
無記心有展轉相緣義又此中所說邪見謗  
因謗果者有四句差別謂或依因謗果或依  
果謗因或不依因謗果或不依果謗因依  
謗果者如說妙行惡行無果異熟依果謗因  
者如說一切士夫補特伽羅所受苦樂無因  
無緣不依因謗果者如說無有化生有情不



依果謗因者如說無有妙行惡行問緣有四種此中何故但說因及所緣非餘二耶答是作論者意欲爾故乃至廣說有說應說而不說者當知此義有餘有說彼二亦在此所說中謂若說因緣應知已說等無間緣如無二心展轉為因亦無二心展轉為等無間故若說所緣緣當知已說增上緣如有二心展轉為所緣亦有二心展轉為增上故何故無一補特伽羅乃至廣說問何故復作此論答為止他宗顯已義故謂或有執等無間緣體非

實有為遮彼意欲顯實有等無間緣或有執一補特伽羅二心俱生為重遮彼顯惟一心有說此文是傍主論前說無一補特伽羅非前非後二心俱生未說所以今欲說之故作斯論何故無一補特伽羅非前非後二心俱生答無第二等無間緣故謂心心所法生必依止等無間緣既無第二等無間緣故必無一補特伽羅非前非後二心俱生此復應問何故無第二等無間緣故復答言有情一一心相續轉故謂有情心法爾一一相續而轉

無二無多此是展轉更相答義有說此文重  
答前問謂先問言何故無一補特伽羅非前  
非後二心俱生今重答言有情一一心相續  
轉謂一一有情由法爾力但有一心相續而  
轉所以者何未來心聚必由現在和合故生  
不和合則不生現在但有一和合故令未來  
心一一而起猶如多人經於狹路一一而過  
尚無二並何況有多又如牛羊圈門狹小一  
一而出無二無多如是有情未來心聚依現  
和合一一而生設現在世有多和合為開次

者則應一時有多心起但無此事故一一生  
又由和合有先後故假使先有修道和合後  
見道者則應修道先見道生但無此事故先  
起見道由此無一補特伽羅非前非後二心  
俱生於此義中復有分別謂何故無一補特  
伽羅非前非後二心俱生尊者世友說曰於  
一刹那身惟有一心依彼轉故無有二復次  
於一刹那命根惟一心依彼轉故無有二復  
次於一刹那惟有一類眾同分心依彼轉故  
無有二大德說曰法生時和合惟一無二不

可一和合有二果生故一刹那心惟有一復  
有說者若有二心俱生則應不可調伏如今  
一心剛強懶悞猶難調伏況二心耶若心不  
可調伏則無得解脫義故一相續無二心俱  
或有說者若一相續二心俱生則有雜染清  
淨俱時起過謂一心雜染一心清淨如是則  
無得解脫理又應一時生善惡趣復次若一  
相續二心俱生何妨有三若有三者應一時  
受三界異熟是則界壞亦無解脫復次若一  
相續三心俱生何妨有四若有四者應一時

受四生異熟是則生壞亦無解脫復次若一  
相續四心俱生何妨有五若有五者應一時  
受五趣異熟是則趣壞亦無解脫復次若一  
相續五心俱生何妨有六則應一時六識俱  
起應一時取一切境界復次若一相續六心  
俱生何妨有百若有百者何妨有千乃至何  
妨無數俱起若爾諸法從未來世應一時生  
於現在世一時而滅是則應無未來現在以  
觀未來現在故說有過去未來現在無故過  
去亦無若無三世則無有爲若無有爲則無

無爲如是則一切法皆無是爲大過是故無  
有二心俱生有餘師說若一相續二心俱生  
則應受等諸心所法亦二俱生則一刹那應  
有十蘊則有情壞有情壞故所依身壞所依  
壞故則五部壞五部壞故則對治壞對治壞  
故則遍知壞遍知壞故沙門果等一切皆壞  
勿有此過故一相續無二心俱問如一刹那  
有多心所而無前過心亦應爾尊者世友說  
曰心所雖多而與心同一等無間緣之所引  
起如心是一受等亦一故無有過大德說曰

心與受等一和合生如心是一受等亦一故  
無有過復有說者心與受等一作意生如心  
是一受等亦一雖皆名心所而體類各異故  
無有失問如前所說等無間緣自體是何答  
除阿羅漢最後心心所法諸餘過去現在心  
心所法心十是謂等無間緣自體問何故阿羅漢  
最後心心所法非等無間緣耶答彼心心所  
法若是等無間緣者彼後應有心心所法生  
若爾便無究竟解脫有餘師說彼亦是等無  
間緣彼後心心所法不生者有餘緣故非彼

爲礙設當生者亦與作緣猶如意根意界意處彼不應作是說所以者何等無間緣依作用立若法與彼法作等無間緣無法無有情無呪術無藥物等能爲障礙令彼不生意根界處依根相故立雖後識不生而有根等相故得名根等問何故阿羅漢最後心有意根等相而無等無間緣相耶答意根界處不必觀於後法故立觀心所等亦得名故等無間緣觀後法立後不生故不說爲緣復次不生法中有意識相故最後心是意根等不生法

中無等無間相以雜亂住故是以最後心等不立等無間緣問等無間緣以何爲相答體即是相相即是體不應離體別求其相尊者世友說曰能開闢義是等無間緣相復次與次第義是等無間緣相復次與作用義是等無間緣相復次能生心義是等無間緣相復次能引發心義是等無間緣相復次能警覺心義是等無間緣相復次能令心相續義是等無間緣相大德說曰能引生無間心義是等無間緣相尊者婆未羅說曰能令未已生

心續已生心義是等無間緣相阿毗達磨者  
 說曰能令各別自相法無間生義是等無間  
 緣相各別自相法者謂受想等心所及心自  
 相各別俱時而生無容有二有餘師說令相  
 似法無間生義是等無間緣相已說體相所  
 以今當說問何故名曰等無間緣答此緣能  
 引等無間法是故名曰等無間緣問前後剎  
 那諸心所法或多或少云何名等如欲界心  
 所多非色界色界心所多非無色界善心所  
 多非不善不善心所多非無記有漏心所多

非無漏如何可說此緣能引等無間法耶答  
 依事等說不依數等故無有過若一心中有  
 一想二受等者可不名等以一心中受等心  
 所隨所應生各惟有一是故名等問為心但  
 與心受等但與受等作等無間緣為不爾耶  
 相似相續沙門說曰心但與心作等無間緣  
 受等亦爾各與自類作等無間緣彼不應作  
 是說所以者何若必爾者應善心還生善心  
 不善心還生不善心無記心還生無記心貪  
 心還生貪心恚心還生恚心癡心還生癡心

如是便無究竟解脫又諸心所或少或多少  
生多時便應緣闕多生少時便應果減如是  
則一心聚中有從緣生有不從緣生有作緣  
者有不作緣者又無漏心聚應無緣而生應  
作是說心與心亦與受等受與受亦與心等  
作等無間緣心十餘心所亦爾問為心與心作近十七  
等無間緣非受等受等與受等作近等無間  
緣非心等為不爾耶相似相續沙門說曰心  
與心作近等無間緣非受等受等與受等作  
近等無間緣非心等彼不應作是說所以者

何前已說能開闢義是等無間緣相開闢義  
中無遠近故應作是說前生心聚與後生心  
聚作等無間緣無有差別如豆等聚

阿毗達磨大毗婆沙論卷第十

說一切有部發智

永樂北藏

大毗婆沙論

第一〇六册



阿毗達磨大毗婆沙論卷第十一 動一

五百大阿羅漢等造

唐三藏法師玄奘奉詔譯

雜蘊第一中智納息第二之三

問未來世中有等無間緣不設爾何失若有者未來諸法應次第住修正加行應成無用所以者何若法在此無間而住彼法從此無間必生修正加行復何所用又應無有伏諸煩惱生對治義如是便無究竟解脫見蘊所說復云何通如說若法與彼法作等無間或

時不與彼法作耶答若時此法未至已生若無者何故世第一法無間唯生苦法智忍不生乃至盡無生智八分經說復云何通如說如是補特伽羅作此業已或十三劫或十四劫或乃至二十劫不墮惡趣又云何建立順現法受順次生受順後次受三種業耶答未來無有等無間緣問若爾何故世第一法無間唯生苦法智忍不生乃至盡無生智耶答此名數定非事相定所以者何苦法智忍在六地未知何地者當生三根相應未知何根

相應者當生有四行相未知何行相當生無量刹那未知何刹那當生故乃至住增上忍時苦法智忍唯於三事定謂地定根定行相定於二事猶不定謂刹那不定等無間緣不定若住世第一法時於五事皆定復次不必要有等無間緣諸法次第相續而起所以者何若法依屬彼法從彼法後無間得生餘則不爾猶如外物雖無等無間緣而相依屬前後次第生起如種芽莖枝條華果依屬彼者彼無間生餘則不爾如是內法在未來世雖

無等無間緣而依屬彼者彼無間生餘則不爾苦法智忍依屬世第一法苦法智等則不如是是故世第一法無間唯生苦法智忍不生乃至盡無生智復次未來法生依現在法若現在法和合彼則得生若不和合彼則不生雖無是處為分別故假使修道生緣先合亦應先生然無是事惟苦法智忍依世第一法和合而生苦法智等依餘和合是故世第一法無間唯生苦法智忍不生乃至盡無生智問八分經等復云何通有說世尊依過去

現在比知未來故作是說謂世尊觀過去現在如是種類補特伽羅造如是業爾所劫中不墮惡趣如是種類補特伽羅造如是業現世受果造如是業次生受果造如是業後次受果由此現見如是種類補特伽羅造如是業比知當來爾所劫中不墮惡趣如是種類補特伽羅造如是業當現受果造如是業當生受果造如是業當後受果有餘師說有情身中有如是相是不相應行蘊所攝世尊觀彼便知如是補特伽羅於未來世爾所劫中

不墮惡趣亦知如是補特伽羅所造諸業或當現受或當生受或當後受評曰不應作如是說若作是說便顯世尊於未來事惟有比量智無現量智此不應理應作是說佛知未來是現非比謂佛智見明淨猛利未來諸法雖雜亂住無有次第而能現知如是種類補特伽羅造如是業於未來世爾所劫中不墮惡趣如是種類補特伽羅造如是業或當現受或當生受或當後受明了無謬有餘師說未來亦有等無間緣問若爾未來諸法應次

第住修正加行應成無用又應無有伏諸煩惱生對治義如是便無究竟解脫答未來諸法雖有等無間緣性相定而無前後次第定謂心心所未已生位有應從彼無間生法而無前後次第行列至已生位有應從彼無間生法亦有前後次第行列如多沙門若雜亂住雖大小已定而行列未定若次第住大小亦定行列亦定此亦如是故無有失修正加行非成無用一心無間有二心故謂未來世一心無間有二心住一善二染若現在世修

正加行則善心生染心不生若現在世起邪加行則染心生善心不生如一種後二事應生一牙二灰若牙緣和合則牙生灰不生若灰緣和合則灰生牙不生此亦如是由此亦有伏諸煩惱生對治義漸次便證究竟解脫問見蘊所說復云何通如說若法與彼法作等無間或時不與彼法作耶答若時此法未至已生答彼依前後次第說不依為緣性相定說故不相違評曰應作是說未來無有等無間緣所以者何等無間緣不雜亂住未

來世法雜亂住故等無間緣次第而住未來  
世法無次第故等無間緣依開闢義立未來  
世法無開闢義故復次若未來有等無間緣  
則欲修善者應當作善欲作惡者應當作惡  
然今現見欲修善者後便作惡如天授等欲  
作惡者後便作善如指鬚等故未來世決定  
無有等無間緣問何故色法非等無間緣答  
若法相應有所依有行相有警覺有所緣彼  
法可立等無間緣色法不爾故非等無間緣  
有說等無間緣現前無亂色法有亂故非等

無間緣謂一刹那起欲界色及色界色或一  
刹那起欲界色及不繫色或一刹那起色界  
色及不繫色尊者世友說曰一異熟色相續  
未滅有長養色及等流色復相續生多類俱  
生故非等無間緣大德說曰以諸色法少無  
間生多多無間生少故非等無間緣少無間  
生多者如夏雨時少雲無間起無量雲遍覆  
虛空從小樹子生極高大諾瞿陀樹從小羯  
刺藍生廣大身色多無間生少者如大草聚  
燒為少灰問若爾心所法亦多無間生少少

無間生多應不建立等無間緣多無間生少者如從有尋有伺地入無尋無伺地少無間生多者如從無尋無伺地入有尋有伺地答此依同地前後數等說不依異地故無有失有說此依同類前後數等說不依異類故無有失謂一心中<sup>如</sup>若一受等無間二受等生二受等無間一受等生可有此失然無是事故與色別以諸色法同類極微於一聚中衆多俱起故不可立等無間緣心心所法無如是事問何故不相應行非等無間緣答若法相

應有所依有行相有警覺有所緣彼法可立等無間緣不相應行不爾故非等無間緣有說等無間緣現前無亂不相應行現前有亂故非等無間緣謂一剎那有起三界及不繫不相應行故餘隨所應如前廣說品類足論有如是言云何心等無間法答若心等無間餘心心所法已生正生及無想定滅盡定已生正生是謂心等無間法問彼何故不說無想異熟耶有說應說而不說者當知此義有餘有說二無心定有加行有功用勤勞而得

故彼說之無想異熟與此相違故彼不說有說二無心定是善故說無想異熟無覆無記故不說之有說若由心力無間引起不雜亂者可名為心等無間法無想異熟是異熟因<sub>一</sub>力所引起任運而轉非入彼心勢力所引起故不名心等無間法問若爾異熟心心所法亦異熟因力所引起任運而轉應不名心等無間法答自類相引有勝勢力不同彼故俱是相應有所依等說名自類問何故二無心定是心等無間法而非心等無間緣耶答彼

由心加行功用勤勞所引得故名心等無間法與心相違遮斷心故非心等無間緣有說彼由心勢力所引起故名心等無間法不相應無所依無行相無警覺無所緣故非心等無間緣有說彼由心勢力得增長有作用故名心等無間法損減心令不起作用故非心等無間緣問何故二無心定前後相似無亂續生而前非後等無間緣答由入定心勢力所引不由前念力所引生故前非後等無間緣問若爾異熟心心所法由異熟因勢力引

起任運而轉前應非後等無間緣答心心所法是相應有所依有行相有警覺有所緣故前念於後有勝勢力引發開闢故皆是後等無間緣不相應行與此相違不可為例問入出無想滅盡定中間或經半劫一劫云何可說等無間耶答中間無餘心為隔故謂入出心相去雖遠中間更無餘心所間故後於前名等無間猶如二人共涉遠路一前一後相遠而行有人問言汝有伴不彼答言有次後而來二人中間雖有禽獸無人為隔故言

次後此亦如是無心為隔名等無間問若法是心等無間亦是心無間耶答應作四句有法是心等無間非心無間謂除初刹那二無心定及有心位心心所法諸餘相續二無心定及出定心心所法有法是心無間非心等無間謂初刹那二無心定及有心位心心所法生老住無常有法是心等無間亦是心無間謂初刹那二無心定及有心位心心所法二無心定及有心位心心所法生老住無常



諸餘相續二無心定及出定心心法生老住  
無常問若法是心等無間亦是無心定無間  
耶答應作四句有法是心等無間非無心定  
無間謂初刹那二無心定及有心位心心所  
法有法是無心定無間非心等無間謂除初  
刹那二無心定及有心位心心所法生老住  
無常諸餘相續二無心定及出定心心所法  
生老住無常有法是心等無間亦是無心定  
無間謂除初刹那二無心定及有心位心心  
所法諸餘相續二無心定及出定心心所法

有法非心等無間亦非無心定無間謂初刹  
那二無心定及有心位心心所法生老病無  
常有三種作意謂自相作意共相作意勝解  
作意自相作意者思惟色是變礙相受是領  
納相想是取像相行是造作相識是了別相  
地是堅相水是濕相火是煖相風是動相如  
是等共相作意者如十六行相等勝解作意  
者如不淨觀持息念無量解脫勝處徧處等  
問此三種作意幾種無間聖道現在前聖道  
無間幾種現在前耶有說三種無間聖道現

在前聖道無間三種現在前如是善通契經所說不淨觀俱行修念等覺支依止歇依止離依止滅迴向於捨此中俱聲顯無間義有說二種無間聖道現在前除自相作意聖道無間三種現在前有說惟共相作意無間聖道現在前聖道如無間三種現在前問契經所說當云何通如說不淨觀俱行修念等覺支答依展轉因故作是說如子孫法傳相生故謂勝解作意引起共相作意共相作意引起聖道有說共相作意無間聖道現在前聖道

無間共相作意現在前問若爾依未至定入正性離生者出聖道時可起欲界共相作意若依上地入正性離生者出聖道時彼欲界心既不得起以遠故復未得色界共相作意彼雖已得順決擇分而聖道後不復現前彼以何等共相作意出聖道耶答彼於順決擇分中間已修得如是行相謂一切行非常一切法非我涅槃寂靜等今出聖道起彼作意評曰彼不應作是說如前說者好謂三種無間聖道現在前聖道無間三種現在前後次

欲界有三種作意謂聞所成作意思所成作  
意生得作意色界有三種作意謂聞所成作  
意修所成作意生得作意無色界有二種作  
意謂修所成作意生得作意無漏有一種作  
意謂修所成作意此中欲界惟思所成無間  
聖道現在前聖道無間三種現在前色界惟  
修所成無間聖道現在前聖道無間二種現  
在前除生得無色界惟修所成無間聖道現  
在前聖道無間亦惟修所成現在前問何故  
聖道無間欲界生得現在前非色無色界生

得耶答欲界生得猛利色無色界生得不猛  
利故若依未至定得阿羅漢果彼或以欲界  
心出聖道或以未至定心出聖道若依無所  
有處得阿羅漢果彼或以無所有處心出聖  
道或以非想非非想處心出聖道若依餘地  
得阿羅漢果彼惟以自地心出聖道復次初  
靜慮有三種謂味相應淨無漏如是乃至無  
所有處皆有三種非想非非想處但有二種  
謂除無漏此中味相應無間二種現在前除  
無漏淨無間三種現在前無漏無間二種現

在前除味相應淨初靜慮復有四種謂順退分順住分順勝進分順決擇分如是乃至無所有處皆有四種非想非非想處惟有三種除順勝進分此中順退分無間二種現在前謂順退分及順住分順住分無間三種現在前謂除順決擇分順勝進分無間三種現在前謂除順退分順決擇分無間二種現在前謂順決擇分及順勝進分問若生第二第三第四靜慮起初靜慮諸識身時幾心無間入幾心出耶答隨所生地若未離染者三種心

無間彼諸識身現在前彼諸識身無間三種心現在前謂善染汚無覆無記若已離染者二種心無間彼諸識身現在前彼諸識身無間二種心現在前謂除染汚有十二心欲界四謂善不善有覆無記無覆無記色無色界各三謂前四中除不善無漏有二謂學無學問此十二心一一無間生幾心復從幾心無間生耶答欲界善心無間生九心謂欲界四色界二善有覆無記無色界一有覆無記及學無學心此心復從八心無間生謂欲界四

色界二善有覆無記及學無學心不善心無  
間生四心謂欲界四心此心復從十心無間  
生謂欲界四色無色界各三心如不善心欲  
界有覆無記心亦爾欲界無覆無記心無間  
生七心謂欲界四色界二善有覆無記無色  
界一有覆無記心此心復從五心無間生謂  
欲界四及色界一善心色界善心無間生十  
一心謂十二心中除無色界無覆無記心此  
心復從九心無間生謂色界三欲界二善無  
覆無記無色界二善有覆無記及學無學心

色界有覆無記心無間生六心謂色界三欲  
界三除無覆無記心此心復從八心無間生  
謂色無色界各三欲界二善無覆無記心色  
界無覆無記心無間生六心謂色界三欲界  
二不善有覆無記無色界一有覆無記心此  
心復從三心無間生謂色界三心無色界善  
心無間生九心謂無色界三欲界二不善有  
覆無記色界二善有覆無記及學無學心此  
心復從六心無間生謂無色界三色界一善  
及學無學心無色界有覆無記心無間生七

心謂無色界三欲界二不善有覆無記色界  
二善有覆無記心此心復從七心無間生謂  
無色界三欲色界各二善無覆無記心無色  
界無覆無記心無間生六心謂無色界三欲  
界二不善有覆無記色界一有覆無記心此  
心復從三心無間生謂無色界三心學心無  
間生五心謂三界善及學無學心此心復從  
四心無間生謂三界善及學心無學心無間  
生四心謂三界善及無學心此心復從五心  
無間生謂三界善及學無學心有二十心欲

界八謂加行善生得善不善有覆無記威儀  
路工巧處異熟生通果心色界六謂前八心  
中除不善及工巧處無色界四謂加行善生  
得善有覆無記異熟生心無漏二謂學無學  
心問此二十心一一無間生幾心復從幾心  
無間生耶答欲界加行善心無間生十心謂  
欲界七除通果心色界一加行善及學無學  
心此心復從八心無間生謂欲界四除無覆  
無記四色界二加行善有覆無記及學無學  
心有餘師說此心復從十一心無間生謂前

八及欲界威儀路工巧處異熟生心所以者  
何以熟修習加行善心者從自界威儀路工  
巧處異熟生心無間亦現在前欲界生得善  
心無間生九心謂欲界七除通果心色無色  
界各一有覆無記心此心復從十一心無間  
生謂欲界七除通果心色界二加行善有覆  
無記及學無學心不善心無間生七心謂欲  
界七除通果心此心復從十四心無間生欲  
界七除通果心色界四除加行善及通果心  
無色界三除加行善心如不善心欲界有覆

無記心亦爾欲界威儀路心無間生八心謂  
欲界六除加行善及通果心色無色界各一  
有覆無記心有餘師說此心無間生九心謂  
前八及欲界加行善心熟修習者能現前故  
此心復從七心無間生謂欲界七除通果心  
如欲界威儀路心欲界異熟生心亦爾工巧  
處心無間生六心謂欲界六除加行善及通  
果心有餘師說此心無間生七心謂前六及  
欲界加行善心熟修習者能現前故此心復  
從七心無間生謂欲界七除通果心欲界通

果心無間生二心謂欲界通果及色界加行  
善心此心復從二心無間生謂欲界通果及  
色界加行善心色界加行善心無間生十二  
心謂色界六欲界三加行善生得善通果無  
色界一加行善及學無學心此心復從十心  
無間生謂色界四除威儀路異熟生心欲界  
二加行善通果心無色界二加行善有覆無  
記及學無學心色界生得善心無間生八心  
謂色界五除通果欲界二不善有覆無記無  
色界一有覆無記心此心復從五心無間生

謂色界五除通果心色界有覆無記心無間  
生九心謂色界五除通果欲界四加行善生  
得善不善有覆無記心此心復從十一心無  
間生謂色界五除通果欲界三生得善威儀  
路異熟生無色界三除加行善心色界威儀  
路心無間生七心謂色界四除加行善通果  
心欲界二不善有覆無記無色界一有覆無  
記心此心復從五心無間生謂色界五除通  
果心如色界威儀路心色界異熟生心亦爾  
色界通果心無間生一心謂色界加行善及



通果心此心復從二心無間生謂色界加行善及通果心無色界加行善心無間生七心謂無色界四色界一加行善及學無學心此心復從六心無間生謂無色界三除異熟生色界一加行善及學無學心無色界生得善心無間生七心謂無色界四欲界二不善有覆無記色界一有覆無記心此心復從四心無間生謂無色界四心無色界有覆無記心無間生八心謂無色界四欲界二不善有覆無記色界二加行善有覆無記心此心復從

十心無間生謂無色界四欲色界各三生得善威儀路異熟生心無色界異熟生心無間生六心謂無色界三除加行善心欲界二不善有覆無記色界一有覆無記心此心復從四心無間生謂無色界四心學心無間生六心謂欲界二加行善生得善色無色界各一加行善及學無學心此心復從四心無間生謂三界各一加行善及學心無學心無間生五心謂欲界二加行善生得善色無色界各一加行善及無學心此心復從五心無間生

謂三界各一加行善及學無學心補特伽羅  
既不可得又無前心往後心理何緣能憶本  
所作事乃至廣說問何故作此論答為止他  
宗顯已義故謂或有執補特伽羅自體實有  
如犢子部彼作是說我計有我可能憶念本  
所作事先自領納令自憶故若無我者何緣  
能憶本所作事或復有執物性相隱如說諸  
法相隱外道彼作是說諸有為法有晝夜分  
互相藏隱夜時晝入夜中晝性雖在而不顯  
現晝時夜入晝中夜性雖在而不顯現如是

可能憶本所作晝夜分中有夜晝故夜晝時  
所作晝夜時能憶若不爾者何緣能憶本所  
作事或復有執物性相變如說諸法相變外  
道彼作是說即羯刺藍位變作頰部曇位乃  
至即堅固位變作衰老位如即青葉變作黃  
葉如是可能憶本所作以前後位體無異故  
前位所作後位能憶若不爾者何緣能憶本  
所作事或復有執物性相往如說諸法相往  
外道彼作是說羯刺藍往入頰部曇位中乃  
至堅固往入衰老位中如是可能憶本所作

以後位中有前法故前位所作後位能憶若不爾者何緣能憶本所作事問物性相變相往外道二執何別答相變外道執即前位變作後位後位中無前位相往外道執前位往後位既至後位其相不壞即與後位俱時增長有作是說相變外道執後與前不一不異相往外道執後與前亦一亦異或復有執覺性是一如說前後一覺論者彼作是說前作事覺後憶念覺相用雖異其性是一如是可能憶本所作以前後位覺體一故前位所作

後位能憶若不爾者何緣能憶本所作事或復有執境界是常如執境界是常論者彼作是說六識雖生滅而境界是常如是可能憶本所作六識所作事境界能憶故若不爾者何緣能憶本所作事或復有執蘊有二種一根本蘊二作用蘊前蘊是常後蘊非常彼作是說根本作用二蘊雖別而共和合成一有情如是可能憶本所作以作用蘊所作事根本蘊能憶故若不爾者何緣能憶本所作事或復有執前心往告後心我作是事汝可憶

持彼作是說心細冥通前有所作必告後知如是可能憶本所作若不爾者何緣能憶本所作事然過殞伽沙數諸佛及佛弟子雖不說有補特伽羅亦不說有物性相隱相變相往一覺性意界常根本蘊異作用蘊異前心往告後心而說有能憶本所作此義決定微細甚深難可覺了為欲顯示如是決定微細甚深難可覺了諸法性相及止他宗不如理說故作斯論問此中應具說補特伽羅既不可得亦無物性相隱相變相往一覺性意界

常根本蘊異作用蘊異前心往告後心理何緣能憶本所作事何故但說補特伽羅既不可得又無前心往後心理答此中說補特伽羅不可得者別遮初一補特伽羅論又無前心往後心理者總遮後七論有說此中說補特伽羅既不可得者遮第一補特伽羅論又無前心往後心理者遮第八前心往告後心理既遮初後應知已遮中間六論謂本論師畧舉初後令諸弟子易受持故阿毘達磨大毘婆沙論卷第十一

說一切有部發智

音釋

補特伽羅梵語也此云數取趣謂數羯刺

藍居梵語也此云凝滑羯也部曇梵語也亦

此云疱頰剌虛達切頰也部曇梵語也亦

阿葛切頰也部曇梵語也亦

永樂北藏

大毗婆沙論

第一〇六册

永樂北藏

大毗婆沙論

第一〇六册

阿毗達磨大毗婆沙論卷第十二 動二

五百大阿羅漢等造

唐三藏法師玄奘奉詔譯

雜蘊第一中智納息第二之四

補特伽羅既不可得又無前心往後心理何

動二

緣能憶本所作事答有情於法由慣習力得如是同分智隨所更事能如是知問前說無有補特伽羅今何復言有情於法答前依聖想名示現今依世想名示現前依聖言說示現今依世言說示現前依勝義今依世俗有

說為順文故若說法於法於義雖順於文不順若說有情於法文義俱順依世俗理有有情故有說為生解故若說法於法弟子不了謂能憶誰若說有情於法弟子便了有情憶法有情於法由慣習力得如是同分智者謂有情智於所知法決定慣習隨欲自在前後相似故名同分隨所更事能如是知者謂隨本所見隨本所受能如是憶有說此文應作是說隨所有事能如是知謂隨本所有體所有相所有我所有物所有性所有分能如是

憶有說此文應作是說隨所住事能如是知  
謂隨本所住顯色隨本所住形色等能如是  
憶為令此義得分明故引世現喻謂如有二  
造印者能了自他所造印字雖彼二人不往  
相問汝云何造此字亦不相答我如是造此  
字而彼二人由慣習力得如是同分智能了  
自他所造印字有情亦爾由慣習力乃至廣  
說此中能書者皆名造印者如彼二人雖不  
相問亦不相答而由慣習力得如是同分智  
能了自他所造印字乃至海外書來亦能讀

知有情亦爾雖無真實補特伽羅亦無前心  
往後心理而由慣習力得如是同分智隨所  
更事能如是知復令此義重分明故引第二  
喻又如有一知他心者互相知心雖彼二人  
不往相問汝云何知我心亦不相答我如是  
知汝心而彼二人由慣習力得如是同分智  
互相知心有情亦爾由慣習力乃至廣說此  
中知他心者謂得他心通者如彼二人雖不  
相問亦不相答而由慣習力得如是同分智  
互相知心乃至百踰繕那外亦互相知心有情



亦爾雖無真實補特伽羅乃至廣說問若異  
心所更異心能憶者云何不天授所更祠授  
能憶祠授所更天授能憶耶答彼相續異故  
前心後心相續無異不應為難有說彼心相  
望無因義故前心能與後心為因不應為難  
有說彼二身心不相屬故前後身心既相繼  
屬故先所更後能記憶問若心相屬即能憶  
者何不見異牛而憶是前牛答若於曾受今  
見相似則能記憶若雖曾受今見不相似便  
不能憶日初分所更日後分能憶日後分所

更日初分能憶前後所見身相似故復次一  
切心心所法於所緣定安住所緣此於所問  
是勝義根本答所以者何如見蘊說若法與  
彼法作所緣或時不與彼法作耶答無時非  
所緣以心心所於所緣定安住所緣不可移  
轉是故能憶本所動二作事謂於一所緣有無量  
心心所聚轉此一所緣如以此理趣以此性  
類以此法式與一心心所聚作所緣事與餘  
無量心心所聚作所緣事亦爾如一心心所  
聚以此理趣以此性類以此法式領受此所

緣餘無量心心所聚領受此所緣亦爾譬如一人而有百子此一人如於一子作父事於餘子亦爾如一子於父作子事餘子於父亦爾此中眼識及相應法於色所緣定乃至意識及相應法於一切法所緣定此色與眼識及相應法為所緣者無時非所緣乃至此法與意識及相應法為所緣者無時非所緣以一切心心所法各能領受自所緣故由此無有餘心聚所更餘心聚能憶問云何心心所法於所緣定為於處定為於青等定為於刹

那定耶此中有說惟於處定所以者何勿有無量心心所法住不生法中故問云何於處定答眼識及相應法於色處定乃至身識及相應法於觸處定意識及相應法於法處等定如一眼識若遇青色和合現前則緣青起若遇黃等和合現前則緣黃等起如是餘識於自所緣亦惟處定彼不應作是說所以者何若爾者應一覺有多了性一法多體不應道理識身論說復云何通如說過去眼識惟緣過去色非未來現在有餘欲避如是過失

說心心所法於所緣處定亦於青等定非於  
剎那定所以者何勿有無量心心所法住不  
生法中故問云何亦於青等定耶答緣青等  
心心所其體各異若遇青色和合現前則生  
緣青心心所法若遇黃等和合現前則生緣  
黃等心心所法彼亦不應作如是說所以者  
何青有多種謂青根青莖青枝青葉青華青  
果黃等亦爾應緣根等覺即是緣莖等覺若  
爾一覺有多了性一法多體不應道理亦與  
識身論所說相違如前說如是說者心心所

法於三事定問若爾則應無量心心所法住  
不生法中答斯有何過未來世寬無容處耶  
然彼本來已有住處故不應難問心心所法  
如於所緣定於所依亦定不設爾何失若於  
所依亦定者何故此中但說於所緣定不說  
於所依定耶品類足說復云何通如說云何  
有俱有法答一切有漏法及有漏法俱生無  
漏法若於所依不定者何故於所緣定於所  
依不定耶答於所依亦定然心心所法在未  
來世與所依遠現在則俱過去復遠有說在

未來世與所依遠現在過去與所依俱有說  
三世皆與所依俱問若爾何故此中不說答  
此中但欲說憶本所作所憶者是所緣非所  
依故問品類足說復云何通答彼文應作是  
說云何有俱有法答一切有為法而不作是  
說者彼文顯示有用聖道不說無用故不相  
違有說彼文顯示聖道依他力得依他力起  
故但說與有漏法俱生者問若心心所法於  
所緣定於所依亦定者彼於何位取所緣耶  
乃為於生時為於滅時設爾何失若生時者

生時在未來云何未來法能有所作若滅時  
者即乃滅時諸法衰退散壞云何此位能取  
所緣答應言滅時問云何衰退散壞之法能  
取所緣答諸有為法性羸劣故不自依故依  
他轉故無作用故不自在故隨於何位若遇  
所依所緣和合即於彼位能取所緣惟於滅  
時有此和合有說生時是未來世未來諸法  
無作用故不能取所緣滅時是現在世現在  
諸法有作用故能取所緣若滅時不取所緣  
者則心心所法畢竟不能取於所緣勿有斯

過故於滅時能取所緣又以受意為因力強  
念便不忘應知此中前生心聚以意聲說後  
生心聚以念聲說然受意有二種一受行相  
意二受所緣意且如於增上忍有二心受彼  
行相不受彼所緣謂苦類智忍苦類智相應  
有二心受彼所緣不受彼行相謂集法智忍  
集法智相應有三心受彼行相亦受彼所緣  
謂世第一法苦法智忍苦法智相應餘心不  
受彼行相亦不受彼所緣謂餘忍智相應如  
於增上忍於餘心隨應廣說亦爾受行相所

更受所緣能憶受所緣所更受行相能憶復  
有二種意一染污二不染污一一所更二種  
能憶復有三種意謂善不善無記一一所更  
三種能憶復有四種意謂善不善有覆無記  
無覆無記一一所更四種能憶復有四種意  
謂彼因彼等無間彼所緣彼增上一一所更  
四種能憶復有五種意謂見苦所斷乃至修  
所斷此中見苦所斷所更五種能憶見集修  
所斷所更亦爾見滅所斷所更四種能憶除  
見道所斷見道所斷所更四種能憶除見滅

所斷復有五種意謂善不善有覆無記如理  
 所引無覆無記不如理所引無覆無記此中  
 有說善所更二種能憶謂善如理所引無覆  
 無記如理所引無覆無記所更亦爾不善所  
 更三種能憶謂不善有覆無記不如理所引  
 無覆無記有覆無記不如理所引無覆無記  
 所更亦爾如是說者一一所更五種能憶復  
 有六種意謂眼識乃至意識五識所更意識  
 能憶意識所更六識能憶復有十二種意欲  
 界有四謂善不善有覆無記無覆無記色界

有三謂前四除不善無色界亦爾無漏有二  
 謂學無學欲界善所更十二種能憶不善色  
 界善所更亦爾欲界有覆無記所更八種能  
 憶謂除色界有覆無記無色界三欲界無覆  
 無記所更亦爾色界有覆無記所更十種能  
 憶除欲界二無記物二無色界善所更亦爾色界  
 無覆無記所更十種能憶除無色界二無記  
 無色界有覆無記所更九種能憶除欲界二  
 無記及色界無覆無記無色界無覆無記所  
 更亦爾學所更十一種能憶除欲界有覆無

記無學所更若退法者如學說若不退法者七種能憶除學及四染汚由前受意為因力強於彼所緣引生後念不忘者謂心不狂亂非苦所逼尊者世友說曰由三因緣憶本所作一善取前相故二同分相續現行故三不失念故由此雖無補特伽羅亦無前心往後心理而能憶念本所作事何緣有情忘而復憶答有情同分相續轉時於法能起相屬智見此中忘者是失念義非不念義所以者何無有少法名不念故同分有三種謂加行同

分所緣同分隨順同分加行同分者如有先誦素怛纜藏中間忘失後因如前所作加行還得記憶先誦毗柰耶阿毗達磨藏亦爾如是先起不淨觀中間忘失後因如前所作加行還得記憶先起持息念界方便亦爾曾聞有婆羅門子先誦得四吠陀書中間忘失復溫誦之盡斯方便不能通利便往師所具述因緣師即問言汝先誦時以何加行答言本時手繩口誦師言汝當如本加行彼隨師教一切皆憶所緣同分者如有先見如是園林

泉池山谷經行處等中間忘失後見相似園  
林等時一切皆憶隨順同分者如得隨順飲  
食衣服卧具房舍說法人等則能憶念先所  
更事曾聞有一苾芻先誦得四阿笈摩中間  
忘失復溫誦之盡其方便不能通利便往尊  
者阿難陀所問其因緣尊者答言汝今可往  
以油塗身溫室洗浴求諸隨順衣服飲食卧  
具房舍說法人等苾芻依教悉還通利如是  
同分相續轉時於法能起相屬智見問起誰  
相屬答三種同分有異誦言於法能起連續

智見即是起長時流注相續知見義復有誦  
云於法能起次第智見即是起彼彼周徧行  
列智見義復有誦言於法能起無礙智見即  
是起無滯無著無斷智見義復有誦言於法  
能起無障智見即是起離障伏所治勝怨敵  
智見義又以受意為因力強念便不忘應知  
此中前生心聚以意聲說後生心聚以念聲  
說受意言如前釋由前受意為因力強於彼  
所緣引生後念中間雖忘而後復憶不忘言  
如前釋何緣有情憶而復忘答有情異分相



續轉時於法不起相屬智見此中忘者是失  
念義廣說如前異分有三種謂加行異分所  
緣異分隨順異分加行異分者如有先誦素  
怛纜藏中間忘失捨之復誦毗奈耶或阿毗  
達磨藏後皆不憶先誦毗奈耶阿毗達磨藏  
亦爾如是先起不淨觀中間忘失捨之復起  
持息念或界方便後皆不憶先起持息念界  
方便亦爾所緣異分者如有先見如是園林  
泉池山谷經行處等中間忘失後更不見彼  
相似相於前所更不復能憶隨順異分者如

有不得隨順飲食衣服等事於前所更不能  
復憶如是異分相續轉時於法不起相屬智  
見問不起誰相屬答三種同分此中亦有四  
種異誦與前相違應廣說又以受意為因力  
劣念便忘失應知此中前生心聚以意聲說  
後生心聚以念聲說受意言如前釋由前受  
意為因力劣於彼所緣不生後念中間雖憶  
而後復忘忘者謂心狂亂苦受所逼尊者世  
友說曰由三因緣念便忘失一不善取前相  
故二異分相續現行故三失念故復作是說

由八因緣念便忘失一者生時生苦所逼故  
念便忘失二者死時死苦所逼故三者餘語  
多現行故四者根鈍依餘智故五者生非愛  
趣苦受所逼故六者五根於境馳散不息多  
放逸故七者重煩惱障數現行故八者不數  
修定心散亂故念便忘失問何等智所更念  
有忘失聞所成耶思所成耶修所成耶生得  
等耶有說聞思所成及生得等所更念有忘  
失非修所成定力所持無忘失故有說修所  
成所更亦有忘失身羸弱故謂有得定身羸

弱者心亦羸弱故彼所更亦有忘失問何處  
有忘念耶答在欲界非色無色界於五趣中  
皆有忘念有說地獄無有忘念以恒忘故問  
何等補特伽羅有忘念耶答異生聖者皆有  
忘念聖者中預流一來不還阿羅漢獨覺皆  
有忘念惟除世尊以佛成就無忘失法故云  
何知然答經為量故如說舍利子假使諸苾  
芻眾以牀座與我行經百年欲令如來無上  
慧辯有少退失無有是處故知佛具無忘失  
法

如象跡喻契經中說舍利子言若內意處不壞外法處現前及能生作意正起爾時意識生問意云何壞答有三種壞一暫時壞二盡眾同分壞三究竟壞暫時壞者謂善心無間不善無記心現前爾時名為善心暫壞乃至無記心無間善不善心現前爾時名為無記心暫壞如是欲界心無間色界不繫心現前爾時名為欲界心暫壞乃至不繫心無間三界心現前爾時名為不繫心暫壞若入無想滅盡等至爾時名為一切心暫壞盡眾同分

壞者謂斷善根者善心有盡眾同分壞離欲染異生不善心有盡眾同分壞如是等究竟壞者謂苦智已生集智未生三界見苦所斷心究竟壞乃至滅智已生道智未生三界見苦集滅所斷心究竟壞預流者三界見所斷<sup>十一</sup>心究竟壞不退法一來者三界見所斷及欲界修所斷六品心究竟壞不退法不還者三界見所斷及欲界修所斷染污心究竟壞不退法阿羅漢三界見修所斷染污心究竟壞不退法異生離欲染者欲界染污心究竟壞

乃至離無所有處染者八地染污心究竟壞尊者世友說曰意若過和合緣不名為壞若不遇和合緣則名為壞復作是說意若不為相連因所障不名為壞若為相連因所障則名為壞

何緣祭祀餓鬼則到非餘趣耶乃至廣說問何故作此論答為釋經故如契經說生聞婆羅門來詣佛所白佛言喬答摩我有親里命過欲施其食彼為得我食不世尊告言此事不定所以者何諸有情類有五趣別若汝親

里生地獄中食地獄食以自存活彼不能受汝食生傍生趣天趣人趣亦復如是若汝親里生鬼趣中則能受汝所施飲食婆羅門言若我親里不生鬼趣所施飲食誰當受之佛語彼言餓鬼趣中無汝親里無有是處乃至廣說彼經雖作是說而不說何緣祭祀餓鬼則到非餘彼經是此論所依根本彼所不說者今應說之故作斯論問彼婆羅門何故不問佛何緣祭祀餓鬼則到非餘答有二緣故謂彼或是利根或是鈍根若是利根自能解

了不須問佛若是鈍根不能生疑故不問佛問何故世尊不為彼說惟施餓鬼則到因緣答亦二緣故謂彼或是利根或是鈍根若是利根自能解了不須佛說若是鈍根非法器故佛不為說何緣祭祀餓鬼則到非餘趣耶

初二

十二

到亦不以高貴故到然由二緣一由彼趣法爾故二由業異孰故於中先顯示彼趣法爾謂彼鬼趣法爾得如是處事生我分是故祭祀則到非餘欲令此義得分明故引世現喻如鵝鴈孔雀鸚鵡舍利命鳥等雖如意自在飛翔虛空而神力威德不大於人然彼趣法爾得如是處事生我分能飛翔虛空鬼趣亦爾由法爾力祭祀則到餘趣不爾謂如傍生趣中鵝鴈孔雀等由趣法爾力能飛翔虛空久住遊戲人離神足呪術藥草欲住虛空

去地四指經須臾頃猶無能者然彼神力威德不勝於人餓鬼亦爾由趣法爾方祭祀則到非餘欲令前義重分明故引第二喻又如一類那落迦能憶宿住亦知他心一類傍生一類餓鬼能憶宿住亦知他心及起煙焰與雲致雨作寒熱等雖能作是事而神力威德不大於人然彼趣法爾得如是處事生我分能作是事鬼趣亦爾由法爾力祭祀則到餘趣不爾此中一類那落迦能憶宿住者如契經說地獄衆生作如是念大德沙門婆羅門

等觀欲將來能作過患是大怖畏恒為我等說斷欲法我等雖聞而不能斷今因欲故受大苦惱又作是念我等昔於淨行沙門婆羅門等作邪惡行由彼為因今受此苦問彼於何時能作是念答於初生時非中後時所以者何彼初生時未受苦痛能作是念若受苦痛今生所受尚不能憶況先所受問彼住何心能作是念善耶染污耶無覆無記耶答三種皆能問何無覆無記答威儀路非工巧處彼無工巧事故非異熟生彼異熟心是五識

故問彼如是念為在意地為五識身答在意地非五識身五識中無此分別故問彼如是念為憶幾生答彼惟憶一生謂所從歿來生此者有說能憶多生乃至五百亦知他心者謂地獄中有生處得智能知他心然無事可顯問彼於何時能知他心答惟初生時所以者何若受苦痛心便悶亂故問彼住何心知他心耶答住三性心皆能知問何無覆無記答威儀路非工巧處異熟生如前說問為在意地為五識身答在意地非五識身以五識

身緣色法故一類傍生能憶宿住者如契經說婆羅門告餉佉言若是我父刀提耶者可昇此座彼便昇之復語之言若是我父刀提耶者可食此飯彼便食之又復告言若是我父刀提耶者汝命終時所藏財寶今可示我彼便示之問何時能憶宿住事耶答初中後時並皆能憶問住何心憶答住三性心問何無覆無記答威儀路工巧處異熟生皆能憶問此在何識答在意地非五識身問能憶幾生有說惟能憶一生謂所從歿來生此者

有說能憶多生乃至五百云何知然傳說有  
 一女人置兒一處有緣他行須更有狼負其  
 兒去衆人捕逐而語之言汝今何緣負他兒  
 去狼言此女五百生來常殺我子我亦於其  
 五百生中常殺其子若彼能捨舊怨嫌心我  
 亦捨之女言已捨狼觀此女口雖言捨而心  
 不捨即便斷其子命而去亦知他心者謂傍  
 生趣亦知他心即如彼狼知女心事問何時  
 能知答三時皆知問住何心知答住三性心  
 問何無覆無記答威儀路工巧處異熟生皆

能知問此在何識答在意地非五識一類餓  
 鬼能憶宿住者如伽陀說  
 我昔集珍財 以法或非法 他今受富樂  
 我獨受貧苦  
 問何時能憶答三時皆能問住何心憶答住  
 三性心問何無覆無記答三種如前說問此  
 在何識答在意地非五識身問能憶幾生答  
 乃至五百云何知然傳聞有一女人為鬼所  
 執羸困欲死呪師語言汝今何故惱他女人  
 鬼言此女五百生來常害我命我亦於其五

迦二

十五



百生中常害彼命彼若能捨舊怨嫌心我亦捨之女言已捨鬼觀此女口雖言捨而心不捨便害而去亦知他心者即如彼鬼知女心事問何時能知答三時皆能問住何心知答住三性心問何無覆無記答三種如前說問此在何識答在意地非五識及起煙焰興雲致雨作寒熱等者此惟傍生趣能非餘趣傍生趣中惟龍能非餘類問若爾經說當云何通如說有天能興雲有天能降雨有天作寒熱有天起風雷答應知彼經說龍為天如餘

經說佛告阿難汝看天雨為不雨耶彼亦於龍以天聲說問起煙焰等為多龍作為一龍耶答一龍亦能問若爾何故經作是說有天能興雲有天能致雨乃至廣說答隨別所樂故作是說謂或有龍惟樂興雲或復有龍惟樂致雨餘亦如是此中煙焰雲雨等事是龍加行所引發故惟是彼龍近士用果若從龍宮所流出水非彼加行所引發故是一切有情共增上果如地獄等由趣法爾力雖有如上所說事而神力威德不大於人鬼趣亦爾

由趣法爾力祭祀則到非餘復有說者五趣皆有法爾勝事謂地獄趣異熟色等斷已還續餘趣不爾傍生趣中有能飛空興雲雨等餓鬼趣中祭祀則到人趣能受善戒惡戒修勝品善勇猛強記智力深遠天趣中欲天隨其所須應念則至色無色天有勝生勝定復有說者諸方亦有法爾勝事謂至那國雖奴僕等皆衣繒絹餘方貴勝所不能得印度等國乃至貧賤皆衣氎衣餘方貴人亦不能得迦濕彌羅國中秋時牛頸繫鬱金華鬘餘方

勝人所不能得北方貧人飲蒲萄酒餘方富者亦不能得如諸方有法爾勝事餓鬼亦爾祭祀則到有說諸趣法爾有異謂四趣中一皆有生處得智惟人趣無三惡趣有如前廣說天趣有能憶宿住者如伽陀說

我施誓多林 蒙大法王住 賢聖僧受用 故我心歡喜

彼亦知他心而無現事可說何時憶知等如傍生鬼隨應廣說問此生處得智為憶知幾趣有說各惟自憶知有說地獄惟憶知地獄

傍生憶知二趣餓鬼憶知三趣天憶知五趣  
問若傍生不知天者施設論說當云何通如  
說善住龍王等知帝釋心念乃至廣說答此  
是比知非現知故無相違過如是說者此事  
不定如狼及鬼憶知人故問何故人趣無此  
智耶答非田非器乃至廣說復次人趣有占  
相智觀言相智本性念生智妙願智等覆蔽  
彼故如生處得智餘趣皆有惟人趣無如是  
祭祀惟鬼趣到餘趣不爾如是已顯示由趣  
法爾力祭祀餓鬼則到非餘今當顯示由業

動二

十七

異熟復次有人長夜起如是欲如是愛樂我  
當娶婦為兒娶婦為孫娶婦令生子孫紹繼  
不絕我命終已若生鬼趣彼念我故當祭祀  
我由彼長夜有此欲樂是故祭祀則到非餘  
謂彼由起如是欲樂引發諸業生鬼趣中是  
故祭祀則到非餘如諸聚落城邑中人或為  
子孫不斷絕故或為財產轉增盛故或為富  
名久流傳故以法非法集諸財寶牛羊等物  
於已親屬尚不欲與況施他人彼由慳貪纏  
縛心故捨人同分生鬼趣中於自舍宅水竇

廁溷不淨處住彼有親屬追戀生苦作是念  
言彼集財產自不受用亦不施人今生何所  
遂集親里請諸沙門婆羅門等設大施會願  
此資彼捨苦受樂爾時餓鬼於自住處見如  
是事於自親里生眷屬想於其財物生已有  
想即時歡喜於福田所生信敬心於其所作  
起隨喜心便離重苦由此因緣祭祀則到問  
若爾何故不名他作業他受果耶答不爾彼  
於爾時由生敬信隨喜心故見施功德慳貪  
過失由此增長捨相應思成順現受業得現

法果故尊者世友說曰今所受果是先業所  
引先業有障以今業除之故無他作業他受  
果失謂彼餓鬼先世已造感飲食業但由慳  
貪障蔽心故於所飲食起倒想見不得受用  
然彼餓鬼有二種一樂淨二樂不淨彼樂淨  
者以慳貪故河見非河水見為血所有飲食  
見為不淨樂不淨者河見乾枯水見無水滿  
飲食器悉見為空若彼親里為設施會彼便  
信敬起隨喜心見施功德慳貪過失捨相應  
思得增長故除想見倒彼樂淨者見河是河

見水澄清於諸飲食皆見淨妙樂不淨者見  
河盈溢見水是水見飲食器悉皆盈滿故彼  
親里祭祀則到有作是說彼先世亦有感飲  
食業但由慳貪所覆蔽故今時感得怯劣身  
心諸飲食處必有大力鬼神守護彼怯劣故  
不能得往設復得往亦不敢食若彼親里為  
設施會廣說乃至捨相應思得增長故今彼  
身心轉得強勝由此能至有飲食處食其飲  
食由此因緣祭祀則到是故無有他作業他  
受果失大德說曰彼先雖造感飲食業以微

劣故未能與果若彼親里為設施會廣說乃  
至捨相應思得增長故先所作業便能與果  
故彼親里祭祀則到由此無有他作業他受  
果失問捨相應思得增長已為但感資具為  
亦感得勝身心耶答二種俱得勝身心者捨  
劣色香味觸得勝色香味觸捨無威德得有  
威德感資具者謂得飲食衣服園林宅舍等  
事問若生餘趣親里為其修福業者彼亦得  
不答若彼亦能生於信敬隨喜之心令捨俱  
思得增長者亦得其福問若爾此中何故不

說答應說而不說者當知此義有餘有說此  
 中從多分說謂餓鬼中多有是事餘趣不爾  
 故有說鬼趣多有如是業故謂造此業者多  
 生鬼趣故有說鬼趣於人常希求故有說鬼  
 趣飢渴所逼於一切處常有希望是故偏說

此中應辯五趣義如定蘊當廣分別

阿毗達磨大毗婆沙論卷第十二 說一切有部發智

音釋

踰繕那

梵語也亦云由句此云限量

素怛

覽

梵語也亦云修多羅此云吠陀亦云章契經恒當割切纒盧毘切

陀此云智論 **阿笈摩** 梵語也亦云阿達婆  
 吠房廢切 **鸚鵡** 西域外道書名四章  
 陀典之一也 **鸚鵡** 切鸚鵡能言鳥也  
 梵語狗名也 **毳** 徒協切細  
 亮切法丘迦切 **厠** 厠初  
 潤胡因切 **潤** 厠  
 潤固也

阿毗達磨大毗婆沙論卷第十三

動三

五百大阿羅漢等造

唐三藏法師玄奘奉詔譯

雜蘊第一中智納息第二之五

當言一眼見色二眼見色耶乃至廣說問何

物三

故作此論答為止他宗顯已義故謂或有執  
眼識見色如尊者法救或復有執眼識相應  
慧見色如尊者妙音或復有執和合見色如  
譬喻者或復有執一眼見色如犢子部為止  
如是他宗異執顯示已宗二眼見色故作斯

論所以者何若眼識見色者識應有見相然  
識無見相故不應理若眼識相應慧見色者  
耳識相應慧亦應聞聲然慧無聞相故不應  
理若和合見色者應一切時見色以無時不  
和合故亦不應理若一眼見色非二眼者身  
諸分亦應不俱時覺觸如身根兩臂相去雖  
遠而得俱時覺觸生一身識兩眼亦爾相去  
雖遠何妨俱時見色生一眼識問若眼見色  
者餘識俱時何故不見又無識時亦應見色  
答眼有二種一者識合二者識空識合者能

見識空者不能見故無有失復次所以作此論者欲令疑者得決定故謂諸有情兩眼相去或半麻一麻半麥一麥半指一指半揲手一揲手半弓一弓半俱盧舍一俱盧舍半踰繕那一踰繕那或復乃至百踰繕那如大海中有大身衆生或長百踰繕那乃至或長二千一百踰繕那如曷邏呼阿素洛王身量極大又如天趣色究竟身一萬六千踰繕那量此等二眼相去甚遠或有生疑云何眼識依之而轉爲二眼識俱時各依一眼生耶爲一

眼識依一眼生已復依第二眼轉耶爲一眼識分爲二分於二眼處各半生耶爲一眼識如橫一物通二眼耶若二眼識俱時各依一眼生者應一有情二心俱轉此不應理若一眼識依一眼生已復依第二眼轉者則應一法二刹那住然無是事若一眼識分爲二分於二眼處各半生者則應一法體有二分然一切法體無細分若一眼識如橫一物通二眼者則應一識亦是眼識亦是身識二眼中間依身根故然五識身所依各異所緣各異



不應一識二依二緣欲令此疑得決定故顯  
雖無有二眼識俱乃至無一識橫通二眼然  
其非不依於二眼一眼識生二眼雖隔百踰  
繕那亦無有過如是理趣微細甚深難可覺  
了今欲顯斯甚深理趣故作斯論當言一眼  
見色二眼見色耶答應言二眼見色問云何  
二眼相去甚遠一識依之令俱見色答俱是  
眼識所依根故設有百眼一一相去百踰繕  
那亦可依之生於一識令俱時見如迦遮器  
有百小輪一面對之百面像現如是一識依

多眼生令俱時見其義亦爾應知此中眼見  
色者遮法救等三種異執二眼見者遮犢子  
部一眼見色所以者何若合一眼起不淨識  
開二眼時起淨識故設合一眼起如是識開  
二眼時亦起此識則不應言二眼見色然合  
一眼起不淨識開二眼時便起淨識是故應  
言二眼見色非但立宗義即成立故復問答  
顯示此因起淨識者謂於多境明白顯了與  
此相違名不淨識如合覆損破壞亦爾覆謂  
以手以衣以葉以餘物覆損謂垢煙塵等所

損破謂諸膜諸翳所破壞謂枯爛挑出自脫  
蟲食等壞覆等如合起不淨識與此相違便  
起淨識此隨所依說淨不淨依世俗理若依  
勝義善識名淨染名不淨由此對眼應作四  
句有眼淨識不淨謂依具眼起染眼識有識  
淨眼不淨謂依不具眼起善眼識有眼識俱  
淨謂依具眼起善眼識有眼識俱不淨謂依  
不具眼起染眼識如眼見色耳聞聲鼻嗅香  
亦爾俱有二處與眼同故問何故眼耳鼻各  
有二處而舌身惟一耶答諸色根處為莊

嚴身若有二舌是鄙陋事世便嗤笑云何此  
人而有二舌如似毒蛇若有二身亦是鄙陋  
世所嗤笑云何一人而有二身如兩指並問  
眼耳鼻處何故惟二不增不減脅尊者言一  
切生疑故不應責謂若增減亦復生疑云何  
此三各惟爾所然各二處不違法性有說根  
處為莊嚴身若減若增身便醜陋有說色根  
為生淨識若當三識依二處生則明不亂增  
便識亂滅則不明有說色根為取自境各惟  
有二取境事足滅則不明增便無用問何故

二眼二耳二鼻合立一界一處一根答作用  
一故謂雖有二處而共發一識共取一境如  
身衆分處所雖多作用同故但立一界一處  
一根此亦如是眼有二種謂長養異熟生無  
別等流不可得故問頗惟有長養眼無異熟  
生或惟有異熟生眼無長養耶答無異熟生  
眼離長養眼如人重人如墻重墻長養防護  
異熟亦爾然有長養眼離異熟生眼如從無  
眼得天眼者問爲長養眼見色多爲異熟生  
耶答長養眼見色多非異熟生以天眼根是

勅三

四

長養故然約時分二眼勝劣應作四句有長  
養眼勝非異熟生如幼年時爾時異熟相續  
小故有異熟生眼勝非長養眼如者病時爾  
時長養相續小故有二眼俱勝如盛年時有  
二眼俱不勝謂除前位約有情相續二眼勝  
劣亦應作四句有長養眼勝非異熟生如有  
富貴者異熟生眼劣資緣多故長養眼勝有  
異熟生眼勝非長養眼如有貧賤者異熟生  
眼勝乏資緣故長養眼劣有二眼俱勝如有  
富貴者異熟生眼勝資緣多故長養亦勝有

二眼俱不勝如有貧賤者異熟生眼劣乏資緣故長養亦劣又長養眼有二種謂善法所長養不善法所長養問為善法所長養眼見色勝為不善法所長養眼勝耶答善法所長養眼見色勝如修得天眼是善法所長養故異熟生眼亦有二種謂善業異熟不善業異熟問為善業異熟眼見色勝為不善業異熟眼見色勝耶答善業異熟眼見色勝如菩薩轉輪王等眼是善業異熟故若約相續或有不善業異熟眼見色勝非善業異熟眼如龍

王等眼見色勝人如眼耳鼻舌身亦爾意有三種謂異熟生等流刹那刹那者謂苦法智忍相應色有三種謂異熟生長養等流如色香味觸亦爾聲有二種謂長養等流無異熟生有間斷故法有四種謂異熟生等流刹那及實事實事者謂諸無為問眼根極微云何而住為傍布住為前後住耶設爾何失若傍布住者云何風吹不散若前後住者云何前不障後耶有作是說黑瞳子上傍布而住對外色境如胡荽華或如滿器水上散麩問若

爾何緣風吹不散答淨色覆持故吹不散有餘師說黑瞳子中前後而住問若爾何故前不障後答體清淨故不相障礙謂如是類所造淨色雖多積集而不相障如秋池水以澄淨故細針墮中而亦可見耳根極微住耳孔中鼻根極微住鼻孔中如是三根繞頭而住如冠華鬘舌根極微住在舌上猶如半月然於其中如毛端量無有舌根身根極微隨身內外次第而住復有餘師以喻顯示諸根極微次第住相眼根極微黑瞳子上如藥杵頭

耳根極微住耳孔中猶如燈器鼻根極微住鼻孔中猶如人爪舌根極微住在舌上猶如剃刀身根極微隨身而住猶如戟稍女根極微住女形中猶如鼓頰男根極微住男形上猶如指環佛於經中亦以此喻說諸根相眼根極微有時一切是同分有時一切是彼同分有時一分是同分一分是彼同分如眼根極微耳鼻舌根極微亦爾身根極微有時一切是彼同分有時一分是同分一分是彼同分必無一切是同分時問若舉身入冷水池

中或鑊湯中若在地獄山所磴磨身如爛葉  
或十三種猛焰纏身爾時豈非一切同分答  
爾時亦有彼同分者假使一切身根極微皆  
生身識身便散壞以五識身皆依積聚緣積  
聚故問眼等六根幾能取至境幾能取不至  
境耶答至有二種一為境至二無間至若依  
為境至說則六根皆取至境若依無間至說  
則三取至境謂鼻舌身三取不至境謂眼耳  
意問若爾何故耳聞近聲如耳門邊聲而眼  
不見近色如藥杵頭色耶尊者世友說曰雖

俱取不至境而根法爾有能取近境有不能  
取近境故不應難有說若聲逼近耳根如藥  
杵頭近眼根者亦不能聞耳門邊聲去耳尚  
遠故得聞之以耳根極微在耳孔中故大德  
說曰眼因明故能見色色若逼近則礙於明  
故不能見耳因空故能聞聲聲雖逼近而不  
礙空故能聞之由此而說眼因明增故見色  
耳因空增故聞聲鼻因風增故嗅香舌因水  
增故嘗味身因地增故覺觸意因作意增故  
能了法問何故三根能取至境三根不能取

至境耶答以眼識依自界緣自界他界耳識亦爾意識依自界他界緣自界他界餘三識依自界緣自界故復次眼識依同分緣同分彼同分耳識亦爾餘四識依同分緣同分此依現在識說復次眼識依自地他地緣自地他地耳身意識亦爾餘二識依自地緣自地復次眼識依無記緣三種耳識亦爾意識依三種緣三種餘三識依無記緣無記復次眼識依近緣近遠耳識亦爾意識依近遠緣近遠餘三識依近緣近所以者何乃至三根未

與境無間而住三識必不得生故復次眼識或依小而緣大如見大山或依大而緣小如見毛端或依緣等如見蒲萄果耳識亦爾意識所依雖不可施設大小而所緣或小或大餘三識所依緣等隨依爾所鼻舌身極微即緣爾所香味觸極微故復次眼耳意三識依非業緣業非業餘三識依非業緣非業復次眼耳意三識依非妙行惡行緣妙行惡行及俱非餘三識依非妙行惡行緣非妙行惡行如妙行惡行善戒惡戒律儀不律儀表非表

亦爾問頗有一極微為所依一極微為所緣  
生眼等五識不答無所以者何眼等五識依  
積聚緣積聚依有對緣有對依和合緣和合  
故問若合爾所法俱生即爾所法俱滅刹那  
後必不住如何可言鼻嗅香舌嘗味身覺觸  
耶答若緣彼法鼻舌身識生即說彼法是鼻  
舌身識所了別即說名為鼻舌身根所嗅嘗  
覺故無有失問眼等五根處有筋骨血肉耶  
答無以諸色根是清淨大種所造故而經說  
色根處有筋骨血肉者是根中間色香味觸

近根處故說名為有而實根處無筋骨等色  
處有二十種謂青黃赤白長短方圓高下正  
不正雲煙塵霧影光明闇有說色處有二十  
一謂前二十及空一顯色如是諸色或有顯  
故可知非形故謂青黃赤白影光明闇及空  
一顯色或有形故可知非顯故謂身表業或  
有顯形故可知謂餘十二種色若非顯形故  
可知者無也問為緣一色生於眼識為緣多  
色生眼識耶若緣一色生眼識者此云何通  
如說眼識緣五色縷若緣多色生眼識者則



一眼識有多了性了性多故應有多體一法  
多體與理相違有說但緣一色生於眼識問  
此云何通如說眼識緣五色纒答多色和合  
共生一色見一色時言見多色尊者世友說  
曰非一眼識頓取多色生速疾故非俱謂俱  
是增上慢如旋火輪非輪謂輪是增上慢有  
說亦緣多色生一眼識問應一眼識有多了  
性乃至廣說答若別分別則緣一色生一眼  
識若不別分別則緣多色生一眼識大德說  
曰若不明了取色差別則緣多色亦生一識

如觀樹林總取葉等問為有一青極微不答  
有但非眼識所取若一極微非青者眾微聚  
集亦應非青黃等亦爾問為有長等形極微  
不答有但非眼識所取若一極微非長等形  
者眾微聚集亦應非長等形復次有色極細  
故不見非非境故如滅七微色處有色非境  
故不見非極細故如除色處餘積集色有色  
極細故不見亦非境故如除色處餘極微色  
有色非極細故不見亦非非境故如藥杵頭  
逼眼腫子復次有色極遠故不見非非境故

如四天王衆天等住自宮時彼雖是人眼境而遠故不見有色非境故不見非極遠故如梵衆天等來至人間雖近不見有色極遠故不見亦非境故如梵衆天等住自宮時人眼不見有色非極遠故不見亦非非境故如藥杵頭逼眼瞳子尊者世友說曰由四緣故雖有色而不見一極近故如逼瞳子藥杵頭色二極遠故如住此間波吒梨色三極細故如減七微色四有障故如壁外等色數論者說由八緣故雖有色而不見謂極遠故極近故

根壞故意亂故極細故有障故被勝映奪故相似所亂故聲處有八種謂執受大種因聲非執受大種因聲此各有二謂有情名聲非有情名聲此復各有可意不可意別故成八種有作是說執受大種因聲非執受大種因聲各有可意不可意別有情數大種因聲非有情數大種因聲亦各有可意不可意別故成八種間為緣一聲生於耳識為緣多聲生耳識耶若緣一聲生耳識者云何一時聞五樂聲及一時聞多人誦聲若聞多聲生耳識

者則一耳識有多了性乃至廣說有說但緣一聲生於耳識問云何一時聞於五樂及多人誦聲答多聲和合共生一聲聞一聲時言聞多聲尊者世友說曰非一耳識頓取多聲生速疾故非俱謂俱乃至廣說有說亦緣多聲生一耳識聞應一耳識有多了性乃至廣說答若別分別則緣一聲生一耳識若不別分別則緣多聲生一耳識大德說曰若不明了取聲差別則緣多聲亦生一識如聞軍衆喧雜之聲香處有四種謂好香惡香平等香

不平等香問為緣一香生於鼻識為緣多香生鼻識耶若緣一香生鼻識者云何一時嗅百和香若緣多香生鼻識者則一鼻識有多了性乃至廣說有說但緣一香生於鼻識問云何一時嗅百和香答多香和合共生一香嗅一香時言嗅多香尊者世友所說如前有說亦緣多香生一鼻識問應一鼻識有多了性乃至廣說答若別分別則緣一香生一鼻識若不別分別則緣多香生一鼻識大德所說如前應知味處有六種謂甘醋鹹辛苦淡

問爲緣一味生於舌識爲緣多味生舌識耶  
若緣一味生舌識者云何一時嘗百味丸若  
緣多味生舌識者則一舌識有多了性乃至  
廣說有說但緣一味生於舌識問云何一時  
嘗百味丸答多味和合共生一味嘗一味時  
言嘗多味尊者世友所說如前有說亦緣多  
味生一舌識問應一舌識有多了性乃至廣  
說答若別分別則緣一味生一舌識若不別  
分別則緣多味生一舌識大德所說如前應  
知問若嘗味時爲舌識先起爲身識耶答隨

彼境增彼識先起若二境等舌識先生以諸  
有情貪味增故觸處有十一種謂四大種滑  
性澀性輕性重性冷性飢性渴性問爲緣一  
觸生於身識爲緣多觸生身識耶有說但緣  
一觸生於身識謂或緣堅性乃至或緣渴性  
有說乃至有緣五觸生一身識謂滑性及四  
大種乃至渴性及四大種有說乃至有緣十  
一種觸生一身識如乃至有緣二十種色生  
一眼識問云何身識緣共相境以五識身緣  
自相故答自相有二種一事自相二處自相

若依事自相說者五識身亦緣共相若依處  
自相說則五識唯緣自相故不相違問於嗅  
嘗覺香味觸時為嗅嘗覺執受香等為嗅嘗  
覺非執受香等耶若嗅嘗覺執受香等者云  
何名受用施主所施又應一切時有嗅嘗覺  
若嗅嘗覺非執受香等者外香味觸於內香  
味觸都無有因云何受用有說嗅嘗覺執受  
香味觸問云何名受用施主所施又應一切  
時有嗅嘗覺答外香味觸於內香味觸是覺  
發因故無有失有說嗅嘗覺非執受香味觸

物三

十二

問外香味觸於內香味觸都無有因云何受  
用答如聲故無失有說於執受非執受香味  
觸俱嗅嘗覺然不一時問內香味觸既無增  
減云何嗅嘗覺耶答由外緣故亦有增減法  
處有七種謂前四蘊及三無為於色蘊中取  
無表色三無為者謂虛空擇滅非擇滅問為  
緣一法生意識為緣多法生意識耶答緣一  
緣多俱生意識又所緣法非惟七種即前七  
種及諸餘法皆能頓緣惟除自性相應俱有  
問曾聞菩薩六根猛利云何於境知猛利耶

答菩薩宮邊有無滅舍彼於舍內然五百燈  
菩薩爾時住自宮內不見燈焰但見其光即  
知彼燈數有五百於中若有一燈涅槃即記  
之言一燈已滅是名菩薩眼根猛利無滅舍  
中有五百妓一時奏樂菩薩爾時不見彼妓  
物三  
但聞樂聲即知其中作五百樂若一絃斷或  
十三  
一睡眠即記之言今滅爾所是名菩薩耳根  
猛利菩薩宮內燒百和香菩薩嗅之知有百  
種彼合香者欲試菩薩於百種中或增或減  
菩薩嗅已即記之言此於先香增減爾所是

名菩薩鼻根猛利菩薩食時侍者常以百味  
丸進菩薩嘗之即知其中百味具足時造食  
者欲試菩薩於百味中或增或減菩薩嘗已  
即知其中增減爾所是名菩薩舌根猛利菩  
薩浴時侍者即以洗浴衣進菩薩觸之即知  
織者或進衣者有如是病是名菩薩身根猛  
利菩薩善知諸法自相及與共相而無罣礙  
是名菩薩意根猛利諸過去彼一切不現耶  
乃至廣說問何故作此論答為止他宗顯已  
義故謂或有說過去未來無實體性現在雖

有而是無爲欲止彼意願去來有現是有爲  
故作斯論諸過去彼一切不現耶答應作四  
句過去有二種一世過去二瑜伽過去不現  
亦有二種一世不現二覆障不現此中俱依  
二種作論過去不現互有廣狹故作四句有  
過去非不現謂如具壽鄔陀夷言

一切結過去 從林離林來 樂出離諸欲  
如金出山頂

鄔陀夷經是此根本如說世尊住室羅筏鹿  
母堂中於日後分從靜定出將鄔陀夷往東

池所著觀身衣入池洗浴時彼尊者爲佛掛  
身然鄔陀夷於佛昔日爲菩薩時常隨供侍  
今見佛身光明赫奕勝菩薩時歡喜敬愛合  
掌白佛我今欲以龍喻之頌讚歎世尊惟願  
聽許佛言欲說隨意說之時鄔陀夷便說此  
頌一切結過去者謂佛解脫一切煩惱從林  
離林來者林謂居家世尊從家捨於家法趣  
非家來樂出離諸欲者欲有二種一煩惱欲  
二衆具欲佛於此二身心不染故名出離樂  
謂於中愛樂而住如金出山頂者日名爲金

勸三

十四

山頂即是日所出處如日初出山頂之時光明徧照佛從煩惱隨煩惱出亦復如是有說山頂者是山頂雲如日從雲出時光明徧照佛亦如是有說山頂者是山頂黑砂金謂金砂猶如金砂從黑砂出光明照耀佛亦如是從煩惱出力無畏等光明照耀是謂過去非不現過去者是第二過去非不現者非二種不現佛身現在而顯現故有不現非過去謂如有一或以神通或以呪術或以藥物或以如是生處得智有所隱没令不顯現或以神

通者謂神通力令不顯現如契經說梵王白佛我欲隱身佛言可爾時彼大梵隱入地中佛便指之彼豈非汝梵王念言此由近故即渡大海入妙高山腹中而住世尊復指汝住此耶梵又念言此由麤故即便化作極微細身入佛白毫宛轉中住佛既知已舒毫現之時大梵王極懷愧恥佛便告曰吾當隱身盡汝所能試知吾不梵王敬諾時佛即入如是等持放大光明徧梵宮處亦令梵世聞大音聲諸梵王莫知佛處問佛住何處令彼不

物三

十五



知有說梵王髻中而住有說化作極微妙身  
有說化身令不顯現有說化作障色障之有  
說靜慮靜慮境界佛境界皆不思議故不  
可知佛身所在又如尊者大目犍連入如是  
等持即於坐所而自隱蔽令提婆達多對目  
不見如是等類或以呪術者謂呪術力令不  
顯現如諸仙人所結呪術有受持者隨所隱  
沒能令不現或以藥物者謂藥物力令不顯  
現如有藥物具大神用若有執持隨所隱沒  
亦令不現如畢舍遮宮畔荼等或以如是生

處得智者謂彼智力令所隱沒不復顯現此  
中有說地獄雖有生處得智而不能令身不  
顯現彼若能者終不須更住彼受苦有作是  
說彼雖不能於獄卒邊令身不現而能於餘  
令身不現傍生餓鬼天亦有此生處得智令  
身不現惟人趣無問此神通等四種力中誰  
能於誰令不顯現答神通能於一切不現以  
最勝故問誰神通於誰能令不現答佛於一  
切能令不現獨覺除佛於餘一切能令不現  
舍利子除佛獨覺於餘不現目犍連除佛獨

覺及舍利子於餘不現乃至鈍根者除利根者於餘不現呪術除神通於餘能不現問何呪術於何能令不現答有圓滿呪術有不圓滿呪術有殊勝呪術有不殊勝呪術圓滿殊勝者於一切皆能不現不圓滿不殊勝者除圓滿殊勝於餘不現物三藥物除神通呪術於餘能不現十六所以者何由呪術力能致藥物非藥物力能致呪術故問何藥於何能令不現答勝藥於劣能令不現生處得智除前三種於餘不現以最劣故問此誰於誰能令不現有

說地獄惟於地獄能令不現乃至天惟於天能令不現有說地獄惟於地獄能令不現傍生於二餘鬼於三天於五趣能令不現如是說者地獄能於五趣不現乃至天亦能於五趣不現是謂不現非過去不現者是第二不現非過去者非二種過去以所隱沒住現在故有過去亦不現謂所有行已起等起已生等生已轉現轉已集已現已過去已盡滅已離變是過去過去分過去去世攝如是諸句皆共顯示過去諸行過去者是世過去不現者

是世不現有非過去亦非不現謂除前相此  
 中相聲於所名轉謂若法是前三句名所顯  
 者皆悉除之餘未顯者作第四句此復云何  
 謂除一切過去世法現在佛身及所隱沒取  
 餘現在一切未來及無為法問如後盡滅亦  
 約結斷而作四句何故此中不約結斷作四  
 句耶答有處說結斷名盡名滅無處說結斷  
 名不現故

阿毗達磨大毗婆沙論卷第十三 說一切有部發智

永樂北藏

大毗婆沙論

音釋

揅 正作張開曰 磔 磔格 曷 曷 邏呼 梵語也 邏 邏 膜 膜  
也 啗 笑也 胡 胡 萎 萎 宣 宣 佳 佳 胡 胡 麩 麩 膜 膜  
也 戰 戰 稍 稍 色 色 角 角 切 切 矛 矛 戟 戟 也 也 雙 雙 枝 枝 為 為  
也 穎 穎 鼓 鼓 穎 穎 也 也 礎 礎 五 五 對 對 切 切 澀 澀 不 不 滑 滑 也 也 觀 觀 初 初 覲 覲 切 切

第一〇六册

永樂北藏

大毗婆沙論

第一〇六册

阿毗達磨大毗婆沙論卷第十四

動四

五百大阿羅漢等造

唐三藏法師玄奘奉詔譯

雜蘊第一中習納息第二之六

諸過去彼一切盡耶答應作四句過去有二

動四

種如前說盡亦有二種如過去說此中俱依

二種作論過去與盡互有廣狹故作四句有

過去非盡謂如具壽鄔陀夷言一切結過去

乃至廣說過去者是第二過去非盡者非初

盡佛身現在已斷盡故有盡非過去謂如佛

言此聖弟子已盡地獄已盡傍生已盡餓鬼

已盡所有嶮惡趣坑問此中已盡地獄者顯

聖弟子已盡地獄已盡傍生者顯此已盡傍

生已盡餓鬼者顯此已盡餓鬼已盡所有嶮

惡趣坑者顯此更何所盡耶答即顯上三然

前廣後畧前別後總前漸後頓前分別後不

分別有說已盡地獄傍生餓鬼者顯此已盡

三惡趣自性已盡所有嶮惡趣坑者顯此已

盡彼中有有說已盡地獄等者顯已盡地獄

等已盡所有嶮惡趣坑者顯已盡人中扇撻

半擇迦無形二形彼是人中嶮惡趣坑故有  
 說前顯已盡地獄傍生餓鬼後顯已盡住不  
 律儀彼當墮嶮惡趣坑故有說前顯已盡地  
 獄傍生餓鬼後顯已盡造五無間業彼無間  
 生墮地獄故有說前顯已盡地獄傍生餓鬼  
 後顯已盡斷善根者以斷善者如嶮惡趣坑  
 故若不續善根死必墮地獄故有說前顯已  
 盡地獄等果後顯已盡地獄等因如契經說  
 汝等必芻若見行身語意惡行者應知已見  
 地獄或餘惡趣有說前顯已盡地獄傍生餓

鬼後復言已盡所有嶮者重顯已盡地獄以  
 地獄中無善果故惡趣者重顯已盡餓鬼彼  
 常貧窮乏資緣故坑者重顯已盡傍生身心  
 隨彼難可出故有成劫時生彼壞劫時方命  
 終故有說前顯已盡地獄傍生餓鬼後復言  
 已盡所有嶮劫四惡趣坑者皆重顯已盡三惡趣  
 果謂三惡趣皆是極嶮眾惡所趣所墮坑故  
 問今地獄中猶有種種雙湯爐炭及獄卒等  
 無量苦具如何言盡耶答不往不生故說為  
 盡謂聖弟子不復往彼處不復生彼蘊界處

故此已得彼非擇滅故問亦有異生得地獄等  
非擇滅者何故但說聖弟子耶答諸聖弟子皆已盡故  
異生品中有未盡者是故不說問諸聖弟子亦盡人天何故但言盡地獄等  
答此中但說一切盡者諸聖弟子於人天趣有未盡者故不說之是謂盡非過去盡者是  
第二盡非過去者非初過去有過去亦盡謂所有行已起等起乃至廣說此皆顯示過去  
諸行過去者是世過去盡亦爾有非過去亦非盡謂除前相此中相聲義如前釋廣說乃

至此復云何謂除一切過去世法現在佛身未來聖弟子地獄等蘊界處取餘現在一切未來及無為法作第四句復次若依結斷說者此中依言顯所憑義前四句中依世盡及不生盡說盡言今四句中依斷煩惱得擇滅盡建立盡名有結過去非盡謂結過去未斷未徧知未滅未變吐未斷者未立斷徧知未徧知者未立智徧知未滅者未得擇滅未變吐者未棄彼得有說未斷者未以無間道斷未徧知者未以解脫道徧知未滅者未證彼

離繫得未變吐者未捨彼繫得有說此四句皆顯未棄捨義此復云何謂諸異生若具縛者過去三界見修所斷結已離欲染未離初靜慮染者過去入地見修所斷結乃至已離無所有處染者過去一地見修所斷結若聖者具縛入正性離生位苦法智忍時過去三界見修所斷結苦法智已生苦類智未生過去色無色界見苦所斷及三界見集滅道修所斷結乃至道法智已生道類智未生過去色無色界見道所斷及色界修所斷結預流

者過去三界修所斷結一來者過去欲界修所斷三品及色無色界修所斷結不還者若未離初靜慮染過去入地修所斷結乃至若已離無所有處染過去一地修所斷結是謂結過去非盡有結盡非過去謂結未來已斷已遍知已滅已變吐已斷者已立斷遍知已遍知者已立智遍知已滅者已得擇滅已變吐者已棄彼得有說已斷者已以無間道斷已遍知者已以解脫道遍知已滅者已證彼離繫得已變吐者已捨彼繫得有說此四句



皆顯已棄捨義此復云何謂阿羅漢未來三界見修所斷結若不還者已離無所有處染未來三界見所斷及八地修所斷結乃至未離初靜慮染者未來三界見所斷及一地修所斷結若一來者未來三界見所斷及欲界六品修所斷結若預流者未來三界見所斷結若隨信隨法行道法智已生道類智未生未來三界見苦集滅所斷及欲界見道所斷結乃至苦法智已生苦類智未生未來欲界見苦所斷結若諸異生已離無所有處染未

來入地見修所斷結乃至已離欲染未離初靜慮染未來一地見修所斷結是謂結盡非過去有結過去亦盡謂結過去已斷已遍知已滅已變吐已斷等言如前廣說此復云何謂阿羅漢過去三界見修所斷結廣說乃至若異生已離欲染未離初靜慮染過去一地見修所斷結是謂結過去亦盡有結非過去亦非盡謂結未來未斷未遍知未滅未變吐及結現在未斷等言如前廣說此復云何謂諸異生若具縛者未來三界見修所斷結廣

說乃至若不還者已離無所有處染未來一地修所斷結及一切現在結是謂結非過去亦非盡諸過去彼一切滅耶答應作四句過去有二種如前說滅亦有二種一世滅二隱沒滅此中俱依二種作論過去與滅互有廣狹故作四句有過去非滅謂如具壽鄔陀夷言一切結過去乃至廣說過去者是第二過去非滅者非二種滅佛身現在非隱沒故有滅非過去謂依世俗小街小舍小器小眼言是滅街乃至滅眼謂東方人見小街等說言

此滅即依此義可作是言頗有眼滅能見色耶答有謂現在世同分小眼是謂滅非過去滅者是第二滅非過去者非初過去有過去亦滅謂所有行已起等起乃至廣說此皆顯示過去諸行過去者是世過去滅亦爾有非過去亦非滅謂除前相此中相聲亦如前說廣說乃至此復云何謂除一切過去世法現在佛身及小街等取餘現在一切未來及無為法作第四句復次若依結斷說者此中依言義如前說前四句中依世滅及隱沒滅說

滅言今四句中依斷煩惱得擇滅滅建立滅  
名有結過去非滅謂結過去未斷未徧知未  
滅未變吐廣說乃至有結非過去亦非滅謂  
結未來未斷未徧知未滅未變吐及結現在  
此中一切義如前說如是所說五四句中前  
三四句依世施設及聖施設說作世語言及  
聖語言說依世俗及勝義說依契經及現見  
說後二四句惟依聖施設聖語言勝義契經  
說問後二四句中何故但說結不說結法耶  
答彼作論者意欲爾故乃至廣說有說應說

而不說者當知此義有餘有說已說結當知  
亦已說結法所以者何依結立結法故又同  
一對治故有說諸結自性斷斷已不成就  
故說之結法不定是故不說有說諸結多諸  
過失堅牢難斷難破難越是故說之結法不  
爾是故不說有說諸結與聖道相違結法不  
爾以善有漏能與聖道相入出故無覆無記  
能與聖道為依止故然與結相離故亦是聖  
道所斷如燈破闇時亦損炷等王破他軍時  
亦損自衆有說諸結是結亦是結法是故說

之結法非結是故不說如結結法縛縛法隨  
眠隨眠法隨煩惱隨煩惱法纏纏法垢垢法  
應知亦爾若於苦生疑此是苦耶此非苦耶  
乃至廣說問何故作此論答為欲分別契經  
義故如契經說有因論婆羅門來詣佛所作  
如是問沙門喬答摩疑甚為希有難度非易  
度世尊告言如是如是婆羅門疑甚為希有  
難度非易度所以者何有古昔婆羅門造明  
論者造呪術者上首有十一頰瑟捺迦二婆  
莫迦三婆莫提婆四毗濕縛蜜多羅五闍莫

鐸耆尼六耆耆羅七跋羅墮闍八婆死瑟攏  
九迦葉波十勃栗瞿如是等諸婆羅門世雖  
尊敬皆不度疑而命終是故知疑甚為難度  
契經雖作是說而不廣分別彼經是此論所  
依根本彼所不說者今應說之故作斯論若  
於苦生疑此是苦耶此非苦耶當言一心多  
心耶答應言多心謂此是苦耶是一心此非  
苦耶是第二心於集滅道生疑亦爾此中邪  
聲顯成疑義若但說此是苦便成正見此非  
苦便成邪見乃至於道亦爾由說邪聲故成

疑義如是於苦乃至於道各有二心總成八心此說極速於四聖諦次第疑者有此八心如現觀時從苦法智忍乃至道類智十六刹那有說此八非八刹那以一一心生滅速疾若作是念此是苦耶中間已經百千生滅餘心亦爾但本論師欲令弟子易解了故說多刹那以為一心行相等故頗有一心有疑無疑耶乃至廣說問何故作此論答為令疑者得決定故謂阿毗達磨者說一心聚有多法俱生於中有是猶豫謂疑有是決定謂慧有

非猶豫非決定謂餘心所勿有生疑即有疑心是無疑心即無疑心是有疑心為令此疑得決定故顯有疑心異無疑心異故作斯論頗有一心有疑無疑耶答無問此言為約心聚為約所緣說耶若約心聚說者則一心聚中有是疑有非疑如前已說何故言無若約所緣說者則於一佛心有有疑謂異生有無疑謂聖者亦不應言無何故答言無也答此約心聚故答言無謂諸心聚若有疑者名有疑心若無疑者名無疑心是故有疑心異無

疑心異然此中說無疑心者於四聖諦或了  
是有或撥為無非但與疑不相應起所以者  
何謂於苦諦若言此是苦耶此心有疑若言  
此是苦此心無疑若言此非苦耶此心有疑  
若言此非苦此心無疑於集滅道應知亦爾  
應知此中有十六心於四聖諦各有四故謂  
八是疑四是正見四是邪見前四種疑引四  
正見後四種疑引四邪見謂此是苦等是正  
見此非苦等是邪見故問何等補特伽羅疑  
能引生正見何等補特伽羅疑能引生邪見

答若好與此法共住者彼疑引生正見若好  
與外道共住者彼疑引生邪見復次若樂習  
內論者彼疑引生正見若樂習外論者彼疑  
引生邪見復次若愛親近善士聽聞正法者  
彼疑引生正見若愛親近不善士聽聞不正  
法者彼疑引生邪見復次若因力加行力不  
放逸力增上者彼疑引生正見若因力加行  
力不放逸力非增上者彼疑引生邪見如契  
經說有三種冥身謂於三世疑惑猶豫問冥  
身自性應是無明何故說疑答彼相似故謂

諸煩惱中無有不了行相與無明相似猶如  
疑者是故說疑有說冥身自性實是無明疑  
是無明依處舍宅是故說疑如施設論說疑  
是無知依處舍宅故有說疑與無明親近住  
故謂若有疑處必有無明如世於親說彼是  
我是故說疑有說疑與無明相類同故謂彼  
於境俱不決定二分而轉是故說疑有說彼  
經為成不成法故謂無明為冥身自性不說  
自成而疑亦有冥身之義然不顯了是故偏  
說問世尊何故但說緣世疑為冥身不說緣

勅四

九

無為疑耶答應說而不說者當知此義有餘  
有說彼經依多分說謂多緣世起此冥身少  
緣無為是以不說有說有為麤顯於中生疑  
聖所訶責說為冥者無為微細難可覺了於  
中生疑聖不訶責是以不說如晝蹠蹠為世  
所訶說為盲者夜分蹠蹠世則不訶彼亦如  
是有說外道於世起增上愚疑惑猶豫是故  
偏說如契經言我於過去為曾有為非曾有  
何所曾有云何曾有我於未來為當有為非  
當有何所當有云何當有於內猶豫此物是

何此物云何當何所有如是有情生從何來  
沒往何所外道於世數起如是增上猶豫是  
故偏說有說若愚若智內道外道世間論者  
乃至童堅皆知有世謂彼皆了有去來今而  
於中疑甚為盲冥故說冥身涅槃離相極難  
覺了雖猛利智猶不能窮故於彼疑此中不  
說有說佛觀未來有諸弟子撥無過未故說  
於世起疑惑者名為冥身如契經說有五種  
心裁一者疑佛二者疑法三者疑戒四者疑  
教五者瞋僧如彼經說有五心裁云何為五

謂於大師及法戒教疑惑猶豫不悟入不信  
解不害心裁於佛所讚歎有智同梵行者瞋  
恚毀罵凌辱觸惱不害心裁問此五心裁以  
何為體答疑瞋為體前四是疑第五是瞋問  
瞋可爾疑云何如契經說裁有三種謂貪瞋  
癡品類足論亦作是說瞋云何謂於有情作  
損害作裁藥無處說疑為裁自性此中何以  
說耶答彼相似故謂諸煩惱中無有非裁自  
性而作裁事猶如疑者如施設論說疑覆蔽  
心令心剛強作裁藥事尚不令心得邪決定



況正決定譬如良田若不耕墾即便堅韌多諸株杌穢草不植何況嘉苗有說疑與瞋恚行相所對俱相似故說為心栽行相相似者俱感行相轉故所對相似者俱對歡行相故問何故疑佛說為心栽非疑僧耶答不應生處而妄生者說名心栽佛無一切惡行過失而生猜疑是名非處於法戒教應知亦爾僧有少分惡行過失而猜疑者是應處起不名心栽問何故瞋僧說名心栽非瞋佛耶答僧有少分惡行過失緣之生瞋性必尤重故名

心栽佛無一切惡行過失生瞋則輕是故不說於法戒教應知亦爾有餘師說於非重過施設心栽於僧生疑其過則重以應處起難可斷故不名心栽佛無諸過而能緣之生瞋性必尤重難斷亦非心栽於法戒教亦復如是云何多名身乃至廣說問何故作此論答是作論者意欲爾故乃至廣說有說為欲分別契經義故如契經說苾芻當知如來出世便有名身句身文身出現世間雖作是說而不分別云何名身句身文身今欲分別故作

斯論有說為令疑者得決定故謂此論中分別種種甚深妙義或有生疑論者於義雖得善巧而於其文或不善巧為令此疑得決定故顯於文義俱得善巧故作斯論有說為止他宗顯已義故謂或有執名句文身非實有法如譬喻者或復有執名句文身聲為自性如聲論者為止彼執顯名身等是實有法是不相應行蘊所攝故作斯論有說欲顯世尊三無數劫所設劬勞有大果故謂佛過去無量劫前應得滅度所以經於三無數劫修習

百千難行苦行但為利他夫利他者必於名身句文身身皆得善巧以善巧故能為他說蘊界處等令得涅槃究竟饒益是名大果有說為欲建立三種菩提增上緣故謂若以上品覺慧覺名句文身名佛菩提若以中品覺慧覺名句文身名獨覺菩提若以下品覺慧覺名句文身名聲聞菩提有說欲顯佛是無量無邊說法者故謂佛善達名句文身能為衆生說法無盡有說欲顯世尊異獨覺故謂佛獨覺皆不由師自能覺悟而於名等惟佛

善知獨覺不爾有說為欲照了雜染清淨二  
法性相令他知故謂名身等是能照了染淨  
根本若無名等雜染清淨不可顯示有說欲  
顯於名身等觀察不觀察者引大義利大衰  
損故謂修行者若能觀察名句文身則能制  
伏猶如積山煩惱惡行雖遭罵辱能堪忍故  
若不觀察名句文身則煩惱惡行如河流不  
絕如罵太子毗盧釋迦言婢子何以昇我釋  
種堂彼以不能觀察如是四五字故牽引無  
量百千衆生墮大地獄問彼修行者得他罵

動四

十二

時云何觀察令瞋不起答所言阿俱盧舍縵  
者是為罵我若除阿字但是喚我若除縵字  
直是罵聲若二字俱除直名為喚彼修行者  
得他罵時便審觀察此諸字中若無阿者便  
是喚我何為生瞋若無縵者但有罵聲不關  
於我何由得瞋若二字俱無直名為喚於我  
何苦而得生瞋復次行者得他罵時便審觀  
察如是諸字此方是罵他方是讚我若於此  
生瞋生憂若於他方生貪生喜則常憂常喜  
常瞋常貪誰有疲苦與我比者由此觀察便

不生瞋復次行者得他罵時便審觀察有證  
我者更無別字但於罵我諸字之中顛倒次  
比此讚與罵既不決定不應於中生憂生喜  
由此於罵不生瞋心復次行者得他罵時應  
審觀察如是語業誰所成就為是罵者為是  
我身即知此是罵者成就便作是念彼為自  
罵何關於我故不生瞋復次行者得他罵時  
便觀罵者身中諸法罵我法多不罵法多即  
知罵法惟攝一界一處一蘊少分不罵法攝  
十七界一界少分十一處一處少分四蘊一

蘊少分作如是念彼罵我者罵我法少不罵  
法多何為忘多於少生恚復次行者得他罵  
時應觀一字一刹那頃必不成罵無有多字  
多念俱生前字生時後字未起後字若生前  
字已滅都無罵理但妄分別謂之為罵故不  
應瞋復次行者得他罵時應觀我身及能罵  
者皆念念滅適欲分別罵者及我皆已滅無  
誰復於誰應生瞋恨由此觀察故不生瞋復  
次行者得他罵時應觀諸行離我我所作者  
受者皆不可得惟空行聚何為生瞋有說所

以作此論者為顯此論文義具故謂此論中  
分別諸法自相共相名為義具此中分別名  
句文身名為文具其有說為顯名句文身有大  
用故謂由名等顯示分別蘊界處等無量義  
門及能讚述佛法僧寶無邊功德由如是等  
種種因緣故作斯論云何多名身答謂名名  
號異語增語想等想假施設是謂多名身此  
中論者於文善巧以多文句共顯一名皆是  
名之差別名故問此中何故問多名身而不  
問名及名身耶答是作論者意欲爾故乃至

廣說有說應問而不問者當知此義有餘有  
說名與名身二俱攝在多名身中間多名身  
則為都問有說此是契經所說不應問作論  
者契經但問多名身故論者於中不能增減  
問若爾何故問多名身而答以名答名是根  
本名滿名身名身復滿多名身故有說依展  
轉因故作是說如子孫法謂依名有名身依  
名身有多名身故問名體是何答是不相應  
行蘊所攝句文亦爾問何故名名答名者名  
為隨名為召名為合隨者如其所作即往相

動四

十四

應召者為此義立如求便應合者隨造頌轉  
令與義會此中名具三義故名爲名心心所  
法有隨有召而無合義故不名名餘不相應  
色無爲法有隨有合而無召義故亦非名問  
名身者是何義答是二名聚集義是故一名  
不名名身問多名身是何義是多名聚集義  
如一象二象不名多象身要衆多象名多象  
身馬等亦爾白身多白身文身多文身亦復  
如是此中有名有名身有多名身有一字所  
起名有二字所起名有多字所起名一字所

起名中於一字但有名於二字有名身多名  
身者有欲令依三字有欲令依四字二字所  
起名中於二字但有名於四字有名身多名  
身者有欲令依六字有欲令依八字三字所  
起名中於三字但有名於六字有名身多名  
身者有欲令依九字有欲令依十二字四字  
所起名中於四字但有名於八字有名身多  
名身者有欲令依十二字有欲令依十六字  
以此爲門餘多字名應知亦爾有餘師說一  
字所起名中於一字一呼但有名即於此字

再呼有名身即於此字或三呼或四呼有多  
名身於二字所起名等應知亦爾云何多句  
身答諸句能滿未滿足義於中連合是謂多  
句身為成此義引經為證如世尊說諸惡莫  
作諸善奉行自淨其心是諸佛教如是四句  
各能滿足未滿足義於中連合是謂多句身  
如是四句一一能滿各自句中未滿足義於  
中連合者於四句中一一各別連合諸字顯  
未滿義或復連合諸句顯成頌義為多句身  
一一句中有標有釋謂諸惡者是標莫作者

是釋乃至是諸佛者是標教者是釋故此頌  
中有四事滿一標二釋三句四頌若說諸惡  
於標名滿於釋於句於頌未滿復說莫作於  
標釋句三種名滿於頌未滿復說諸善若於  
總頌標釋句滿若於別句標滿非餘乃至復  
說是諸佛者若於總頌標釋句滿若於別句  
標滿非餘復說教者一切皆滿此頌處中不  
長不短八字為句三十二字為頌諸經論頌  
多依此法計書寫數亦依此法又從六字乃  
至二十六字皆得為句然六字者名為初句

二十六字者名爲後句減六字者名短句過  
二十六字者名長句云何多文身答諸字衆  
是謂多文身爲成此義引經爲證如世尊說  
欲爲頌本文即是字頌依於名及造頌者  
此中欲者是欲造頌欣喜愛樂爲頌本者此  
欲是頌因集生緣文即是字者巧便顯了故  
名爲文此即是字無轉蓋故此即顯示能顯  
頌文以字爲體頌依於名者頌是假有依名  
而立亦依文句且說依名此中依言如林依  
樹及造頌者思惟觀察作諸伽陀名造頌者

頌依造者如蛇依穴水依於泉乳依乳房與  
依名異應知此中有名有名身有多名身有  
句有句身有多句身有文有文身有多文身  
於一字有名無名身無多名身無句無句身  
無多句身有文無文身無多文身於二字有  
名有名身無多名身無句無句身無多句身  
有文有文身無多文身於四字有名有名身  
有多名身無句無句身無多句身有文有文  
身有多文身於八字有名有名身有多名身  
有句無句身無多句身有文有文身有多文



身於十六字有名身有多名身有句有  
 句身無多句身有文有文身有多文身於三  
 十二字有名有名身有多名身有句有句身  
 有多句身有文有文身有多文身由此為門  
 於諸字眾所說多少如理應知

動四

十七

阿毗達磨大毗婆沙論卷第十四 說一切有部發智

永樂北藏

大毗婆沙論

音釋

扇 梳 梵語也此云生謂男根不半擇迦 梵  
 也此云變謂金鐸遠各踰蹶蹶居月切僂也  
 今生變作也 藥 謂魚列切斫木餘也 墜 用力反土也 韆 孟  
 切堅 株 杙 五 怨 切 木 無 枝 也 杙 反 土 也 韆 孟  
 切 堅 株 杙 五 怨 切 木 無 枝 也 杙 反 土 也 韆 孟

第一〇六册

永樂北藏

大毗婆沙論

第一〇六冊

阿毗達磨大毗婆沙論卷第十五 動五

五百大阿羅漢等造

唐三藏法師玄奘奉詔譯

雜蘊第一中智納息第二之七

問名為隨語地繫為隨補特伽羅地繫耶有

動五

說名隨語地繫彼作是說生欲界者若作欲界語彼欲界身欲界語欲界名所說義或三界繫或不繫若作初靜慮語彼欲界身初靜慮語初靜慮名所說義如前說生初靜慮者若作初靜慮語彼初靜慮身初靜慮語初靜

慮名所說義如前說若作欲界語彼初靜慮身欲界語欲界名所說義如前說生第二第三第四靜慮者若作欲界語彼第二第三第四靜慮身欲界語欲界名所說義如前說若作初靜慮語彼第二第三第四靜慮身初靜慮語初靜慮名所說義如前說問若爾者上三靜慮為有名不有說無有說有而不可說評曰彼不應作是說寧說無不應說有而不可說以無用故有說名隨補特伽羅地繫彼作是說生欲界者若作欲界語彼欲界身欲

界語欲界名所說義如前說若作初靜慮語  
 彼欲界身初靜慮語欲界名所說義如前說  
 生初靜慮者若作初靜慮語彼初靜慮身初  
 靜慮語初靜慮名所說義如前說若作欲界  
 語彼初靜慮身欲界語初靜慮名所說義如  
 前說生第二第三第四靜慮者若作欲界語  
 彼第二第三第四靜慮身欲界語第二第三  
 第四靜慮名所說義如前說若作初靜慮語  
 彼第二第三第四靜慮身初靜慮語第二第  
 三第四靜慮名所說義如前說間若爾者無

色界為有名不有說無有說有而不可說評  
 曰彼不應作是說寧說無不應說有而不可  
 說以無用故如說名文句亦爾問名等為是  
 有情數為非有情數耶答是有情數問名等  
 為有執受為無執受耶答無執受問名等為  
 是長養為是等流初五為是異熟生耶答是等流  
 非長養非異熟生問若名等非異熟生契經  
 云何通如說佛告阿難我亦說名從業生是  
 業果答名亦是業增上果故作如是說謂作  
 好業亦得好名然非異熟問名等為善為不

善為無記耶答無記非造業者故思起故如  
四大種問誰成就名等為能說者為所說耶  
設爾何失若能說者則阿羅漢應成就染污  
法離欲染者應成就不善法異生應成就聖  
法斷善根者應成就善法以阿羅漢等亦說  
染污等法故若所說者則外事及無為亦應  
成就名等以彼亦是所說法故答惟能說者  
成就名等問若爾後難善通前難云何通答  
阿羅漢等雖成就染污等名而不成就染污  
等法以染污等名皆是無覆無記法故問一

刹那心能起一語一刹那語能說一字耶答  
佛一刹那心能起一語一刹那語能說一字  
聲聞獨覺一刹那心能起一語一刹那語不  
能說一字彼說衰時必經多刹那故由此惟  
佛其言捷利聲韻無過詞辯第一問三世諸  
法一一各有三世名耶答有過去諸法有過  
去名者如過去佛以如是名說過去法過去  
諸法有未來名者如未來佛以如是名說過  
去法過去諸法有現在名者如現在佛以如  
是名說過去法未來現在法廣說亦爾問一

切名皆能顯義耶答一切名皆能顯義問若以此名顯斷常第二頭第三手第六蘊第十三處第十九界等此名何所顯耶答此名即顯斷常等想問若以此名顯諸法無我此名何所不顯耶答有說除其自性及俱有法餘悉能顯有說惟除自性餘悉能顯有說惟除四字餘悉能顯有說一切悉顯謂於此中薩能顯婆婆能顯薩達能顯磨磨能顯達是故此中雖顯一切而無自性顯自性失問名之與義何者多耶答義多名少所以者何義攝

十七界一界少分十一處一處少分四蘊一蘊少分名攝一界一處一蘊少分有說名多義少所以者何以一一義有多名故如古所制尼犍茶書一一義有千名次後畧之於一一義惟留百名今一一義惟留十名又說法者以無量名說一義故如是說者義多名少所以者何名亦義故設名非義義猶為多以攝十七界一界少分乃至廣說況名亦是義是餘名所顯故是則義攝十八界十二處五蘊名但攝一界一處一蘊少分問若名亦是

義者名義有何差別答能顯是名所顯是義  
復次名是非色義通色非色名惟無見義通  
有見無見名惟無對義通有對無對名惟有  
漏義通有漏無漏名惟有為義通有為無為  
復次名惟無記義通善不善無記名惟墮三  
世義通墮三世及離世名惟欲色界繫義通  
三界繫及不繫名惟非學非無學義通學無  
學非學非無學名惟修所斷義通見修所斷  
及不斷復次名惟不染汚義通染汚不染汚  
如染汚不染汚有罪無罪有覆無覆是退非

退黑法白法亦爾復次名無異熟義通有異  
熟無異熟名非異熟義通異熟非異熟名不  
相應義通相應不相應如相應不相應有所  
依無所依有所緣無所緣有行相無行相有  
警覺無警覺亦爾復次名惟苦集諦攝義通  
四諦及非諦攝由如是等名義差別問義為  
可說為不可說耶設爾何失若可說者說火  
應燒舌說刀應割舌說不淨應汚舌說飲應  
除渴說食應除飢如是等若不可說者云何  
所索不顛倒耶如索象應得馬索馬應得象

如是等契經所說復云何通如說我所說法  
初中後善文義巧妙答義不可說問若爾前  
難善通云何所索不顛倒耶答劫初時人共  
於象等假立名想展轉傳來故令所索而不  
顛倒有說語能起名名能顯義語雖不能親  
說得義而依展轉如子孫法故於象等所索  
無倒問契經所說復云何通知說我於說法  
初中後善文義巧妙尊者世友作是釋言語  
能起文文能顯義故作是說復作是言為異  
外道故作是說謂諸外道所說法或少義或

無義世尊所說有義多義是故說言我所說  
法文義巧妙復作是說外道所說文義相違  
世尊所說文義相順欲顯異彼故作是說問  
名句文身是不相應行蘊所攝何故佛說四  
蘊名名答佛於有為總立二分謂色非色色  
是色蘊非色即是受等四蘊非色聚中有能  
顯了一切法名故非色聚總說為名有說色  
法麤顯即說為色非色微隱由名顯故說之  
為名然實名等惟不相應行蘊所攝名有六  
種一功德名二生類名三時分名四隨欲名



五業生名六標相名功德名者謂依功德立  
名如解或誦素怛纜者名為經師若解或誦  
毗奈耶者名為律師若解或誦阿毗達磨者  
名為論師得預流果名為預流乃至得阿羅  
漢果名阿羅漢如是等生類名者謂依生類  
立名如城市生者名城市人村野生者名村  
野人刹帝利種中生者名刹帝利乃至戍達  
羅種中生者名戍達羅如是等時分名者謂  
依時分立名如童稚時名為童子乃至衰老  
時名為老人如是等隨欲名者謂隨樂欲立

名如初生時或父母等或沙門等為其立名  
如是等業生名者謂依作業立名如善畫者  
名為畫師鍛金鐵者名金鐵師如是等標相  
名者謂依標相立名如執杖者名執杖人執  
蓋者名執蓋人如是等復次名有四種一假  
想名二隨用名三彼益名四從畧名假想名  
者如貧賤者名為富貴如是等隨用名者如  
腹行者名腹行蟲如是等彼益名者如天神  
邊求得者名為天授因祠祀而得者名為祠  
授如是等從畧名者如具五功德者名為五

德繫屬王者名曰王人如是等復次名有二種一生名二作名生名者如刹帝利婆羅門等作名者如父母等所為立名有說生名者謂初生時父母等所立名作名者謂於後時親友知識所為立名復次名有二種一有相名二無相名有相名者如無常苦空無我等無相名者如我人有情意生等若佛出世則有相名多無相名少若不出世則無相名多有相名少問火名為是有相為是無相答若云尸棄是有相名云阿耨尼是無相名復次

名有二種一共名二不共名不共名者如佛法僧蘊界處等共名者謂餘世間共所立名有餘師說無不共名以一法可立一切名一切法可立一名故名皆是共如共不共名曾未曾名亦爾復次名有二種一定名二不定名定名者如蘇迷盧劫五大海洲渚等不定名者謂餘世間隨共立名有餘師說無決定名所以者何蘇迷盧等邊方亦為作種種名此方文頌亦作餘名如是說者蘇迷盧等有決定名劫初成時蘇迷盧等名已定故問前劫壞

時一時失壞今劫成已誰傳彼名答有諸仙人得宿住智憶前劫事復傳彼名或劫初人由法爾力心想欸有彼名現前問諸所有名爲皆先有展轉傳說爲新立耶答蘇迷盧等諸名先有餘名不定或有新立復次名有二種一者詮體二者詮用詮體名者如盆中果舍中人等詮用名者如刈者誦者等有說詮體名者如堅濕煖動等詮用名者如持攝熟長等有說詮體名者謂諸惡等詮用名者謂莫作等問名爲有邊際不有作是說名無邊

際法無邊故於一一法有多名故復有說者名有邊際惟佛能知餘無知者以佛能知名邊際故名一切智有說佛及獨覺知名邊際餘不能知有說佛及獨覺到彼岸聲聞知名邊際餘不能知評曰初說爲善惟佛能知名之邊際餘皆無有一切智故問有佛無佛世間恒有名句文身何故經言如來出世便有種種多名身等出現世間答依不共名故作是說如佛法僧蘊界處等惟佛出世方有此名有作是說惟佛出世有順解脫順空無我

違生死苦違我我所斷諸見生覺意背煩惱  
向出要止愚癡生智慧斷猶豫生決定厭生  
死樂涅槃毀外道讚正法諸如是等名句文  
身出現於世餘時不爾故作是說如契經說  
有三種言依無第四第五云何為三謂依過  
去說曾諸法依未來說當諸法依現在說今  
諸法問言依以何為自性答品類足說言依  
十八界十二處五蘊所攝問言即是語彼依  
是名但應一界一處一蘊所攝何故言十八  
界十二處五蘊所攝耶答彼論應說言依一

界一處一蘊所攝而言十八界十二處五蘊  
所攝者依展轉因故作是說謂語依名轉名  
依義轉義是言展轉依義中具有十八界十  
二處五蘊故說者聽者皆為於義是故彼論  
依展轉因說言依自性有說言依是名及所  
說義是故具有十八界等以言依名及義轉  
故問何故但依三世法說三言依不依無為  
法說言依耶答亦應說無為法是言依而不  
說者當知此義有餘有說無為攝在現在品  
中以現在法得無為故有說言多分依有為

法轉故無為法不說言依有說為止有情增  
上愚故說三言依於有為法所起無明多增  
上故有說有情多於三世猶豫故佛為說三  
種言依有說為止外道執有我故說三言依  
謂外道言若無我者我言何依故佛為說三  
種言依我言但依三世起故有說為止撥無  
去來二世并止現在是無為執說三言依依  
是有體有用法故無必無體無為無用故非  
言依有說有為法麤多信是有易起言說故  
立言依無為法細少信是有難起言說故非

言依尊者世友作如是說有為無為分為二  
聚若彼聚中三事可得謂語名義立為言依  
無為聚中雖得有義而無餘二故非言依大  
德說曰若法有用取果與果可立言依無為  
無用是故不說脇尊者言有為諸法與言可  
有俱時轉義故立言依無為不然是故不說  
問若依過去說未來現在法依未來說過去  
現在法依現在說過去未來法彼是何等言  
依攝耶有作是說彼不攝在三言依中復有  
說者若依過去說未來現在即攝在過去中

乃至若依現在說過去未來即攝在現在中  
有餘師說若依過去說未來現在未來者攝  
在未來現在者攝在現在乃至若依現在說  
過去未來過去者攝在過去未來者攝在未  
來前言說依義為體故問若於一時頓說二  
世或復三世何言依攝有作是說彼不攝在  
三言依中復有說者隨能顯名在何世攝即  
說攝在彼世言依有餘師說隨所顯義在何  
世攝即說攝在彼世言依前說言依義為體  
故問契經但說有三種言依於義已足何故

復說無第四第五答無第四者遮第四世恐  
有執有第四世故無第五者遮無為法恐執  
無為是言依故有說二言鄭重遮止欲令所  
說義決定故契經依世建立言依故說有三  
無四無五若依如理作意建立言依應說有  
一無第二第三物五無第二者遮有第二如理作  
意無第三者遮如理作意所不攝法若依止  
觀建立言依應說有二無第三第四義如前  
說若依三解脫門建立言依應言有三無第  
四第五義如前說若依四聖諦建立言依應

說有四無第五第六義如前說若依五蘊建立言依應說有五無第六第七義如前說若依六隨念建立言依應說有六無第七第八義如前說若依七等覺支建立言依應說有七無第八第九義如前說若依八聖道支建立言依應說有八無第九第十義如前說若依九次第定建立言依應說有九無第十第十一義如前說若依如來十力建立言依應說有十無第十一第十二義如前說如是若依餘法建立言依應如理說此經依世建立

言依故但說三無四無五即此經中作如是說應以四事觀察補特伽羅知彼具壽為可與語為不可與語云何為四一者處非處二者智論三者分別四者道跡若於此四善安住者彼可與語與此相違不可與語問如是四事有何差別答不善安住處非處者謂不如實知是處非處不善安住智論者謂不如實知智及爾焰不善安住分別者謂不如實知世俗勝義不善安住道跡者謂不如實知趣苦集行及趣苦滅行有說不善安住處非

動五

十一

處者謂不如實知眼色為緣生眼識乃至意  
法為緣生意識是處耳等為緣生眼識乃至  
眼等為緣生意識非處不善安住智論者謂  
不如實知十智差別不善安住分別者謂不  
如實知了義經及不了義經不善安住道跡  
者謂不如實知四種行跡有說不善安住處  
非處者謂不如實知有理無理不善安住智  
論者謂不如實知聖者正論不善安住分別  
者謂不如實知假設言論不善安住道跡者  
謂不如實知他言句義前中後別而輒酬對

有說不善安住處非處者謂不能如實立所  
立宗不善安住智論者謂不能堪受他所問  
難不善安住分別者謂不善了知詭誑真實  
不善安住道跡者謂不能成辦增上覺慧有  
說不善安住處非處者謂於自宗他宗不善  
安住而有所說不善安住智論者謂不了知  
他以量為先有所結難不善安住分別者謂  
不了知他前後次第相應言論不善安住道  
跡者謂不能滿足所求勝事有說不善安住  
處非處者謂不善了知現非現量不善安住



智論者謂於先所聞堅執不捨不欲觀察前後得失不善安住分別者謂於他正說心懷猶豫如不能決是餅是酥不善安住道跡者謂不了知現比至教為先問難脇尊者言不善安住處非處者謂於所知境不善了知不善安住智論者謂於能知智不善了知不善安住分別者謂於邪正教不善了知不善安住道跡者謂於邪正行不善了知尊者僧伽筏蘇說曰不善安住處非處者謂於多界經中所說處非處義不善了知不善安住智論

勅五

十二

者謂於四十四智七十七智事不善了知不善安住分別者謂於雜染清淨不善了知不善安住道跡者謂於趣色滅行乃至趣識滅行不善了知與上相違名善安住即此經中復作是說應以四事觀察補特伽羅知彼具壽為可與語為不可與語云何為四一者應一向記問二者應分別記問三者應反詰記問四者應捨置記問若於此四如應記者彼可與語與此相違不可與語云何名應一向記問此問應以一向記故謂有問言如來應

正等覺耶法善說耶僧妙行耶一切行無常  
耶一切法無我耶涅槃寂靜耶應一向記此  
皆如是問何故此問應一向記答此問能引  
義利能引善法隨順梵行能發覺慧能得涅  
槃是故此問應一向記云何名應分別記問  
物五  
此問應以分別記故謂有請言為我說法應  
告彼言法有各種有過去有未來有現在有  
善有不善有無記有欲界繫有色界繫有無  
色界繫有學有無學有非學非無學有見所  
斷有修所斷有不斷欲說何者云何名應反

詰記問此問應以反詰記故謂有問言為我  
說法應反詰言法有衆多汝問何者衆多法  
者謂過去等如前廣說問應分別記論應反  
詰記論有何差別答答意雖無差別而問意  
有異謂彼問者有為知解故問有為觸惱故  
問若為知解故問應告彼言法有各種有過  
去有未來有現在廣說乃至有見所斷有修  
所斷有不斷欲說何者若言為我說過去法  
應告彼言過去法亦有多種有善有不善有  
無記欲說何者若言為我說善法應告彼言

善法亦有多種有色有受想行識欲說何者  
若言為我說色法應告彼言色法亦有多種  
有離殺生乃至有離雜穢語欲說何者若言  
為我說離殺生應告彼言離殺生有三種謂  
從無貪生從無瞋生從無癡生欲說何者若  
言為我說從無貪生應告彼言無貪生者復  
有二種謂表無表欲說何者若為知解故發  
問者則應如是分別而答若為觸惱故問應  
反詰言法有衆多汝問何者不應為說有過  
去乃至有不斷若言為我說過去法應反詰

言過去法多汝問何者不應為說善不善無  
記若言為我說善法應反詰言善法亦多汝  
問何者不應為說色乃至識若言為我說色  
法應反詰言色法亦多汝問何者不應為說  
離殺生乃至離雜穢語若言為我說離殺生  
應反詰言離殺生亦多汝問何者不應為說  
從無貪生乃至從無癡生若言為我說從無  
貪生應反詰言從無貪生亦有衆多汝問何  
者不應為說表及無表若為觸惱故發問者  
則應如是總相反詰令彼問盡或令自答如

有為知解故問有為觸惱故問如是有為求  
善故問有為試他覺慧淺深故問有為求義  
故問有為摧他故問有質直故問有諂曲故  
問有柔和故問有憍傲故問應知亦爾如是  
名為分別反詰二論差別云何名應捨置記  
問此問應以捨置記故謂有外道來詣佛所  
白佛言喬答摩世間常耶乃至廣說四句世  
間有邊耶乃至廣說四句世尊告曰皆不應  
記問何故世尊不答此問答彼諸外道執有  
實我名為世間來詣佛所作如是問佛作是

念實我定無若答言無彼當作是言我不問  
有無若答言常或無常等便不應理實我本  
無如何可說常無常等如有問他此石女兒  
恭敬孝順及愛語不彼作是念石女無兒若  
答言無彼當作是言我不問有無若我答言  
恭敬孝順及愛語者勅五便不應理石女無兒如  
何可說有恭敬等此亦如是所問非有非真  
非實不應道理故佛不答復有外道來詣佛  
所白佛言喬答摩命者即身為異身耶世尊  
告曰俱不應記問何故世尊不答此問答彼

諸外道執有實我名為命者來詣佛所作如是問佛作是念實我定無若答言無彼當作是言我不問有無若我答言即身或異便不應理實我本無如何可說與身一異如有問他兔角牛角為相似不彼作是念兔角本無若答言無彼當作是言我不問有無若我答言相似或不相似便不應理兔角本無如何可說與牛角相似不相似耶此亦如是所問非有非真非實不應道理故佛不答復有外道來詣佛所白佛言喬答摩如來死後為有

為無乃至四句世尊告曰皆不應記問何故世尊不答此問答彼諸外道執有實我名為如來彼執此我本無而有問佛死後為有為無乃至廣說佛作是念如是本無今有實我畢竟無體若答此我今尚是無彼當作是言我不問今有無若我答言死後有等便不應理如是實我今尚是無如何可說死後有等所問非有非真非實不應道理故佛不答復有外道來詣佛所白佛言喬答摩自作自受耶世尊告曰此不應記問何故世尊不答此

問答彼諸外道執有實我自作自受佛說無  
我故不應答義如前說彼復問言他作他受  
耶世尊告曰此不應記問何故世尊不答此  
問答彼諸外道執有實我名自在天等彼能  
作我受果佛說無我故不應答義如前說彼  
復問言自他作自受耶世尊告曰此不應記  
問何故世尊不答此問答彼諸外道執有實  
我名爲自他佛說無我故不應答義如前說  
彼復問言非自他作無因而生無作無受耶  
世尊告曰此不應記問何故世尊不答此問

答世尊常說果從因生自作自受故不應答  
問何故於彼外道諸問應捨置耶答彼問不  
引義利不引善法不順梵行不發覺慧不得  
涅槃是故彼問皆應捨置問前三有答可名  
爲記第四無答云何名記答佛雖告言此不  
應記而實已與答理相應是根本答故亦名  
記今彼問者得正解故或有默然於理得勝  
況酬彼問而非記耶昔有外道名扇帙畧聰  
明廣學是大論師爲論議故來入迦濕彌羅  
國爾時此國有阿羅漢名筏素羅三明六通

具八解脫學窮內外恒住波利質但羅林中  
時扇帙畧為搆論故來詣其所共相問訊種  
種慰勞在一面坐白言必芻欲相搆論尊者  
與我誰先立宗筏素羅言我是舊住應先立  
宗但汝遠來稍當疲倦隨意先立時扇帙畧  
便立宗言一切立論皆有報答覺慧若盡其  
論乃窮時筏素羅默然而住彼扇帙畧與諸  
弟子歡喜而起唱如是言今此必芻已墮負  
處時筏素羅告彼弟子汝師若是扇帙畧者  
不久當悟誰墮負處彼諸弟子聞之嗤笑隨

物五

十七

逐其師從林而出時扇帙畧尋即思惟何故  
沙門作如是說乃便自悟我立論言一切立  
論皆有報答必芻默然是我墮負深生慙赧  
告弟子言吾所立論今已墮負可與汝等馳  
還懺謝弟子白言何名墮負時扇帙畧具為  
述之弟子報言已對大眾得勝而來何須復  
往懺謝取辱其師報言我寧於智者邊受劣  
不能於愚者邊取勝即與弟子還入林中到  
尊者所頂禮雙足作如是言尊者得勝我已  
墮負尊者是師我是弟子從今以後請常教





阿毗達磨大毗婆沙論卷第十六 動六

五百大阿羅漢等造

唐三藏法師玄奘奉詔譯

雜蘊第一中智納息第二之八

如佛世尊訶諸弟子稱言癡人乃至廣說問

動六

何故作此論答欲令疑者得決定故謂佛世尊愛恚永斷違順平等拔誣論根滅憍慢本視諸珍寶猶如瓦礫於一切法覺照無遺無相似愛及恚慢等諸煩惱習已永斷故非如獨覺及諸聲聞雖斷煩惱而有餘習貪愛習

者如尊者阿難憐諸釋種瞋恚習者如尊者畢陵伽跋蹉語苑伽神言小婢止流吾今欲渡憍慢習者如尊者舍利子棄擲醫藥愚癡習者如尊者笈房鉢底食前咳氣知食未銷不知後苦而復更食如是等事其類甚多世尊雖無煩惱餘習而或時有似愛等言似愛言者如世尊說善來苾芻能善出家猶具禁戒似恚言者如世尊說汝是釋種婢子釋種是汝大家似慢言者如世尊說我是如來應正等覺成就十力得四無畏似癡言者如世

尊說大王今者從何處來告阿難言看天雨不園中何故高聲大聲或有生疑世尊已斷諸煩惱習云何復有如是等類似煩惱言欲令彼疑得決定解故作斯論釋其因緣如此癡言彼亦爾故問何故佛說似愛等言答護所化田饒益彼故謂世尊說似愛言者欲令天授所破苾芻身心安隱及除疑故謂提婆達多貪名利故破壞僧已尊者舍利子及大目犍連化使還來彼諸苾芻深生羞恥身心顛掉復生疑惑我隨天授不失戒耶聞世尊

說善來苾芻能善出家猶具禁戒顛掉疑惑二事皆除若佛爾時不作此語彼懷愧惱吐血命終又世尊說似恚言者摧彼梵志憍慢幢故謂彼梵志菴婆瑟吒不量母卑而懷憍傲障他出家當墮惡趣由佛訶彼傲恨心摧五六次第二身得生天上見四聖諦又訶彼補色羯羅婆利梵志得入佛法逮殊勝果又世尊說似慢言者為令不知佛功德者知已歸依修勝行故又世尊說似癡言者為開彼王談論道故為解阿難睡悶心故又欲生彼樂靜

心故佛說此等似煩惱言皆為有情獲利樂  
故今訶弟子稱言癡人亦為利生如後當說  
問何緣獨覺及諸聲聞雖斷煩惱而有餘習  
佛不爾耶答聲聞獨覺慧不猛利雖斷煩惱  
而有餘習如世常火雖有所燒而餘灰燼佛  
慧猛利斷諸煩惱令無餘習如劫盡火隨所  
燒物無餘灰燼由前所說種種因緣故作斯  
論如佛世尊訶諸弟子稱言癡人此有何義  
答是訶責語謂佛世尊訶責弟子稱言癡人  
如今親教及軌範師若有近住依止弟子起

諸過失便訶責言汝為愚癡不明不善世尊  
亦爾訶諸弟子稱言癡人此中論文總有二  
分一者釋佛訶弟子義二者釋佛訶彼因緣  
前所舉文即是初分如今親教及軌範師為  
遮弟子所起過失或如父母遮防子過有所  
訶責皆為饒益勅六無有惡心佛亦如是三謂佛所  
化畧有四種一宜讚歎二宜訶責三宜捨置  
四宜因他宜讚歎者如佛讚歎俱胝耳等宜  
訶責者如佛訶責鄔陀夷等宜捨置者如置  
無衣迦葉波等如佛告彼婆羅門言今非其

時未可答汝宜因他者如佛為五苾芻轉正法輪爾時八萬諸天皆得聖道佛為頻毗娑羅王說法爾時亦有八萬諸天及摩揭陀九萬二千人皆得聖道佛為帝釋說法爾時亦有八萬諸天得入聖道佛為羅怛羅說法爾時亦有六萬諸天一時得道諸如是等其類甚多是故世尊應以訶責而入道者必訶責之有說世尊大悲所逼故常求覓利他方便若不訶罵提婆達多汝是愚癡食涕唾者則引無量愚癡衆生作諸惡事又復數數觸惱

世尊若不毀咎無比女人汝身穢惡不淨充滿即彼欲心無由止息故訶弟子稱言癡人有說世尊所以訶責諸弟子者欲使未種善根者能種善根已種善根未成熟者速能成熟若已成就未解脫者速得解脫若不訶責失此善利故佛為此稱言癡人問言癡人者是何義耶為從癡生故說為癡人為現行癡故說為癡人設爾何失若從癡生故名癡人者亦從貪恚慢見等生世尊何故惟言癡人若現行癡故名為癡人契經不應說阿羅漢

亦名癡人如契經說遠去癡人勿我前住又世尊責鄔陀夷言癡人無眼云何乃與上座苾芻競甚深義又餘煩惱亦有現行何故惟說癡人非餘有作是說從癡生故名爲癡人問若爾亦從貪恚慢見等生世尊何故惟言癡人答癡徧行故若佛知訶阿羅漢等以爲癡人於物有益即亦訶彼阿羅漢身亦癡生故如契經說無明所覆愛結所繫愚夫感得有識之身智者亦爾阿羅漢等說爲智者有餘師說現行癡故名爲癡人問若爾契經不

應說阿羅漢亦名癡人答且契經說遠去癡人勿我前住者是誦者謬誦應如是說遠去苾芻勿我前住世尊臨欲般涅槃時尊者白淨在佛前住以扇扇佛時有無量長壽諸天來詣佛所嫌彼尊者當佛前住遮蔽我等不見世尊而使我等失最後利佛知彼意便作是言遠去苾芻勿我前住又世尊責鄔陀夷言癡人無眼云何乃與上座苾芻競甚深義者亦不相違以鄔陀夷爾時未得阿羅漢果或言異生或言有學有餘師說阿羅漢等亦

現行癡不染無知猶未斷故問諸餘煩惱亦有現行何故惟說癡人非餘答前已說言癡徧行故隨起何地無明現前則癡人名依彼而立由此義故佛訶弟子稱言癡人何故世尊訶諸弟子稱言癡人答彼於世尊教誡教授不隨義行不隨順不相續此下論文即第二分釋佛訶彼癡人因緣教誡教授總顯佛語能正行者名隨義行彼諸弟子不能正行故名不隨義行有說如應行者名隨義行彼諸弟子不如應行故名不隨義行不隨順者

於佛聖教不能隨順修功德故不相續者不能長時流注相續修功德故問教誡教授有何差別答遮無利益故名教誡與有利益故名教授復次教住正念故名教誡教住正知故名教授復次令修有表故名教誡令修無表故名教授復次令修奢摩他故名教誡令修毗鉢舍那故名教授復次令修聖道故名教誡令得聖果故名教授復次令修世間善法故名教誡令修出世善法故名教授是謂教誡教授差別復次彼於聖教作愚癡事空

無有果無出無味無有勝利遠越佛教於諸  
學處不能受學故佛訶彼稱言癡人此中聖  
教意顯聖道問彼云何於聖道作愚癡事耶  
答彼不能令聖道成愚癡事但彼相續增長  
愚癡障礙聖道有說亦令聖道成愚癡事謂  
令成遠不得自在不現行故有說為斷愚癡  
佛說聖教彼聞聖教不斷愚癡轉更增長是  
故說彼於佛聖教作愚癡事空者顯彼無聖  
道胎如女身中不任懷孕空無子故說名石  
女彼亦如是雖聞佛教不能攝受聖道胎故

佛於彼身無士用果虛棄功用故名為空無  
有果者無有等流及解脫果無出者無士用  
果復次出者謂得彼於佛法無所得故說名  
無出無味者彼於佛法無出家味無寂靜味  
無聖道味無寂滅味故名無味無勝利者果  
名勝利彼不得果故無勝利復次有<sup>六</sup>二失故  
名無勝利譬如良醫愍諸有疾四方求藥得  
已與之病者輕賤投之糞壤彼有二失一者  
自病不得除愈二者良醫功為虛棄世尊亦  
爾三無數劫修習百千難行苦行為諸有情

求聖法藥得已為說彼聞輕賤不自服行用  
求名利彼有二失一者不除自煩惱病二者  
令佛唐捐其功違越佛教者違越世尊聖教  
理趣於諸學處不能受學者不能修行法隨  
法行復次彼於聖教作愚癡事者彼斷聖教  
不令相續故謂佛為彼說無上法若聞正行  
轉為他說他復正行更為餘說如是展轉饒  
益無窮乃名如來聖教不絕彼聞聖教不能  
正行亦復不能轉為他說自既無益復不利  
他名斷聖教不令相續由此說名作愚癡事

空者自身非法器故無有果者令佛期心無  
有果故謂佛欲令眾生聞法脫生死苦彼聞  
法已不能修行離苦方便是故令佛期心無  
果無出者彼不能得本出家時所求勝事謂  
淨持戒無味者無靜慮味無勝利者無無倒  
慧違越佛教者謂不得涅槃佛為眾生得涅  
槃樂說正法教彼不能證故名違越於諸學  
處不能受學者佛所施設種種學處不能受  
學有雖受學不能恒修如婆柁黎過雨四月  
方能受學一坐食法有雖恒修而不圓滿俱



名不能受學學處由此因緣佛訶弟子稱言  
癡人有六因謂相應因乃至能作因問何故  
作此論答為止無因惡因論故謂諸外道或  
執諸法無因而生或復執有不平等因為止  
彼意顯諸法生決定有因非不平等有作是  
說有執因緣非實有物如譬喻者為止彼意  
顯示因緣若性若相皆是實有復有說者欲  
以六因顯示四果令其明了如觀掌內阿摩  
洛迦謂以相應俱有二因顯士用果以同類  
徧行二因顯等流果以異熟因顯異熟果以

能作因顯增上果由此因緣故作斯論然此  
六因非契經說契經但說有四緣性謂因緣  
性廣說乃至增上緣性今欲以因分別緣故  
說此六因問為因攝緣緣攝因耶答互相攝  
隨其事謂前五因是因緣能作因是餘三緣  
有作是說緣攝因非因攝緣謂前五因是因  
緣能作因是增上緣等無間緣及所緣緣非  
因所攝復有說者六因亦是契經所說謂增  
一阿笈摩增六中說時經久遠其文隱沒尊  
者迦多衍尼子等以願智力觀契經中說六

因緣撰集製造阿毗達磨是故於此分別六  
因曾聞增一阿笈摩經從一法增乃至百法  
今惟有一乃至十在餘皆隱沒又於增一乃  
至十中亦多隱沒在者極少曾聞尊者商諾  
迦衣大阿羅漢是尊者阿難陀同住弟子是  
大德時縛迦親教授師彼阿羅漢般涅槃時  
即於是日有七萬七千本生經一萬阿毗達  
磨論隱沒不現一論師滅尚有爾所經論隱  
沒況從彼後迄至于今若百若干諸論師滅  
經論隨沒數豈可知故此六因是契經說有

餘師說如是六因雖無一經次第具說然於  
諸經處處散說謂契經說是名見為根信證  
智相應如是等經說相應因又契經說眼及  
色為緣生眼識三和合故觸俱起受想思如  
是等經說俱有因又契經說如是補特伽羅  
成就善法及不善法善法隱沒惡法出現有  
隨俱行善根未斷以未斷故從此善根猶有  
可起餘善根義彼於當來有清淨法如是等  
經說同類因又契經說諸邪見者所有身業  
語業意業諸有願求皆如所見所有諸行皆

是彼類如是諸法皆悉能招非欣愛樂不可  
意果如是等經說徧行因又契經說無處無  
容身語意惡行受可愛異熟有處有容彼受  
不可愛異熟如是等經說異熟因又契經說  
二因二緣能生正見勸六謂他音聲及內如理作  
意如是等經說能作因故此六因是佛所說  
是故尊者依經作論云何相應因乃至廣說  
問何故作此論答為止他宗顯正理故謂或  
有執心心所法前後而生非一時起如譬喻  
者彼作是說心心所法依諸因緣前後而生

譬如商侶涉險隘路一一而度無二並行心  
心所法亦復如是眾緣和合一一生所待  
眾緣各有異故阿毗達磨諸論師言心心所  
法有別因故可說眾緣和合有異有別因故  
可說眾緣和合無異謂心心所各各別有生  
住異滅和合而生是故可說和合有異同依  
一根同緣一境而得生故可說一切和合無  
異是故一切心心所法隨其所應俱時而起  
或復有執諸法各與自性相應非與他性彼  
作是說相喜樂義是相應義無法與法共相

喜樂猶如自性與自性者阿毗達磨諸論師  
言二事和合可說相應非於一物有相應義  
亦無自體喜樂自體能緣所緣有差別故或  
復有執自性於自性非相應非不相應彼作  
是說要與他合方名相應自於自性無他義  
故不名相應互相喜樂是相應義自於自性  
深喜樂故非不相應阿毗達磨諸論師言無  
有自性喜樂自性義如前說或復有執力任  
持義是相應義彼作是說若法由彼法力任  
持生此法與彼法相應是故心與心相應心

力持心令得生故心所法與心相應心力持  
彼令得生故心不與心所法相應非彼力持  
而得生故心所法不與心所法相應非互相  
持而得生故阿毗達磨諸論師言心與心所  
心所與心心所皆展轉力持而得生故更互  
相應一身二心不並起故無相應義為遮此  
等種種異執顯示正理故作斯論云何相應  
因答受與受相應法為相應因受相應法與  
受為相應因想思觸作意欲勝解念三摩地  
慧與慧相應法為相應因慧相應法與慧為

相應因是謂相應因問此中何故不說心耶  
答是作論者意欲爾故乃至廣說或有說者  
亦應說心而不說者應知此中是有餘說說  
六因義皆不盡故若作盡理無餘說者應作  
是說云何相應因謂一切心心所法云何俱  
有因謂一切有為法云何同類因謂一切過  
去現在法云何徧行因謂一切過去現在徧  
行隨眠及彼相應俱有法云何異熟因謂一  
切不善及善有漏法云何能作因謂一切法  
有作是說設作是說亦不盡理不知何位誰

與誰為因故若說此中是有餘說於理為勝  
諸作論者畧標少法為根本故有餘師說心  
已說在此所說中謂受相應慧相應法亦攝  
心故問何故不說心之自相答平等相似是  
相應義心勝如王是故不說如伽陀言

第六增上王

勅六

染時染自取

十一

不染而有染

染者謂愚夫

復有說者以三摩地有說即心說三摩地即  
已說心故不別說問何故但說十大地法為  
相應因非餘法耶答是作論者意欲爾故乃

至廣說有說應說而不說者當知此義有餘  
有說若法一切界一切地一切趣一切生一  
切種一切心可得者此中說之餘法不爾故  
此不說問大地法是何義答大者謂心如是  
十法是心起處大之地故名爲大地大地即  
法名大地法有說心名爲大體用勝故即大  
是地故名大地是諸心所所依處故受等十  
法於諸大地徧可得故名大地法有說受等  
十法徧諸心品故名爲大心是彼地故名大  
地受等即是大地所有名大地法問何故名

心所答是心所有故問何故心心所法展轉  
爲相應因答展轉爲因故展轉力生故展轉  
相引故展轉相養故展轉相增故展轉相依  
故如二蘆束相依而住多繩相合能牽大木  
多人連手能渡大河有爲諸法性羸劣故展  
轉相依方辦事業義問受言汝若離想能納  
境耶答言不能餘心心所爲問亦爾問相應  
因以何爲自性答一切心心所法即攝三蘊  
一蘊少分一處一處少分七界一界少分已  
說自性所以今當說問相應是何義答等義

是相應義問諸心所法或多或少謂善心多不善心少不善心多有覆無記心少有覆無記心多無覆無記心少欲界心多色界心少色界心多無色界心少有漏心多無漏心少云何等義是相應義答依體等義說名為等

勅六

十二

若一心中二受一想可不名等然一心中一受一想餘亦如是故說等義是相應義復次等不相離是相應義復次等不別異是相應義復次等運轉義是相應義如車轉時眾分皆轉共辦一事如是心車於境轉時心所亦

轉共成一事故名相應復次等所作義是相應義如秋鴿等一時詣場一時食一時起非前非後心心所法亦復如是一時趣境一時受境一時捨境故名相應復次等相順義是相應義如人相順即名相應心心所法相順亦爾復次等和合義是相應義如水乳合說名相應心心所法和合亦爾霧尊者曰四事等故說名相應一時分等謂心心所同一刹那而現行故二所依等謂心心所同依一根而現行故三所緣等謂心心所同緣一境而

現行故四行相等謂心心所同一行相而現  
行故復次五事等故說名相應即前四事及  
物體等謂心心所各惟一物和合而起故名  
相應復次如束蘆義是相應義如一一蘆不  
能獨立要多共束方能得住心心所法亦復  
如是要多相依方能行世取果與果及取所  
緣復次如合索義是相應義如一一縷不能  
牽材多縷相合乃有牽用心心所法亦復如  
是廣如前說復次如連手義是相應義如河  
漂急獨不能渡多人連手乃能渡之心心所

物六

十三

法亦復如是廣如前說復次如商侶義是相  
應義如多商人共為伴侶能過險路心心所  
法亦復如是廣說如前尊者世友作如是說  
相引生義是相應義問若爾眼識意識亦互  
相引彼相應耶答彼所依異若同所依互相  
引者乃是相應復次不相離義是相應義問  
若爾四大種亦不相離彼相應耶答彼無所  
依若有所依亦不相離乃是相應復次有所  
緣義是相應義問若爾六識皆有所緣彼相  
應耶答彼所依異若同所依有所緣者乃是



相應復次同所緣義是相應義問若爾五識  
各與意識同一所緣應說相應又多眼識應  
說相應如多有情共觀初月等答彼所依異  
若同所依同所緣者乃是相應復次常和合  
義是相應義問若爾壽煖識三亦常和合彼  
相應耶答不爾壽煖二法無所依故若有所  
依亦常和合乃是相應復次恒俱生義是相  
應義問若爾四大種恒俱生彼相應耶答彼  
無所依若有所依恒俱生者乃是相應復次  
俱生住滅是相應義問若爾隨心轉色隨心

轉心不相應行亦俱生住滅彼相應耶答彼  
無所依若有所依俱生住滅乃是相應復次  
同一所依同一所緣同一行相轉義是相應  
義問云何知然答寧知不然復次同作一事  
義是相應義問若爾諸忍與智同作一事彼  
相應耶答彼不俱生若俱時生同作一事乃  
是相應大德說曰同伴侶義是相應義謂與  
心所互相容受俱時而生同取一境乃是相  
應尊者妙音作如是說所依所緣行相所作  
一切同義是相應義所以者何諸有為法性

羸劣故展轉力持方能起作曾不見有一大地法獨起作故此相應因定通三世有士用果云何俱有因乃至廣說問相應俱有二因何異有說無異一剎那受與想等法無二因故是故於此應作是說若相應因即俱有因有俱有因非相應因謂不相應俱有因是如是說者二因有異雖依一法而義別故問若爾二因有何差別答名即差別謂名相應因名俱有因復次為伴侶義是相應因同一果義是俱有因復次同一所依一行相一所緣

義是相應因同一生一老一住一滅一果一等流一異熟義是俱有因復次如執杖義是相應因如執杖已有所作義是俱有因復次如連手義是相應因如連手已渡暴河義是俱有因復次相隨順義是相應因不相離義是俱有因云何俱有因答心與心所法為俱有因心所法與心為俱有因問何故前相應因中不說心今俱有因中即說心耶答平等義是相應因義心王是勝與心所法等義不顯故不說心辦一事義是俱有因義心心所

法辦事義同故今說心此中心者即一切心  
心所法者亦一切心所法如其所應展轉爲  
俱有因心與隨心轉身業語業爲俱有因隨  
心轉身業語業者謂靜慮律儀無漏律儀問  
何故此中不說隨心轉身業語業與心爲俱  
有因耶答是作論者意欲爾故乃至廣說有  
說應說而不說者當知此義有餘師說此中  
所說因義皆不盡故有說此中初後廣說中  
間畧說義准可知是故不說有餘師說心於  
隨心轉身語業能爲因不隨其事轉以是勝

故隨心轉身語業於心隨其事轉不能爲因  
以是劣故如王於臣能與爵祿不隨其事轉  
臣於王隨其事轉不能與爵祿此亦如是評  
曰心與隨心轉身語業展轉爲俱有因所以  
者何同一果故辨一事故問若爾此中何故  
不說答由前說三因故心與隨心轉不相應  
行爲俱有因隨心轉不相應行與心爲俱有  
因問何等隨心轉不相應行與心展轉爲因  
耶答心心所法及隨心轉身語業生老住無  
常與心展轉爲因此中有說心與自生老住

無常為俱有因惟自生住與心為俱有因非  
老無常以能增益說名為因老與無常衰滅  
法故不名為因有說心與自生老住無常為  
俱有因自生老住無常與心為俱有因皆互  
相助辦一事故有說心與心第六所法及隨心  
轉身語業生老住無常為俱有因十六惟心生老  
住無常與心為俱有因非餘生等評曰應作  
是說心與心心所法及隨心轉身語業生老  
住無常展轉為俱有因云何知然品類足說  
云何心俱有因法謂一切心所法道俱有戒

定俱有戒及心彼諸法生老住無常問若爾  
品類足說復云何通如說或有苦諦以有身  
見為因非與有身見為因謂除過去現在見  
苦所斷隨眠及彼相應苦諦除過去現在見  
集所斷徧行隨眠及彼相應苦諦除未來有  
身見相應苦諦除未來有身見生老住無常  
諸餘染污苦諦答品類足論應作是說除過  
去現在見苦所斷隨眠及彼相應俱有等苦  
諦除過去現在見集所斷徧行隨眠及彼相  
應俱有苦諦除未來有身見相應苦諦除未

來有身見及彼相應法生老住無常諸餘染  
汚苦諦應作是說而不說者當知彼是有餘  
之說復次俱生四大種展轉為俱有因是謂  
俱有因此中有欲令四大種體無偏增者彼  
作是說地大種與三大種為俱有因三大種  
與地大種為俱有因乃至風大種亦爾有欲  
令四大種體有偏增者彼作是說地大種與  
四大種為俱有因四大種與地大種為俱有  
因所以者何地大種有多體於中一與多為  
俱有因多與一為俱有因故乃至風大種亦

動六

十七

爾評曰應作是說四大種體若有偏增若無  
偏增地為三俱有因三為地俱有因所以者  
何地不觀地生所造色以一切法不觀自性  
及同類體為他因故乃至風大種亦爾問未  
生四大種亦是俱有因不答亦是俱有因墮  
因義故有因相故有說彼非俱有因此中但  
說俱生四大種展轉為俱有因故評曰應作  
是說生未生四大種皆展轉為俱有因此中  
生言說可生義或生相合如品類足說云何  
因所生法謂一切有為法如彼生言說生未

生此亦如是問所造色為有俱有因不答有  
 一切有為法皆有生等相為俱有因故問所  
 造色與所造色為俱有因不答有為俱有因  
 如隨心轉所造色問有對造色與有對造色  
 為俱有因不答無有說亦有如眼根等有多  
 極微俱生展轉為俱有因評曰彼不應作是  
 說如前說者好所以者何同一果義是俱有  
 因義彼非同 一果故然一切心皆有隨轉諸  
 心所法及生等相非一切心皆有隨轉身語  
 業色隨心轉義總有十種謂一起一住一滅

一果一等流一異熟善則善不善則不善無  
 記則無記墮一世中一果者謂離繫果一等  
 流者謂等流果一異熟者謂異熟果隨法別  
 說此十多少根蘊當說問隨轉自性是何答  
 四蘊五蘊欲界無色界四蘊無隨轉色故色  
 界五蘊有隨轉色故已說自性所以今當說  
 問何故名隨轉答相隨順義是隨轉義相攝  
 益義是隨轉義辨一事義是隨轉義隨心轉  
 法義語心言汝所作事我亦作之心心所法  
 展轉相望由五事故說名隨轉謂所依故所

緣故行相故果故異熟故心與隨心轉色心  
 不相應行展轉相望由二事故說名隨轉謂  
 果故異熟故

阿毗達磨大毗婆沙論卷第十六  
說一切有部發智  
 音釋

礫即狄切畢陵伽筏蹉梵語也亦云畢陵  
小石也筏房越切笈房鉢底梵語也亦云懦梵鉢  
提此云牛同笈極擘咳逆氣也顫掉顫顫謂四支寒動也傲  
疑到切很下愆切盡徐刃切婆柁梨梵語  
倨也迄至許訖切也

永樂北藏

大毗婆沙論

第一〇六册

永樂北藏

大毗婆沙論

第一〇六册



阿毗達磨大毗婆沙論卷第十七

動七

五百大阿羅漢等造

唐三藏法師玄奘奉詔譯

雜蘊第一中智納息第二之九

問身語業何等隨心轉何等不隨心轉耶答

動七

色界戒及無漏戒隨心轉欲界戒及餘身語業不隨心轉問何故欲界戒不隨心轉耶答欲界於彼隨心轉戒非田非器乃至廣說復次欲界非定界非修地非離染地故無如是道戒可隨轉色界是定界是修地是離染地

故有如是道戒可隨轉復次欲界戒義問欲界心言汝能為我斷破戒及起破戒煩惱不能者我隨汝轉欲界心義答欲界戒言我不能戒義言若不能我何為隨汝轉如人怖怨問他人曰汝能為我作救護不若能者常依止汝隨汝而轉他答不能彼便語言汝若不能我何為依止汝隨汝轉此亦如是問色界善心一切皆有隨轉戒不答非一切有謂初靜慮有六善心無隨轉戒一善眼識二善耳識三善身識四死時善心五起表善心六

聞所成慧相應善心第二第三第四靜慮有二善心無隨轉戒謂死時善心及聞所成心問何故無色界無隨轉戒耶答彼界於戒非田非器乃至廣說復次戒是色一分攝彼界無色故亦無戒復次戒是大種所造彼無大種故亦無戒問如雖無無漏大種而有無漏戒如是彼界雖無大種何妨有戒耶答無漏戒非大種力故成無漏但由心力隨無漏心所等起故有漏戒由大種力繫屬界地故不相似復次戒者對治破戒及起破戒煩惱無

色界道不能對治破戒及起破戒煩惱故彼無戒問因論生論何故無色界道不能對治破戒及起破戒煩惱耶答彼惟欲界無色於欲有四事遠故無對治四事遠者一界地遠二所依遠三所緣遠四對治遠問若爾第二第三第四靜慮亦無破戒及起破戒煩惱對治彼應無戒答對治有二種一斷對治二馱壞對治上三靜慮於破戒及起破戒煩惱雖無斷對治而有馱壞對治如世尊說聖弟子入不動心解脫能斷不善修習善法非彼身

勅七

二

中猶有不善可斷然依過患對治故作是諺  
無色界於破戒及起破戒煩惱無斷對治亦  
無猷壞對治是故無戒隨心轉戒總有二種  
一道俱有戒二定俱有戒道俱有戒者謂無  
漏戒定俱有戒者謂色界戒若是道俱有戒  
彼非定俱有戒若是定俱有戒彼非道俱有  
戒有作是說道俱有戒謂無漏戒定俱有戒  
謂一切有漏無漏隨心轉戒彼作是說一切  
道俱有戒皆是定俱有戒或是定俱有戒而  
非道俱有戒謂有漏隨心轉戒有餘師說道

俱有戒謂無漏戒定俱有戒謂根本靜慮有  
漏無漏戒依如是說應作四句有是道俱有  
戒非定俱有戒謂近分地諸無漏戒有是定  
俱有戒非道俱有戒謂根本地諸有漏戒有  
是道俱有戒亦是定俱有戒謂根本地諸無  
漏戒有非道俱有戒亦非定俱有戒謂近分  
地諸有漏戒彼師依得復作四句有得道俱  
有戒非定俱有戒謂未離欲染入正性離生  
十六心頃若已離欲染依未至定入正性離  
生見道十五心頃若諸聖者為離欲染起加

行道九無間道八解脫道若未離欲染信勝解練根作見至所有加行無間解脫道若諸聖者未離欲染依未至定起無量不淨觀持息念及念住等如是等時得道俱有戒非定俱有戒有得定俱有戒非道俱有戒謂諸異生離欲染一切最後解脫道即彼為離初靜慮染依初靜慮起加行道及一切最後解脫道即彼為離第二靜慮起加行道及一切最後解脫道即彼為離第三靜慮染依第三靜慮起加行道及最後解脫道

即彼為離第四靜慮染依第四靜慮起加行道若諸異生依根本靜慮引發諸通起加行道五無間道三解脫道若起無量不淨觀念住煖頂忍世第一法初三解脫八勝處前八徧處及無色界沒生色界時色界上地沒生下地時如是等時得定俱有戒非道俱有戒有得道俱有戒亦得定俱有戒謂已離欲染依未至定入正性離生道類智時若依上地入正性離生十六心頃若諸聖者離欲染最後解脫道即彼為離初靜慮乃至非想非非

想處染諸加行道九無間道九解脫道已離  
欲染信勝解練根作見至所有加行無間解  
脫道時解脫阿羅漢練根作不動諸加行道  
九無間道九解脫道若雜修初靜慮乃至第  
四靜慮時若諸聖者引發諸通起加行道五  
無間道三解脫道若諸聖者已離欲染依未  
至定等起無量解脫勝處徧處不淨觀持息  
念及諸念住若起無礙解邊際定無諍願智  
空空無願無願無相無相想微細心如是等  
時得道俱有戒亦得定俱有戒有不得道俱

有戒亦不得定俱有戒謂諸異生為離欲染  
起加行道九無間道八解脫道依未至定靜  
慮中間起煖頂忍世第一法若諸異生依第  
二第三第四靜慮近分為離初第二第三靜  
慮染起加行道九無間道八解脫道若諸異  
生依空無邊處乃至非想非非想處近分為  
離第四靜慮乃至無所有處染起加行道九  
無間道九解脫道若諸異生未離欲染或已  
離欲染依未至等諸近分定或無色定起無  
量解脫勝處徧處及不淨觀持息念并念住

等諸功德時若諸聖者依未至等諸有色定起有漏無漏成就諸功德時依無色定起有漏無漏成就諸功德時一切不定及無心位如是等時不得道俱有戒亦不得定俱有戒彼師依捨復作四句有捨道俱有戒非定俱有戒謂得預流果或一來果或漸次者得不還果未離欲染信勝解練根得見至從一來果一來勝果道及預流果預流勝果道退時從預流果退時者謂從練根所得果退如是等時捨道俱有戒非定俱有戒有捨定俱有

戒非道俱有戒謂諸異生從離欲染乃至從離第三靜慮染退若諸異生及諸聖者欲色界沒生無色界若色界沒生欲界若諸異生從根本地勝功德退如是等時捨定俱有戒非道俱有戒有捨道俱有戒亦捨定俱有戒謂諸聖者從離欲染乃至從離非想非非想處染退若依四靜慮及靜慮中間得不還果若得阿羅漢果已離欲染信勝解練根得見至時解脫阿羅漢練根得不動從不還果不還勝果道及阿羅漢果阿羅漢勝果道退時

如是等時捨道俱有戒亦捨定俱有戒有不捨道俱有戒亦不捨定俱有戒謂除前相諸餘位彼依成就復作四句有成就道俱有戒非定俱有戒謂未離欲染聖者有成就定俱有戒非道俱有戒謂諸異生生欲界已離欲染若諸異生生色界有俱成就謂諸聖者生欲界已離欲染若諸聖者生色無色界有俱成就謂諸異生未離欲染若諸異生生無色界依不成就亦作四句謂次前第二句為今第一句次前第一句為今第二句次前第

四句為今第三句次前第三句為今第四句一切律儀總有四種一別解脫律儀二靜慮律儀三無漏律儀四斷律儀別解脫律儀者謂欲界戒靜慮律儀者謂色界戒無漏律儀者謂無漏戒斷律儀者謂離欲界染九無間道中所有靜慮動七無漏戒廣說此四律儀如業蘊害生納息煖隨轉戒於破戒為捨對治持對治遠分對治頂忍世第一法見道修道中道類智隨轉戒於破戒但為持對治遠分對治離欲界染加行道隨轉戒於破戒為捨對

治持對治遠分對治初無間道隨轉戒於破  
戒但為持對治遠分對治於起破戒煩惱但  
為斷對治捨對治七無間道隨轉戒於破戒  
但為持對治遠分對治於起破戒煩惱為斷  
對治捨對治持對治遠分對治第九無間道  
隨轉戒於破戒為斷對治持對治遠分對治  
於起破戒煩惱為斷對治捨對治持對治遠  
分對治九解脫道隨轉戒及餘後時乃至盡  
智無生智無學正見隨轉戒於破戒及起破  
戒煩惱但為持對治遠分對治問法智品道

能斷破戒及起破戒煩惱可有隨轉戒類智  
品道無此功能云何亦有隨轉戒耶尊者世  
友說曰類智品道於彼雖無斷對治捨對治  
而有持對治遠分對治故復次法智品道與  
類智品道展轉為因展轉相續展轉相屬展  
轉相生故有餘師說類智品道亦能斷破戒  
及起破戒煩惱然法智品道先斷彼故今無  
所斷故亦有隨轉戒譬如多人共一怨家一  
人已害餘無所害非無害能此亦如是大德  
說曰若法智品道有隨轉戒類智品道無隨



轉戒者則應律儀惟於能處轉不於不能處  
轉然諸律儀通於能處不能處轉是故法智  
類智品道俱得有隨轉戒問欲界色界何者  
戒多有作是說欲界戒多所以者何欲界戒  
於根本業道及加行後起處得色界戒惟於  
根本業道處得欲界戒離性罪及離遮罪故  
得色界戒惟離性罪故得如是說者色界戒  
多所以者何且未至定所攝戒尚多欲界有  
無量功德對治彼故況復更有上地餘戒問  
有漏無漏何者戒多有作是說有漏戒多所

以者何有漏戒攝二律儀一律儀少分無漏  
戒攝一律儀一律儀少分復次有漏戒攝二  
界一界少分二處一處少分無漏戒但攝一  
界一處少分如是說者無漏戒多所以者何  
且苦法智忍隨轉戒尚多有漏有無量功德  
對治彼故況復更有上位餘戒問苦法智忍  
與苦法智乃至盡智無生智無學正見諸隨  
轉戒何者為多有作是說苦法智隨轉戒於  
苦法智忍隨轉戒一倍為多如是展轉乃至  
無學正見隨轉戒於無生智隨轉戒一倍為

多復有說者如苦法智忍隨轉戒如是苦法智隨轉戒乃至道類智隨轉戒亦爾離欲界染諸加行道九無間道九解脫道諸隨轉戒後後轉多所以者何如漸漸破戒及起破戒煩惱如是如是戒漸增多上諸位戒前後相似如是說者苦法智忍隨轉戒與苦法智乃至無學正見隨轉戒等無有異所以者何同於身語七支轉故問若爾施設論說當云何通如說苦法智於苦法智忍為勝乃至盡智於金剛喻定為勝答依因長養故作是說

謂苦法智忍惟一刹那因所長養苦法智二刹那因之所長養乃至盡智無量刹那因所長養彼說品勝不說戒多問聲聞與佛何者戒多有作是說聲聞戒多所以者何聲聞戒依二界身佛戒但依欲界身復次聲聞戒依二趣身佛戒但依人趣身如是說者佛戒多所以者何且力無畏隨轉戒尚多一切聲聞獨覺沉復更有無量無邊殊勝功德諸隨轉戒問諸佛世尊有百年位證得無上正等菩提有乃至於八萬歲位若百年位得菩提者

亦得八萬身中戒不設爾何失若得者云何  
此身得異身戒若不得者施設論說當云何  
通如說一切如來應正等覺皆悉平等答應  
言亦得問若爾云何此身得異身戒答若依  
此身得異身戒亦無有失相續一故然百年  
位得菩提者於百年位隨心轉戒亦得亦在  
身亦成就亦現在前於八萬歲位隨心轉戒  
得而不在身成就不在前八萬歲位得菩  
提者於八萬歲位隨心轉戒亦得亦在身亦  
成就亦現在前於百年位隨心轉戒得而不

第七九

在身成就不在前有說不得問若爾施設  
論說當云何通答由三事等故名平等一修  
行等謂如一佛於三無數劫修六波羅蜜多  
得圓滿故證得無上正等菩提餘佛亦爾故  
名平等二利益等謂如一佛出現於世度無  
量百千那庾多衆生令般涅槃餘佛亦爾故  
名平等三法身等謂如一佛成就十力四無  
所畏大悲三念住十八不共法等無邊功德  
餘佛亦爾故名平等復次根等故名平等諸  
佛皆住上品根故復次戒等故名平等諸佛

皆得上品戒故復次地等故名平等謂如一  
佛依第四靜慮證得無上正等菩提餘佛亦  
爾故名平等問得阿羅漢果時得幾地身隨  
心轉戒西方諸師作如是說得二十六處身  
隨心轉戒謂欲界九色界十七迦濕彌羅國  
諸論師言得二十五處身隨心轉戒以大梵  
天無別處故是未來修非皆現起謂欲色界  
隨何地身得無學果即彼地身隨心轉戒亦  
未來修亦得現起所餘地身隨心轉戒雖未  
來修而不現起無彼異熟所依身故生無色

界得無學果雖得彼戒而不現起生上不起  
下地定故問依自地身能起自地一切戒不  
答不能盡起所以者何惡法尚無能盡起者  
況諸功德加行生故問何故聖者生無色界  
成就道俱有戒非定俱有戒耶答有漏法繫  
屬界地非上界者生上便失無漏不爾復次  
有漏法勝劣隨地生上厭下無所用者必不  
成就無漏不爾是故聖者生無色界惟得成  
就道俱有戒傍論已了應復正論問俱有因  
以何為自性答一切有為法已說自性所以

今當說問何故名俱有因俱有是何義答不相離義是俱有義同一果義是俱有義相隨順義是俱有義此俱有因定通三世有士用果云何同類因乃至廣說問何故作此論答爲止他宗顯正理故謂或有執過去未來非實有體或執現在是無爲法或執自類爲同類因謂心惟與心受惟與受餘法亦爾爲止如是種種異執顯示實有過去未來及現在世是有爲法并自他類爲同類因故作此論云何同類因答前生善根與後生自界善根

及相應法爲同類因過去善根與未來現在自界善根及相應法爲同類因現在善根與未來自界善根及相應法爲同類因問此中何故不說過去與過去爲同類因耶答前生與後生言已說彼故問何緣不說過去自名初七答欲顯後法非前因故若說過去與過去爲同類因或有生疑過去後法亦爲前法因若說前生與後生爲同類因此疑便息有說此文欲顯過去有前後義若說過去與過去爲同類因或有生疑過去諸法同時展轉爲同十一

類因若說前生與後生爲同類因此疑便息  
問何故前生等惟說善根後生等兼說相應  
法耶答是作論者意欲爾故乃至廣說有說  
前生等亦應說相應法而不說者當知此是  
有餘之說有說此文爲遮相似相續沙門意  
故彼作是說善根惟與善根爲因善根相應  
法惟與善根相應法爲因爲遮彼意顯示善  
根與善根爲因亦與相應法爲因善根相應  
法與善根相應法爲因亦與善根爲因故作  
是說問此中何故惟說善根及相應法非餘

法耶答就勝說故謂善法中善根最勝彼相  
應法極相隣近故偏說之不善無記應知亦  
爾自界者謂欲界惟與欲界爲同類因色無  
色界應知亦爾如說自界自地亦爾繫縛別  
故謂初靜慮惟與初靜慮爲同類因乃至非  
想非非想處應知亦爾有餘師說如說自界  
自地自處亦爾謂那落迦惟與那落迦爲同  
類因乃至色究竟天應知亦爾評曰彼不應  
作是說若作是說則五淨居處初剎那起應  
無同類因無始時來未生彼故應作是說同

地異處所起煩惱展轉相縛隨類展轉為同類因然除異部五部隨眠繫縛分劑有差別故復說過去等者欲顯過去未來體是實有現在是有為故如善根不善無記根亦爾差別者不善中除自界是謂同類因問何故不善除自界耶答以不善根無異界故若說自界無所簡別有說不善中亦應說自界以自界聲亦說自部謂見苦所斷惟與見苦所斷為同類因乃至修所斷應知亦爾問若爾此中但應說如善根不善無記根亦爾不應復

說差別等言答若但作如是說或有生疑如無記根通三界不善根亦爾故復須說差別等言問此中何故不說前生等不善根與後生等無記根及相應法為同類因前生等無記根與後生等不善根及相應法為同類因耶答是作論者意欲爾故乃至廣說有說應說而不說者當知此義有餘有說若作是說或有生疑不善根亦通三界或無記根惟在欲界或復生疑因少果多或因多果少是故不說文雖不說而義實有自部互為同類因

故問未來世中有同類因不設爾何失若有者此中何故不說謂此中但說前生與後生為同類因過去與未來現在為同類因現在與未來為同類因而不說未來與未來為同類因又若有者應有二心展轉為因便違前說若無者此論見蘊當云何通如說若法與彼法為因或時此法與彼非因耶答無時非因若法已生是同類因若未已生非同類因是則若法與彼法為因或時此法與彼非因云何答言無時非因又若無者品類足論復

云何通如說云何非心為因法答已入正性離生補特伽羅初無漏心及餘異生定當入正性離生者初無漏心然彼異生未來所有無漏心皆非心為因何故但說彼初無漏心耶又若無者品類足論復云何通如說或有苦諦以有身見為因非與有身見為因除未來有身見及彼相應苦諦諸餘染污苦諦或有苦諦以有身見為因亦與有身見為因即所除法若未來有身見不與未來有身見為因何故言除未來有身見及彼相應苦諦耶



又若無者識身足論復云何通如說於過去  
染汚眼識所有隨眠彼於此心或能為因非  
所隨增或所隨增不能為因或能為因亦所  
隨增或不能為因亦非所隨增且能為因非  
所隨增者謂諸隨眠在此心前同類徧行即  
彼隨眠若不緣此設緣已斷及此相應隨眠  
已斷為所隨增不能為因者謂諸隨眠在此  
心後同類徧行即彼隨眠緣此未斷能為其  
因亦所隨增者謂諸隨眠在此心前同類徧  
行即彼隨眠緣此未斷及此相應隨眠未斷

不能為因亦非所隨增者謂諸隨眠在此心  
後同類徧行即彼隨眠若不緣此設緣已斷  
若所餘緣若他隨眠若不同界徧行隨眠如  
彼過去染汚眼識未來染汚眼識亦爾過去  
四句其理可然未來如何可作四句若有前  
後如何無因動七又若無者施設足論復云何通下四  
如說諸法四事決定所謂因果所依所緣若  
未來世非同類因生已乃是云何決定又若  
無者則應無因而有因亦應無果而有果便  
壞所宗答應作是說未來世中無同類因以

彼無故此中不說亦無二心互為因過問此  
 論見蘊當云何通如說若法與彼法為因乃  
 至廣說有說彼依俱有因作論以俱有因徧  
 有為法親能辦果通三世故有說彼依相應  
 俱有二因作論以此二因俱徧三性親能辦  
 果通三世故有說彼依相應俱有異熟三因  
 作論以此三因親能辦果通三世故有說彼  
 依相應俱有異熟能作四因作論以此四因  
 通三世故有說彼依五因作論除能作因徧  
 一切法皆不遮故此中有說除徧行因體用

狹故應說彼依六因作論因名所表通六因  
 故問若法已生是同類因或徧行因若未已  
 生非同類因非徧行因是則若法與彼法為  
 因或時此法與彼非因云何答言無時非因  
 答依最後位密作是答謂若法於此位定能  
 作同類因或徧行因從是以後無時非因故  
 作是說問若爾見蘊復云何通如說若法與  
 彼法為等無間或時此法與彼非等無間耶  
 答若時此法未至已生此中亦應依最後位  
 密作是答無時非等無間謂若法於此位定

能作等無間從是以後無時非等無間何故  
不作如是說耶答亦應作如是說而不說者  
有別意趣為現異相異文說故若以異相異  
文而說義則易解復次為現二門二畧二燈  
二明二炬二光二曜二影文故如同類因依  
最後位密作是說無時非因等無間緣亦應  
依此位密作是說無時非等無間如等無間  
緣依一切位說若時此法未至已生同類因  
亦應依一切位作如是說二文相影俱通二  
義問品類足論復云何通如說云何非心為

因法乃至廣說答彼惟說畢竟非心為因法  
雖彼未入正性離生者諸無漏心皆非心為  
因然彼若入正性離生惟有初無漏心是非  
心為因法餘心無不以心為因有餘師說彼  
文不辯同類因義何者惟辯二種異生謂有  
般涅槃法及無般涅槃法文雖不舉無涅槃  
法義准理門顯示知有謂彼既說有餘異生  
決定當入正性離生由此義准亦有異生決  
定不入正性離生此則名為無涅槃法即無  
涅槃法名非心為因問品類足論復云何通

如說或有苦諦以有身見為因乃至廣說答  
彼論但說除未來有身見相應苦諦無及彼  
言設作是說是誦者謬問識身足論復云何  
通如說於過去染汚眼識所有隨眠乃至廣  
說答彼於未來應作三句除所隨增不能為  
因彼無後故然說未來如過去者有別意趣  
謂正生時必入現在定為同類或徧行因望  
餘未起可說為前對此可說餘名後故有餘  
師說彼說未來亦有四句不說未來有心前  
後同於過去且能為因非所隨增者謂此相

應隨眠已斷為所隨增不能為因者謂有同  
類徧行隨眠在未來世於未來世染汚眼識  
緣而未斷能為其因亦所隨增者謂此相應  
隨眠未斷不能為因亦非所隨增者謂有同  
類徧行隨眠在未來世若不緣此設緣已斷  
若所餘緣若他隨眠若不同界徧行隨眠問  
施設足論復云何通如說諸法四事決定乃  
至廣說答因者四因謂相應俱有異熟能作  
因果者三果謂士用異熟增上果所依者六  
種所依謂眼耳鼻舌身意所緣者六種所緣

謂色聲香味觸法如是四事三世決定故不相違問若未來世無同類因及徧行因過現乃有則應無因而有因亦應無果而有果如是便壞三世有宗答許亦無失約位非體以和合作用位果非體果然位與體非即非離體雖恒有而位非恒故同類因及徧行因本無今有亦無有失有餘師說未來世中有同類因問若爾後說六難善通此中論文何故不說答應說而不說者當知此義有餘所說六因皆有餘故復次若同類因有力能取果

與果者此中說之未來同類因無力不能取果與果是故不說復次若同類因已現在已和合已有作用荷負擔者此中說之未來同類因無如是事是故不說復次若同類因已行世相顯了者此中說之未來同類因未行世相不顯了是故不說問若未來世有同類因應有二心互為因過答如四行相各有繫屬餘法亦然故無斯過謂未來世無常行相有四行相應無間生彼是所修繫屬於此無常行相與彼為因彼非此因繫屬此故無常

行相起必居前苦空無我行相亦爾餘有爲法類此應知故無二心互爲因過若作是說有依第四靜慮得阿羅漢果能修未來九地無漏所修無漏皆繫屬此後起餘地聖道現前更不能修未來無漏無餘聖道繫屬此故應在過現非同類因是則違害此中所說前生善根與後生者爲同類因乃至廣說勿有此失故未來世無同類因於理爲善問色法爲有同類因不外國諸師有作是說一切色法無同類因但藉餘緣和合力起現見鑿地

深踰百肘從彼出泥日曝風吹後逢天雨即便生草又復現見屋脊山峯先無種子亦生草樹故知色法無同類因問若爾此論大種蘊說當云何通如說過去大種造色與未來等大種造色爲因增上答我於他論何事須通若必須通應作是說增上緣力有近有遠有在此身有在餘身若近在此身者說名爲因若遠在餘身者說名增上迦濕彌羅國諸論師言色法亦有同類因惟除初無漏色問若爾雖通大種蘊說彼所引事當云何通答

所出泥中先有種子餘緣闕故草未得生後  
遇衆緣即便生草又彼泥聚屋脊山峯草樹  
生者風吹鳥銜種子來至故得如是

阿毗達磨大毗婆沙論卷第十七 說一切有部發智

音釋

分劑 分扶問切劑才非切分劑限量也 鑿 在各切芳也 肘 陟切數也一尺八寸為一肘 曝 步木切日乾也

永樂北藏

大毗婆沙論

第一〇六册

永樂北藏

大毗婆沙論

第一〇六册



阿毗達磨大毗婆沙論卷第十八 動八

五百大阿羅漢等造

唐三藏法師玄奘奉詔譯

雜蘊第一中智納息第二之十

有餘師說色法雖有同類因而在此身非餘

身相似為因動八非不相似如此身羯刺藍位與

此身羯刺藍位為同類因與同位作緣非因

乃至此身老位與此身老位為同類因與餘

位作緣非因若作是說於位位中初色無因

後色無果有作是說色法雖有同類因而在

此身非餘身相似為因亦不相似如此身羯

刺藍位與此身羯刺藍位乃至老位為同類

因此身頰部曇位與此身頰部曇位乃至老

位為同類因與羯刺藍位作緣非因乃至此

身老位與此身老位為同類因與前諸位作

緣非因若作是說羯刺藍位初色無因老位

後色無果或有說者色法雖有同類因在此

身亦在餘身而相似為因非不相似如此身

羯刺藍位與此身及餘身羯刺藍位為同類

因與餘位作緣非因乃至此身老位與此身

及餘身老位爲同類因與餘位作緣非因復有說者色法雖有同類因在此身亦在餘身相似爲因亦不相似而與前位非同類因如此身羯刺藍位與此身羯刺藍位乃至老位爲同類因亦與餘身羯刺藍位乃至老位爲同類因此身頰部曇位與此身頰部曇位乃至老位爲同類因亦與餘身頰部曇位乃至老位爲同類因與羯刺藍位作緣非因乃至此身老位與此身老位爲同類因亦與餘身老位爲同類因與前諸位作緣非因或復有

說色法雖有同類因在此身亦在餘身相似爲因亦不相似而與此身前位非同類如此身羯刺藍位與此身羯刺藍位乃至老位爲同類因亦與餘身羯刺藍位乃至老位爲同類因此身頰部曇位與此身頰部曇位乃至老位爲同類因亦與餘身羯刺藍位乃至老位爲同類因與此身老位爲同類因亦與餘身老位爲同類因與此身前諸位作緣非因評曰應作是說餘身十位一一

皆與餘身十位及此身十位為同類因此身十位一一皆與此身十位及餘身十位為同類因後位已生法與前位不生法亦為同類因故如是外分諸色相望為同類因如理應說復次善五蘊展轉為同類因染污五蘊展轉為同類因無覆無記五蘊亦展轉為同類因性類等故有說無覆無記四蘊與無覆無記色蘊為同類因無覆無記色蘊不能與無覆無記四蘊為同類因勢力劣故有說無覆無記色蘊與無覆無記四蘊為同類因無覆

無記四蘊不與無覆無記色蘊為同類因勝法不為劣法因故有說無覆無記四蘊不與無覆無記色蘊為同類因無覆無記色蘊亦不與無覆無記四蘊為同類因勢用羸劣類各別故無覆無記四蘊展轉為同類因無覆無記復有四種物入一異熟生二威儀路三工巧處四通果品如次能與四三二一為同類因有餘師說此四展轉為同類因同一繫縛同一性故評曰彼不應作是說勿加行善互為因故前說為善染污法有九品謂下下中

下上中下中中中上上下上中上上九品展轉爲同類因問若爾云何有九品答由對治有九品故染污法亦有九品謂修下下道對治上上煩惱乃至修上上道對治下下煩惱復次以現行故亦有九品謂諸煩惱現在前時或是下下品乃至或是上上品諸不善者亦由異熟有九品故建立九品善法有二種一生得善二加行善生得善與生得善爲同類因亦與加行善爲同類因加行善與加行善爲同類因非生得善以彼劣故有說此二

善法展轉爲同類因同一繫縛同一性故評曰彼不應作是說勿修加行退趣劣法是故前說於理爲善有說善法有三種一加行善二離染善三生得善此中生得與三種爲同類因離染善與二種爲同類因非生得彼劣故加行善與加行善爲同類因非餘二俱劣故生得善法復有九品謂下下乃至上上九品展轉爲同類因問若爾云何有九品答由現行有九品故復次由異熟有九品故離染善及加行善亦俱有九品謂下下乃至上上

此中下下與九品爲同類因下中與八品爲同類因乃至上上惟與上上爲同類因此二惟與等勝爲因非劣法故加行善法復有三種一聞所成二思所成三修所成聞所成善與三種爲同類因思所成善惟與思所成善爲同類因非聞所成彼劣故非修所成異界故修所成善惟與修所成善爲同類因非聞所成彼劣故非思所成彼亦劣故及異界故修所成善復有四種謂煖頂忍世第一法如次能與四三二一爲同類因義如前說欲界

通果心有四種謂初靜慮果乃至第四靜慮果如是四種如次能與四三二一爲同類因有說此四非互爲因如靜慮故有說此四展轉爲因同一繫縛同一性故評曰初說爲善同一地故加行生故初靜慮等諸通果心應知亦爾問初靜慮有諸識身有變化心互爲因不答諸識身與變化心爲同類因變化心不與識身爲同類因以彼劣故依前諸義應作問答頗有前生法非後生法同類因不答有謂不同界頗有同界前生法非後生法同

類因不答有謂不同地頗有同地前生法非  
後生法同類因不答有謂有漏於無漏無漏  
於有漏頗有有漏前生法非有漏後生法同  
類因不答有謂不同部或不同性或勝於劣  
前生無漏於後生無漏非同類因者謂勝於  
劣問諸同類因若與果者亦取果耶答若與  
果者定亦取果若不取果云何與果或有取  
果而不與果謂阿羅漢最後諸蘊此則總說  
若別說者依善不善有覆無記無覆無記有  
多四句問善同類因若時取果亦與果耶答

應作四句有時取果非與果謂斷善根時最  
後所捨得有時與果非取果謂續善根時即  
住過去所捨善得有時取果亦與果謂不斷  
善根於所餘位有時不取果亦不與果謂除  
前相問不善同類因若時取果亦與果耶答  
應作四句有時取果非與果謂離欲染時最  
後所捨得有時與果非取果謂退離欲染時  
即住過去所捨不善得有時取果亦與果謂  
未離欲染於所餘位有時不取果亦不與果  
謂除前相問有覆無記同類因若時取果亦

與果耶答應作四句有時取果非與果謂離  
非想非非想處染時最後所捨得有時與果  
非取果謂退離非想非非想處染時即住過  
去所捨有覆無記得有時取果亦與果謂未  
離非想非非想處染於所餘位有時不取果  
亦不與果謂除前相問無覆無記同類因若  
時取果亦與果耶答若時與果必亦取果有  
時取果非與果謂阿羅漢最後諸蘊已依成  
就分別取果與果差別今依現行分別取果  
與果差別復次已依不相應法分別取果與

果差別今依相應法分別取果與果差別問  
善同類因若時取果亦與果耶答應作四句  
有時取果非與果謂善心無間不善無記心  
現在前有時與果非取果謂不善無記心無  
間善心現在前即住過去所問善心有時取  
果亦與果謂善心相續無間斷位有時不取  
果亦不與果謂除前相問不善同類因若時  
取果亦與果耶答應作四句有時取果非與  
果謂不善心無間善無記心現在前有時與  
果非取果謂善無記心無間不善心現在前

即住過去所問不善心有時取果亦與果謂不善心相續無間斷位有時不取果亦不與果謂除前相問有覆無記同類因若時取果亦與果耶答應作四句有時取果非與果謂有覆無記心無間善不善無覆無記心現在前有時與果非取果謂善不善無覆無記心無間有覆無記心現在前即住過去所問有覆無記心有時取果亦與果謂除前相問無覆無記同類因若時取果亦與果

耶答應作四句有時取果非與果謂無覆無記心無間善染污心現在前有時與果非取果謂善染污心無間無覆無記心現在前即住過去無間無覆無記心有時取果亦與果謂無覆無記心相續無間斷位有時不取果亦不與果謂除前相已依相續分別取果與果差別今依刹那分別取果與果差別謂一刹那心後有二十刹那心無間而起於中得作四句且善同類因第一句者謂上首刹那善心現在前時除初刹那善心望後十九刹



那善心第二句者謂後十九刹那善心現在前時即住過去上首善心第三句者即上首善心現在前時望初刹那善心第四句者謂除前相如善同類因四句不善有覆無記無覆無記同類因隨其所應四句亦爾頗有一刹那頃或得同類因不得彼因或得彼因不得同類因或得同類因亦得彼因或不得同類因亦不得彼因耶答有謂從上沙門果退住預流果時有此四句得同類因不得彼因者謂爾時得過去初刹那道類智而不得彼

因以不得見道故得彼因不得同類因者謂爾時得過去預流果而不得過去預流勝果道以預流勝果道用預流果為因與上沙門果作同類因故得同類因亦得彼因者謂爾時得過去除初刹那諸餘刹那相續預流果不得同類因亦不得彼因者謂除前相頗有一刹那頃或知同類因不知彼所緣或知彼所緣不知同類因或知同類因亦知彼所緣或不知同類因亦不知彼所緣耶答有謂住見道道法智時有此四句知同類因不知彼

所緣者謂爾時知過去緣苦集滅三法智品  
知彼所緣不知同類因者謂知未來四法智  
品知同類因亦知彼所緣者謂知過去道法  
忍品不知同類因亦不知彼所緣者謂除前  
相問同類因力有增減不答有謂若久習因  
力便增若不久習或遭損害因力便減且不  
善中因力增者如具壽迷祇迦曾一林中修  
習靜慮坐一樹下欲尋現起心生厭離便捨  
此處坐餘樹下恚尋復起心生厭離復捨此  
處坐餘樹下害尋復起由彼具壽曾於此地

作大國王若於是處五樂自娛受諸欲樂今  
坐其處便起欲尋若於是處斬截衆生頭耳  
手足今至其處便起恚尋若於是處役使衆  
生作諸事業繫縛鞭打今至其處便起害尋  
尊者阿難入城乞食摩登伽女見已生貪隨  
逐瞻觀不能捨離此女過去五百生中作阿  
難婦故今暫見便起欲尋隨逐不捨諸如是  
等皆由過去因力增上或有現在習諸煩惱  
因力增上同類異類展轉相生如不善法善  
無記法應知亦爾如尸拔羅久習施故纔生

便告父母等言今此家中有何財寶我欲持  
施一切貧窮諸如是等廣如經說問同類因  
以何爲自性答過去現在一切有爲法已說  
自性所以今當說問何故名同類因同類是  
何義答種類等義是同類義界地等義是同  
類義部類等義是同類義此同類因惟通過  
去現在二世有等流果云何徧行因乃至廣  
說問何故作此論答爲止他宗顯正理故謂  
或有執一切煩惱皆是徧行爲止彼執顯諸  
煩惱有是徧行有非徧行或復有執五部煩

惱皆有是徧行有非徧行爲止彼執顯惟見  
苦集所斷煩惱有是徧行有非徧行或復有  
執見苦集所斷一切煩惱皆是徧行見滅道  
所斷一切煩惱皆無漏緣爲止彼執顯見苦  
集所斷煩惱有是徧行有非徧行見滅道所  
斷煩惱有有漏緣有無漏緣或復有執若諸  
煩惱通三界者皆是徧行爲止彼執顯諸煩  
惱通三界者有是徧行有非徧行或復有執  
徧行有二一者無明二者有愛如譬喻者彼  
作是說緣起根本名爲徧行無明是前際緣

起根本有愛是後際緣起根本故是徧行為  
 止彼執顯無明有是徧行有非徧行有愛一  
 向非徧行或復有執若諸煩惱通五部者名  
 為徧行即是無明及貪瞋慢為止彼執顯無  
 明有是徧行有非徧行貪瞋慢一向非徧行  
 或復有執五法是徧行謂無明愛見慢及心  
 如分別論者故彼頌言  
 有五徧行法 能廣生眾苦 謂無明愛見  
 慢心是為五  
 為止彼執顯無明見有是徧行有非徧行餘

三一 一向非徧行為止此等種種異執顯示正  
 理故作斯論云何徧行因答前生見苦所斷  
 徧行隨眠與後生自界見集滅道修所斷隨  
 眠及相應法為徧行因過去見苦所斷徧行  
 隨眠與未來現在自界見集滅道修所斷隨  
 眠及相應法為徧行因現在見苦所斷徧行  
 隨眠與未來自界見集滅道修所斷隨眠及  
 相應法為徧行因如見苦所斷見集所斷亦  
 爾是謂徧行因問此中何故不說過去與過  
 去為徧行因耶答前生與後生言已說彼故

問何緣不說過去自名答欲顯後法非前因故若說過去與過去為徧行因或有生疑過去後法亦為前法因若說前生與後生為徧行因此疑便息有說此文欲顯過去有前後義若說過去與過去為徧行因或有生疑過去諸法同時展轉為徧行因若說前生與後生為徧行因此疑便息問自部於自部有徧行因不設爾何失若有者此中何故不說若無者何故於他部有自部無耶答應說亦有問若爾此中何故不說答亦應說而不說者

有別意趣為欲成立不成義故謂於自部有徧行因不說自成故不須說若於他部有徧行因其義不成是故須說有說為顯無雜徧行因故謂於自部有二種因謂徧行因及同類因其義雜亂是故不說若於他部惟有一因謂徧行因義無雜亂是故徧說復次為顯無雜增長門故謂於自部二門增長謂同類因門及徧行因門其義雜亂是故不說若於他部惟一門增長謂徧行因門義無雜亂是故徧說問何故前生等惟說隨眠後生等兼

說相應法耶答前生等亦應說相應法而不說者當知此是有餘之說復次為遮相似相續沙門意故彼作是說徧行隨眠惟與隨眠為徧行因彼相應法惟與隨眠相應法為徧行因為遮彼意顯徧行隨眠與隨眠及相應法為徧行因彼相應法與隨眠相應法及隨眠為徧行因故作是說問徧行隨眠於諸隨眠俱有法等亦是徧行因不設爾何失若亦是者此中何故不說若非者何故於相應法是而於俱有法等非耶答應說亦是以與一

切染汚法皆為徧行因故問若爾此中何故不說答彼相應法與彼隨眠同一所緣同一行相極相隣近是故說之生等不爾是故不說自界者謂欲界惟與欲界為徧行因色無色界應知亦爾如說自界自地亦爾繫縛別故謂初靜慮惟與初靜慮為徧行因乃至非想非非想處應知亦爾於自地中處別部別亦得展轉為徧行因繫縛同故復說過去等欲顯過去未來體是實有現在是有為故如說見苦所斷見集所斷亦爾體類同故問徧

行隨眠以何為自性答欲界有十一謂見苦  
所斷五見疑無明見集所斷邪見見取疑無  
明色無色界各有十一應知亦爾此中無明  
者謂五見疑相應及不共無明品類足說九  
十八隨眠中三十三是徧行六十五非徧行  
問見苦集所斷無明有是徧行有非徧行何  
故彼說三十三是徧行六十五非徧行耶答  
西方尊者所誦本言九十八隨眠中二十七  
是徧行六十五非徧行六應分別謂見苦集  
所斷無明有是徧行有非徧行云何是徧行

謂見苦集所斷非徧行隨眠不相應無明云  
何非徧行謂見苦集所斷非徧行隨眠相應  
無明如是所說於義為善若作是說云何是  
徧行謂見苦集所斷徧行隨眠相應無明則  
便不攝不共無明是故彼說於義為善問若  
爾何故迦濕彌羅國諸師不作此誦答亦應  
作此誦而不爾者有別意趣以彼多分是徧  
行故謂見苦所斷有十無明七是徧行即五  
見疑相應及不共無明三非徧行即貪瞋慢  
相應無明見集所斷有七無明四是徧行即

二見疑相應及不共無明三非徧行即貪瞋慢相應無明又此國誦三十三是徧行六十五非徧行者無明皆說不共無明惟徧非徧自力起故相應無明有八十三謂二十七徧行及五十六非徧行隨眠相應彼隨他力現

初八

十三

者謂無始來具起九品中一切者謂無始來一切有情無不皆起後一切者謂無始來普緣一切有漏事起故施設論作如是說無有異生從長世來於有漏法不執為我或執我所或執斷常或撥為無或執為淨解脫出離或執為尊最勝第一或起疑惑猶豫或起愚闇無知是故本來一切一切一切起故名為徧行復次若法一刹那頃現在前時能緣五部為五部因令五部法於所緣愚名為徧行問徧行隨眠云何令彼無漏緣法於所緣愚



答若執我等法爾便謗我滅對治先於中愚  
然後於彼撥為無故復次若法一刹那頃現  
在前時能緣五部為五部因於五部法皆悉  
隨增名為徧行問徧行隨眠相應俱有法亦  
是徧行因不設爾何失若亦是者何故但說  
三十三是徧行若非者何故相應俱有法有  
是徧行因有非徧行因耶有作是說彼非徧  
行因問若爾何故相應俱有法有是徧行因  
有非徧行因答如相應俱有法有是隨眠有  
非隨眠如是相應俱有法有是徧行因有非

徧行因復有何過評曰應作是說彼亦是徧  
行因因義通故相應俱有同一果故問若爾  
何故但說三十三是徧行耶答彼論但欲分  
別九十八隨眠中幾是徧行幾非徧行不為  
總說徧行因義故不相違復次徧行隨眠具  
三事故名為徧行物八一於五部法徧隨增故二  
於五部法徧能緣故三於五部法徧為因故  
是以徧說彼相應法但有二事除徧隨增彼  
俱有法但有一事謂徧為因故彼不說問徧  
行隨眠等得亦是徧行因不尊者僧伽筏蘇

說曰若徧行得非徧行者非徧行得應是徧行故徧行得亦是徧行因彼難非理如色得既非色非色得豈是色故徧行得非徧行因於理為善問何故徧行生等諸相是徧行因彼得非耶答生等諸相與徧行法同一果常相隨不相離無前後極親近故亦是徧行因得與徧行不同一果不常相隨非不相離或前或後非極親近如皮於樹是故彼得非徧行因問何故惟於見苦集所斷法立有徧行隨眠非於見滅道所斷法耶舊阿毗達磨師

說曰此是彼族類故謂見苦集所斷諸法是徧行隨眠族姓根本生地舍宅非見滅道所斷諸法有說此中隨眠極堅牢故謂見苦集所斷隨眠皆同一意同一所作故極堅牢以堅牢故於中可立徧行隨眠見滅道所斷法不同一意事業各異故極羸劣極羸劣故於中不立徧行隨眠如城邑人若同一意同一事業則城邑主及餘怨敵不能降伏若彼諸人不同一意事業各異則被降伏此亦如有說此中我見所持故謂於是處若有我

見則有漏法相續熾盛可立徧行見集所斷  
雖無我見而有長養我見諸法非見滅道所  
斷法中有如是事有說徧緣有漏因果事故  
謂見苦集所斷隨眠俱能徧緣有漏因果故  
立徧行餘則不爾有說此於所緣定增長故  
謂見苦集所斷隨眠皆緣有漏隨緣有漏隨  
漸增長如人觀月增益眼根若見滅道所斷  
隨眠或緣有漏或緣無漏緣無漏者隨有所  
緣隨漸損減如人觀日損減眼根以不定故  
於此不立徧行隨眠有說此有二種隨眠事

故謂見苦集所斷隨眠俱由二門作隨眠事  
一由所緣二由相應見滅見道所斷隨眠或  
由二門作隨眠事或惟相應不決定故不可  
建立徧行隨眠有說此中決定安二足故義  
如前說有說四部皆有二種道故謂見苦集  
所斷部中有是徧行有非徧行於見滅道所  
斷部中有有漏緣有無漏緣故不應責有說  
一切隨眠墮此二故謂諸隨眠一切皆墮苦  
集諦攝故惟此有徧行隨眠有說若見苦集  
有漏果因則見滅道所斷諸法根本羸劣故

彼不立徧行隨眠有說不應責故謂徧行隨眠者定能徧緣非見滅道所斷法中有徧緣者問何故見苦集所斷貪瞋慢非徧行耶答以彼皆無徧行相故謂徧行者能緣一切彼三不爾有說此三自相煩惱攝故謂要共相煩惱攝者可立徧行云何此三皆是自相煩惱所攝謂起貪者或於彼身不於此身或於此身不於彼身於諸身分亦各別起瞋慢亦爾故是自相有身見等一刹那中總於一界一趣生等或執為我或執我所或復乃至愚

闇無知故是共相有說難熾盛故謂貪瞋慢難可熾盛要依妻財怨讎卑敵方熾盛故徧行隨眠易可熾盛任運相續如河流故有說見疑無明能緣四諦於中可立徧行隨眠貪瞋慢三無如是事是故不立徧行隨眠問何故見滅道所斷貪瞋慢見取戒禁取非無漏緣耶答不應訶責故無怨害相故性柔和故最勝故清淨故是以貪等非無漏緣欲界有十一徧行隨眠九通他界緣二惟自界緣謂有身見及邊執見問何故比二見不緣他界

耶答惟有爾所緣境力故復次此二見惟於  
麤法轉故謂此二見惟於麤顯現見諸蘊執  
我我所及計斷常若生欲界於色無色界微  
細諸蘊不能現見故不執爲我我所等問若  
爾生色界者現見欲界麤顯諸蘊何不執爲  
我我所等答已離染故謂生色界者於欲界  
蘊已得離染故雖現見而不執爲我我所等  
復次上地煩惱不緣下故問因論生論何故  
上地煩惱不緣下耶答已離彼染故謂要已  
離下地染者方起上地煩惱現前於下地法

既已離染上地煩惱寧復緣彼問如何得知  
要離下染上地煩惱方得現前答如施設論  
說有六種非律儀謂三界繫各有二種一相  
應二不相應欲界相應非律儀現在前時六  
非律儀成就四非律儀亦現在前謂欲界二  
色無色界各不相應色界相應非律儀現在  
前時四非律儀成就三非律儀亦現在前謂  
色界二無色界不相應無色界相應非律儀  
現在前時二非律儀成就亦現在前謂無色  
界二此中染法名非律儀由此故知要離下

染上地煩惱方現在前問何故欲界煩惱能緣色無色界彼二界煩惱不能緣欲界耶答欲界是不定界非修地非離染地不能攝伏自界隨眠故得越緣色無色界色無色界是定界是修地是離染地能善攝伏自界隨眠故彼不能越緣下地如人不能攝伏妻妾便得與他作非法事若善攝伏乃至不能以眼顧眄況為非法此亦如是復次生欲界者於上二界諸蘊猶豫為是苦耶為非苦耶為是集耶為非集耶是第一耶非第一耶是清淨

耶非清淨耶由不了故欲界煩惱得緣上界若生上地於下諸蘊已現見故無有猶豫故上煩惱不緣下地復次若色無色界煩惱緣欲界者則應隨增若隨增者界應雜亂故彼煩惱不緣欲界問如欲界煩惱雖緣上界而不隨增上界煩惱何故不爾答上界蘊勝欲界煩惱雖緣彼起而不隨增欲界蘊劣上界煩惱若緣此起即便隨增如下劣人於尊勝者雖能現見而不能損若尊勝者見下劣人便能損害此亦如是色界亦有十一徧行隨

眠九通他界緣二惟自界緣無色界亦有十  
 一徧行隨眠皆是自界緣無他界緣者無上  
 界故不緣下故有說亦有他界緣者伏能緣  
 定非現起定評曰彼不應作是說既無上界  
 可緣如何有能緣定是故說無於理為善初  
 靜慮乃至無所有處皆有十一徧行隨眠九  
 通他地緣二惟自地緣非想非非想處亦有  
 十一徧行隨眠皆惟自地緣無上地故不緣  
 下故有說亦有他地緣者然能緣定非現起  
 定評曰彼不應作是說既無上地可緣如何

有能緣定是故說無於理為善

阿毗達磨大毗婆沙論卷第十八

說一切有部發智

音釋

羸倫為切怨怨於素切讎對也顧顧

慕冠羸也彌彌切矜矜切視視也

永樂北藏

大毗婆沙論

第一〇六冊



阿毗達磨大毗婆沙論卷第十九 動九

五百大阿羅漢等造

唐三藏法師玄奘奉詔譯

雜蘊第一中智納息第二之十一

欲界見苦集所斷邪見能緣三界苦集而非

一時謂異刹那緣欲界異刹那緣色無色界

問何故不一刹那頃頓緣三界若苦若集耶

答彼緣欲界亦隨增緣色無色界不隨增故

問彼何故緣欲界亦隨增緣色無色界不隨

增耶答欲界是彼隨增處色無色界非彼隨

增處故復次欲界是彼居宅色無色界非彼

居宅故復次欲界有彼等流異熟果色無色

界無彼等流異熟果故復次欲界有彼五部

徧行果色無色界無彼五部徧行果故復次

欲界無彼畢竟對治色無色界有彼畢竟對

治故復次若彼一刹那頃頓緣三界若苦若

集者云何而緣為如緣欲界即隨增緣色無

色界亦爾耶為如緣色無色界不隨增緣欲

界亦爾耶設爾何失若如緣欲界則隨增緣

色無色界亦爾者界應雜亂若如緣色無色

界不隨增緣欲界亦爾者則不應理以無煩惱緣自界法而有不具所緣相應二隨增者緣自地法必具所緣相應緣故若一刹那頓增者亦應於相應法有隨增有不隨增是則違此因理亦壞相應法勿有此失故別時緣自界他界理善成立如是初靜慮見苦集所斷邪見能緣八地苦集而非一時謂異刹那緣初靜慮異刹那緣上七地如是乃至無所有處見苦集所斷邪見能緣二地苦集而非

一時謂異刹那緣自地異刹那緣上地非想非非想處見苦集所斷邪見惟緣自地苦集欲界見滅所斷邪見惟緣欲界諸行滅問何故欲界見苦集所斷邪見能緣三界苦集欲界見滅所斷邪見惟能緣欲界諸行滅耶脇尊者曰若法欲界愛所耽著身見執為我所者此諸法滅應為欲界見滅所斷邪見所緣非彼煩惱能緣他界此亦如有說苦集是有為法自地他地展轉相引故彼邪見能緣他地滅諦無為自地他地無相引義故彼

邪見不緣他地如是初靜慮見滅所斷邪見  
惟緣初靜慮諸行滅乃至非想非非想處見  
滅所斷邪見惟緣非想非非想處諸行滅欲  
界見道所斷邪見惟緣欲界諸行對治問何  
故欲界見苦集所斷邪見能緣三界苦集欲  
界見道所斷邪見惟能緣欲界諸行對治耶  
脇尊者曰若法欲界愛所就著身見執為我  
我所者此法對治應為欲界見道所斷邪見  
所緣非彼煩惱能緣他界此亦如有說欲  
界見苦集所斷邪見所緣非對治故能緣他

地欲界見道所斷邪見所緣即對治故不能  
緣他地對治此中有說欲界見道所斷邪見  
惟緣未至定法智品道惟彼是此斷對治故  
評曰應作是說能緣六地法智品道種類同  
故俱是欲界壞對治故如是初靜慮見道所  
斷邪見能緣九地初九類智品道乃至非想非非  
想處見道所斷邪見能緣九地類智品道問  
何故見滅所斷邪見惟能緣自地諸行滅見  
道所斷邪見能緣六地法智品道或緣九地  
類智品道耶答自他地滅非展轉因多地聖

道互爲因故問若爾法類品道亦互爲因何故見道所斷邪見不總緣耶有說見道所斷邪見亦能總緣法類品道互爲因故法智品道亦能對治上二界故評曰彼不應作是說類智品道於欲界法非對治故法智品道於上二界雖爲對治而非初非今故又法類品種類品別故有說九地類智品道是上八地斷對治者即爲彼地見道所斷邪見所緣非餘地道評曰彼不應作是說以能對治有多種故又類智品展轉爲因種類同故問一刹

那隨眠不能徧緣一切亦無徧隨增理何故名徧行耶答依彼種類相續而說故無有過然徧行隨眠對徧行因應作四句有徧行隨眠非徧行因謂未來徧行隨眠有徧行因非徧行隨眠謂過去現在徧行隨眠相應俱有法有徧行隨眠亦徧行因謂過去現在徧行隨眠有非徧行隨眠亦非徧行因若不依彼種類說者應作是說謂除前相若即依彼種類說者應言未來徧行隨眠相應俱有法問一切染汚法皆以見所斷法爲因不設爾何

失若一切染污法皆以見所斷法為因者未  
斷亦作因已斷亦作因未斷已斷有何差別  
又若爾者何故聖者修所斷染污法有起有  
不起耶不起者謂無有愛諸慢類極瞋纏起  
者謂餘貪瞋慢無明又若爾者識身論說當  
云何通如說物九頗有不善法惟以不善為因耶  
答有謂聖者退離欲染時初染污思現在前  
若一切染污法不皆以見所斷法為因者品  
類足論當云何通如說云何見所斷為因法  
謂一切染污法及見所斷法異熟又若爾者

復違彼說云何無記為因法謂無記有為法  
及一切不善法又若爾者復違彼說或有苦  
諦以有身見為因非與有身見為因謂除過  
去現在見苦所斷廣說乃至除未來有身見  
及彼相應法生老住無常諸餘染污苦諦等  
又若爾者識身論說當云何通如說不善眼  
識乃至不善意識皆以不善無記為因答應  
作是說一切染污法皆以見所斷法為因問  
若爾未斷已斷俱能為因有何差別答名即  
差別謂前未斷位名未斷因後已斷位名已

斷因復次前位未為對治所壞後位雖亦為因而已為對治所壞復次前位於自身中能障聖道後位雖亦為因而於自身中不障聖道復次前位於自身中能起如煙焰得後位雖亦為因而於自身中不復能起如煙焰得復次前位於自身中作可訶<sup>五</sup>猷事及垢穢事後位雖亦為因而於自身中不復能作可訶猷事及垢穢事復次前位於自身中能辦所應作事後位雖亦為因而於自身中不復能辦所應作事復次前位於自身中能辦同類

因徧行因事後位雖亦為因而於自身中不復能辦同類因徧行因事後次前位於自身中能辦等流果異熟果後位雖亦為因而於自身中不復能辦等流果異熟果復次前位於自身中能取果與果後位雖亦為因而於自身中不復能取果與果是名未斷已斷差別問若爾何故聖者修所斷染污法有起有不起耶答見所斷法與彼或為相續近因或為不相續遠因若與彼為相續近因者聖者不起若與彼為不相續遠因者聖者猶起復

次若已得彼非擇滅者聖者不起若未得彼非擇滅者聖者猶起復次彼起定依異生性者聖者不起若不定者聖者猶起復次彼起定能障聖性者聖者不起若不爾者聖者猶起問何故聖者不起無有愛耶答彼是斷見所長養故次斷見後現在前故一切聖者斷見已斷故彼不起問何故聖者不起諸慢類耶答彼是身見所長養故次身見後現在前故一切聖者身見已斷故彼不起問何故聖者不起極瞋纏耶答彼是邪見所長養故次

邪見後現在前故一切聖者邪見已斷故彼不起問若爾識身論說當云何通如說頗有不善法惟以不善為因耶答有乃至廣說答彼依未斷因說故不相違謂彼初起不善思有二種因一已斷二未斷彼論但依未斷因說復次彼依不善因說故不相違謂彼初起不善思有二種因一不善二無記彼論但依不善因說復次彼依自部因說故不相違謂彼初起不善思有二種因一自部二他部彼論但依自部因說復次彼依非徧行因說故

不相違謂彼初起不善思有二種因一徧行  
二非徧行彼論但依非徧行因說復次彼依  
不共因說故不相違謂彼初起不善思有二  
種因一共二不共彼論但依不共因說問聖  
者先未離欲染時彼染汚思亦以不善為因  
何故彼論說後退時答爾時彼思先不成就  
今得成就先無縛今有縛先死今生是故偏  
說問後起染汚思亦以不善為因何故彼論  
但論初起答爾時彼得先斷今續先無用今  
有用先死今生是故偏說有作是說一切染

汚法亦皆以見所斷法為因問若爾品類足  
論謂身論說當云何通答彼總相說若別說  
者應作是言有染汚色以見所斷法為因非  
一切染汚色乃至有染汚識以見所斷法為  
因非一切染汚識評曰彼不應作是說以彼  
論說一切染汚法皆以見所斷法為因故一  
切不善法皆以無記為因故諸餘染汚苦諦  
等皆以有身見為因故不善六識皆以不善  
無記為因故前說為善尊者設摩達多分別  
染法有異彼作是說有見苦所斷法惟以見



苦所斷為因有見苦所斷法惟以見集所斷為因無二為因見集所斷法亦爾實無是處分別故說假使聖者現觀苦已未現觀集從聖道起見集所斷法惟以見集所斷為因者得起現前見集所斷法以見苦所斷為因者不起現前因已斷故有見滅所斷法惟以見滅所斷為因有見滅所斷法惟以見苦所斷為因有見滅所斷法惟以見集所斷為因無三為因見道所斷修所斷染污法亦爾實無是處

分別故說假使聖者現觀滅已未現觀道從聖道起見道所斷法惟以見道所斷為因者得起現前見道所斷法惟以見苦集所斷為因者不起現前因已斷故如是聖者於修道中修所斷染污法惟以修所斷為因者得起現前修所斷染污法惟以見苦集所斷為因者不起現前因已斷故然諸聖者離欲染時欲界修所斷染污法若惟以修所斷為因若惟以見苦集所斷為因合為一聚九品漸斷彼後退時欲界修所斷染污法惟以修所斷

爲因者還成就惟以見所斷爲因者不成就  
因已斷故又於爾時惟以修所斷爲因修所  
斷染汚法中未來者還成就過去者不成就  
彼後無容起現前故評曰彼不應作是說云  
何同一對治所斷煩惱彼後退時有還成就  
有<sup>動九</sup>不成就又不能通品類足論識身論說是  
故如前所說爲善問愛於諸界諸地諸部皆  
等隔絕何故徧行隨眠能於他部隨增非他  
界地答徧行隨眠於他部法有等流果或異  
熟果故能隨增於他界地無等流果及異熟

果故不隨增復次自地他部麤細相似故能  
隨增上地細故不能隨增問徧行異熟與不  
徧行異熟展轉爲因不有作是說徧行異熟  
與不徧行異熟爲因不徧行異熟不皆與徧  
行異熟爲因如徧行隨眠與不徧行隨眠爲  
因他部不徧行隨眠不能與徧行隨眠爲因  
異熟亦爾評曰彼不應作是說隨眠法異異  
熟法異隨眠有五部異熟惟修所斷故應作  
是說徧行異熟與徧行異熟爲因亦與不徧  
行異熟爲因不徧行異熟與不徧行異熟爲

因亦與徧行異熟為因同地同性類等故  
問徧行因以何為自性答一切過去現在徧  
行隨眠及彼相應俱有諸法已說自性所以  
今當說問何故名徧行因徧行是何義答徧  
為因義是徧行義復次能徧緣義是徧行義  
復次徧隨增義是徧行義此徧行因惟通過  
去現在二世有等流果

云何異熟因乃至廣說問何故作此論答為  
止他宗顯正理故謂或有執離思無異熟因  
離受無異熟果如譬喻者為止彼執顯異熟

因及異熟果俱通五蘊或復有執惟心心所  
有異熟因及異熟果如大衆部為止彼執顯  
此因果亦通諸色不相應行或復有執惟心  
心所及諸色法有異熟因及異熟果為止彼  
執顯此亦通不相應行或復有執諸異熟因  
要捨自體其果方熟彼作是說諸異熟因要  
入過去方與其果過去已滅故無自體為止  
彼執顯異熟因至異熟位猶有實體或復有  
執諸異熟因果若未熟其體恒有彼果熟已  
其體便壞如飲光部彼作是說猶如種子牙

若未生其體恒有牙生便壞諸異熟因亦復如是爲止彼執顯異熟因果雖已熟其體猶有或復有執所造善惡無苦樂果如諸外道爲止彼執顯善惡業有苦樂果故作斯論云何異熟因答諸心心所法受異熟色心心所法心不相應行此心心所法與彼異熟爲異熟因此中諸心心所法者謂一切不善善有漏心心所法此言亦攝彼隨轉色不相應行與心心所同一果故異熟色者謂色蘊即眼等五根色香味觸心者謂識蘊即眼等六識

心所法者謂三蘊即受想思等心不相應行者謂行蘊即命根衆同分等此顯異熟因及異熟果俱通五蘊復次諸身語業受異熟色心心所法心不相應行此身語業與彼異熟爲異熟因問隨心轉身語業心一果故如前已說此中復言身語業者說何法耶答善不善表及依表業所生無表不隨心轉身語二業此定能招異熟果故有說此中說身語表及此剎那所生無表同一果故彼說非理身語表業與彼俱生身語無表非同一果彼不

互為俱有因故有說表業與依表生身語無表雖非一果而定俱時受異熟果一心起故彼說非理展轉相望非俱有因如何定說同一剎那受異熟果然表無表展轉不為俱有因故異熟果別於表業中七支等異一一各別招異熟果一一支等有多種微一一極微有三世別於一一世有多剎那一剎那異熟果別非俱有因故無表業亦爾前隨心轉七支無表能展轉為俱有因故同異熟果此中所說表無表業則亦攝彼隨轉生等同一

果故所受異熟如前應知復次諸心不相應行受異熟色心心所法心不相應行此心不相應行與彼異熟為異熟因是謂異熟因問諸心心所表無表業隨轉生等如前已說同一果故今復說何不相應行答今說無想定滅盡定一切不善善有漏得及彼隨轉生等諸相前未說故問無想定受何異熟果耶有說無想定受無想及色異熟果彼命根眾同分異熟是第四靜慮有心業果彼餘蘊異熟是共果有說無想定受無想及色異熟果彼

命根異熟是第四靜慮有心業果彼餘蘊異熟是共果有說無想定受無想及色異熟果彼餘蘊異熟是共果有說無想定惟受無想異熟果彼餘蘊異熟是共果問若命根亦是非業異熟果者品類足論當云何通如說一法是業異熟而非業謂命根答一切命根惟是異熟一切異熟由業故顯依此密意故作是言而實命根亦非業感復次彼論依世俗說不依勝義謂諸世間見短壽者即言是人作短壽業見長壽者即言是人作長壽業有

說無想天處無心時亦受第四靜慮有心業果有心時亦受無想定果問若無心時亦受有心果有心時亦受無心果者云何因果不顛倒耶答如有色業亦受無色果無色業亦受有色果而無因果顛倒過失此亦如是尊者設摩達多說曰無想定受無想及衆同分異熟果彼命根及色異熟是第四靜慮有心業果彼心心所及餘心不相应行皆非異熟評曰彼不應作是說異熟衆同分是業果故彼心心所及餘心不相应行亦有是異熟者

故尊者佛陀提婆說曰無想定受無想異熟果彼命根衆同分是第四靜慮有心業果彼餘蘊異熟是共果評曰彼不應作是說眼等五根是業果故應作是說無想異熟惟是無想定果彼命根衆同分及五色根異熟惟是

動九

十二

第四靜慮有心業果彼餘蘊異熟是共果問滅盡定受何異熟果耶答受非想非非想處四蘊異熟果除命根衆同分彼惟是業果故問諸得受何異熟果耶答諸得受色心心所法心不相應行異熟果色者謂色香味觸非

五色根彼業果故心心所法者謂苦受樂受不苦不樂受及彼相應法心不相應行者謂諸得生老住無常尊者僧伽筏蘇說曰得亦能受眼等五根及命根衆同分異熟果彼作是說雖一一得無力能引衆同分等衆得聚集則能引彼然彼惟感愚鈍之身如蚯蚓等得所感色九處除聲心心所法通三受聚不相應行謂衆同分命根諸得生住異滅評曰彼不應作是說諸得相望非俱有因設集俱抵復何所益非一果故不能共引衆同分等

尊者妙音作如是說得不能引衆同分等諸業引得衆同分等時於眼等根處但能感得色香味觸評曰彼不應作是說勿無色界得無異熟果故是以應知初說為善問品類足說云何異熟因謂一切不善善有漏法與此論所說異熟因<sup>勅九</sup>有何差別答此<sup>十三</sup>不了義彼是了義此有餘意彼無餘意此有餘因彼無餘因此依世俗彼依勝義此有影顯彼無影顯復次此說已生異熟因彼說已生未生異熟因此說與果異熟因彼說與果未與果異熟

因復次此說新業果彼說新舊業果復次此說過去異熟因彼說三世異熟因復次此說正與果異熟因彼說已正當與果異熟因是謂此說彼說差別問何故此中但說正與果異熟因耶答正與果者其相顯故復次彼果現前施設五趣諸有情故復次爾時此因用究竟故以正與果顯示當與已與果因於義便故此中但說正與果因復次欲界中有四蘊異熟因得一果謂善不善心心所法及彼生等有二蘊異熟因得一果謂善不善身業



語業及彼生等有一蘊異熟因得一果謂得  
及彼生等色界中有五蘊異熟因得一果謂  
有隨轉色心心所法及彼生等有四蘊異熟  
因得一果謂無隨轉色善心心所法及彼生  
等有二蘊異熟因得一果謂善身語表及彼  
生等有一蘊異熟因得一果謂得無想定及  
彼生等無色界中有四蘊異熟因得一果謂  
善心心所法及彼生等有一蘊異熟因得一  
果謂得滅盡定及彼生等復次有業惟受一  
處異熟謂得命根衆同分業彼業惟受法處

異熟有業惟受二處異熟謂得意處業彼業  
惟受意處法處異熟得觸處業亦受二處異  
熟謂觸處法處得身處業受三處異熟謂身  
處觸處法處得色香味處業亦爾各受自處  
觸處法處異熟得眼處業受四處異熟謂眼  
處身處觸處法處得耳鼻舌處業亦爾謂各  
受自處身處觸處法處異熟有餘師說一切  
大種皆生色聲欲界諸色不離香味彼作是  
說得眼處業受七處異熟謂眼處身處及色  
香味觸處法處異熟得耳鼻舌處業亦爾謂各

受自處身處及色香味觸法處異熟得身處  
 業受六處異熟謂身處及色香味觸法處異  
 熟得色處業受五處異熟謂色香味觸法處  
 異熟得香味觸處業亦爾謂各受色香味觸  
 法處異熟如是所說是定得者不定得者其  
 數不定然有業能受八處異熟有業能受九  
 處異熟有業能受十處異熟有業能受十一  
 處異熟皆除聲處問何故有業能受多處異  
 熟有業能受少處異熟耶答若業有種種功  
 能得種種果者受多處異熟若業無種種功

能不得種種果者受少處異熟如外種子有  
 種種功能得種種果者如稻甘蔗蒲萄藕等  
 無種種功能不得種種果者如素的迦多羅  
 子等謂澤中有草名素的迦一種一莖而高  
 數尺上有少葉其形如蓋有多羅樹高逾百  
 肘上亦少葉其形如蓋物九質幹雖長果實甚少  
 業亦如是然一世業得三世果無三世業得  
 一世果一刹那業得多刹那果無多刹那業  
 得一刹那果業善不善果無記故如所生果  
 不滅因故問諸造業者為先造引眾同分業

為先造滿衆同分業耶有作是說先造引業後造滿業若先不引後無所滿猶如畫師先作模位後填衆彩此亦如是有餘師說先造滿業後造引業如菩薩先於三無數劫造滿業已後於百大劫中方造引業如是說者此則不定或有先造引業後造滿業或有先造滿業後造引業隨造業者意樂起故復次有三種受異熟業一順現法受業二順次生受業三順後次受業順現法受業者若業此生造作增長即於此生受異熟果非於餘生順

次生受業者若業此生造作增長於次後生受異熟果非於餘生順後次受業者若業此生造作增長於第三生或第四生以後如次受異熟果然異熟聲說多種義有處等流說名異熟如說受是受支異熟有處長養說名異熟如說飲食及諸醫藥得樂異熟有處夢事說名異熟如說夢見如是如是種類異熟有處豐儉說名異熟如說星宿在此路行當有如是豐儉異熟有處梵王說名異熟如說大仙我且未去觀此光明有何異熟有處異

熟說名異熟如此中說色等異熟果名為異  
 熟熟有二種一者同類二者異類同類熟者  
 即等流果謂善生善不善生不善無記生無  
 記異類熟者即異熟果謂善不善生無記果  
 此無記果從善不善異類因生故名異熟問  
 若異類而說名異熟果者何故惡趣名非熟  
 耶答彼亦異熟然下賤故說名非熟如有下  
 賤村城等物名非村等復次過熟故名非熟  
 如拙陶師燒諸瓦器多費薪草器皆焦融不  
 任實用亦名非熟惡趣亦爾苦果太過故名

非熟復次於彼無善異熟故名非熟問傍生  
 鬼趣亦受善果如何惡趣皆名非熟答彼善  
 果少故亦名無如少水河亦名無水復次彼  
 趣雖有善果而不能修餘勝善法故名非熟  
 譬如農夫收穫少亦名非熟而實惡趣有  
 異熟果問何故不善善有漏法有異熟果無  
 記無漏法無異熟果耶答自性眾緣有具有  
 闕三種不同如外種故如堅實種置良田中  
 以水澆灌覆之糞壤因緣力具即便生牙如  
 是不善善有漏法自性堅實置有田中澆之

愛水覆以餘結因緣力具便生有牙如堅實  
種置於倉中水糞緣闕不能生牙如是無漏  
善有為法體雖堅實而闕愛水餘結潤覆有  
牙不生如朽敗種雖置良田以水溉灌覆之  
糞壤而因力闕不能生牙如是無記諸有為  
法雖以愛水餘結潤覆而體羸劣有牙不生  
問復何緣故諸無漏法無異熟果答非田非  
器乃至廣說復次若法能令諸有諸趣生老  
病死恒相續者有異熟果無漏能令諸有諸  
趣生老病死究竟斷故無異熟果復次若法

能令諸有諸趣漸增長者有異熟果無漏能  
令諸有諸趣漸損減故無異熟果復次若法  
是苦諸有世間生老病死趣集行者有異熟  
果無漏是苦諸有世間生老病死趣滅行故  
無異熟果復次若法是身見事是顛倒事是  
貪愛事是隨眠事有垢有毒有穢有濁隨苦  
集諦隨三有者有異熟果諸無漏法不同彼  
故無異熟果復次若無漏法有異熟者則為  
勝因得下劣果因是無漏善有為法果是有  
漏無記法故復次若無漏法有異熟者則為

聖道今有相續聖道續有與理相違復次若無漏法有異熟者何處當受若在欲界則不應理無漏法非欲界繫故如色無色界業若在色界亦不應理無漏法非色界繫故如欲無色界業若在無色界亦不應理無漏法非無色界繫故如欲色界業若在三界外亦不應理以三界外無別處故復次無漏聖道對治異熟及異熟因若復能感異熟果者復須對治對治此者是無漏故復感異熟為對治彼復修聖道即彼聖道復感異熟如是展轉

便為無窮是則應無解脫出離勿有此過故無漏法無異熟果復次若無漏法感異熟者則應畢竟不得涅槃聖者不應精勤修習是招生死輪轉法故由此無漏無異熟果問復何緣故諸無記法無異熟果答非田非器乃至廣說復次若無記法有異熟果此異熟果為是無記為善不善若是無記何故名異熟非異類熟故若善不善亦非異熟以異熟果是無記故復次若無記法有異熟者此異熟果是無記故應有異熟即彼異熟復應能感

初九

十八

餘異熟果如是展轉便為無窮是則應無解脫出離勿有此過故無記法無異熟果由如是等種種因緣惟諸不善善有漏法是異熟

因

阿毗達磨大毗婆沙論卷第十九

說一切有部發智

音釋

蝮

蝮音立蝮以忍切蝮曲也

蝮

居按切木旁生者枝正出者為蝮

貿

莫侯切交易也

獲

黃郭切獲收指曰獲

甚

息淺切少也

漑

漑居

代

切灌澆也

灌

澆也

壤

無塊曰壤

柔

土

永樂北藏

大毗婆沙論

第一〇六册

永樂北藏

大毗婆沙論

第一〇六册



阿毗達磨大毗婆沙論卷第二十 動十

五百 大阿羅漢等造

唐三藏法師玄奘奉詔譯

雜蘊第一中智納息第二之十二

問一刹那業為但能引一眾同分為亦能引

多眾同分耶設爾何失若一刹那業但能引

一眾同分者施設論說當云何通如說有諸

眾生曾在人中或作國王或作大臣具大勢

力非理損害無量眾生理奪資財供給自身

及諸眷屬由是惡業死墮地獄經無量時受

大苦惱從彼捨命復由殘業生大海中受惡

獸身其形長大噉食無量水陸眾亦為無

量眾生啖食徧著其體如拘執毛既受苦痛

不能堪忍以身揩突頗胝迦山在彼身蟲俱

被殘害遂令海水縱廣百千踰繕那量皆變

成血又若爾者尊者無滅所說本事復云何

通如說具壽我以一食施福田故七生天上

作大天王七生人中為大國主又若爾者大

迦葉波所說本事復云何通如說具壽我以

一器稗子米飯施福田故千返生彼北俱盧

洲自然衣食千返生彼三十三天受大快樂  
又若爾者鹽喻經說復云何通如說一類補  
特伽羅造作增長爾許惡業有應地獄受者  
成現法受有應現法受者往地獄受若一刹  
那業亦能引多衆同分者施設論說當云何  
通如說由業種種差別勢力施設諸趣種種  
差別由趣種種差別勢力施設諸生種種差  
別由生種種差別勢力施設異熟種種差別  
由異熟種種差別勢力施設諸根種種差別  
由根種種差別勢力施設補特伽羅種種差

別又若爾者通達經說復云何通如說云何  
應知諸業差別謂別業生地獄別業生傍生  
別業生餓鬼別業生天上別業生人中又若  
爾者云何建立順現法受等三業差別又若  
爾者施設論說復云何通如說造作增長上  
殺生業身壞命終墮無間獄中生餘處下復  
生餘乃至廣說如十答應作是說一刹那業惟能  
引一衆同分問若爾施設論說當云何通如  
說有諸衆生曾在人中乃至廣說答由殘業  
者由別趣業謂彼人中造作增長地獄傍生

二惡趣業地獄中受地獄業已殘傍生業生  
大海中故此殘業非望一業問尊者無滅所  
說本事復云何通如說具壽我以一食施福  
田故乃至廣說答彼顯初因故作是說謂彼  
先以一食施故生富貴家多饒財寶由宿生  
念或本願力復以百千財食布施如是展轉  
經於多生常好布施受大富樂彼依初因故  
作是說譬如農夫以少種子多年種植展轉  
增長至百千斛唱如是言我植少種今獲百  
千又如賈客以一金錢多時貿易至於千萬

唱如是言我用一錢經求滋息今至千萬此  
等皆依最初因故作如是說尊者亦爾復次  
或彼尊者於一生中先施一食後復數施由  
此引發多人天因彼依最初故作是說復次  
或彼尊者施一食時起多意願由此引得天  
上人中多異熟果復次或彼尊者因施一食  
起下中上三品善業由下業故生在人中得  
爲人主由中業故生於天上復作天王由上  
業故於最後身生釋氏家多饒財寶出家修  
道成阿羅漢由此理趣則已釋通大迦葉波

所說本事聞鹽喻經說復云何通如說一類  
補持伽羅乃至廣說有作是說彼說二人造  
二種業感二異熟謂有二人俱害生命一不  
勤修身戒心慧彼多福故往地獄中受此業  
異熟果一能勤修身戒心慧彼多福故即於  
人中受此業異熟果問經言爾許說何義耶  
答若少若等若相似故說名爾許有餘師說  
彼說一人造二種業感二異熟謂有一人害  
二生命一業能引地獄異熟一業能引人中  
異熟彼若不修身戒心慧便往地獄受別業

異熟果若能勤修身戒心慧即於人中受別  
業異熟果復有說者彼說一人造一種業感  
二異熟謂有一人害一生命此業能引地獄  
異熟兼復能引人中異熟彼若不修身戒心  
慧便往地獄受異熟果人中異熟果住不生  
法中若能勤修身戒心慧即於人中受異熟  
果地獄異熟果住不生法中評曰彼不應作  
是說勿有業壞趣壞過故業壞者謂一業亦  
是地獄業亦是人業趣壞者應一異熟亦是  
地獄趣亦是人趣果似因故應作是說彼說

一人造一種業感一異熟謂有一人害一生  
命此業能引地獄異熟彼若不能精勤修道  
成阿羅漢便往地獄受此業果彼人若能精  
勤修道成阿羅漢便能引取地獄苦事人身  
中受此業不能引衆同分引衆同分業不可  
寄受故由此尊者世友說言頗有能引地獄  
苦事人中受不答曰有能謂若證得阿羅漢  
果殊勝定慧熏修身故能爲此事非諸有學  
及諸異生能爲此事譬如廚人以水漬手雖  
探熱飯而不被燒若不漬手即便被燒此亦

如是故惟無學能爲此事有餘師說一刹那  
業亦能引多衆同分問若爾前難善及後難  
云何通耶答有情造業品類不定有所造業  
雜亂可轉有所造業不雜亂不可轉若雜亂  
可轉者如前所引若不雜亂不可轉者如後  
所引如是前後二難俱通評曰彼不應作是  
說勿有業壞趣壞過故應作是說一刹那業  
惟能引一衆同分復次但由不善引衆同分  
業生地獄中既生彼已惟受不善法異熟色  
心心所法不相應行色者九處除聲心心所

法者苦受及相應法不相应行者命根眾同  
分得生老住無常但由不善引眾同分業生  
傍生鬼趣中既生彼已受善不善法異熟色  
心心所法不相应行不善法異熟色者九處  
除聲心心所法者苦受及相應法不相应行  
者命根眾同分得生住老無常善法異熟色  
者四處謂色香味觸心心所法者樂喜捨受  
及相應法不相应行者得生老住無常有餘  
師說善法於傍生鬼趣無異熟色惟有異熟  
心心所法不相应行問若爾何故現見傍生

鬼趣中有形色妙好或醜陋耶答彼不善業  
或有以善業為眷屬或有以不善業為眷屬  
若以善業為眷屬者形色妙好善伏不善弊  
惡力故若以不善業為眷屬者形色醜陋不  
善增彼弊惡力故評曰善業於彼傍生鬼趣  
亦能感異熟色於理無違是故應知初說為  
善但由善引眾同分業生欲界人天中既生  
彼已受善不善法異熟色心心所法不相应  
行善法異熟色者九處除聲心心所法者樂  
喜捨受及相應法不相应行者命根眾同分

得生老住無常不善法異熟色者四處謂色香味觸心心所法者苦受及相應法不相應行者得生老住無常有餘師說不善法於人天趣無異熟色惟有異熟心心所法不相應行問若爾何故現見人天趣中有形色醜陋或妙好耶答彼善業或以不善業為眷屬或以善業為眷屬若以不善業為眷屬者形色醜陋不善伏善美麗力故若以善業為眷屬者形色妙好善業增彼美麗力故評曰應知此中初說為善不違理故問現見人中有二

形者彼為是善業異熟為是不善業異熟耶有作是說彼是不善業異熟有餘師說如處如時一形生者是善業異熟非處非時第二形生者是不善業異熟評曰應作是說彼二形者男女根體是善業異熟於彼處所色香味觸是不善業異熟六但由善引眾同分業生色界中既生彼已惟受善法異熟色心心所法不相應行色者七處除聲香味心心所法者樂喜捨受及相應法不相應行者命根眾同分無想事得生老住無常但由善引眾同

分業生無色界既生彼已惟受善法異熟心  
心所法不相應行心心所法者捨受及相應  
法不相應行者命根衆同分得生老住無常  
復次有作是說但由上品不善引衆同分業  
生地獄中既生彼已惟受彼上品不善法異  
熟果但由中品不善引衆同分業生傍生趣  
既生彼已惟受彼中品法異熟果但由下品  
不善引衆同分業生鬼趣中既生彼已惟受  
彼下品法異熟果有餘師說但由上品不善  
引衆同分業生地獄中既生彼已受彼上中

二品不善法異熟果傍生鬼趣如前說或復  
有說但由上品不善引衆同分業生地獄中  
既生彼已受彼三品不善法異熟果但由中  
品不善引衆同分業生傍生趣既生彼已受  
彼中下二品法異熟果鬼趣如前說或有說  
者但由上品不善引衆同分業生地獄中既  
生彼已受彼三品不善法異熟果但由中品  
不善引衆同分業生傍生趣既生彼已受彼  
三品法異熟果但由下品不善引衆同分業  
生鬼趣中既生彼已受彼下中二品法異熟



果復有說者但由上品不善引衆同分業生  
地獄中既生彼已受彼三品不善法異熟果  
但由中品不善引衆同分業生傍生趣既生  
彼已受彼三品法異熟果但由下品不善引  
衆同分業生鬼趣中既生彼已受彼三品法  
異熟果評曰應作是說有三品不善引地獄  
趣衆同分業隨由一種生地獄中既生彼已  
隨其所應受彼三品不善法異熟果有三品  
不善引傍生趣衆同分業隨由一種生傍生  
趣既生彼已隨其所應受彼三品法異熟果

有三品不善引鬼趣衆同分業隨由一種生  
鬼趣中既生彼已隨其所應受彼三品法異  
熟果復次有作是說但由欲界上品善引衆  
同分業生他化自在天既生彼已惟受彼上  
品法異熟果但由欲界中品善引衆同分業  
生下五天既生彼已惟受彼中品法異熟果  
但由欲界下品善引衆同分業生人趣中既  
生彼已惟受彼下品法異熟果問若由下品  
善業生人趣中受下品法異熟果者菩薩善  
業亦人中受云何上品又菩薩善業與他化

自在天善業有何差別答所說欲界下品善業人中受者除菩薩業故作是說非說一切有餘緣故菩薩業勝以菩薩身是力無畏等無邊功德所依止故他化自在天身無如是事有餘緣故他化自在天業勝以彼天身清淨微妙如燈焰故菩薩生身猶有種種便利不淨有餘師說但由欲界上品善引衆同分業生他化自在天既生彼已受彼上中二品法異熟果下五天人趣如前說或復有說但由欲界上品善引衆同分業生他化自在天

既生彼已受彼三品法異熟果但由欲界中品善引衆同分業生下五天受彼下中二品法異熟果人趣如前說或有說者但由欲界上品善引衆同分業生他化自在天既生彼已受彼三品法異熟果但由欲界中品善引衆同分業生下五天既生彼已受彼三品法異熟果但由欲界下品善引衆同分業生人趣中既生彼已受彼下中二品法異熟果復有說者但由欲界上品善引衆同分業生他化自在天既生彼已受彼三品法異熟果但

由欲界中品善引衆同分業生下五天既生  
彼已受彼三品法異熟果但由欲界下品善  
引衆同分業生人趣中既生彼已受彼三品  
法異熟果評曰應作是說有三品善引他化  
自在天衆同分業隨由一品生他化自在天  
既生彼已隨其所應受彼三品法異熟果有  
三品善引下五天衆同分業隨由一品生下  
五天既生彼已隨其所應受彼三品法異熟  
果有三品善引人趣衆衆同分業隨由一品  
生人趣中既生彼已隨其所應受彼三品法

異熟果復次有三品善引初靜慮無別異衆  
同分業隨由一品生初靜慮既生彼已隨其  
所應受彼三品無別異善法異熟果但由下  
品善引第二靜慮衆同分業生少光天既生  
彼已惟受彼下品善法異熟果但由中品善  
引第二靜慮衆同分業生無量光天既生彼  
已惟受彼中品善法異熟果但由上品善引  
第二靜慮衆同分業生極光淨天既生彼已  
惟受彼上品善法異熟果但由下品善引第  
三靜慮衆同分業生少淨天既生彼已惟受

彼下品善法異熟果但由中品善引第三靜慮衆同分業生無量淨天既生彼已惟受彼中品善法異熟果但由上品善引第三靜慮衆同分業生徧淨天既生彼已惟受彼上品善法異熟果但由下品善引第四靜慮衆同分業生無雲天既生彼已惟受彼下品善法異熟果但由中品善引第四靜慮衆同分業生福生天既生彼已惟受彼中品善法異熟果但由上品善引第四靜慮衆同分業生廣果天既生彼已惟受彼上品善法異熟果但

由下品雜修靜慮引第四靜慮衆同分業生無煩天既生彼已惟受彼下品雜修靜慮法異熟果但由中品雜修靜慮引第四靜慮衆同分業生無熱天既生彼已惟受彼中品雜修靜慮法異熟果但由上品雜修靜慮引第四靜慮衆同分業生善現天第十既生彼已惟受彼上品雜修靜慮法異熟果但由上品雜修靜慮引第四靜慮衆同分業生善見天第十既生彼已惟受彼上品雜修靜慮法異熟果但由上極品雜修靜慮引第四靜慮衆同分

業生色究竟天既生彼已惟受彼上極品雜  
修靜慮法異熟果有三品善引空無邊處無  
別異眾同分業隨由一品生空無邊處既生  
彼已隨其所應受彼三品善法異熟果有三  
品善引識無邊處無別異眾同分業隨由一  
品生識無邊處既生彼已隨其所應受彼三  
品善法異熟果有三品善引無所有處無別  
異眾同分業隨由一品生無所有處既生彼  
已隨其所應受彼三品善法異熟果有三品  
善引非想非非想處無別異眾同分業隨由

一品生非想非非想處既生彼已隨其所應  
受彼三品善法異熟果問何故初靜慮三品  
善業受無別異熟果上三靜慮三品善業  
受有別異熟果耶答初靜慮中有眾有主  
雜亂而住上三靜慮無此事故有餘師說初  
靜慮中有尋有伺有諸識身及起自地身語  
表業上三靜慮無此事故復次欲界中不善  
業有一劫異熟果善業不爾欲界中不善業  
有五趣異熟果善業不爾問何故欲界中不  
善業有一劫異熟果善業不爾耶答欲界是

不定界非修地非離染地不善業勝善業劣  
故復次欲界中不善法難斷難破難可越度  
善不爾故復次欲界中不善根強善根弱故  
復次欲界中不善如主善如客故復次欲界  
中不善法因常增長善因不爾故復次欲界  
中不善根能斷善根善根不能斷不善根故  
復次欲界中威儀雜亂猶如夫妻不善法增  
善法減故復次欲界中威儀無雜如旃荼羅  
子與賊子同因不善法增善法減故復次欲  
界中無器可受善業一劫異熟故問豈無洲

渚妙高山王七金山等一劫器耶答彼是增  
上果非異熟果今依異熟果故作是說復次  
欲界善業極增上者亦有能感一劫異熟如  
是善業要離非想非非想處第九品得已離  
染業定不能引衆同分果是故欲界無善能  
受一劫異熟復次諸善法中最上品者謂無  
漏善彼無異熟有漏善中最上品者謂有頂  
善彼非欲界是故欲界善業無有一劫異熟  
不善業中最上品者謂引無間衆同分業是  
故彼有一劫異熟問何故善業極增上者能

感有頂八萬大劫不善惟感一中劫耶答善業多界多地修習諸不善業不如是故問何故欲界中不善業有五趣異熟果善業不爾耶答前來所說皆是此因謂欲界中不善業勝此中復有一不共因謂欲界是不善因故如有惡田嘉苗難植穢草易生欲界亦爾善業難茂不善易生故不善業於一趣全四趣少分受異熟果善業惟於四趣少分受異熟果有餘師說善與不善互有勝事故不應責謂不善業五趣受果不徧三界善業徧於三

界受果不徧五趣俱勝事者謂善惡業俱徧四生受異熟果又俱能受五蘊異熟如契經說業是眼因阿毗達磨說大種是眼因即彼復說眼是眼因問如是三說豈不相違答無相違失謂依異熟因故契經中說業是眼因依生因依住因持因養因故阿毗達磨說大種是眼因依同類因故即彼復說眼是眼因問若大種及眼亦是眼因何故契經惟說業是眼因答業是本故如說由業種種差別勢力施設諸趣種種差別乃至由根種種差

別勢力施設補特伽羅種種差別復次業是有情差別因故謂由業故有情好醜貴賤差別復次業是七眾差別因故謂由業故有苾芻等軌範差別復次業能分別愛非愛果有差別故復次業是愚智能表相故復次業印動十衆生今差別故復次諸根差別由業別故如十三牙差別由種別故復次諸有情類壽量增減進退興衰皆由業故復次諸界諸趣諸生差別皆由業故由如是等種種因緣契經但說業是眼因如契經說於殺生罪數習廣布當

墮地獄傍生鬼趣後生人中壽量短促問爲由此業墮諸惡趣即由此業壽短促耶有作是說由此惡業墮諸惡趣即由此業還來人中壽量短促彼經不說有別因故復有說者由殺生加行墮諸惡趣由殺生根本後生人中壽量短促復有說者墮諸惡趣是殺生異熟果後生人中壽量短促是殺生等流果復有說者由害生命墮諸惡趣由食彼肉後生人中壽量短促復有說者害生命者有二過失一者生彼非愛苦受二者斷彼所愛壽量



由生彼非愛苦受故墮諸惡趣由斷彼所愛  
壽量故後生人中壽量短促尊者世友說曰  
人中壽量短者非殺業異熟果以人天趣命  
等八根是異熟者惟是善業異熟果故然造  
業者昔在人中先造能引人壽量業次後復  
造害生命業此業與前作損害事前業應受  
二十年壽由後損害但受十年故人壽短促  
非彼異熟果如契經說十歲時人由能受行  
善業道故所生男女壽二十歲問無他造業  
他受果理何故十歲父母修善令所生子壽

二十歲尊者世友作如是言即十歲人共修  
善故命終轉作二十歲子故無他作他受過  
失大德說曰業異熟果各別決定謂二十歲  
業感二十歲果乃至八萬歲業感八萬歲果  
然由父母修善業故令子所造業能與果雖  
無他作業他受果理而有互為緣業與果義  
問十歲時人不殺生等成業道不有作是說  
彼非業道但共立制不害生等無增上心決  
意受持不殺等故有餘師說亦有業道彼亦  
專心展轉相對受遠離故復次施設論說有

四種死一壽盡故死非財盡故如有一類有短壽業及多財業彼於後時壽盡故死非財盡故二財盡故死非壽盡故如有一類有少財業及長壽業彼於後時財盡故死非壽盡故三壽盡故死及財盡故如有一類有短壽業及少財業彼於後時壽盡故死及財盡故四非壽盡故死亦非財盡故如有一類有長壽業及多財業彼於後時雖財與壽二俱未盡而遇惡緣非時而死作彼論者顯有橫死故作是說佛雖財壽俱未盡故而般涅槃然

非橫死邊際定力所成辦故功德威勢未窮盡故諸餘有情於命終位威勢窮盡佛不如是復次施設論說頗有不受順現法受業異熟而受順次生受業及順後次受業異熟耶答有謂順現法受業異熟不現在前順次生受業及順後次受業異熟現前頗有不受順次生受業異熟而受順現法受業及順後次受業異熟耶答有謂順次生受業異熟不現在前順現法受業及順後次受業異熟現前頗有不受順後次受業異熟而受順現法受

業及順次生受業異熟耶答有謂順後次受業異熟不現在前順現法受業及順次生受業異熟現前此要證得阿羅漢果方有是事非不得者問有學異生亦應有如是事何故彼論但說阿羅漢耶答惟阿羅漢有勝定慧熏修身故有如是能有學異生無如是事復次惟阿羅漢能善知自業有近有遠有可轉有不可轉諸可轉者以修力轉之若不可轉者引現前受無後有故譬如有人欲適他國所有債主悉來現前彼人即便迴轉酬償此

說滿業可有是事衆同分業不並受故又一相續無斷續故有餘師說有業前生雖受異熟而有餘殘今時證得阿羅漢果以勝修力及決擇力引現前受惟阿羅漢有如是能故彼偏說問異熟因以何為自性答一切不善善有漏法已說自性所以今當說問何故名異熟因異熟是何義答異類而熟是異熟義謂善不善因以無記為果果是熟義如前已說此異熟因定通三世有異熟果云何能作因乃至廣說問何故作此論答為止他宗顯

正理故謂或有執諸法生時無因而生如諸  
外道為止彼執顯諸法生決定有因或復有  
執諸法生時雖由因生而諸法滅時不由因  
滅如譬喻者為止彼執顯諸法生滅無不由  
因或復有執惟有為法是能作因非無為法  
為止彼執顯無為法亦能作因或復有執諸  
能作因皆有作用取果與果為止彼執顯能  
作因亦有不能取果與果但不為障亦立為  
因或復有執自性於自性亦是能作因為止  
彼執顯自性於自性非能作因或復有執諸

無為法亦有能作因為止彼執顯有為法有  
能作因非無為法或復有執後法於前非能  
作因為止彼執顯能作因於前於後及俱諸  
法皆能為因為止此等種種異執顯示正因  
故作斯論云何能作因答眼及色為緣生眼  
識此眼識以彼眼色彼相應法彼俱有法及  
耳聲耳識鼻香鼻識舌味舌識身觸身識意  
法意識有色無色有見無見有對無對有漏  
無漏有為無為等一切法為能作因除其自  
性如眼識耳鼻舌身意識亦爾是謂能作因

此中彼相應法彼俱有法者謂眼識相應俱有諸法問前眼色等六二門法或六三門法善標善釋施設顯示一切法體為能作因其義已足何故復說有色無色等五二法耶答前是廣說後是畧說前是別說後是總說前是分別說後是不分別說前是漸說後是頓說如是顯示其義明了問此中何故不但說言云何能作因答一切法答若作是說應自性與自性作能作因問若爾何故不作是說云何能作因答一切法除其自性答若作是

說應無為亦有能作因無簡別故問若爾何故不作是說云何能作因答一切有為法除其自性答若作是說應無為法非能作因問何故此中但說六識以所餘法為能作因非餘有為法耶答識於諸法最為勝故此中六因皆就勝說並不盡理問若爾眼識除其自性餘一切法是能作因何故此中先說眼色次說彼相應俱有法後說耳等一切法耶答眼色與眼識作所依所緣能作因義勢用強故相應俱有法與眼識作能作因勢用親故

耳等不爾是故後說問何故自性於自性非  
能作因耶答若自性於自性為能作因者則  
應因果能作所作能生所生能引所引能相  
所相能轉所轉能續所續皆無差別因果等  
二既有差別故於自性非能作因復次自性  
於自性無益無損無增無減無成無壞無進  
無退故非能作因復次自性於自性非因非  
等無間非所緣非增上故非能作因復次若  
自性於自性為能作因便違世間諸現見事  
謂指端不自觸眼不自見刀不自割諸有力

人不能自負如是一切復次自性於自性無  
有自在無觀待故非能作因復次自性不依  
自性故非能作因如人依杖得起去杖便倒  
自性於自性無如是義復次無障礙分是能  
作因諸法自性障礙自性故非能作因障礙  
有二種一者世俗如人在牀障礙餘者二者  
勝義如自性障礙自性令不自在復次若自  
性於自性為能作因應說無明緣無明等非  
無明緣行等應說眼識為緣生眼識等非眼  
色為緣生眼識等是故自性於自性非能作

因其義決定

阿毗達磨大毗婆沙論卷第二十

說一切有部發智

音釋

啞子答切象口聚食也 措丘皆切摩也 稗旁卦切稗也  
 也斛斗曰斛 實尸羊切與商同 漬疾智切浸也  
 伺相吏切察也

永樂北藏

大毗婆沙論

第一〇六册

永樂北藏

大毗婆沙論

第一〇六册



阿毗達磨大毗婆沙論卷第二十一 神一

五百大阿羅漢等造

唐三藏法師玄奘奉詔譯

雜蘊第一中智納息第二之十三

能作因體即增上緣俱一切法為自性故然  
義有異謂多勝義是增上緣義不障礙義是  
能作因義問若多勝義是增上緣義則所緣  
緣亦應名增上彼體亦攝一切法故如品類  
足論辯此二緣俱以一切法為自性故答若  
依相續則此二緣寬狹相似若依刹那則增

永樂北藏

大毗婆沙論

上緣體義多勝謂緣一切法非我行相現在  
前時一切法中非所緣者謂此自性相應俱  
有非增上者唯此自性由此相應俱有諸法  
是此增上非所緣故問若不障礙義是能作  
因義者則能作因體應不攝一切法謂一有  
情若有一趣蘊界處起即此有情更無第二  
蘊界處生若依一眼一眼識生於中更無第  
二識起如於一處若有一樹無第二樹若有  
一舍無第二舍如是諸法互相障礙云何此  
因攝一切法答雖有此事而理無違謂一有

第一〇六册

情若有一趣蘊界處起義語諸餘蘊界處曰  
我於汝等不爲障礙隨汝等生設我與汝爲  
障礙者汝等於彼則不得生若依一眼眼識  
現前此識義語餘眼識言我於汝等不爲障  
礙隨汝等生設我與汝爲障礙者汝等於彼  
不得現前樹及舍喻准此應說又即於彼爲  
障礙者彼若生時亦不爲礙是故一法將欲  
生時餘一切法皆不爲礙設有一法障礙彼  
者彼法爾時應不得起故不障礙義是能作  
因義而能作因攝一切法

問因緣和合故諸法生因緣和合故諸法滅  
因緣無有不和合時諸法云何不恒生滅尊  
者世友作如是言一生和合故諸法生一滅  
和合故諸法滅生滅和合無二無多諸法云  
何恒生恒滅復作是言因緣和合諸法生已  
次後相續無量刹那神一連注覆壓不能復起如  
人墮崖復爲上土續續覆壓彼人爾時尚不  
能動況得起耶大德說曰和合因緣既唯暫  
有云何諸法恒生滅耶尊者覺天作如是說  
諸法生滅各唯一時應有作用生已復生滅

已復滅便爲無用是故諸法生滅非恒問因緣和合生諸法時因緣功能爲多爲一若言唯一云何依多若言有多云何和合答可說爲一可說爲多辨一事故依多體故復次因緣功能相隨順故可說爲一生多法故可說爲多復次因緣功能同令諸法起作用故可說爲一起色受等作用別故可說爲多若彼功能無多種者所起作用色非色等應無差別是故諸法因緣功能不可定言是多是一問如是因緣故諸法得生亦有因緣故諸法

滅耶譬喻尊者作如是說生待因緣滅則不爾如人射時發箭須力墮則不然如陶家輪轉時須力止則不爾阿毗達磨諸論師言諸法生滅俱待因緣以滅與生皆是用故問前所說喻當云何通答不必須通非三藏故然凡聖法異不可例同又箭與輪亦由因墮止箭墮因者謂排楯的等設無餘因則彎弓等亦是其因若不先射今何由墮輪止因者謂手杖等設無餘因則能轉者亦是其因若先不轉今何由止問若排手等障礙箭輪令其

墮止如何與彼爲能作因答排手等物障彼  
行轉非礙墮止爲能作因於理何失問若法  
生滅俱待因緣生滅因緣一切時有何不生  
時亦滅滅時亦生耶尊者世友作如是說生  
滅兩時和合各異是故生時無滅滅時無生  
不可一因有二果故復作是說生時因緣隨  
順彼法滅時因緣違害彼法雖彼因緣前後  
體一而損益用時分不同猶如苾芻解安居  
已携持衣鉢遊歷諸寺有賊見之先申禮敬  
恭順隨逐後至曠野奪其衣鉢凌辱而去生

滅因緣亦復如是大德說曰生滅兩事既互  
相違如何俱有尊者妙音作如是說諸法生  
時未有作用當何所滅諸法滅時已有作用  
復何所生問一法既與多法爲能作因多法  
亦與一法爲能作因一法與多法爲能作因  
時爲如一法與多法爲因爲如多法與多法  
爲因耶多法與一法爲能作因時爲如多法  
與一法爲因爲如一法與一法爲因耶設爾  
何失此一法與多法爲能作因時若如一法  
與多法爲因者云何不因一故果亦成一若

如多法與多法爲因者云何不果多故因亦成多此多法與一法爲能作因時若如多法與一法爲因者云何不因多故果亦成多若如一法與一法爲因者云何不果一故因亦成一答應作是說一法與多法爲能作因時亦如多法與一法爲因多法與一法爲能作神一因時亦如一法與多法爲因問若爾一應成多多應成一答我說一亦成多多亦成一此依作用不依實體我說諸因以作用爲果非以實體爲果又說諸果以作用爲因非以實

體爲因諸法實體恒無轉變非因果故然無爲法名能作因但不爲障非能辨果復次有爲法與有爲法爲能作因亦以彼爲增上果有爲法不與無爲法爲能作因亦不以彼爲增上果無爲法不與無爲法爲能作因亦不以彼爲增上果無爲法與有爲法雖爲能作因而不以彼爲增上果以無取果與果用故問何故有爲法有因有果無爲法無因無果耶答有爲法流轉世故有因有果無爲不爾故無因果如遠行者須具資糧能有所至非

不行者復次有為法有作用故有因有果無  
 為不爾故無因果如營務者須備作具能有  
 所成非不營者復次有為法有生滅故有因  
 有果無為不爾故無因果復次有為法有和  
 合故有因有果無為不爾故無因果復次有  
 為法有三相故有因有果無為不爾故無因  
 果復次有為法性羸劣故有因有作用故有  
 果如羸劣者依他而住非勇健者無為不爾  
 故無因果復次有為法如王如王眷屬如富  
 貴者如富貴者眷屬如因陀羅如因陀羅眷

屬故有因有果無為不爾故無因果問有為  
 法不生者為有為法為留難故令彼不起為  
 無為法為留難故彼不生耶答以有為法為  
 留難故令彼不起非無為法無為與彼為能  
 作因於一切時不障礙故如注水瀆水若不  
 流自為餘因非瀆為障問無為法與有為法  
 為能作因及增上緣時何者為勝為緣彼者  
 為餘法耶答等無差別如兩豆聚若無為法  
 與有為法為所緣緣有是有非復次過去法  
 與過去法為能作因亦以彼為增上果過去

法與未來現在法爲能作因亦以彼爲增上  
果義言我若不與汝爲近能作因者汝則無  
因然有爲法無無因者未來法與未來法爲  
能作因亦以彼爲增上果未來法與過去現  
在法爲能作因然不以彼爲增上果所以者  
何果與因俱或在後故義言我若不與汝爲  
近能作因者汝則無果然有爲法無無果者  
現在法與現在法爲能作因亦以彼爲增上  
果現在法與未來法爲能作因亦以彼爲增  
上果義言我若不與汝爲近能作因者汝則

無因然有爲法無無因者現在法與過去法  
爲能作因然不以彼爲增上果果與因俱或  
在後故義言我若不與汝爲近能作因者汝  
則無果然有爲法無無果者問何故後法與  
前法爲能作因而前法非後法增上果耶答  
不障礙義是能作<sup>神一</sup>因義後法於前法<sup>六</sup>不障礙  
故得爲能作因果必是因力所取與後法於  
前無取與力故前法非後果如有爲法以無  
爲法爲能作因而非彼果彼無取果與果力  
故復次善法與善法爲能作因亦以彼爲增

上果善法與不善無記法爲能作因亦以彼  
爲增上果不善法與不善法爲能作因亦以  
彼爲增上果不善法與善無記法爲能作因  
亦以彼爲增上果無記法與無記法爲能作  
因亦以彼爲增上果無記法與善不善法爲  
能作因亦以彼爲增上果如善不善無記法  
展轉爲能作因及增上果如是三界繫不繫  
法學無學非學非無學法見所斷修所斷不  
斷法有色無色法有見無見法有對無對法  
有漏無漏法相應不相應法等應知亦爾復

次有善法與善法爲近能作因如由善業生  
樂善家生已復能多修妙行有善法與不善  
法爲近能作因如由善業生富貴家生已放  
逸多造惡行有不善法與不善法爲近能作  
因如由不善業生不律儀家生已復造衆多  
惡行有不善法與善法爲近能作因如由不  
善業身遭病惱或失財位心生厭悔修諸妙  
行有內法與內法爲近能作因如一有情供  
多人衆有內法與外法爲近能作因如諸農  
夫種植稼穡有外法與外法爲近能作因如



水糞等生長苗稼有外法與內法為近能作  
因如飲食等長養有情有一趣法與五趣法  
為近能作因如有多人食一羊肉身強盛已  
有作善業有作惡業作善業者得生人天作  
惡業者墮三惡趣

問若一有情害生命時一切有情不障礙彼  
無不與彼為能作因何不一切俱得殺罪答  
彼能殺者起殺加行亦令果滿故得殺罪餘  
不爾故不得殺罪復次彼起惡心亦斷他命  
故得殺罪餘不爾故不得殺罪餘業道等准

此應知問諸外財物一切有情共業所起何  
故盜者唯於財主得罪非餘答財主於財攝  
受守護餘則不爾是故盜者唯於財主得罪  
非餘復次財主於財作已有想盜者於彼作  
財主想故唯於彼得罪非餘復次若財物於  
彼是士用果及增上果者於彼得罪財物於  
餘一切有情是增上果非士用果是故於彼  
不得盜罪問士用果與增上果有何差別答  
作功力得者是士用果不障礙得者是增上  
果復次財物於作者是士用果於用者是增

上果如諸果實於種植者是士用果亦增上  
果於食用者唯增上果如諸財物於營求者  
是士用果亦增上果於受用者唯增上果  
問此器世界蘇迷盧山洲渚等物一切有情  
共業所起於中若有般涅槃者何故此物不  
減少耶尊者世友作如是說若物是彼士用  
果及近增上果者亦有減少蘇迷盧等但是  
彼遠增上果故無減少復作是說蘇迷盧等  
一切有情共業所起假使此中一有情在由  
彼業力所任持故亦不減少況有無量無邊

有情未得滅度如富貴者雖已命終而彼宮  
殿園林象馬不隨隱沒是餘有情業力持故  
此亦如是復作是說此中雖有無量有情得  
般涅槃及生他處復有無量無邊有情來生  
此界由彼業力故不減少尊者覺天作如是  
說此是過去業力所持故無減少問如轉輪  
王於四洲渚皆得自在是何果耶答自身威  
勢是異熟果所統領物是增上果彼於過去  
修習增上自身器具諸善業故今得如是二  
殊勝果復次有三種增上一自增上一世增

上三法增上自增上者如有一類煩惱未斷惡境現前而爲自護不起惡業勿由斯墮諸惡趣世增上者如有一類煩惱未斷惡境現前護世間故不起惡業勿由斯爲世譏毀有作是說勿由我故世間有情造諸惡業九法增上者如有一類煩惱未斷惡境現前爲護法故不起惡業勿由我故令諸世間輕毀正法此三即是近能作因問何故此三說名增上答以於善法不障礙故是善親近增上緣故問能作因力有增減不答有如多人衆

挽大木時中有盡力不盡力者其盡力者能作因增不盡力者能作因減如後挽木豎剝牽船轉石等時應知亦爾如內於外若外於內外內自望亦復如是問能作因與增上果何者爲多答能作因多增上果少以能作因攝一切有爲無爲法增上果唯攝有爲法故由此故說頗有法於法非能作因耶答有謂自性於自性頗有法於他性非能作因耶答有謂有爲於無爲及無爲於無爲問能作因以何爲自性答一切法已說自性所以今當

說問何故名能作因能作是何義答不障礙  
義是能作義有所辨義是能作義此能作因  
定通三世及離世法有增上果如是已顯六  
因自性今當復顯六因相雜不相雜義問若  
法是相應因彼亦是俱有因耶答若法是相  
應因彼亦是俱有因有法是俱有因彼非相  
應因謂有為不相應法問若法是相應因彼  
亦是同類因耶答應作四句有法是相應因  
非同類因謂未來相應法有法是同類因非  
相應因謂過去現在不相應法有法是相應

因亦同類因謂過去現在相應法有法非相  
應因非同類因謂未來不相應法及無為法  
問若法是相應因彼亦是徧行因耶答應作  
四句有法是相應因非徧行因謂除過去現  
在徧行隨眠及彼相應法諸餘相應法有法  
是徧行因非相應因謂過去現在<sup>十</sup>徧行隨眠  
及彼相應法生住老無常有法是相應因亦  
徧行因謂過去現在徧行隨眠及彼相應法  
有法非相應因非徧行因謂除過去現在徧  
行隨眠及彼相應法生老住無常諸餘不相

應法問若法是相應因彼亦是異熟因耶答  
應作四句有法是相應因非異熟因謂無記  
無漏相應法有法是異熟因非相應因謂不  
善善有漏不相應法有法是相應因亦異熟  
因謂不善善有漏相應法有法非相應因非  
異熟因謂無記無漏不相應法問若法是相  
應因彼亦是能作因耶答若法是相應因彼  
亦是能作因有法是能作因彼非相應因謂  
不相應法問若法是俱有因彼亦是同類因  
耶答若法是同類因彼亦是俱有因有法是

俱有因彼非同類因謂未來法問若法是俱  
有因彼亦是徧行因耶答若法是徧行因彼  
亦是俱有因有法是俱有因彼非徧行因謂  
除過去現在徧行隨眠及彼相應俱有法諸  
餘有為法問若法是俱有因彼亦是異熟因  
耶答若法是異熟因彼亦是俱有因有法是  
俱有因彼非異熟因謂無記無漏有為法問  
若法是俱有因彼亦是能作因耶答若法是  
俱有因彼亦是能作因有法是能作因彼非  
俱有因謂無為法問若法是同類因彼亦是

徧行因耶答若法是徧行因彼亦是同類因  
有法是同類因彼非徧行因謂除過去現在  
徧行隨眠及彼相應俱有法諸餘過去現在  
法問若法是同類因彼亦是異熟因耶答應  
作四句有法是同類因非異熟因謂過去現  
在無記無漏法有法是異熟因非同類因謂  
未來不善善有漏法有法是同類因亦異熟  
因謂過去現在不善善有漏法有法非同類  
因非異熟因謂未來無記無漏法及無為法  
問若法是同類因彼亦是能作因耶答若法

是同類因彼亦是能作因有法是能作因彼  
非同類因謂未來法及無為法問若法是徧  
行因彼亦是異熟因耶答應作四句有法是  
徧行因非異熟因謂過去現在無記徧行隨  
眠及彼相應俱有法有法是異熟因非徧行  
因謂除過去現在不善徧行隨眠及彼相應  
俱有法諸餘不善善有漏法有法是徧行因  
亦異熟因謂過去現在不善徧行隨眠及彼  
相應俱有法有法非徧行因非異熟因謂除  
過去現在無記徧行隨眠及彼相應俱有法

諸餘無記及無漏法問若法是徧行因彼亦是能作因耶答若法是徧行因彼亦是能作因有法是能作因彼非徧行因謂除過去現在徧行隨眠及彼相應俱有法諸餘一切法問若法是異熟因彼亦是能作因耶答若法十一是異熟因彼亦是能作因有法是能作因彼非異熟因謂無記及無漏法

問此六因幾是色幾非色答二唯非色謂相應徧行因餘通色非色如色非色有見無見有對無對有執受無執受是長養非長養是

大種非大種是造色非造色亦爾問此六因幾有漏幾無漏答二唯有漏謂徧行異熟因餘通有漏無漏問此六因幾有為幾無為答五唯有為一通有為無為謂能作因問此六因幾過去幾未來幾現在答三通三世謂相應俱有異熟因二唯過去現在謂同類徧行因一通三世亦離世謂能作因問此六因幾善幾不善幾無記答一唯不善無記謂徧行因一唯善不善謂異熟因餘通三種問此六因幾欲界繫幾色界繫幾無色界繫答二唯

三界繫謂徧行異熟因餘通三界繫及不繫  
 問此六因幾學幾無學幾非學非無學答三  
 唯非學非無學謂徧行異熟因餘通三種問  
 此六因幾見所斷幾修所斷幾不斷答一唯  
 見所斷謂徧行因一唯見所斷修所斷謂異  
 熟因餘通三種問此六因幾染汙幾不染汙  
 答一唯染汙謂徧行因餘通二種如染汙不  
 染汙有罪無罪黑白有覆無覆退非退亦爾  
 問此六因幾有異熟幾無異熟答一有異熟  
 謂異熟因餘通二種問此六因幾是異熟幾

非異熟答二非異熟謂徧行異熟因餘通二  
 種問此六因幾相應幾不相應答一唯相應  
 謂相應因餘通二種如相應不相應有所依  
 無所依有所緣無所緣有行相無行相有警  
 覺無警覺有等無間無等無間亦爾問此六  
 因幾是四諦攝幾非四諦攝答二唯苦集諦  
 攝謂徧行異熟因三唯苦集道諦攝謂相應  
 俱有同類因一通四諦及非諦攝謂能作因  
 問此六因幾是五蘊攝幾非五蘊攝答二唯  
 四蘊攝除色蘊謂相應徧行因三通五蘊攝



謂俱有同類異熟因一通五蘊及非蘊攝謂能作因問此六因幾何處攝答二唯意法處攝謂相應徧行因一唯色聲意法處攝謂異熟因三通十二處攝謂俱有同類能作因問此六因幾何界攝答一唯意法意識界攝謂徧行因一唯七心法界攝謂相應因一唯色聲七心法界攝謂異熟因三通十八界攝謂俱有同類能作因問如是六因誰有何果答相應俱有因有士用果同類徧行因有等流果異熟因有異熟果能作因有增上果其解

脫果是道所證非因所得問如是六因何時取果何時與果答相應俱有因現在取果現在與果一剎那取果一剎那與果取一剎那果與一剎那果同類徧行因現在取果過去現在與果一剎那取果多剎那與果取多剎那果與多剎那果異熟因現在取果過去與果一剎那取果多剎那與果取多剎那果與多剎那果能作因有作是說現在取果過去現在與果一剎那取果多剎那與果取多剎那果與多剎那果有餘師說此能作因過去

現在取果過去現在與果多利那取果多利那與果若取果時即能與果餘如前說若能覺了如是六因即於四果分明照察如觀掌中餘甘子等

復次諸法作用必假因緣因已廣辯次應說緣緣有四種如施設論及見蘊辯然施設論作如是說有法是因緣彼亦是等無間緣亦是所緣緣亦是增上緣乃至有法是增上緣彼亦是因緣亦是等無間緣亦是所緣緣問一切法中有能作四緣者如心心所法有能

作三緣者如色心不相應行有能作二緣者如無為法何故彼說有法是因緣彼亦是等無間緣乃至廣說耶答彼依容有故作是說謂諸法中有心心所具四緣性不說一切皆作四緣若盡理者應作是說問若法是因緣神一彼亦是等無間緣耶答若法是等無間緣彼亦是因緣有法是因緣彼非等無間緣十五謂除過去現在非最後心心所法餘一切有為法問若法是因緣彼亦是所緣緣耶答若法是因緣彼亦是所緣緣有法是因緣緣彼非因

緣謂無爲法問若法是因緣彼亦是增上緣  
耶答若法是因緣彼亦是增上緣有法是增  
上緣彼非因緣謂無爲法問若法是等無間  
緣彼亦是所緣緣耶答若法是等無間緣彼  
亦是所緣緣有法是非所緣緣彼非等無間緣  
謂除過去現在非最後心心所法餘一切法  
問若法是非無間緣彼亦是增上緣耶答若  
法是非無間緣彼亦是增上緣有法是非增上  
緣彼非等無間緣謂除過去現在非最後心  
心所法餘一切法問若法是非所緣緣彼亦是

增上緣耶答如是問若於一法具四緣者應  
但一緣云何立四答依作用立不依物體一  
物體中有四用故謂一刹那心心所法引起  
次後刹那同類心心所故立爲因緣即此開  
避次後刹那心心所法令得生故立爲等無  
間緣即此能爲次後刹那心心所法所取境  
故立爲所緣緣即此不障礙次後刹那心心  
所法令得生故立爲增上緣此中因緣如種  
子法等無間緣如開導法所緣緣如任杖法  
增上緣如不障法如是等過去現在非最後

心心所法具四緣性餘有為法有三緣性三  
 無為法有二緣性皆依義說不依物體一物  
 體中有多義故如諸法中有能作六因者謂  
 過去現在不善徧行隨眠及彼相應法有能  
 作五因者謂過去現在無記徧行隨眠及彼  
 相應法或過去現在不善徧行隨眠及彼相  
 應法生老住無常或過去現在非徧行不善  
 善有漏心心所法有能作四因者謂過去現  
 在無記徧行隨眠及彼相應法生老住無常  
 或過去現在非徧行不善善有漏色心不相

應行或過去現在無漏心心所法或過去現  
 在非徧行無記心心所法或未來不善善有  
 漏心心所法有能作三因者謂過去現在非  
 徧行無記色心不相應行或過去現在無漏  
 色心不相應行或未來不善善有漏色心不  
 相應行或未來無記無漏心心所法有能作  
 二因者謂未來無記無漏色心不相應行有  
 能作一因者謂無為法如一有為有多因義  
 互不相違緣亦應爾問若爾因緣有何差別  
 尊者世友作如是言無有差別因即是緣緣

即是因如契經說二因二緣能生正見謂他  
言音及內如理作意又如大因緣經說佛告  
阿難老死支有如是由有如是因有如是集  
有如是生有如是緣謂生支是也故知因緣  
無有差別復作是說若有此則有彼此是彼  
因亦是彼緣問由有瓶故得有瓶覺豈此瓶  
覺雖瓶爲因答非但有瓶則有瓶覺以無瓶  
時亦有瓶覺雖有瓶時無瓶覺故然有和合  
故得有瓶覺是故和合是瓶覺因緣有作是  
說和合是因此和合因說名爲緣問若一

別不名爲因衆事和合亦應非因答如一  
別不名和合衆事聚集即名和合故一一別  
不名爲因衆事和合得名爲因復有說者同  
類是因異類是緣如火於火麥於麥芽說名  
同類問麥於麥芽有何同類若同稱麥名同  
類者應田水等大種同故亦名同類則田水  
等應是麥因復有說者近者是因遠者是緣  
問若爾因與等無間緣應無差別又善心無  
間起不善或無記心應是因非緣復有說者  
不共是因共者是緣問若爾眼於眼識應是

因非緣以不共故又麥於芽灰應是緣非因以是共故復有說者能生者是因隨能生者是緣問若爾生支於老死應非緣隨順生支有等於老死應非因復有說者能長養自相續者是因能長養他相續者是緣問若爾緣自相續所起善心惟長養自相續應是因非緣大德說曰轉是因隨轉是緣近是因遠是緣如近遠在此在彼和合不和合在此身在餘身應知亦爾問若爾同類隨轉應是緣非因無明緣行等應是因非緣故因緣體雖無

差別而義有異謂因義親緣義是疎為表此義說因有六說緣有四若不爾者名數應同阿毗達磨大毗婆沙論卷第二十一說一切有部發

音釋

覆覆敷救切蓋也 壓壓乙甲切鎮也 排排步皆切插食 楯楯兵為關切 劣劣力追切瘦也 挽挽無 堅堅臣庚切 也也切引

大

阿毗達磨大毗婆沙論卷第二十二 神二

五百大阿羅漢等造

唐三藏法師玄奘奉詔譯

雜蘊第一中智納息第二之十四

諸心由隨眠故名有隨眠心彼隨眠於此心

神二

一

隨增耶乃至廣說問何故作此論答為止他  
宗顯正理故謂或有執但有一心如說一心  
相續論者彼作是說有隨眠心無隨眠心其  
性不異聖道現前與煩惱相違不違心性為  
對治煩惱非對治心如浣衣磨鏡鍊金等物

與垢等相違不違衣等聖道亦爾又此身中  
若聖道未現在前煩惱未斷故心有隨眠聖  
道現前煩惱斷故心無隨眠此心雖有隨眠  
無隨眠時異而性是一如衣鏡金等未浣磨  
練等時名有垢衣等若浣磨練等已名無垢  
衣等有無垢等時雖有異而性無別心亦如  
是為止彼執顯有隨眠心與無隨眠心其性  
各異或復有執隨眠不於所緣隨增亦不於  
相應法有隨增義如譬喻者彼作是說若隨  
眠於所緣隨增者於他界地及無漏法亦應

隨增是所緣故如自界地若於相應法有隨增義者則應未斷已斷一切時隨增相應畢竟不相離故猶如自性爲止彼執顯諸隨眠於所緣相應俱有隨增義謂於自界地有漏法及相應法乃至未斷恒隨增故或復有執隨眠唯於補特伽羅有隨增義如犢子部彼作是說補特伽羅名有隨眠及無隨眠非心等法補特伽羅有縛解故爲止彼執顯唯心等有縛有解名有隨眠及無隨眠非數取趣畢竟無故爲止此等他宗及顯無顛倒理故

作斯論諸心由隨眠故名有隨眠心彼隨眠於此心隨增耶答或隨增或不隨增云何隨增謂彼隨眠與此心相應未斷及緣此心云何不隨增謂彼隨眠與此心相應已斷此中諸心者有五部心補二謂見苦所斷心乃至修所斷心隨眠者有五部隨眠謂見苦所斷隨眠乃至修所斷隨眠由二事故名有隨眠心一由隨眠於此心有隨增性二由隨眠於此心有同伴性謂見苦所斷心於見苦所斷隨眠由二事故名有隨眠心於見集所斷隨眠由



一事故名有隨眠心謂隨增性於餘隨眠無  
 二事故非有隨眠心見集所斷心於見集所  
 斷隨眠由二事故名有隨眠心於見苦所斷  
 隨眠由一事故名有隨眠心謂隨增性於餘  
 隨眠無二事故非有隨眠心見滅所斷心於  
 見滅所斷隨眠由二事故名有隨眠心於見  
 苦集所斷隨眠由一事故名有隨眠心謂隨  
 增性於餘隨眠無二事故非有隨眠心見道  
 所斷心於見道所斷隨眠由二事故名有隨  
 眠心於見苦集所斷隨眠由一事故名有隨

眠心謂隨增性於餘隨眠無二事故非有隨  
 眠心修所斷心於修所斷隨眠由二事故名  
 有隨眠心於見苦集所斷隨眠由一事故名  
 有隨眠心謂隨增性於餘隨眠無二事故非  
 有隨眠心復次見苦所斷心有二種一徧行  
 隨眠相應心二非徧行隨眠相應心見集所  
 斷心亦爾見滅所斷心有二種一有漏緣隨  
 眠相應心二無漏緣隨眠相應心見道所斷  
 心亦爾修所斷心有二種一染汙心二不染  
 汙心見苦所斷徧行隨眠相應心於見苦所

斷徧行隨眠由二事故名有隨眠心於見苦  
所斷非徧行隨眠及見集所斷徧行隨眠由  
一事故名有隨眠心謂隨增性於餘隨眠無  
二事故非有隨眠心見苦所斷非徧行隨眠  
相應心於見苦所斷非徧行隨眠由二事故  
名有隨眠心於見苦集所斷徧行隨眠由一  
事故名有隨眠心謂隨增性於餘隨眠無二  
事故非有隨眠心見集所斷徧行隨眠相應  
心於見集所斷徧行隨眠由二事故名有隨  
眠心於見集所斷非徧行隨眠及見苦所斷

徧行隨眠由一事故名有隨眠心謂隨增性  
於餘隨眠無二事故非有隨眠心見集所斷  
非徧行隨眠相應心於見集所斷非徧行隨  
眠由二事故名有隨眠心於見苦集所斷徧  
行隨眠由一事故名有隨眠心謂隨增性於  
餘隨眠無二事故非有隨眠心見滅所斷有  
漏緣隨眠相應心於見滅所斷有漏緣隨眠  
由二事故名有隨眠心於見苦集所斷徧行  
隨眠由一事故名有隨眠心謂隨增性於餘  
隨眠無二事故非有隨眠心見滅所斷無漏

緣隨眠相應心於見滅所斷無漏緣隨眠由二事故名有隨眠心於見滅所斷有漏緣隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心見道所斷有漏緣隨眠相應心於見道所斷無漏緣隨眠由二事故名有隨眠心於見苦集所斷徧行隨眠由一事故名有隨眠心謂隨增性於餘隨眠無二事故非有隨眠心見道所斷無漏緣隨眠相應心於見道所斷無漏緣隨眠由二事故名有隨眠心於

見道所斷有漏緣隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心修所斷染汙心於修所斷隨眠由二事故名有隨眠心於見苦集所斷徧行隨眠由一事故名有隨眠心謂隨增性於餘隨眠無二事故非有隨眠心修所斷不染汙心於修所斷隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心復次欲界見苦所斷心有十種謂五見疑愛恚慢

不共無明相應心見集所斷心有七種謂二見疑愛恚慢不共無明相應心見滅所斷心亦爾見道所斷心有八種謂三見疑愛恚慢不共無明相應心修所斷心有五種謂愛恚慢不共無明相應心及不染汙心謂善有漏無覆無記有身見相應心於有身見及彼相應無明由二事故名有隨眠心於餘見苦所斷隨眠及見集所斷徧行隨眠由一事故名有隨眠心謂隨增性於餘隨眠無二事故非有隨眠心如是乃至見苦所斷慢相應心應

知亦爾見苦所斷不共無明相應心於見苦所斷不共無明由二事故名有隨眠心於餘見苦所斷隨眠及見集所斷徧行隨眠由一事故名有隨眠心謂隨增性於餘隨眠無二事故非有隨眠心見集所斷心應知亦爾見滅所斷邪見相應心於見滅所斷邪見及彼相應無明由二事故名有隨眠心於見滅所斷有漏緣隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心見滅所斷疑相應心應

知亦爾見滅所斷見取相應心於見滅所斷見取及彼相應無明由二事故名有隨眠心於餘見滅所斷有漏緣隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心見滅所斷愛恚慢相應心應知亦爾見滅所斷不共無明相應心於見滅所斷不共無明由二事故名有隨眠心於見滅所斷有漏緣隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心

見道所斷心應知亦爾修所斷愛相應心於修所斷愛及彼相應無明由二事故名有隨眠心於餘修所斷隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心修所斷恚慢相應心應知亦爾修所斷不共無明相應心於修所斷不共無明由二事故名有隨眠心於餘修所斷隨眠及見苦集所斷徧行隨眠由一事故名有隨眠心謂隨增性於餘隨眠無二事故非有隨眠心修所斷不染汚心於修

所斷隨眠及見苦集所斷徧行隨眠由一事  
故名有隨眠心謂隨增性於餘隨眠無二事  
故非有隨眠心如說欲界色無色界應知亦  
爾是謂此處略毗婆沙如是所說三界五部  
隨眠於此三界五部有隨眠心若未斷則隨  
增互相隨順而增長故隨眠於心增縛事故  
若已斷則不隨增不相隨順非增長故隨眠  
於心無縛事故然未斷位心於相應所緣隨  
眠俱得建立有隨眠名以相應者具二事故  
緣縛心者但隨增故若已斷位此心唯於相

應隨眠可得建立有隨眠名非彼先來緣縛  
心者無隨增故相應隨眠於心猶有同伴性  
故問何故心於相應隨眠已斷未斷俱得建  
立有隨眠名於所緣隨眠唯未斷位可得建  
立有隨眠名非已斷位耶答前來已說心於  
隨眠由二事故名有隨眠一隨增性二同伴  
性相應隨眠若未斷位由二事故心於彼立  
有隨眠名若已斷位彼於此心雖無隨增性  
而有同伴性故猶可立有隨眠名所緣隨眠  
若未斷位於心唯有隨增性故心於彼立有

神二

七

隨眠名若已斷位二事俱無故心於彼不復可立有隨眠名問若相應隨眠於相應心若未斷位有隨增性及同伴性若已斷位雖無隨增性而有同伴性心恒於彼名有隨眠者行所緣隨眠於所緣心若未斷位有隨增性及所緣性若已斷位雖無隨增性而有所緣性何故心於彼不恒建立有隨眠名答相應隨眠於相應心極相親近衆事皆等不可相離如羊與皮故斷未斷恒名相有所緣隨眠與所緣心非極親近衆事不等未嘗和合若

未斷時由隨增性可說相有若已斷位極疏遠故不說相有此中有名依親強立非如立有所緣等名尊者世友作如是說相應隨眠染汙心故所緣隨眠不如是故復次相應隨眠不離心故所緣隨眠不如是故復次相應隨眠覆蔽心故所緣隨眠不如是故復次相應隨眠隨心轉故所緣隨眠不如是故復次相應隨眠擾亂心故所緣隨眠不如是故復次相應隨眠與相應心同一所依同一所緣同一行相同一果同一等流同一異熟俱生

俱住俱異俱滅極親近故所緣隨眠不如是  
故大德說曰相應隨眠令相應心剛強懽候  
智者訶厭難可出離所緣隨眠於所緣心無  
此事故尊者妙音作如是說相應隨眠令相  
應心發起染汙如烟燄得障礙聖果所緣隨  
眠於所緣心無此事故尊者覺天作如是說  
相應隨眠令相應心於所緣境迷謬不了所  
緣隨眠於所緣心無此事故由如是等種種  
因緣相應隨眠斷未斷位恒令心得有隨眠  
名所緣隨眠唯未斷位可令心得有隨眠名

若已斷位則不名有設隨眠於心隨增此心  
但由彼隨眠故名有隨眠心耶答或由彼非  
餘或由彼及餘云何由彼非餘謂此心未斷  
云何由彼及餘謂苦智已生集智未生若心  
見苦所斷見集所斷隨眠所緣此中由彼非  
餘者謂有隨眠心但由彼於心隨增隨眠故  
名有隨眠心非由餘於心不隨增隨眠故名  
有隨眠心謂此心未斷者若心未斷必但由  
彼於心隨增隨眠故名有隨眠心非由餘於  
心不隨增隨眠故名有隨眠心有說此文應



作是說謂具縛者諸染汙心彼不應作是說  
以具縛者不具縛者有染汙心無染汙心皆  
可爾故但應作是說謂此心未斷諸未斷心  
名有隨眠神二但由於心隨增隨眠非由餘故由  
彼及餘者謂有隨眠心由彼於心隨增隨眠  
故名有隨眠心及由餘於心不隨增隨眠故  
名有隨眠心謂苦智已生乃至廣說者見苦  
所斷有隨眠心爾時由彼見集所斷於心隨  
增徧行隨眠故名有隨眠心及由餘見苦所  
斷於心不隨增相應隨眠故名有隨眠心如

是即說見苦所斷心於此位中由彼他部於  
心隨增隨眠故及由餘自部於心不隨增隨  
眠故名有隨眠心問何故此中他部隨眠名  
彼自部隨眠名餘答以先問言設隨眠於心  
隨增此心但由彼隨眠故名有隨眠心耶故  
今答言見苦所斷心於此位中非但由彼見  
集所斷於此心隨增徧行隨眠故名有隨眠  
心亦由餘見苦所斷於此心不隨增相應隨  
眠故名有隨眠心如是即說正所問者名彼  
非正所問者名餘他部隨眠爾時未斷猶隨

增故是正所問自部隨眠爾時已斷不隨增故非正所問有說自部隨眠爾時轉至異部位故說之為餘謂前未斷今已斷故有說自部隨眠先得自在隨欲所作今已斷故不得自在無所能作故說為餘有說自部隨眠本來成就今不成就故說為餘有說自部隨眠今為聖道究竟斷滅異昔來故說之為餘有說自部隨眠已為聖道簡別頓斷不同昔來與餘四部同時漸斷故說為餘問修所斷心亦有此義謂斷一品乃至八品已斷染心由

彼未斷及餘已斷名有隨眠何故不說答是作論者意欲爾故乃至廣說復次應說而不說者當知此義有餘復次若異部為彼異部為餘者此中說之修所斷心雖有此義而自部為彼自部為餘故此不說復次此中但說斷已畢竟不復退者修所斷心雖有此義而彼斷已或有復退故不說之問諸隨眠云何於所緣隨增云何於相應隨增耶西方諸師作如是說為繫縛性故於所緣隨增為同伴性故於相應隨增迦濕彌羅

國諸論師言於所緣境各別行相隨報增益故名於所緣隨增於相應法令同自過隨順增益故名於相應隨增有餘師說諸隨眠於所緣隨增如於相應於相應隨增如於所緣問若爾品類足論當云何通如說云何欲貪隨眠隨增謂可愛可樂可喜可意彼於相應無能緣義云何亦說有可愛等答彼顯貪相謂欲貪隨眠有可愛等相故作是說不顯所緣相應異相尊者世友作如是說由四事故說諸隨眠有隨增義一墮惡意故如大衆中

一人造惡令彼多人皆墮惡意如是於一相應品中起一隨眠即令此品心心所法皆墮惡意二如火熱故如置熱鐵小水器中其器及水無不皆熱如是於一心品法中起一煩惱即令一切心心所法皆成熱惱三如烟等故如烟塵垢所著衣服皆成穢惡<sup>十一</sup>如是心品有一隨眠皆成涂汙四可毀馱故如僧衆中有一犯罪衆皆受責如是心品有一隨眠皆可毀馱如於相應有此四事說名隨增於所緣境亦增此四故名隨增謂若所緣增長此

四即說煩惱於彼隨增問過去未來隨眠亦隨增不答彼亦隨增若彼隨眠不隨增者不染汗心現在前位應無隨眠便違經說如說佛告結鬘母言嬰孩小兒仰腹而卧尚不能了欲境勝劣況復能起欲貪纏心然彼欲貪隨眠繫縛問過去未來既無作用云何可說隨眠隨增答彼能起得現在前故如火不現而能起烟尊者妙音作如是說彼雖無有取境作用而於所緣及相應法有如現在繫縛功能故彼隨眠有隨增義尊者設摩達多說

曰由五事故可說過去未來隨眠有隨增義一者彼因未盡故二者彼得未斷故三者未轉彼所依故四者未了彼所緣故五者未得彼對治故諸心由隨眠故名有隨眠心彼隨眠於此心當斷耶答或當斷或不當斷云何當斷謂彼隨眠緣此心云何不當斷謂彼隨眠與此心相應此中顯示隨眠於所緣境可說當斷非於相應謂於所緣可制煩惱令不現起造諸過失非於相應可制煩惱令不復與心等相應故於所緣可說當斷非於相應

有說此文應作是說云何當斷謂彼隨眠緣  
此心未斷云何不當斷謂彼隨眠緣此心已  
斷及與此心相應彼說非理所以者何前問  
諸心由隨眠故名有隨眠心彼隨眠於此心  
當斷不今但應說云何當斷謂彼隨眠緣此  
心於義已足何須更說未斷若彼已斷心不  
由彼名有隨眠便非所問是故不須更說未  
斷又緣此心已斷及言理不應說緣心隨眠  
若已斷者便非所問故但應說云何不當斷  
謂彼隨眠與此心相應其義已足然此中說

十二

十二

諸隨眠於所緣可斷非於相應者依心名有  
隨眠義說不依隨增義說以隨增義俱可斷  
故諸隨眠因何當斷答因所緣前所顯義今  
現其文謂諸隨眠由對治力令彼於境不復  
起過可說當斷如人制子不令復入酒舍淫  
舍博戲舍等若令隨眠離相應法無有是處  
是故說彼於相應法無有斷義汝說隨眠因  
所緣當斷耶答如是若爾諸隨眠見滅道所  
斷有漏緣彼隨眠因何當斷若言此斷彼斷  
俱不應理答見滅道所斷無漏緣隨眠因所

緣故斷由此斷故彼亦斷此中意說要因慧見煩惱所緣隨眠方斷爲成此理問答難通汝說隨眠因所緣當斷耶者是問前雖略說而未審定若不審定他宗所許說他過失無有是處答如是者是答要因慧見煩惱所緣隨眠方斷其理決定更無異趣神二故言如是若爾諸隨眠見滅道所斷有漏緣彼隨眠因何當斷若言此斷彼斷俱不應理者是難彼難意言見滅道所斷有漏緣隨眠因何當斷若言因慧見此苦集故得斷者其理不然見苦

集時此未斷故若言因慧見彼滅道故得斷者理亦不然滅道非此所緣境故答見滅道所斷無漏緣隨眠因所緣故斷由此斷故彼亦斷者是通此通意言見滅道所斷有漏緣隨眠依止無漏緣隨眠故而得生長見滅道時此無漏緣隨眠斷故彼見滅道所斷有漏緣隨眠亦隨斷如羸病人依杖而立去杖便倒此亦如是問前定宗言要因慧見煩惱所緣隨眠方斷今乃通言所緣斷故能緣隨斷豈不相違答無相違失慧見所緣隨眠尚斷

況所緣斷而不斷耶如果依樹動樹尚墮況樹傾倒而果不落此亦如是又前所說要因慧見煩惱所緣隨眠方斷者不說要因慧見所斷煩惱所緣隨眠方斷但說要因慧見有煩惱所緣隨眠方斷故不相違謂因慧見

無漏緣煩惱所緣滅道故見滅道所斷有漏緣隨眠亦斷由此理趣苦集法忍能斷緣上徧行隨眠修道位中滅道二智能斷九地修所斷惑有餘師說因所緣故隨眠斷者意顯煩惱所緣斷故隨眠方斷為成此理問答難

通汝說隨眠因所緣當斷耶答如是若爾諸隨眠見滅道所斷無漏緣彼隨眠因何當斷若言此相應斷故斷者其理不然前說隨眠非於相應可說斷故若言彼所緣斷故斷者理亦不然所緣滅道無諸過夫不可斷故答

神二

十四

見滅道所斷有漏緣隨眠斷故此亦隨斷問前定宗言所緣斷故隨眠方斷今說能緣煩惱斷故隨眠方斷豈不相違答無相違失謂無漏緣隨眠依有漏緣隨眠而得生長由彼任持此得相續故彼斷時此亦隨斷如樹莖

等依根而住若斷其根莖等隨倒此亦如是  
 彼說非理違前宗故此本論文難通異故有  
 所緣斷時能緣未斷故有能緣斷時所緣未  
 斷故或復有說因所緣故隨眠斷者意說要  
 因有所緣道隨眠方斷彼說非理以世尊說  
 如是八支聖道能斷過去未來現在衆苦棄  
 捨變吐盡離染滅寂靜涅槃是故應說有所  
 緣道無所緣道俱能斷惑又於後說若難若  
 通俱不相應故彼非理尊者設摩達多說曰  
 由四事故諸隨眠斷一由所緣斷故如見滅

道所斷有漏緣隨眠二由能緣斷故如他界  
 緣隨眠三由俱緣斷故如見苦集所斷非徧  
 行隨眠四隨得對治故如餘隨眠隨得對治  
 彼則隨斷尊者世友作如是說由五事故諸  
 隨眠斷一見所緣故斷如無漏緣隨眠及緣  
 自界徧行隨眠神二二所緣斷故斷如見滅道所  
 斷有漏緣隨眠三能緣斷故斷如緣他界徧  
 行隨眠四俱緣斷故斷如見苦集所斷不徧  
 行隨眠五得對治故斷如修所斷隨眠設隨  
 眠於心當斷此心但由彼隨眠故名有隨眠



心耶答或由彼非餘或由彼及餘云何由彼  
非餘謂心不染汙修所斷云何由彼及餘謂  
心染汙此中不染汙者簡異染汙修所斷者  
簡異無漏謂有漏善心及無覆無記心此心  
由彼者由緣此心隨增隨眠故名有隨眠心  
非餘者非由相應隨眠故名有隨眠心此心  
相應無隨眠故染汙心由彼者由緣此心隨  
增隨眠故名有隨眠心及餘者及由餘相應  
隨眠故名有隨眠心問何故此中所緣隨眠  
說彼相應隨眠說餘答以先問言設隨眠於

心當斷此心但由彼隨眠故名有隨眠心耶  
前說隨眠唯於所緣有當斷義非於相應是  
故彼言唯說當斷所緣隨眠即此隨眠是正  
所問故說爲彼相應隨眠非正所問故說爲  
餘問何故復作如是問答答爲今疑者得決  
定故謂或有疑惟當斷者心由彼故名有隨  
眠相應隨眠不當斷故心不由彼名有隨眠  
欲令此疑得決定故顯染汙心亦由彼故名  
有隨眠或復有疑相應隨眠亦當可斷故今  
復顯相應隨眠無當斷義或復有疑心於隨

眠名為有者但依隨增性故今復顯示依同  
 伴性謂無染汙心但依隨增性名有隨眠若  
 染汙心俱依二性頗有隨眠斷而慧不見彼  
 所緣耶答應作四句有隨眠斷而慧不見彼  
 所緣謂諸異生離欲界乃至無所有處染時  
 斷上地緣及無漏緣神二隨眠若諸聖者現觀欲  
 界苦集諦時斷他界緣隨眠現觀滅道諦時  
 斷見滅道所斷有漏緣隨眠以滅道智離修  
 所斷一切隨眠有慧見彼所緣而隨眠不斷  
 謂諸異生離欲界乃至無所有處染時前後

諸品所斷隨眠離初靜慮乃至無所有處染  
 時欲界乃至識無邊處所有他地緣隨眠若  
 諸聖者現觀色無色界苦集諦時欲界所有  
 他界緣隨眠現觀苦諦時見集所斷自界緣  
 隨眠見滅道所斷有漏緣隨眠及修所斷一  
 切隨眠現觀集諦時見苦所斷自界緣隨眠  
 見滅道所斷有漏緣隨眠及修所斷一切隨  
 眠以苦集智及世俗智離修所斷染時見所  
 斷有漏緣隨眠及前後品修所斷隨眠以滅  
 道智離修所斷染時無漏緣隨眠及餘一切

異生聖者不斷煩惱而見煩惱所緣境時一切隨眠有隨眠斷慧亦見彼所緣謂諸異生離欲界乃至無所有處染時所有自地緣自品隨眠若諸聖者現觀苦集諦時見苦集所斷自界緣隨眠現觀滅道諦時見滅道所斷神二無漏緣隨眠以苦集智及世俗智十七離修所斷染時自地自品修所斷隨眠有隨眠不斷慧亦不見彼所緣謂除前相頗有一剎那頃隨眠斷而慧不見彼所緣耶答應作四句然有多位謂苦集法智忍及滅道法類智忍位皆

有四句苦法智忍位四句者第一句謂欲界見苦所斷他界緣隨眠第二句謂欲界見集所斷自界緣隨眠見滅道所斷有漏緣隨眠及修所斷隨眠第三句謂欲界見苦所斷自界緣隨眠第四句謂除前相集法智忍位隨其所應四句亦爾滅道法類智忍位若先異生位中分離欲界染及於上七地或分或全離者得作四句且滅法智忍位四句者第一句謂欲界見滅所斷先所未離有漏緣隨眠第二句謂欲界見滅所斷先所已離無漏緣

隨眠第三句謂欲界見滅所斷先所未離無漏緣隨眠第四句謂欲界見滅所斷先所已離有漏緣隨眠或除前相滅類智忍及道法類智忍位隨其所應四句亦爾若諸異生離欲界乃至無所有處染時一一無間道中皆得作四句第一句謂自品他地緣隨眠第二句謂前後品自地緣隨眠第三句謂自品自地緣隨眠第四句謂前後品他地緣隨眠或除前相頗有於煩惱斷得而不捨捨而不得亦得亦捨不得不捨耶答有得而不捨者謂

諸異生離欲界乃至無所有處染時若諸聖者斷煩惱時除得果位捨而不得者謂諸異生從離染退下地没生二定以上上二界没生欲界時若諸聖者向中退斷亦得亦捨者謂諸異生上地没生初定以上若諸聖者練根得果及退果時神二不得不捨者謂除前相阿毗達磨大毗婆沙論卷第二十二說一切有部發

阿毗達磨大毗婆沙論卷第二十三 神三

五百大阿羅漢等造

唐三藏法師玄奘奉詔譯

雜蘊第一中智納息第二之十五

頗有於隨眠滅身作證而慧不見彼滅耶答

神三

應作四句有於隨眠滅身作證而慧不見彼滅謂諸異生離欲界乃至無所有處染時所有自地自品諸隨眠滅若諸聖者苦現觀時見苦所斷諸隨眠滅集現觀時見集所斷諸隨眠滅道現觀時見道所斷諸隨眠滅修道

位中以苦集道及世俗智隨其所應離欲界乃至非想非非想處染時所有自地自品修所斷諸隨眠滅若以苦集道及世俗智隨其所應得果及練根成時所證已斷諸隨眠滅有慧見彼滅而身不作證謂滅現觀時見苦集道及修所斷諸隨眠滅修道位中若以滅智離欲界乃至非想非非想處染時除得果位隨現所觀已斷未斷諸隨眠滅及餘一切異生聖者不證擇滅而見滅時即彼所見諸隨眠滅有於隨眠滅身作證慧亦見彼滅謂

滅現觀時見滅所斷諸隨眠滅修道位中若以滅智離欲界乃至非想非非想處染時所證所觀諸隨眠滅若以滅智練根成時所證所觀諸隨眠滅有於隨眠滅身不作證慧亦不見彼滅謂除前相頗有一刹那頃於隨眠滅身作證而慧不見彼滅耶答應作四句謂以滅法智得一來果時有於隨眠滅身作證而慧不見彼滅謂爾時色無色界見所斷諸隨眠滅有慧見彼滅而身不作證謂欲界修所斷後三品諸隨眠滅有於隨眠滅身作證

慧亦見彼滅謂欲界一切見所斷及修所斷前六品諸隨眠滅有於隨眠滅身不作證慧亦不見彼滅謂色無色界修所斷諸隨眠滅如以滅法智得一來果時一刹那頃有四句如是以滅智預流一來或不還者轉根時一刹那頃皆得作四句云何因境斷識答苦智神三已生集智未生若心見集所斷見苦所斷緣是謂因境斷識此中若識因斷境斷自體未斷名因境斷識諸有欲令徧行隨眠及彼相應俱有諸法於自部非徧行因者彼作是說

苦智已生集智未生若心見集所斷見苦所  
斷緣此心因全斷境全斷自體未斷故名因  
境斷識爾時若心見集所斷見集滅道修所  
斷緣此心因雖全斷而境未斷故非因境斷  
識爾時若心見集所斷見苦集滅道修所斷  
緣此心因雖全斷而境有斷有未斷故非因  
境斷識諸有欲令徧行隨眠及彼相應俱有  
諸法亦作自部徧行因者彼作是說苦智已  
生集智未生若心見集所斷見苦所斷緣此  
心自部因雖未斷而他部因全斷境全斷自

體未斷故名因境斷識爾時若心見集所斷  
見集滅道修所斷緣此心因有斷有未斷境  
未斷故非因境斷識爾時若心見集所斷見  
苦集滅道修所斷緣此心因境俱有斷有未  
斷故非因境斷識已顯因境斷識自性次應  
顯彼隨眠隨增神三問於此識有幾隨眠隨增耶  
答十九問一心耶答不爾其事云何謂未離  
欲染苦法智已生集法智未生若心欲界見  
集所斷見苦所斷緣此因境斷識欲界見集  
所斷七隨眠隨增四於此識相應所緣隨眠

隨增謂邪見見取疑無明三於此識唯有所斷隨眠隨增謂愛恚慢已離欲染未離色染苦類智已生集類智未生若心色界見集所斷見苦所斷緣此因境斷識色界見集所斷六隨眠隨增四於此識相應所緣隨眠隨增如欲界說二於此識唯有所緣隨眠隨增謂愛慢問未離欲染者亦可爾何故說已離欲染耶答此中說容現行者要離下地染上地煩惱方得現行故作是說已離色染苦類智已生集類智未生若心無色界見集所斷見

苦所斷緣此因境斷識無色界見集所斷六隨眠隨增四於此識相應所緣隨眠隨增二於此識唯有所緣隨眠隨增如色界說此中有誦已離色染未離無色染彼不應誦說集類智未生已顯未離無色染故問修所斷中亦可建立因境斷識謂已斷上上品乃至下中品者所未斷八品乃至一品心此心緣前已斷一品乃至八品前一品乃至八品因已斷故亦應名爲因境斷識何故不說答亦應說而不說者當知此義有餘復次若異部識



異部爲因異部爲境而因境斷體未斷者此  
中說之修所斷心自部爲因自部爲境雖因  
境斷而不說爲因境斷識復次此中因者說  
徧行因唯染汙故餘因不定此中識者唯說  
隨眠相應諸心唯染汙故由此所說因境斷

神三

四

識唯在三界見集所斷問何故因後說隨眠  
耶答以阿毗達磨藏義應以十四事覺知謂  
六因四緣攝相應成就不成就若以如是十  
四事覺知阿毗達磨無錯謬者名阿毗達磨  
師非但誦持文者有餘師說應以七事覺知

阿毗達磨藏義謂因善巧緣善巧自相善巧  
共相善巧攝不攝善巧相應不相應善巧成  
就不成就善巧若以如是七事覺知阿毗達  
磨無錯謬者名阿毗達磨師非但誦持文者  
是故因後說諸隨眠於義無失

雜蘊第一中補特伽羅納息第三之一

一補特伽羅於此生十二支緣起幾過去幾  
未來幾現在如是等章及解章義既領會已  
次應廣釋問何故作此論答爲止他宗顯正  
義故謂或有執過去未來體非實有現在雖

有而是無為為止彼宗顯過去未來體是實  
 有現在是有為世所攝故或復有執緣起是  
 無為如分別論者問彼因何故作如是執答  
 彼因經故謂契經說如來出世若不出世法  
 住法性佛自等覺為他開示乃至廣說故知  
 緣起是無為法為止彼宗顯示緣起是有為  
神三  
 法墮三世故無無為法墮在三世問若緣起  
 法非無為者如何會釋彼所引經答經說因  
 果決定義故謂佛出世若不出世無明決定  
 是諸行因諸行決定是無明果如是乃至生

決定是老死因老死決定是生果法住法性  
 是決定義非無為義經意如是若不爾者契  
 經亦說如來出世若不出世法住法性色常  
 色相乃至識常識相地常堅相乃至風常動  
 相喝梨德鷄常是苦味羯竹迦盧四尼常是  
 辛味豈五蘊等亦是無為彼既有為緣起亦  
 爾謂五蘊等自相決定說如是言緣起亦依  
 因果決定作如是說為止如是他宗異執顯  
 示正理故作斯論此中論者所發論端應辯  
 五事一者何故唯說一補特伽羅二者說何

等一補特伽羅三者何故唯說此生四者說何等此生五者說何等現在何故唯說一補特伽羅者謂避論文煩廣失故若說一切補特伽羅論文煩廣亦為無用說一則知餘亦爾故說何等一補特伽羅者若有徧歷此十二支如陟梯墜是此所說謂若過去起無明行引得現在識名色六處觸受復於現在起愛取有引得未來生老死者是此所說一補特伽羅若有過去起無明行引得現在識乃至受現在不復起愛取有引得未來生老死

者非此所說如智蘊說成就八支名學行者何等學者是彼所說若有徧歷三摩鉢底如陟梯墜是彼所說謂若先入有尋有伺定次入無尋無伺定次入無色定次入滅盡定出滅盡定起無漏心現在滅盡定起有漏心神三現在前者彼中說之若有先入有尋有伺定次入無尋無伺定次入無色定次入滅盡定出滅盡定起無漏心現在前者非彼所說又如經說先見女人形容端正少壯充悅次復見彼衰老羸瘦次復見彼重病困苦次復見彼死經一日乃至七日次

復見彼臃脹膿爛次復見彼骨節分離無血肉等復見彼骸骨腐爛如鳩鵲色若有女人徧經如上所說諸位是彼經說若不爾者非彼所說此中亦爾但說徧歷十二支者不說其餘何故唯說此生者說現在生則知過去未來亦爾故不說餘說何等此生者一衆同分說爲此生說何等現在者說衆同分現在不說剎那現在及分位現在一補特伽羅於此生十二支緣起幾過去幾未來幾現在耶答二過去謂無明行二未來謂生老死八現

在謂識名色六處觸受愛取有問此十二支過去未來現在皆具何故但說過去未來各有二支現在有八答無慧眼者以現在因推未來果以現在果推過去因可知亦有故作是說以現在因者謂愛取有推未來果者謂生老死以現在<sup>坤三</sup>果者謂識名色六處<sup>七</sup>觸受推過去因者謂無明行世尊欲令無慧眼者以現因果推有去來由此即能辦所作事過去世果未來世因由此爲門亦可知有故此論者但作是說復次說有過去二支即遮生死

本無今有執說有未來二支即遮生死有已  
還無執說有現在八支成立生死因果相續  
如是如來化事已滿故作是說復次說有過  
去二支即遮常見說有未來二支即遮斷見  
說有現在八支即顯中道如是如來化事已  
滿故作是說復次說有過去二支即顯生死  
有因說有未來二支即顯生死有果說有現  
在八支即顯因果相續由此有情能辦所作  
故作是說復次說有過去二支除前際愚說  
有未來二支除後際愚說有現在八支除中

際愚由此有情能辦所作故作是說復次此  
中但說一生因果餘生因果義唯可知故作  
是說品類足論作如是言云何緣起法謂一  
切有爲法問此與彼論所說何異答此說不  
了義彼說是了義此是有餘說彼是無餘說  
此說有密意彼說無密意此說有別因彼說  
無別因此說是世俗彼說是勝義此唯說有  
情數緣起法彼通說有情數非有情數緣起  
法此唯說有根緣起法彼通說有根無根緣  
起法此唯說有心緣起法彼通說有心無心

緣起法此唯說執受緣起法彼通說執受非  
執受緣起法復次緣起有四種一刹那二連  
縛三分位四遠續此說分位遠續彼說刹那  
連縛問何故此論唯說有情數緣起法耶答  
是作論者意欲爾故乃至廣說復次不應責  
此作論者意以作論者依經作論契經唯說  
有情數緣起法故此亦爾問因論生論何故  
世尊唯說有情數緣起法耶答觀所化故謂  
佛觀彼所化有情宜聞唯說有情數緣起法  
則能解了辨所作事故作是說復次順有支

故謂有情數隨順有支其義最勝有情數法  
從無始來輪轉三有相續不絕有義最勝說  
名為有有情數法隨順此有故名有支是故  
世尊唯說有情數緣起法此論依彼亦唯說  
有情數緣起法復次諸有情類從無始來輪  
轉生死受大苦惱皆由迷執有情數法是故  
世尊但為開示有情數緣起法此論依彼故  
作是說問如是緣起自性是何答五蘊四蘊  
是此所說緣起自性謂欲色界五蘊為自性  
若無色界四蘊為自性如說自性我物相分

本性亦爾已說自性所以今當說問何故名緣起緣起是何義答待緣而起故名緣起待何等緣謂因緣等或有說者有緣可起故名緣起謂有性相可從緣起非無性相非不可起復有說者從有緣起故名緣起謂必有緣神三此方得起有作是說別別緣起故名緣起謂別別物從別別緣和合而起或復有說等從緣起故名緣起問有法從四緣生謂心心所有法從三緣生謂滅盡無想定有法從二緣生謂一切色及餘不相應行云何等從緣起

故名緣起耶答即以此事故名為等謂應從四緣生者皆四緣生非三非二應從三緣生者皆三緣生非四非二應從二緣生者皆二緣生非三非四是故名等復次依增上緣故說為等謂一一法於正起時各除自性餘一切法皆與彼為增上緣故復次皆同時生故說為等如說一切有情心等生等住等滅復次皆一刹那故說為等復次一切皆有此十支從無始來乃至證得無學果位故說為等問諸有情類或有前般涅槃者或有後般

涅槃者如何可說緣起法等答皆具十二故  
 說為等復次皆得涅槃方捨緣起故說為等  
 復次緣起總相無始無終一切有情同有此  
 法故說為等復次前般涅槃者於緣起法前  
 少後多後般涅槃者於緣起法前多後少故  
 說為等謂諸有情皆有無量過去未來諸緣  
 起法雖行世者有少有多而其體數一切皆  
 等如契經說佛告苾芻吾當為汝說緣起法  
 及緣已生法問緣起法與緣已生法差別云  
 何有作是言無有差別所以者何品類足論

作如是言云何緣起法謂一切有為法云何  
 緣已生法謂一切有為法故知此二無有差  
 別有餘師說亦有差別謂名即差別此名緣  
 起法彼名緣已生法故復次因名緣起法果  
 名緣已生法如因果如是能作所作能成所  
 成能生所生能轉所轉能起所起能引所引  
 能續所續能相所相能取所取應知亦爾復  
 次前生者名緣起法後生者名緣已生法復  
 次過去者名緣起法未來現在者名緣已生  
 法復次過去現在者名緣起法未來者名緣



已生法復次無明名緣起法行名緣已生法  
乃至生名緣起法老死名緣已生法脇尊者  
言無明唯名緣起法老死唯名緣已生法中  
間十支亦名緣起法亦名緣已生法尊者妙  
音作如是說過去二支唯名緣起法未來二  
支唯名緣已生法現在八支亦名緣起法亦  
名緣已生法尊者望滿說有四句有緣起法  
非緣已生法謂未來法有緣已生法非緣起  
法謂過去現在阿羅漢最後五蘊有緣起法  
亦緣已生法謂除過去現在阿羅漢最後五

蘊諸餘過去現在法有非緣起法亦非緣已  
生法謂無為法集異門論及法蘊論俱作是  
說若無明生行決定安住不雜亂者名緣起  
法亦名緣已生法若無明生行不決定不安  
住而雜亂者名緣已生法非緣起法乃至生  
生老死應知亦爾尊者世友作如是說若法  
是因名緣起法若法有因名緣已生法復次  
若法是和合名緣起法若法有和合名緣已  
生法復次若法是生名緣起法若法有生名  
緣已生法復次若法是起名緣起法若法有

起名緣已生法復次若法是能作名緣起法若法有能作名緣已生法大德說曰轉名緣起法隨轉名緣已生法尊者覺天作如是說諸法生時名緣起法諸法生已名緣已生法契經所說緣起法緣已生法如是差別此中但說時分緣起謂十二位立十二支一一支中各具五蘊尊者設摩達多說曰一刹那頃有十二支如起貪心害衆生命此相應癡是無明此相應思是行此相應心是識起有表業必有俱時名色諸根共相伴助即是名色

及與六處此相應觸是觸此相應受是受貪即是愛即此相應諸纏是取所起身語二業是有如是諸法起即是生熟變是老滅壞是死瞋癡心殺有十一支無愛支故雖有此理而此中說時分緣起依十二位立十二支一支中各具五蘊非刹那頃有十二支然識身論復作是說於可愛境由無知故起貪著時此中無知是無明有貪著者是行了別境者是識識俱諸蘊是名色名色所依諸根是六處六處和合是觸能領觸者是受欣所受

者是愛愛增廣是取引後有業是有諸蘊起是生諸蘊熟變是老諸蘊滅壞是死內熱是愁哀泣是悲五識相應不平等受是苦意識相應不平等受是憂心焦是惱乃至廣說問前說彼說有何差別答前說是一心彼說是多心十三前說是刹那彼說是相續十二是謂差別彼論雖說多心相續十二有支而不同此以彼所說十二有支多是別法或同時起此論所說十二有支皆具五蘊時分各異施設論說云何無明謂過去一切煩惱彼不

應作是說若作是說則捨自相應作是說云何無明謂過去煩惱位云何行謂過去業位云何識謂續生心及彼助伴云何名色謂結生已未起眼等四種色根六處未滿中間五位謂羯刺藍頰部曇闍尸鍵南鉢羅奢佉是名色位云何六處謂已起四色根六處已滿即鉢羅奢佉位眼等諸根未能與觸作所依止是六處位云何觸謂眼等根雖能與觸作所依止而未了知苦樂差別亦未能避諸損害緣觸火觸刀食毒食糞食姪具愛猶未現

行是觸位云何受謂能別苦樂亦能避損害  
 緣不觸火觸刀不食毒食糞雖已起食愛而  
 未起婬及具愛是受位云何愛謂雖已起食  
 愛婬愛及資具愛而未爲此四方追求不辭  
 勞倦是愛位云何取謂由三愛四方追求雖  
 涉多危嶮而不辭勞倦然未爲後有起善惡  
 業是取位云何有謂追求時亦爲後有起善  
 惡業是有位云何生謂即現在識位在未來  
 時名生位云何老死謂即現在名色六處觸  
 受位在未來時名老死位復次有說無明有

二種一雜事二不雜事復有二種一顯事二  
 不顯事無明緣行亦有二種一思業二思已  
 業行緣識亦有二種一與悔俱二不與悔俱  
 識緣名色亦有二種一可愛趣攝二不愛趣  
 攝名色緣六處亦有二種一長養二異熟六  
 處緣觸亦有二種一有對觸二增語觸緣  
 受亦有二種一身受二心受受緣受亦有二  
 種一婬欲愛二資具愛愛緣取亦有二種一  
 見門轉二愛門轉取緣有亦有二種一內門  
 轉二外門轉有緣生亦有二種一剎那生二

衆同分生緣老死老有二種一根所見老  
二慧所見老死有二種一刹那死二衆同分  
死如契經說佛告苾芻我昔持草詣菩提樹  
到已敷設結跏趺坐順逆觀察十二緣起依  
此有彼有此生故彼生謂無明緣行乃至生  
緣老死老死緣愁悲苦憂惱問云何菩薩順  
逆觀察十二緣起耶答若以因推果名順觀  
察若以果推因名逆觀察復次若從細入麤  
名順觀察若從麤入細名逆觀察如麤細如  
是可見不可見現見非現見顯了非顯了應

知亦爾復次若因近觀遠名順觀察若因遠  
觀近名逆觀察如近遠如是在此在彼現前  
不現前此衆同分彼衆同分應知亦爾問此  
經中說無明緣行何故不說無明因行耶答  
餘經亦說無明因行如大因緣法門經說佛  
告阿難老死有如是因有如是緣有如是說  
謂生如說生爲老死因乃至說無明爲行因  
問一經雖說無明因行而多經說無明緣行  
有何意耶答若說無明因行則但說染汙行  
若說無明緣行則通說染汙不染汙行復次

若說無明因行則但說罪行若說無明緣行則通說罪福不動行復次若說無明因行則但說因緣若說無明緣行則通說四緣故多經說無明緣行問何故但說無明緣行而不說行緣無明答亦應說行緣無明而不說者當知是有餘說復次無明緣行勢力隨順親近強勝行緣無明則不如是復次無明緣行其義決定行緣無明則不如是以阿羅漢有漏業不生無明故復次行緣無明由無明力如契經說非理作意由癡生故能引無明是

故但說無明緣行復次行於無明但有緣義無明於行有因有緣是故但說無明緣行復次此經中說時分緣起前位諸蘊說名無明後位諸蘊說名為行前因後果展轉相引是故不說行緣無明問無明為緣通生十二何故但說無明緣行答亦應說餘而不說者當知此是有餘之說復次無明緣行勢用隨順餘則不爾復次無明緣行勢用強勝餘則不爾復次無明於行能作近緣是故偏說於識等十但作遠緣是故不說如近遠在此在彼

現前不現前此衆同分餘衆同分亦爾復次無明與行作不共緣是故偏說與識等十但作共緣是故不說復次此經中說時分緣起前後次第展轉相生若說無明緣無明便無前後若說無明緣識等便非次第是故但說無明緣行問此經中說行緣識有餘處說名色緣識餘處復說二緣生識如是三種有何差別答行緣識說業差別名色緣識說識住差別二緣生識說所依所緣差別復次行緣識說初引時名色緣識說引已守護時二緣

生識說守護已增長時復次行緣識說續生時名色緣識說續生已安住時二緣生識說安住已領納境時復次行緣識說業名色名色緣識說異熟名色二緣生識說所依所緣名色復次行緣識說惡趣識名色緣識說欲界人天識二緣生識說色無色界識脇尊者言行緣識說中有識名色緣識說生有識二緣生識說本有識有餘師說行緣識說染汗識名色緣識及二緣生識說染汗不染汗識如染汗不染汗有覆無覆有罪無罪退不退

應知亦爾復有說者行緣識說識支位識名  
色緣識說名色支位識二緣生識說六處支  
及後位識問此經中說識緣名色餘處復說  
名色緣識此二種何差別答識緣名色顯識  
作用名色緣識顯名色作用復次識與名色  
更互為緣如二蘆束相依而住如象馬船與  
乘御者展轉相依得有所至識與名色亦復  
如是識為緣故名色續生名色為緣識得安  
住故說此二更互為緣復次識緣名色說初  
續生時名色緣識說續生後位復次識緣名

色說續生時識能生名色名色緣識說續生  
後識依名色住復次識緣名色說所生名色  
名色緣識說能生名色復次識緣名色依前  
後說名色緣識依同時說問此經中說名色  
緣六處應不徧說四生有情謂胎卵濕生諸  
根漸起可說名色緣六處化生有情諸根頓  
起云何可說名色緣六處但應說識緣生六  
處有作是說此經但說欲界三生不說上界  
化生亦無有失應作是說此經通說三界四  
生謂化生者初受生時雖具諸根而未猛利



後漸增長方得猛利未猛利時初刹那頃名  
識支第二刹那以後名名色支至猛利位名  
六處支是故此經無不徧失問六處即在名  
色中攝何故說名色緣六處耶答此前已說  
未起眼等四色根時名名色位四根起已具  
六處故名六處位化生雖復六根頓起而未  
猛利名名色位猛利以後名六處位故無有  
失問此經中說六處緣觸有餘處說名色緣  
觸餘處復說二緣生觸如是三種有何差別  
名六處緣觸顯觸所依謂顯一切外物和合

必因於內內法勝故但說所依故此經說六  
處緣觸名色緣觸顯觸自性二緣生觸顯觸  
所依及所緣別復次六處緣觸說惡趣觸名  
色緣觸說欲界人天觸二緣生觸說色無色  
界觸復次六處緣觸說分位觸名色緣觸說  
現在觸二緣生觸說三和觸復次六處緣觸  
說觸位觸名色緣觸說前位觸二緣生觸說  
後位觸問觸受俱起何故此經但說觸緣受  
不說受緣觸耶答二雖俱起而觸緣受非受  
緣觸隨順勝故謂觸於受隨順力勝非受於



阿毗達磨大毗婆沙論卷第二十四 神四

五百大阿羅漢等造

唐三藏法師玄奘奉 詔譯

雜蘊第一中補特伽羅納息第三之二

問樂受及不苦不樂受與愛為緣是事可爾

愛著此受四方<sup>中</sup>追求可意事故如何苦受亦

與愛為緣而此經總說受緣愛耶尊者世友

作如是該苦作愛緣勝餘二受故世尊說苦

受所逼便愛樂具愛樂具故便於樂受起貪

隨眠相續增長有餘師說三受與愛皆作勝

緣樂受義言我能起愛令有相續勝餘二受

謂有情類貪著我故四方追求造善惡行由

此諸有相續無窮苦受義言我能起愛令有

相續勝餘二受謂諸有情為我所逼貪愛樂

受四方追求造善惡行由此諸有相續不絕

不苦不樂受義言我能起愛令有相續勝餘

二受謂於欲界下三靜慮我尚起愛造善惡

行令有相續況於上地無苦樂處而不能耶

脇尊者言三受皆能為緣起愛識身論說若

有三受未斷未知能起諸愛引眾苦果故知

三受皆是愛緣問云何三受皆能起愛答愛有五種一和合愛二不和合愛三別離愛四不別離愛五愚愛樂受未生起和合愛樂受已生起不別離愛苦受未生起不和合愛苦受已生起別離愛不苦不樂受未生起和合愛不苦不樂受已生起不別離愛於中多分生長愚愛問愛即取攝何故此經說愛緣取答初生愛位以愛聲說增廣愛位以取聲說復次下品名愛上品名取故無有失問受緣愛愛緣取此二種何差別答若愛以受為因

名受緣愛若愛以愛為因名愛緣取復次若愛是受果名受緣愛若愛是愛果名愛緣取如因果生所生養所養增所增引所引轉隨轉應知亦爾復次若愛為愛因名受緣愛若愛為業因名愛緣取復次若愛以愛為果名受緣愛若愛以業為果名愛緣取如因果生所生養所養增所增引所引轉隨轉應知亦爾問何故前際緣起無明為初後際緣起愛為初耶答此二煩惱俱是本故謂無明是前際本有愛是後際本復次前際煩惱位已滅

壞故難可了知故說無明後際煩惱位正現  
在前求當有故說名爲愛復次無明有七事  
故說在前際緣起之初一該五部二徧六識  
三通三界四是隨眠性五能起重身語業六  
與斷善根作勝加行七是徧行性愛唯有六  
事故說在後際緣起之初謂前七事中除徧  
行性復次無明有三事故說在前際緣起之  
初一常爲元首二與一切煩惱相應三是徧  
行性愛於後有能引勝故說在後際緣起之  
初復次無明有四事故說在前際緣起之初

一有漏無漏緣二有爲無爲緣三是徧行非  
徧行四自界他界緣愛唯有漏緣有爲緣非  
徧行自界緣故說在後際緣起之初更有餘  
義後當廣說取緣有者若有煩惱復能發業  
牽後有果非無煩惱有緣生者若有能引後  
有諸業後有當生非無引業生緣老死者謂  
若有生便有老死問何故三有爲相中生獨  
立一支老死共立一支耶脇尊者曰世尊於  
法功能差別能善了知餘無此能故於此事  
不須徵詰復有說者諸法生時生有作用故

獨立支諸法滅時老死無常俱有作用故合  
立支有餘師說生令諸法相續增長故獨立  
支老死令諸法不相續不增長故合立支或  
復有說生令諸法和合作用故獨立支老死  
令諸法離散無用故合立支尊者世友作如  
是說生令諸法從未來入現在故獨立支老  
死令諸法從現在入過去故合立支尊者妙  
音作如是說生作用勝獨辦一事故獨立支  
老死作用劣共辦一事故合立支如強力人  
獨辦一事劣則不爾問病何故不立有支答

無有支相故復次若法一切時一切處一切  
有者立有支病非一切時非一切處非一切  
有故不立有支如尊者薄矩羅說我於佛法  
出家年過八十尚不憶有少頭痛況餘身病  
彼在欲界瞻部洲生尚無少病況餘界餘處  
病不徧故不立有支問此契經說老死緣愁  
悲苦憂惱何故愁等不立有支答無支相故  
謂愁等五散壞有支如霜雹等害諸苗稼復  
次愁等非一切時非一切處非一切有猶如  
疾病是故愁等不立有支問此愁等五不應

但說老死爲緣以無明等十二有支爲緣生  
故答此經應該說無明緣行及愁等五乃至生  
緣老死及愁等五而不說者是有餘說復次  
應知此經以終顯始老死爲緣既生愁等應  
知乃至無明亦爾復次老死位中多起愁等  
是故偏說復次老死位中所起愁等多是上  
品是故偏說復次造惡業者毀淨戒者於此  
位中多生愁等是故偏說如契經說若男若  
女造身語意三種惡行或破尸羅臨命終時  
惡趣相現如日欲暮大山峯影來覆其身當

於爾時身心驚怖生大苦惱乃至廣說是故  
但說老死爲緣問無明爲有因不老死爲有  
果不設爾何失若有者緣起支應有十三或  
十四若無者無明無因老死無果應是無爲  
答應作是說無明老死雖有因果而非有支  
故無十三十四支失無明因者謂不如理作  
意老死果者謂愁悲苦憂惱復有說者無明  
有因謂前無明老死有果謂後老死過去未  
來無明老死有多剎那故無十三十四支失  
有餘師說無明有因謂前老死老死有果謂

後無明以現在愛取即過去無明現在名色  
六處觸受即未來老死若說受緣愛即說老  
死緣無明猶如車輪上下迴轉終而復始如  
是有支無始相續雖有因果而無十三十四  
支失復次世尊為受化者施設緣起少多不  
定謂或有處說一緣起謂一切有為法總名  
緣起如說云何緣起謂一切有為法或復有  
處說二緣起謂因與果或復有處說三緣起  
謂三世別或煩惱業及事為三無明愛取說  
名煩惱行有是業餘支是事或復有處說四

緣起謂無明行及生老死現在八支攝入四  
種謂愛取入無明有入行識入生名色六處  
觸受入老死或復有處說五緣起謂愛取有  
及生老死前際七支攝入此五謂無明入愛  
取行入有識入生名色六處觸受入老死或  
復有處說六緣起謂三世中各有因果或復  
有處說七緣起謂無明行識名色六處觸受  
後際五支攝入此七謂愛取入無明有入行  
生入識老死入名色六處觸受或復有處說  
八緣起謂現在八支過去未來四支攝入此



八謂無明入愛取行入有生入識老死入名色六處觸受或復有處說九緣起如大因緣法門經說或復有處說十緣起如城喻經說或復有處說十一緣起如智事中說或復有處說十二緣起如餘無量契經中說復次此十二支緣起法即煩惱業若展轉為緣謂煩惱生業業生苦苦生苦苦生煩惱煩惱生煩惱煩惱生業業生苦苦生苦苦生煩惱生業業生無明緣行業生苦苦者謂行緣識苦生苦苦者謂識緣名色乃至觸緣受苦生煩惱者謂受緣

愛煩惱生煩惱者謂愛緣取煩惱生業者謂取緣有業生苦苦者謂有緣生苦苦者謂生緣老死復次此十二支緣起法有二續三分二續者謂識與生能續生故三分者謂煩惱業事無明愛取是煩惱行有是業餘支是事有餘師說二續者謂行有續後有故三分者謂三世又十二支攝為三聚謂煩惱業苦如名三聚亦名三集三有三道隨相應知復次此十二支緣起法有根有莖有枝有葉有華有果猶如大樹此中根者謂無明行莖者謂

識名色枝者謂六處業者謂觸受華者謂愛  
 取有果者謂生老死此十二支緣起法樹或  
 有華有果或無華無果有華有果者謂異生  
 及學無華無果者謂阿羅漢問此十二支緣  
 起法幾剎那幾相續答二剎那謂識與生餘  
 皆相續問此十二支緣起法幾染汙幾不染  
 汙有作是說五染汙謂無明識愛取及生餘  
 通染汙不染汙評曰彼不應作是說此中說  
 分位緣起故應作是說一切皆通染汙不染  
 汙前所說五支中心心所法唯是染汙餘通

染汙及不染汙有作是說識生二支心心所  
 法定是染汙餘皆不定問此十二支緣起法  
 幾是異熟幾非異熟有作是說五非異熟七  
 是異熟評曰彼不應作是說此中說分位緣  
 起故應作是說一切皆通異熟非異熟然無  
 明識愛取生時心中心所法定非異熟餘通二  
 種有作是說識生二支心心所法定非異熟  
 餘皆不定問此十二支緣起法幾有異熟幾  
 無異熟有作是說行有二支定有異熟餘通  
 二種評曰彼不應作是說此中說分位緣起

故應作是說一切皆通二種問此十二支緣起法幾欲界幾色界幾無色界有作是說欲界具十二支色界有十一支除名色無色界有十支除名色六處色界應作是說識緣六處彼無未起四根時故無色界應言識緣觸彼無有色及五根故評曰應作是說三界皆具十二有支問色界生時諸根頓起云何有名色位無色界無色無五根云何有名色六處位耶答色界五根雖定頓起而生未久根不猛利爾時但是名色支攝無色界雖無色

及五根而有名及意根彼應作是說識緣名緣意處意處緣觸是故三界皆具十二復次相似有支還令相似有支相續謂欲界有支還令欲界有支相續色無色界有支亦爾唯除受位此位或能令不相似有支相續謂生欲界若未離欲染起欲界愛取有現在前引未來生老死彼有現在一愛一取一有未來一生一老死若已離欲染未離初靜慮染處初靜慮愛取有現在前引未來生老死彼有現在二愛二取二有未來二生二老死如

是乃至已離無所有處染未離非想非非想處染起非想非非想處愛取有現在前引未來生老死彼有現在九愛九取九有未來九生九老死彼欲界沒生非想非非想處昔時非想非非想處現在愛取今為過去無明現在有今為過去行未來生今為現在識未來老死今為現在名意觸受昔時餘地若現在若未來諸支今非過去非未來非現在所以者何因果展轉相比說有彼地因果俱不成就故非過去未來現在彼非想非非想處沒

生無所有處昔時無所有處現在愛取今為過去無明現在有今為過去行未來生今為現在識未來老死今為現在名意觸受昔時餘地若現在若未來諸支今非過去非未來非現在所以者何因果展轉相比說有彼地因果俱不成就故非過去未來現在彼無所有處沒展轉乃至還生欲界昔時欲界現在愛取今為過去無明現在有今為過去行未來生今為現在識未來老死今為現在名色六處觸受昔時餘地若現在若未來諸支今

非過去非未來非現在所以者何因果展轉  
相比說有彼地因果俱不成就故非過去未  
來現在復次若生欲界諸根成就就能造能引  
後有業者彼無明位現在前時一支現在謂  
無明餘支未來從無明位至行位時二支現  
在謂無明行餘支未來從行位至識位時二  
支過去謂無明行一支現在謂識餘支未來  
從識位至名色位時二支過去謂無明行二  
支現在謂識名色餘支未來如是乃至從取  
位至有位時二支過去謂無明行八支現在

謂識乃至有二支未來謂生老死從有位至  
生位時十支過去謂無明乃至有一支現在  
謂生一支未來謂老死從生位至老死位時  
十支過去謂無明乃至有二支現在謂生老  
死尊者望滿作如是言無明行位現在前時  
二支現在謂無明行十支未來八在次後生  
謂識乃至有二在第三生謂生老死生老死  
位現在前時二支現在謂生老死十支過去  
八在次前生謂識乃至有二在第三生謂無  
明行識等八位現在前時八支現在謂識乃

至有二支過去謂無明行二支未來謂生老死如說生欲界說生色無色界應知亦爾復次諸契經中佛為所化說緣起法或因為門或果為門或俱為門問為何所化以因為門說緣起法乃至為何所化以俱為門說緣起法答為愚因者以因為門說緣起法為愚果者以果為門說緣起法為愚因果者以俱為門說緣起法復次為初修業者以果為門說緣起法為超作意者以因為門說緣起法為已慣習者以俱為門說緣起法復次為樂略

者以因為門說緣起法為樂廣者以果為門說緣起法為樂廣略者以俱為門說緣起法復次為利根者以因為門說緣起法為鈍根者以果為門說緣起法為中根者以俱為門說緣起法問若為鈍根者以果為門說緣起法彼便得解者後身菩薩於諸有情根最為勝何因緣故以果為門觀緣起法答過去菩薩過疏伽沙數皆以果為門觀緣起法未來亦爾故今菩薩住最後身亦作是觀復次菩薩亦觀無明緣行展轉乃至生緣老死如是

順觀多於二乘或復有時修習逆觀故不可說唯果爲門復次菩薩現見老病死苦作是思惟此老病死何緣而有知由生有復思惟生何緣而有知由有有乃至廣說由先見果故作是觀復次有淨居天爲發菩薩厭有心故現老病死菩薩見已厭有出家旣出家已隨先所見以果爲門觀緣起法復次順現觀故謂菩薩後諦現觀時先觀苦諦今學現觀故先觀果復次先作是說爲初修業者以果爲門說緣起法菩薩亦爾初修業者故果爲

門觀緣起法菩薩雖復無量劫來修緣起觀而最後身創起此故名初修業復次菩薩往劫初修業時以果爲門觀緣起法今雖慣習如本修時以果爲門觀緣起法如人於樹雖數上之後若上時還從根上復次欲現焚燒生死樹故如人燒樹先焚枝葉後及其根菩薩亦爾以果爲門觀緣起法隨所觀處令永不生脇尊者言不以菩薩以果爲門觀緣起故便名鈍根然觀行者總有二種一隨愛行二隨見行隨愛行者以果爲門觀緣起法依

無願三摩地入正性離生隨見行者以因爲門觀緣起法依空三摩地入正性離生唯除菩薩菩薩雖是隨愛行者以果爲門觀緣起法而能依空三摩地入正性離生故有問言頗有隨愛行者以果爲門觀緣起法而依空三摩地入正性離生耶答有如諸菩薩如契經說佛告苾芻我未證得三菩提時獨居靜處作是思惟世間衆生雖恒爲生老死苦之所逼害而不能如實了知出離彼法復作是念誰有故老死有此老死誰爲緣作是念已

便起現觀生有故老死有此老死生爲緣復作是念誰有故生有此生誰爲緣作是念已便起現觀有有故生有此生有爲緣如是乃至復作是念誰有故名色有此名色誰爲緣作是念已便起現觀識有故名色有此名色識爲緣復作是念誰有故識有此識誰爲緣作是念已便起現觀名色有故識有此識名色爲緣便作是念我齊此識心應轉還所以者何名色緣識識緣名色名色緣六處乃至廣說問菩薩觀此緣起法時未得見道真無



漏慧云何得說起現觀耶答爾時未得真實  
現觀由世俗智現見緣起似現觀故立現觀  
名問菩薩何故逆觀緣起唯至於識心便轉  
還為智力窮為爾餒盡設爾何失若智力窮  
不應正理菩薩智見無邊際故若爾餒盡理  
亦不然行與無明猶未觀故答應作是說非  
智力窮非爾餒盡神四但由菩薩於行無明先已  
觀故謂先觀有即已觀行先觀愛取已觀無  
明問先觀老死已觀名色六處觸受先觀生  
已觀識於名色等應不重觀答先略後廣先

總後別無重觀失問若爾生識無廣略異何  
為重觀答厭畏生故再觀無失謂我世尊先  
菩薩位厭老病死逾城出家作是思惟此老  
死苦由誰而有即便現見由續生心復思此  
心由誰而起即知由業復思此業從何而生  
知從煩惱復思煩惱依誰而生即知依事復  
思此事由誰而轉即知此轉由結生心菩薩  
爾時便作是念一切過患皆由此心故於此  
心深生厭畏雖無廣略而更重觀齊識轉還  
義屬於此問無明既略何為不觀答隔行支

故謂觀緣起必依次第不可越行而觀無明  
 有作是說先觀有緣生時已觀業名色後觀  
 名色緣識時即觀異熟名色若復觀行緣識  
 亦觀業名色與前不異故不重觀有餘師說  
 先觀有緣生時已觀遠緣後觀名色緣識時  
 即觀近緣若復觀行緣識亦觀遠緣與前不  
 異故不重觀如近遠在此在彼現前不現前  
 此衆同分餘衆同分應知亦爾或有說者先  
 觀有緣生時已觀前生緣後觀名色緣識時  
 即觀俱生緣若復觀行緣識亦觀前生緣與

前不異故不重觀復有說者先觀有緣生時  
 已觀轉緣後觀名色緣識時即觀隨轉緣若  
 復觀行緣識亦觀轉緣與前不異故不重觀  
 或復有說避無窮過故不重觀謂先觀老死  
 即觀此生名色六處觸受先觀生即觀此生  
 識後觀名色六處觸受即觀前第二生老死  
 後觀識即觀前第二生生若復觀無明行應  
 觀前第三生若爾亦應觀第四生如是展轉  
 便為無窮故不重觀無明及行尊者世友作  
 如是說何故齊識心便轉還以識樂住識住

中故謂識不欲捨於識住識住者即名色故  
觀識已還觀名色復作是說識與名色互爲  
緣故復作是說此二展轉爲因果故大德說  
曰何故齊識心便轉還以度識支無所緣故  
猶如尺蠖行至草端上無所緣即便退下觀  
心亦爾唯應至識餘非其境故便退還脇尊  
者言何故齊識心便轉還緣轉還故謂前已  
說識緣名色今復更說名色緣識前爲因者  
今轉爲果境轉還故心亦轉還尊者妙音作  
如是說何故齊識心便轉還識是生死衆苦

本故謂我菩薩厭生死苦逾城出家推尋世  
間老病死苦誰爲根本謂結生心復推此心  
由誰而引謂業復推此業由誰而發謂煩惱  
復推煩惱依誰而起謂事復推此事誰爲根  
本謂結生心便作是念此結生心恒爲生死  
衆苦根本深可厭患齊此應還修神四眞對治尊  
者設摩達多說曰何故齊識心便轉還以未  
來生可比知故謂先觀見有緣生時知現在  
生是衆苦本後復觀見名色緣識知過去生  
是衆苦本便作是念現在過去生死衆苦既

生爲本未來亦然故不復須更觀餘境是故  
 齊識心便轉還由諸有支皆有三世尊者望  
 滿所說義成如說無明行位現在前時二支  
 現在乃至廣說如契經說佛告苾芻我於爾  
 時作如是念誰不有故老死不有誰滅故老  
 死滅作是念已便起現觀生不有故老死不  
 有生滅故老死滅如是乃至復作是念誰不  
 有故行不有誰滅故行滅作是念已便起現  
 觀無明不有故行不有無明滅故行滅行滅  
 故識滅乃至廣說問何緣菩薩流轉分中但

觀十支還滅分中具觀十二支耶答菩薩憎  
 惡流轉故但觀十支愛樂還滅故具觀十二  
 支復次流轉分中多諸過患牽心劣故但觀  
 十支還滅分中多諸功德牽心勝故具觀十  
 二支諸契經中或說緣起如燈神四或說緣起如  
 火聚十五或說緣起如城問世尊何故說緣起法  
 如燈如火聚如城耶答隨所現見即以爲喻  
 謂所化生現見燈者即以燈喻顯緣起法若  
 所化生現見火聚即以火聚顯緣起法若所  
 化生現見城者即以城喻顯緣起法復次若

所化生聞說燈喻解緣起者佛說如燈若所化生聞說火聚解緣起者說如火聚若所化生聞說如城解緣起者佛說如城復次若所化生有下品愛取者佛則爲說緣起如燈若所化生有中品愛取者佛則爲說緣起如火聚若所化生有上品愛取者佛則爲說緣起如城如三品愛取三根三樂應知亦爾如世尊說無明緣行取緣有乃至廣說問何故作此論答爲欲分別契經義故謂契經說無明緣行取緣有雖作是說而不廣辯經是此論

所依根本彼未辯者本應分別復次爲令疑者得決定故謂行與有體俱是業或有生疑其體無別爲顯差別故作斯論云何無明緣行云何取緣有答無明緣行者此顯示業先餘生中造作增長得今有異熟及已受異熟取緣有者此顯示業現在生中造作增長得常有異熟此顯示業者此佛世尊顯了開示已造今造一切不善善有漏業先餘生中者顯示此業在先世餘衆同分中已盡已滅已離已變造作增長者顯示此業發起圓滿從

煩惱生能得果故得今有異熟者顯示此業  
感得此生諸果異熟及已受異熟者顯示此  
業已受前生諸異熟果所有前生造作增長  
善不善業彼異熟果若今熟若已熟者當知  
皆在行支分中現在生中者顯示此業唯在  
此生衆同分中造作增長非餘生中得當有  
異熟者顯示此業得未來生諸果異熟所有  
今生造作增長善不善業彼異熟果於此生  
中未熟者當知皆在有支分中間何故過去  
生所造業果已熟者名行現在生所造業於

此生中果未熟者名有耶答過去生所造業  
果已熟者已衰朽已受用已與果已辦事無  
勢力不能更引後有異熟然已造作已遷變  
故說名爲行現在生所造業於此生中果未  
熟者與彼相違說名爲有有作是說過去生  
所造業果已熟者是故業故說名爲行現在  
生所造業於此生中果未熟者是新業故說  
名爲有有餘師說過去生所造業果已熟者  
已與果故說名爲行現在生所造業於此生  
中果未熟者未與果故說名爲有問造作增

長有何差別有說此二無有差別所顯業體無差別故有說此二亦有差別謂名則差別名造作名增長故復次義亦有差別謂有由一善惡行生善惡趣有由三善惡行生善惡趣由一者加行時唯造作成滿時具二種由三者作一二唯造作若作三具二種復次有由一無間業墮地獄有由五無間業墮地獄由一者加行時唯造作成滿時具二種由五者作四來唯造作若作五具二種十善不善業道亦爾復次有由多業感一生果如諸善

薩由三十二百福業故感最後身造三十一百福業來唯造作造三十二百福業滿具二種復次故思造業具二種非故思者唯造作復次先思造業具二種率爾造者唯造作復次有加行業具二種無加行者唯造作復次三時定業具二種時不定者唯造作復次處定受業具二種處不定者唯造作復次定受果業具二種不定受者唯造作復次不善業惡趣受者具二種人天受者唯造作善業人天受者具二種惡趣受者唯造作復次不善

業以不善業為眷屬者具二種以善業為眷屬者唯造作善業以善業為眷屬者具二種以不善業為眷屬者惟造作復次不善業在邪見愚因果身中者具二種在正見不愚因果身中者唯造作善業與上相違復次不善業在破戒破見身中者具二種在破戒不破見身中者唯造作善業在具戒具見身中者具二種在不具戒具見身中者唯造作復次不善業在壞加行壞意樂身中者具二種在壞加行不壞意樂身中者唯造作善業在具

加行具意樂身中者具二種在具意樂不具加行身中者唯造作復次若業作已不捨不吐不依對治者具二種若業作已能捨能吐依對治者唯造作復次若業三時恒與悟者具二種若不爾者唯造作復次若業作已無變悔者具二種神四若業作已有變悔者唯造作復次若業作已恒憶念者具二種若業作已不恒憶念唯造作復次若業作事究竟具二種若不究竟唯造作復次若業數作具二種若不數作唯造作復次若業作已歡喜讚歎



迴向果者具二種若不爾者唯造作復次明了心作具二種不明了者唯造作諸如是等是謂差別

阿毗達磨大毗婆沙論卷第二十四說一切有部發智

音釋

電蒲角切 評符兵切 慣古患反 殞梵語  
兩水也 品論也 習也 也  
云天堂來河 蠖鳥郭切 尺  
名殞其陵切 蠖蠖蟲名

永樂北藏

大毗婆沙論

第一〇六册

阿毗達磨大毗婆沙論卷第二十五 神五

五百大阿羅漢等造

唐三藏法師玄奘奉詔譯

雜蘊第一中補特伽羅納息第三之三

無明緣行取緣有有何差別答無明緣行者

廣說如前此業緣世尊說一煩惱謂無明取

緣有者廣說如前此業緣世尊說一切煩惱

謂諸取是謂差別問何故復作此論答前雖

說所發業自性差別謂前業在過去生後業

在現在生前業已與果後業未與果前業是

故後業是新而未說能發緣自性差別今欲

說之故作此論問何故過去業緣但說無明

現在業緣說一切煩惱耶答造過去業時於

多種事不見見故不可知故但說無明為緣

謂於界趣生洲分位依處加行等起相續所

緣皆不可知界者三界不知過去於何界造

此業趣者五趣不知過去於何趣造此業生

者四生不知過去於何生造此業洲者四洲

不知過去於何洲造此業分位者羯刺藍等

十種分位不知過去於何分位造此業依處

者十善不善業道依處不知過去於何依處造此業加行者有情數非有情數所起加行不知過去由何加行造此業等起者貪瞋癡等不知過去由何等起造此業相續者男女等不知過去依何相續造此業所緣者過去未來現在或色聲香味觸法不知過去心緣何等造此業雖不見見亦不可知而發業位皆有無明故總說彼無明爲緣造現在業時於多種事皆現見故皆可知故具說一切煩惱爲緣復次過去業已衰朽已受用已與果

是故業無勢用不明了故但說無明爲緣現在業未衰朽未受用未與果是新業有勢用極明了故說一切煩惱爲緣復次過去業微細難覺若自若他俱不見見不知何等煩惱所發然煩惱起必有無明是故但說無明爲緣神五現在業麤顯易覺若自若他俱能現見知是彼彼煩惱所發故說一切煩惱爲緣復次過去業性不猛利其相暗昧順無明故但說無明爲緣現在業性猛利其相明顯順諸取故具說一切煩惱爲緣問阿羅漢所造業爲

名無明緣行爲名取緣有耶答不名無明緣  
行亦不名取緣有彼無無明亦無取故然彼  
業已與果者當知攝在行支分中未與果者  
當知攝在有支分中是彼類故然非十二有  
支所攝頗有行緣無明不緣明耶乃至廣說  
問何故此中因明無明而作論耶答是作論  
者意欲爾故乃至廣說復次此二俱是根本  
法故謂雜染品法無明爲根本清淨品法明  
爲根本復次此二俱是上首法故如說無明  
爲上首無明爲前相生無量種惡不善法及

起此類無慙無愧明爲上首明爲前相生無  
量種清淨善法及起此類增上慙愧復次明  
與無明近相治故謂無明是明近對治明是  
無明近對治復次明與無明互相違故謂無  
明違明明違無明復次明與無明互相攝  
而所緣境互相攝故謂俱緣神五四聖諦俱緣有  
漏無漏俱緣有爲無爲故然諸行名義有寬  
狹如說無明緣行阿毗達磨諸論師言此中  
意說分位緣起故此行聲說五取蘊尊者妙  
音說此行聲唯說諸業如說造作有損害行

彼行聲說不善業如說造作無損害行彼行聲說善業如說造作諸有爲行彼行聲唯說思如說色心心所法心不相应行無爲彼行聲說不相应行蘊如說色受想行識蘊彼行聲總說相應不相应行蘊如說色受想行識取蘊彼行聲唯說有漏相應不相应行蘊如說身語意行彼身行聲說入出息語行聲說尋伺意行聲說想思故彼行聲說一蘊全二蘊少分如說有罪福不動行彼行聲說有漏善不善業如說於諸行中有五過患有怖有

畏有苦觸無我我所諸有智者不見此行能離諸行有說彼行聲說不善法以說彼行有怖有畏有苦觸故有說彼行聲說五取蘊以說彼行無我我所諸有智者不見此行能離諸行故如說諸行無常有生滅法有說彼行聲說一切有爲法第三句說由生滅故有說彼行聲但說五取蘊第四句說彼寂爲樂以寂樂名唯顯擇滅非無漏法有擇滅故如說有罪行無罪行彼行聲說善不善業如說三妙行三惡行彼行聲說善不善業及貪瞋邪

見無貪無瞋正見如說一切行無常一切法無我涅槃寂靜彼行聲說一切有爲法此中行聲亦說一切有爲法以明無明俱爲緣故頗有行緣無明不緣明耶答無何以故無如是行唯以無明爲緣非明故頗有行緣明不神五是行唯以無明爲緣四無明爲緣無明何以故無如是行唯以明爲緣非無明故頗有行緣無明亦緣明耶答有何以故諸行種類有十一種欲界有四謂善不善有覆無記無覆無記色界有三謂善有覆無記無覆無記無色界有三如色界說及

無漏行爲十一種此中欲界善行明與無明俱非其因但作三緣謂等無間所緣增上不善行以無明爲四因謂相應俱有同類徧行亦作四緣明非其因但作二緣謂所緣增上欲界有覆無記行以無明爲四因如前說亦作四緣明非其因但作一緣謂增上欲界無覆無記行除無明異熟無明非其因但作三緣謂除因緣明非其因但作一緣謂增上緣無明異熟以無明爲一因謂異熟因但作三緣謂除所緣無明異熟非意地故明非其因

但作一緣謂增上緣色界善行明與無明俱  
非其因但作三緣謂除因緣色界有覆無記  
行以無明爲四因謂相應俱有同類徧行亦  
作四緣明非其因但作二緣謂所緣增上色  
界無覆無記行無明非其因但作三緣謂除  
因緣明非其因但作一緣謂增上緣如說色  
界三行無色界三行說亦爾無漏行除初明  
及彼俱得無明非其因但作二緣謂所緣增  
上以明爲三因謂相應俱有同類亦作四緣  
初明無明非其因但作二緣謂所緣增上明

亦非其因但作一緣謂增上緣初明俱得明  
與無明俱非其因但作一緣謂增上緣是謂  
此處略毗婆沙故一切行皆得以明無明爲  
緣理善成立以增上緣無不徧故頗有行不  
緣無明亦不緣明耶答無所以者何無一有  
情從久遠來不於聖道謗言非道先謗道已  
彼於後時造作增長感大地業或於後時造  
作增長感小王業或於後時造作增長感大  
王業或於後時造作增長轉輪王業由此因  
由此緣由彼聖道展轉感得大地所有城邑



聚落人非人畜穀稼藥草樹木叢林增長滋  
茂如是前心四緣於後心但爲一增上緣此  
中正說無漏聖道謗道邪見於諸有漏善業  
及果皆能作緣顯一切行無有不緣明無明  
者以增上緣展轉相望無不有故感大地業  
者謂能感得大地山林河海園苑藥草等物  
於彼自在統領受用感小王業者謂能感據  
堡塢王位感大王業者謂能感據川原王位  
轉輪王業者謂能感據一主地等力輪等位  
如屈夏拏沒魯荼至那天子等復次感小王

業者謂能感據川原王位感大王業者謂能  
感據一主地位如屈夏拏沒魯荼等轉輪王  
業者謂能感據一洲等位復次感小王業者  
謂能感據一主地位感大王業者謂能感據  
一洲王位轉輪王業者謂能感據二洲等位  
復次感小王業者謂能感據一洲王位感大  
王業者謂能感據二三洲位轉輪王業者謂  
能感據四洲王位有作是說感小王業者謂  
能感據轉輪聖王所使王位感大王業者謂  
能感得轉輪王太子位轉輪王業者謂能感

得轉輪王位有餘師說感小王業者謂能感  
得輪王太子未灌頂位感大王業者謂能感  
得輪王太子已灌頂位轉輪王業者謂能感  
得轉輪王位由此因者謂由此所造善業由  
此緣者謂由此謗道邪見由彼聖道者謂由  
彼所謗聖道由此因緣及彼聖道展轉感得  
大地所有有情無情內外異熟及增上果其  
事云何如諸外道厭世增減復厭世間怨憎  
會苦愛別離苦在家迫迮猶如牢獄而便出  
家既出家已爲解脫故受持種種非理苦行

執爲清淨能證解脫如依止苦行邪道如  
是如是聖道轉遠遠聖道故不證解脫便作  
是念雖有解脫而無聖道若當有者我何不  
得我修如是難行苦行經久不得故知無道  
既謗道已捨所受持作是思惟修福業者尚  
於生死不得如意自在快樂况不修福既思  
惟已種種方便求諸財寶設大施會因發願  
言願我此福能感大地內外物等得作小王  
或作大王或作輪王統攝自在隨其所願皆  
得果遂又如內道厭患世間壽命財位或增

或減又厭世間怨憎會苦愛別離苦在家迫  
迫猶如牢獄流轉生死受諸劇苦爲解脫故  
而便出家既出家已少欲喜足精勤苦行初  
夜後夜曾不睡眠依止山巖受小大七結加  
趺坐端身靜慮始從日沒至日出時專注思  
惟所受定相熾然精進經歷多時由二因緣  
不得聖道一善根未熟二起邪加行善根未  
熟者謂依佛法極速三生方得解脫第一生  
中種解脫分第二生中修令成熟第三生中  
既成熟已引起聖道能證解脫彼先未種解

脫分善故此生中善根未熟起邪加行者謂  
彼受持顛倒對治以是事故不得聖道便作  
是念雖有解脫而無聖道若當有者我何不  
得我修如是精進苦行經久不得故知無道  
既謗道已捨所受持作是思惟修福業者尚  
於生死不得如意自在快樂況不修福既思  
惟已種種方便求諸財寶設大施會供侍病  
者敬養有德自作教他見作隨喜修諸福業  
熾然無倦因斯發願願我此福能感大地內  
外物等得作小王或作大王或作輪王統攝

自在隨其所願皆得果遂既居王位以法治國令內外物皆悉滋茂若無聖道謗道邪見無由得生故彼聖道爲此邪見近增上緣若無邪見施俱善心無由得起故染汙法爲不染汙近增上緣若無施福不得王位若無王位諸內外物無由滋長故有情數爲諸外物近增上緣如是前心四緣者謂邪見俱心具有四緣彼相應俱有法等是彼因緣疑等是彼等無間緣聖道是彼所緣緣除彼自體餘一切法皆是彼增上緣於後心但爲一增上

緣者謂前心四緣與後施俱心但爲一增上緣問後施俱心亦有四緣因緣者謂彼相應俱有法等等無間緣者謂次彼前心心所法所緣緣者謂所捨物及受施者增上緣者謂除彼自體餘一切法如是後心四緣於前心亦爲一增上緣此中何故不說答亦應說而不說者應知此是有餘說有作是說以前類後其義可知故不復說有餘師說前心於後爲緣義順非後於前是故不說問後心四緣皆入前心四緣中攝彼增上緣除自攝餘一

切法故何緣乃說前心四緣與後心作一增  
上緣答此中應說前心四緣亦與後心具作  
四緣而但說作一增上者應知此說近增上  
緣謂前邪見近增上緣不入後心前三緣攝  
後心所有近增上緣不入前心前三緣攝如  
餘處說眼識四緣謂彼相應俱有諸法神五是彼  
因緣次彼前滅心心所法是彼等無間緣色  
是彼所緣緣眼是彼增上緣如彼唯說近增  
上緣此亦應爾故無有失有作是說前邪見  
心增上緣內理實具有後心四緣然增上緣

其義寬徧一切處有是故偏說問若爾後心  
亦是前心增上緣攝既說前心四緣於後為  
增上緣是則自體應與自體為增上緣便違  
宗義答此中應說前心四緣於後但作一增  
上緣除其自性而不說者先已說故謂前品  
中已說諸識除其自性餘一切法為能作因  
故不復說若於餘論餘蘊餘日所說語言尚  
可為證況於此論此蘊此日次前品說而不  
為證有說此中說近增上故無有失復次若  
依因緣說者此中依言顯所約義謂約因緣

而作論者得有三句前約四緣而作論故但有俱句頗有行緣無明不緣明耶答有謂無明異熟及染汙行此中無明異熟以無明爲一因謂異熟因明非其因染汙行以無明爲四因謂相應俱有同類徧行明非其因頗有行緣明不緣無明耶答有謂除初明諸餘無漏行謂餘無漏行以明爲三因謂相應俱有同類因無明非其因頗有行緣無明亦緣明耶答無何以故明與無明相去遠故必無一行以二爲因如有頌言

虛空大地相去遠 海彼此岸亦復遠  
日出沒處斯亦遠 正法邪法遠中遠  
頗有行不緣無明亦不緣明耶答有謂除無明異熟諸餘無覆無記行及初明善有漏行問此中所除無明異熟何者是耶答謂欲界神五三十四隨眠及彼相應俱有生等十所感異熟如是名爲無明異熟有作是說欲界三十四不善隨眠得所感異熟亦名無明異熟得與所得同一果故有餘師說不善身語業所感異熟亦名無明異熟能起所起同一果故評

曰二俱非理能得所得能起所起展轉相望  
非俱有因故不同一果故隨眠得及身語業  
所感異熟非無明異熟是故初說於理為善  
諸餘無覆無記行者謂一切善法異熟一切  
不善身語業及彼生等異熟一切不善得及  
彼生等異熟一切長養色及彼諸得生等一  
切等流法及彼諸得生等一切威儀路工巧  
處通果心相應俱有法及所起身語業諸得  
生等如是諸行明與無明俱非其因然非無  
因謂或有四因或有三因或有二因如理應

說初明者謂現行苦法智忍無明非其因無  
漏性故明亦非其因若俱若前俱無明故然  
非無因彼有相應俱有因故問初明俱得亦  
明無明俱非其因然非無因彼俱生等能與  
彼為俱有因故此第四句何故不說前第三  
句何故不除答此亦應說前亦應除而不爾  
者是有餘說有作是說此已攝在第二句中  
是苦法忍俱有法故彼不應作是說得與所  
得非俱有因前已說故前說為善依如是義  
有問答言頗有一刹那頃有二十四得與苦

法智忍俱生是苦法智忍種類而與苦法智忍互無因義耶答有謂依第四靜慮入正性離生者苦法智忍現在前時有六地各四行相苦法智忍得俱時現前彼與苦法智忍互無因義善有漏行者謂一切善有漏五蘊明與無明俱非其因然非無因謂或有三因或有二因如理應說由此故說若依因緣因明無明行有三句問何故名無明無明是何義答不達不解不了是無明義問若爾除無明諸餘法亦不達不解不了何故不名無明答

若不達不解不了以愚癡爲自相者是無明餘法不爾故非無明問何故名明明是何義答能達能解能了是明義問若爾有漏慧亦能達能解能了何故不名明答若達解了能於四諦真實通達說名爲明諸有漏慧雖達解了而於四諦不能真實通達故不名明如暖等四順決擇分雖能猛利推求四諦而未真實通達四諦不名爲明復次若達解了能於四諦究竟通達說名爲明諸有漏慧雖達解了而於四諦不能究竟通達故不名明復



次若達解了能於四諦決定通達說名為明  
諸有漏慧雖達解了而於四諦不能決定通  
達故不名明復次若達解了能於四諦見已  
非復不見知已非復不知現觀已非復為無  
知猶豫邪智所伏說名為明諸有漏慧雖達  
解了而於四諦不能如是故不名明復次若  
達解了斷所斷法令其究竟無力增長說名  
為明諸有漏慧雖達解了而無此力故不名  
明復次若達解了破壞諸有說名為明諸有  
漏慧雖達解了而增長有故不名明復次若

達解了能斷續有續老死法能令生死究竟  
斷滅說名為明諸有漏慧雖達解了無如是  
力故不名明復次若達解了趣苦滅行及趣  
諸有世間生死老死滅行說名為明諸有漏  
慧雖達解了而趣苦集行及趣諸有世間生  
死老死集行故不名明復次若達解了非身  
見事非隨眠事非顛倒事非貪瞋癡慢安足  
處無垢穢濁不墮諸有苦集諦攝說名為明  
諸有漏慧雖達解了與上相違故不名明復  
次若達解了無無明者說名為明諸有漏慧

雖達解了有無明故不名為明復次能療病  
呪說名為明謂世間人鬼魅所著明呪能療  
如是聖道能療衆生諸煩惱病故說為明諸  
有漏慧不能究竟療煩惱病故不名明復次  
諸有漏慧隨順二品以於二品俱作三緣故  
不名明亦非無明如人於他怨家親友俱隨  
順者彼人於他非親非怨此亦如是復次有  
漏慧品能諉明故不名為明有漏善慧雖順  
於明而能引生諉道邪見如叛臣故不名為  
明復次諸無漏慧於四聖諦照了明淨如晝

分眼見諸色像故說為明諸有漏慧於四聖  
諦見不明淨如夜分眼見諸色像故不名明  
問除明為因法及非明法餘法幾界幾處幾  
蘊攝答一界一處一蘊攝此中除明為因法  
者謂除初明諸餘無漏慧及非明法者謂一  
切有漏法及除無漏慧諸餘無漏法餘法者  
謂初明彼一界一處一蘊攝者謂法界法處  
行蘊攝問除心為因法及非心法餘法幾界  
幾處幾蘊攝答二界一處一蘊攝此中除心  
為因法者謂除現行苦法智忍相應心諸餘

無漏心及非心法者謂十一處餘法者謂現  
行苦法智忍相應心彼二界一處一蘊攝者  
謂意識界意識處識蘊攝問若法是明彼  
法是明因耶答應作四句有法是明非明因  
謂未來明有法是明因非明謂過去現在除  
無漏慧諸餘無漏行及未來明相應俱有法  
有法是明亦明因謂過去現在諸無漏慧有  
法非明非明因若說彼類謂未來無漏得及  
彼生等若不說彼類謂除前相問若法是明  
彼法明為因耶答應作四句有法是明非明

為因謂初明有法明為因非明謂明相應俱  
有法及除初無漏得并彼生等諸餘無漏得  
并彼生等有法是明亦明為因謂除初明諸  
餘無漏慧有法非明非明為因若說彼類謂  
初無漏得及彼生等若不說彼類謂除前相  
復次有隨信行道及隨法行道此中隨信行  
道與隨信行道為因亦與隨法行道為因隨  
法行道唯與隨法行道為因非隨信行道以  
彼劣故有作是說隨信行道亦唯與隨信行  
道為因非隨法行道以見道中隨信行者必

不轉為隨法行故評曰彼不應作是說同一相續有可得義復是勝道如何非因是故前說於理為善復次有信解道及見至道此中信解道與信解道為因亦與見至道為因見至道唯與見至道為因非信解道以彼劣故復次有時解脫道及不時解脫道此中時解脫道與時解脫道為因亦與不時解脫道為因不時解脫道唯與不時解脫道為因非時解脫道以彼劣故復次有見道修道無學道此中見道與見道為因亦與修道無學道為

因修道與修道為因亦與無學道為因非見道以彼劣故無學道唯與無學道為因非見修道以彼劣故復次有聲聞道獨覺道佛道此中聲聞道唯與聲聞道為因非餘二道以極遠故獨覺道唯與獨覺道為因非聲聞道<sup>神五</sup>以彼劣故及極遠故亦非佛道以極遠故佛道唯與佛道為因非餘二道以彼劣故及極遠故復次聖道亦依男身亦依女身此中依女身聖道與依女身聖道為因亦與依男身聖道為因依男身聖道唯與依男身聖道為

因非依女身聖道以彼劣故有作是說彼二  
聖道展轉爲因隨其利鈍彼說非理男女二  
身勝劣定故依彼聖道勝劣亦定有餘師說  
彼二聖道展轉非因依類別故彼說非理先  
於女身入聖道已後轉爲男所起聖道應無  
因故由是此中前說爲善復次有說一道有  
說多道說一道者不言見道即是修道及無  
學道見修無學三道異故但說聖道依男女  
身此二身中聖道是一說多道者言二身中  
聖道各別依類別故說多道者復有二種一

作是說依女身聖道於女身中亦得亦在身  
亦成就亦現在前依男身聖道於女身中得  
而不在身成就不現在前依男身聖道於男  
身中亦得亦在身亦成就亦現在前依女身  
聖道於男身中不得不在身不成就不現在  
前以依男身得聖道後必無更受女身義故  
又彼所依定鄙劣故二作是說依女身聖道  
於女身中亦得亦在身亦成就亦現在前依  
男身聖道於女身中不得不在身不成就不  
現在前依類別故於男身中說二聖道應知

亦爾彼說非理先依女身得聖道已後轉爲男應更得道是故次前所說爲善如是見道依九處身謂人三洲除北俱盧及六欲天此九皆能入見道故說一道者言九依身見道是一依類同故謂彼所依男女同類說多道者言九依身見道各別依處異故說多道者十五後有二種一作是說依瞻部洲身見道於瞻部洲身中亦得亦在身亦成就亦現在前依餘八處身見道於瞻部洲身中得而不在身成就不現在前二作是說依瞻部洲身見道

於瞻部洲身中亦得亦在身亦成就亦現在前依餘八處身見道於瞻部洲身中不得不在身不成就不現在前彼說非理依瞻部洲身得預流果已後生餘處應更得果然無此義是故次前所說爲善於餘八身說二見道應知亦爾如是修道依三界身說一道者言三界身修道是一說多道者言三界身修道各別說多道者復有二種一作是說依欲界身修道於欲界身中亦得亦在身亦成就亦現在前依上二界身修道於欲界身中得而

不在身成就不現在前二作是說依欲界身  
修道於欲界身中亦得亦在身亦成就亦現  
在前依色無色界身修道於欲界身中不得  
不在身不成就不現在前彼說非理依欲界  
身得不還果後生上界應更得果然無此義  
是故次前所說神五爲善於上界身說二修道應  
知亦爾二乘無學道亦准此應知如是無上  
正等菩提依瞻部洲百年位身乃至依此八  
萬歲身說一道者言依百年位身無上菩提  
即是乃至依八萬歲身無上菩提說多道者

言依百年位身無上菩提乃至依八萬歲身  
無上菩提其體各別說多道者復有二種一  
作是說依百年位身無上菩提於百年位身  
中亦得亦在身亦成就亦現在前依餘位身  
無上菩提於百年位身中得而不在身成就  
不現在前二作是說依百年位身無上菩提  
於百年位身中亦得亦在身亦成就亦現在  
前依餘位身無上菩提於百年位身中不得  
不在身不成就不現在前問若爾何故施設  
論說諸佛功德一切平等答由三事故一修

行等謂一切佛皆三大劫阿僧企耶修四波羅蜜多圓滿得無上菩提故二法身等謂一切佛皆成十力四無畏等無量無邊勝功德故三利益等謂一一佛能度無量無邊有情令解脫故復次根等謂一切佛皆住上上根故復次戒等謂一切佛皆得上上戒故復次道等謂一切佛皆成上上道故評曰此中次前所說為善依同類故

阿毗達磨大毗婆沙論卷第二十五 說一切有部發智

音釋

堡堡博抱切障也塢 塢安古切壘壁也塢 厦厦亥雅切 拏拏女加切 迫迫博陌切窘也劇甚也 劇劇甚也 療療力嶠切 叛皆蒲半切



阿毗達磨大毗婆沙論卷第二十六 神六

五百大阿羅漢等造

唐三藏法師玄奘奉詔譯

雜蘊第一中補特伽羅納息第三之四

入息出息當言依身轉耶依心轉耶乃至廢

神六

說問何故作此論答為令疑者得決定故謂

契經說佛告長者此入出息是身法身為本

繫屬身依身而轉施設論說何緣死者入出

息不轉耶謂入出息由心力轉死者無心但

有身故此入出息一說依身一說依心或有

生疑如是二說俱不了義或俱了義欲顯此

二真實義趣故作斯論入息出息當言依身

轉耶依心轉耶答應言亦依身轉亦依心轉

如其所應云何名為如其所應有作是說於

下中上如其所應謂入出息小時下品壯時

中品老時上品如是說者由四事故名如所

應謂入出息由四事轉一有息所依身二風

道通三毛孔開四入出息地麤心現前必具

此四入出息轉由此故說如所應言為顯此

義復作是說若入出息但依身轉不依心轉

則在無想定滅盡定位入出息亦應轉彼有  
 入出息所依身風道亦通毛孔亦開唯無入  
 出息地麤心現前以無心故雖有三事而闕  
 一事故息不轉若入出息但依心轉不依身  
 轉則無色界有情入出息亦應轉彼界四事  
 一切皆無故息不轉若入出息但依身心轉  
 不如所應則在卵殼及母胎中羯刺藍頭部  
 曇閉尸鍵南諸根未滿未熟并在第四靜慮  
 入出息亦應轉問何故羯刺藍位息不轉耶  
 答彼稀薄故若息轉者彼應流動問何故頽

部曇閉尸鍵南諸根未滿未熟位息不轉耶  
 答彼身爾時風道未通毛孔未開若息轉者  
 身應散壞然在卵殼及母胎中從羯刺藍乃  
 至諸根未滿未熟爾時未有息所依身風道  
 未通毛孔未開惟有息地麤心現前雖有一  
 事而闕三事故息不轉問何故在第四靜慮  
 息不轉耶答彼心細故謂入出息依麤心轉  
 第四靜慮以上諸地心極微細故息不轉復  
 次內門轉故謂息必依外門心轉第四靜慮  
 以上諸地心內門轉故息不轉復次內事轉

故謂息必依外事心轉第四靜慮以上諸地  
心內事轉故息不轉復次極寂靜故謂息必  
依躁動心轉如人涉路躁則動塵心若躁動  
起入出息第四靜慮以上諸地心極寂靜故  
息不轉尊者世友作如是說入第四靜慮便  
得轉依謂所依身有第四靜慮微妙大種令  
諸毛孔一切密合無竅隙故非息所依由此  
爾時息不復轉大德說曰入第四靜慮心便  
不動心不動故身亦不動身不動故息不復  
轉入彼定時一切動法皆息滅故尊者妙音

作如是說入第四靜慮一切麤重皆息滅故  
息不復轉謂欲界中有麤欲貪初靜慮地有  
尋有伺第二靜慮有喜第三靜慮有樂由此  
發生身心麤重由麤重故入出息轉第四靜  
慮一切皆無故息不轉如是若在下地入第  
四靜慮唯有息所依身及風道通然毛孔不  
開亦無息地神六麤心現前雖有二事而闕二事  
故息不轉問何故但說在第四靜慮息不復  
轉不說生第四靜慮耶答是作論者意欲爾  
故乃至廣說復次亦應說生第四靜慮息不

復轉而不說者應知此是有餘之說復次已說入彼定當知亦說生彼如契經說先在此間入彼靜慮後方生彼問第四靜慮亦有風界以四大種不相離故何緣生彼無息轉耶答第四靜慮雖有風界而不名爲入息出息以於彼身不入出故有說生彼雖有風界而無前說四種事故不名爲息以入出息亦依身轉亦依心轉及如所應是故下從無間地獄上至徧淨其中有情諸根滿熟入息出息依身心轉此中諸根滿熟言顯前四事具足

不說眼等根滿熟義謂前四事能發息故說之爲根具故名滿熟謂作用即前四事具足有用是故說爲諸根滿熟有說諸根滿熟言者簡處胎卵根未滿熟顯風道通毛孔開義身心二事次後自說應知此中有入息有出息有入出息地無入出息地入息者謂息風入身出息者謂息風出身有入出息地者謂欲界及下三靜慮無入出息地者謂第四靜慮及四無色生有入出息地無入出息地心現在前息便不轉生無入出息地有入出息

地心現在前息亦不轉生有入出息地及有  
入出息心現在前若不如所應息亦不轉要  
出有入出息地及有入出息地心現在前如  
其所應息方得轉問入出息何地繫隨身繫  
耶隨心繫耶有作是說隨身地繫諸有欲令  
入出息隨身地繫者彼說生欲界者若欲界  
心現在前彼欲界身欲界入出息隨欲界心  
轉即此心所觀即彼若初靜慮心現在前彼  
欲界身欲界入出息隨初靜慮心轉即此心  
所觀問若爾施設論說當云何通如說欲界

神六

入出息離欲界染時最後無間道滅答欲界  
入出息有隨欲界心轉有隨初靜慮心轉隨  
欲界心轉者爾時滅隨初靜慮心轉者爾時  
現在前復次彼依擇滅說故無相違失即彼  
若第二第三靜慮心現在前彼欲界身欲界  
入出息隨第二第三靜慮心轉即此心所觀  
生初靜慮者若初靜慮心現在前彼初靜慮  
身初靜慮入出息隨初靜慮心轉即此心所  
觀即彼若欲界心現在前彼初靜慮身初靜  
慮入出息隨欲界心轉非此心所觀即彼若

第二第三靜慮心現在前彼初靜慮身初靜  
 慮入出息隨第二第三靜慮心轉即此心所  
 觀生第二靜慮者若第二靜慮心現在前彼  
 第二靜慮身第二靜慮入出息隨第二靜慮  
 心轉即此心所觀即彼若欲界初靜慮心現  
 在前彼第二靜慮身第二靜慮入出息隨欲  
 界初靜慮心轉非此心所觀即彼若第三靜  
 慮心現在前彼第二靜慮身第二靜慮入出  
 息隨第三靜慮心轉即此心所觀生第三靜  
 慮者若第三靜慮心現在前彼第三靜慮身

第三靜慮入出息隨第三靜慮心轉即此心  
 所觀即彼若欲界初二靜慮心現在前彼第  
 三靜慮身第三靜慮入出息隨欲界初二靜  
 慮心轉非此心所觀諸有欲令入出息隨身  
 地繫者彼說欲界入出息四地心所觀初靜  
 慮入出息三地心所觀第二靜慮入出息二  
 地心所觀第三靜慮入出息唯第三靜慮心  
 所觀問若入出息隨身地繫施設論說當云  
 何通如說何緣死者入出息不轉耶謂入出  
 息由心力轉死者無心但有身故答顯入出

息隨心而轉必不離心故作是說不言此息  
隨心地繫有餘師說隨心地繫諸有欲令入  
出息隨心地繫者彼說生欲界者若欲界心  
現在前彼欲界身欲界入出息隨欲界心轉  
即此心所觀即彼若初第二第三靜慮心現  
在前彼欲界身初第二第三靜慮入出息隨  
初第二第三靜慮心轉即此心所觀生初靜  
慮者若初靜慮心現在前彼初靜慮身初靜  
慮入出息隨初靜慮心轉即此心所觀若欲  
界心現在前彼初靜慮身欲界入出息隨欲

界心轉即此心所觀若第二第三靜慮心現  
在前彼初靜慮身第二第三靜慮入出息隨  
第二第三靜慮心轉即此心所觀生第二靜  
慮者若第二靜慮心現在前彼第二靜慮身  
第二靜慮入出息隨第二靜慮心轉即此心  
所觀即彼若欲界初靜慮心現在前彼第二  
靜慮身欲界初靜慮入出息隨欲界初靜慮  
心轉即此心所觀即彼若第三靜慮心現在  
前彼第二靜慮身第三靜慮入出息隨第三  
靜慮心轉即此心所觀生第三靜慮者若第

三靜慮心現在前彼第三靜慮身第三靜慮  
入出息隨第三靜慮心轉即此心所觀即彼  
若欲界初二靜慮心現在前彼第二靜慮身  
欲界初二靜慮入出息隨欲界初二靜慮心  
轉即此心所觀諸有欲令人出息隨心地繫  
者彼說欲界入出息唯欲界心所觀乃至第  
三靜慮入出息唯第三靜慮心所觀問若入  
出息隨心地繫契經所說當云何通如說佛  
告長者此入出息是身法身為本繫屬身依  
身而轉答顯入出息由身力轉必不離身故

作是說不言此息隨身地繫評曰此入出息  
隨身地繫是身分故前說為善問入出息風  
為先入耶為先出耶答應說先入謂此息風  
先入口鼻流至咽喉復從咽喉流至心胃復  
從心胃流至齋輪復從齋輪漸流散徧諸  
肢節有說先出神六謂齋輪中有息風起流散上  
下開諸毛孔方出至外評曰彼不應作是說  
息風不能開毛孔故應作是說有業生風開  
諸毛孔毛孔開已乃有息風於中入出問於  
胎卵中至何分位入出息轉答至具色根六



處滿位息風方轉謂將生時息風先入息風入已名爲已生將欲死時息風後出不復更入名爲已死由此可觀生死分齊有餘師說臨欲生時息風先出息風出已名爲已生將欲死時息風後入不復更出名爲已死如說云何使我常活令我入息恒得出耶諸有欲入第四靜慮息風後出不復更入名已入定將出定時息風先入息風入已名已出定有餘師說諸有欲入第四靜慮息風後入不復更出名已入定將出定時息風先出息風出

已名已出定評曰此中前說爲善問此入出息爲是有情數爲非有情數耶答是有情數問此入出息爲有執受爲無執受耶答是無執受身中雖有有執受風而入出息是無執受問此入出息爲是長養爲是異熟爲是等流答唯是等流身中雖有異熟生風及長養風然入出息唯是等流如契經說佛告阿難若如射箭栝栝相續調入出息令不亂者應知彼名殊勝飲食問何故世尊說入出息名飲食耶答能損益故謂無上妙飲食益身如

有方便調入出息亦無麤惡飲食損身如無  
方便調入出息是故世尊說為飲食問如射  
箭枯枯相續者是何義耶答如以後箭射於  
前箭後觸前枯是此中義有說此中但顯前  
後無間斷義不說後箭觸前箭義又<sup>神六</sup>不定說  
如以後箭射前箭義如契經說有持來有持  
去有持來持去念有修持來持去念此中持  
來者謂入息持去者謂出息如施設論說吸  
風入內名持來引風出外名持去如鍛金師  
囊囊開合風隨入出此亦如是有作是說出

息名持來入息名持去有餘師說煖息名持  
來冷息名持去復有說者上息名持來下息  
名持去評曰此中初說為善能緣彼念名持  
來持去念即於此念及此相應俱有諸法若  
修若習若多所作名修持來持去念問此持  
息念自性是何答慧為自性然此聚中念力  
增故說名為念如四念住及宿住念本性生  
念慧為自性然彼聚中念力增故說名為念  
如除色想慧為自性然彼聚中想力增故說  
名為想此亦如是若并眷屬四蘊五蘊為其

自性此持息念界者謂欲色界非無色界地者五地謂欲界靜慮中間及下三靜慮近分諸有欲令下三根本靜慮地亦有捨根者彼說此念通八地謂前五及下三靜慮所依者唯依欲界非色無色界有餘師說依欲色界神六非無色界然初起時必依欲界行相者非聖行相所緣者緣息風念住者是身念住加行非根本念住若依汎爾四念住說是身念住緣色法故問何故契經說持息念通四念住答此能引起四念住故作如是說問不淨觀

亦能引起四念住何故不說四念住耶答亦有經說此不淨觀通四念住如說若觀青瘀膿爛蟲食等事名身念住又說若觀此中有受能引淨貪亦令止息名受念住又說若觀無損害意憐愍一切徧諸方域名心念住又說若觀貪瞋癡斷離染起明得衆苦盡名法念住問雖此一經說不淨觀通四念住而無量經說持息念通四念住非不淨觀有何意耶答以持息念依處慣習牢固可恃假使失念煩惱現行速可依之伏諸煩惱引四念住

如人怖賊速走歸城處謂大種相決定故若不淨觀非處慣習性不牢固或時失念煩惱現行不能依之速伏煩惱引四念住言非處者謂諸造色相不定故由此多經說持息念通四念住非不淨觀復次以持息念增益法想是空觀本由此速能引四念住是故偏說若不淨觀增有情想如說此骨爲女爲男障礙空觀不能速疾引四念住是故不說復次以持息念所緣鄰近無種種相無定次第不依有情住運而轉由此速能引四念住是故

偏說若不淨觀與此相違是故不說復次以持息念唯內道起不共外道由此速能引四念住是故偏說若不淨觀外道亦起不能速疾引四念住是故不說此持息念智者一世俗智三摩地者非三摩地俱根者一捨根相應世者通三世緣世者過去緣過神六去現在緣十現在未來若生法緣未來若不生法緣三世善不善無記者唯善緣善不善無記者唯緣無記繫不繫者欲色界繫緣繫不繫者緣欲色界繫學無學非學非無學者唯非學非無

學緣學無學非學非無學者唯緣非學非無  
學見所斷修所斷不斷者唯修所斷緣見所  
斷修所斷不斷者唯緣修所斷緣名緣義者  
唯緣義緣自相續他相續非相續者唯緣自  
相續復次此持息念由六因故應知其相一  
數二隨三止四觀五轉六淨數有五種一滿  
數二減數三增數四亂數五淨數滿數者謂  
從一數至十減數者謂於二等數爲一等增  
數者謂於一等數爲二等亂數者謂數過十  
有餘師說於入謂出於出謂入名爲亂數復

有說者數無次第故名亂數淨數者於五入  
息數爲五入於五出息數爲五出問爲先數  
入息爲先數出息耶答先數入息後數出息  
以生時息入死時息出故又如是觀身心安  
隱非顛倒故又如是觀顯於生死先入後出  
非顛倒故隨者繫心神六隨息從外入內謂從口  
鼻流至咽喉復從咽喉流至心十一曾復從心曾  
流至齋輪如是展轉乃至足指心皆隨逐心  
復隨息從內出外半麻一麻半麥一麥半指  
節一指節半指一指半揲手一揲手半肘一

肘半尋一尋乃至廣說隨根勢力息去近遠  
心皆隨逐止者謂觀息風初住口鼻次住咽  
喉次住心曾次住齋輪展轉乃至後住足指  
隨息所止心住觀之有說止者住心觀息徧  
住身中如珠中縷觀者謂此息風若至口鼻  
能審觀察若至咽喉亦審觀察如是展轉乃  
至足指亦審觀察觀息風已復作是念此風  
聚中有四大種此四大種生諸造色此所造  
色是心心所所依止處如是行者觀息爲先  
展轉徧能觀五取蘊轉者轉此入出息觀起

身念住展轉乃至起法念住淨者從煖乃至  
無學有說四種順決擇分亦是轉攝淨謂始  
從苦法智忍乃至無學有說從四念住位乃  
至金剛喻定皆是轉攝有煩惱故未名爲淨  
盡智起後方名爲淨復次此中數作二事一  
能數入出息二能捨耽嗜依尋隨作二事一  
能隨入出息二能捨出離依尋止作二事一  
能止住息二能住等持觀作二事一能觀入  
出息二能取心心所法相無所遺漏轉作二  
事一能轉息觀二能入諦觀有說轉作二事

一能捨異生性二能得聖性有說轉作二事  
 一能捨煩惱二能淨智見淨作二事一能觀  
 聖諦二能入聖道有說淨作二事一能捨煩  
 惱二能淨智見有說淨作二事一能證有餘  
 依涅槃界二能證無餘依涅槃界有餘師說  
 淨作二事一能證現法樂住二能證二涅槃  
 界問此六息念幾是奢摩他品幾是毗鉢舍  
 那品耶有作是說前三是奢摩他品後三是  
 毗鉢舍那品復有說者前三是毗鉢舍那品  
 後三是奢摩他品如是說者此不決定或有

神六

十二

一切皆是奢摩他品或有一切皆是毗鉢舍  
 那品如薄伽梵於契經中為所化生說伽他  
 曰  
 善修息念滿 漸習隨佛教 彼能明照世  
 如月出重雲

問此頌中說息念滿者誰名為滿誰不滿耶  
 有作是說佛名為滿獨覺聲聞俱名不滿有  
 餘師說佛及獨覺俱名為滿聲聞不滿或有  
 說者聲聞乘中到彼岸者亦名為滿諸餘聲  
 聞名為不滿復有說者三乘無學皆名為滿

學名不滿或復有說聖者名滿異生不滿如是說者諸有具上所說六因說名爲滿若不具者名爲不滿如契經說佛告苾芻吾欲兩月宴坐汝等不須參問唯除送食布灑他時於是世尊入室宴坐問世尊何故久宴坐耶

神六

十三

諸有情故謂未來世所化有情聞是事已作如是念如來猶故多時宴坐我輩寧得不宴坐耶有說爲遮外道謗故謂諸外道毀謗佛言此喬答摩好處慣聞愛多言論捨離閑居寂靜之樂爲止此等種種謗故多時宴坐有說任持菩提分法功德樹故如種樹已須更修治菩提分樹亦復如是雖已圓滿仍須經久宴坐任持有說爲受妙法樂故有說爲觀斷證微妙諸佛法故有說任持難行苦行所勞身故有說欲現雖久證得無上菩提而深



敬重猶如今時初證得故大德說曰由二因緣如來經於兩月宴坐一者自受大法樂故二者哀愍諸有情故脇尊者言爲他於法生渴仰故如彼經說過二月已爾時世尊從宴坐起出到迦處敷座而坐現如是相令諸苾芻來詣佛所問世尊爾時現何等相有作是說今地微動有餘師說放勝光明或有說者出梵音聲復有說者化作苾芻前後圍繞問訊恭侍時諸苾芻見已知佛從宴坐起深心慙愧我等何爲不早詣佛便相告命共往佛

所到已頂禮世尊雙足問訊起居退坐一面世尊告曰若有外道來問汝言汝等大師二月宴坐入何等定應答彼言入持息念問諸外道輩尚不知有持息念名況知自性世尊何故作是說耶答爲欲引攝諸外道等所化有情入佛法故謂有外道及信彼法所化有情聞佛世尊二月宴坐入持息念生希有心來詣佛所佛爲說法彼信奉行復次爲欲守護新學苾芻令於佛法不背捨故謂有苾芻初入佛法學持息念心不敬重欲歸外道更

求異法因佛此言諸外道輩來詣佛所恭敬  
受法是諸苾芻心便不退問佛宴坐時徧入  
一切靜慮解脫等持等至何故但說入持息  
念答雖入一切靜慮解脫等持等至而持息  
念是彼上首是故偏說復次靜慮解脫等持  
等至皆是息念前後眷屬是故世尊說持息  
念如契經說佛告苾芻我已念入出息了知  
我已念入出息我已念短入出息了知我已  
念短入出息我已念長入出息了知我已念  
長入出息我已覺徧身入出息了知我已覺

徧身入出息我已止身行人出息了知我已  
止身行入出息問入出息爲先短後長爲先  
長後短耶答先短後長云何知然如施設論  
說菩薩初入定時其息速疾久入定已息便  
安住如人擔重經險難處其息速疾後至平  
道息便安住故入出息先短後長問此觀息  
種大風從鼻而入還從鼻出何故乃說我覺徧身  
入出息耶答息念未成觀入出息從鼻入出  
息念成已觀身毛孔猶如藕根息風周徧於  
中入出問若爾何故非出定耶答意樂加行

俱未息故如菩薩時雖作此觀而不出定亦以意樂加行未息故無有過尊者世友作如是說如觀一切大種造色所合成身皆是無常苦空無我如病如癱如箭不淨以不捨離緣息風覺不名出定此亦應爾止身行者謂令息風漸漸微細乃至不生應知此中念入出息者是總念短入出息等是別復次念入出息者是欲界持息念念短息者是初靜慮念長息者是第二靜慮覺徧身者是第三靜慮止身行者是第四靜慮又彼經說我已覺

喜入出息了知我已覺喜入出息我已覺樂入出息了知我已覺樂入出息我已覺心行入出息了知我已覺心行入出息我已止心行入出息了知我已止心行入出息應知此中覺喜者觀初二靜慮地喜覺樂者觀第三靜慮地樂覺心行者觀想及思止心行者謂令心行漸漸微細乃至不生又彼經說我已覺心入出息了知我已覺心入出息我已令心歡喜入出息了知我已令心歡喜入出息我已令心攝持入出息了知我已令心攝持

入出息我已令心解脫入出息了知我已令  
心解脫入出息應知此中覺心者謂觀識體  
令心歡喜等者佛雖不復令心歡喜攝持解  
脫然菩薩時有如是事故復重觀又彼經說  
我已隨觀無常斷離滅入出息了知我已隨  
觀無常斷離滅入出息尊者世友作如是說  
隨觀無常者謂觀息風無常隨觀斷者觀八  
結斷隨觀離者觀愛結斷隨觀滅者觀結法  
斷有說隨觀無常者觀四大種無常隨觀斷  
者觀無明結斷隨觀離者觀愛結斷隨觀滅

者觀餘結斷有說隨觀無常者觀色身無常  
隨觀斷者觀造去結斷隨觀離者觀現在結  
斷隨觀滅者觀未來結斷有說隨觀無常者  
觀大種造色等皆是無常隨觀斷者觀苦受  
斷隨觀離者觀樂受斷隨觀滅者觀不苦不  
樂受斷大德說曰隨觀無常者觀五取蘊無  
常隨觀斷者觀五取蘊空無我隨觀離者觀  
五取蘊苦隨觀滅者觀五取蘊不轉寂滅又  
彼經說今我此定猶為麤淺我應更入餘深  
細定問此中何者是深細定有說第四靜慮

有說無色有說滅定又彼經說時有三天端  
嚴殊妙過於夜分來至我所第一天言此已  
命過第二天言此當命過第三天言此非已  
死亦非當死然住勝定寂靜如是問彼是何  
天寧作異說答是欲界天根品異故謂鈍根  
者作如是念此大沙門無入出息身不動搖  
神六  
無思作業必已命過若中根者作如是念此  
十七  
大沙門猶有煖氣身不爛壞雖非已死而當  
命過若利根者曾見諸佛及聖弟子入如是  
定身心不動後時還出故作是言此非已死

乃至廣說又彼經說佛告苾芻若有問言云  
何聖住云何天住云何梵住云何佛住云何  
學住云何無學住應正答言謂持息念所以  
者何此持息念能令學者證所未證能令無  
學者得現法樂住此持息念不雜煩惱故名  
聖住自性光淨故名天住自性寂靜故名梵  
住諸佛多住故名佛住學所得故名爲學住  
無學得故名無學住學者由此得勝現觀斷  
餘煩惱故名證所未證無學者由此得不動  
心解脫故名得現法樂住有說此持息念是

聖所有能引聖性故名聖住廣說乃至是無  
 學所有能引無學性故名無學住學者由此  
 能證阿羅漢果故名證所未證無學者由此  
 住四種樂故名得現法樂住四種樂者一出  
 家樂二遠離樂三寂靜樂四三菩提樂問此  
 持息念是非學非無學何故名為學無學住  
 答學無學者身中有故  
 阿毗達磨大毗婆沙論卷第二十六 說一切  
有部發  
 智

音釋

穀 苦角切 竅隙 竅苦弔切孔也  
 鍛 丁貫切 橐囊 橐無蒲拜切也 揅 陟格切 肘 於容切  
 戔 尺曰肘 憤鬧 憤古對切不安靜也 癰 於容切

阿毗達磨大毗婆沙論卷第二十七 神七

五百大阿羅漢等造

唐三藏法師玄奘奉詔譯

雜蘊第一中補特伽羅納息第三之五

如有色有情心相續依身轉乃至廣說問何

神七

故作此論答為令疑者得決定故謂或有疑  
欲色界有色故心相續依色轉無色界既無  
有色心相續應無依轉欲令此疑得決定故  
顯無色界心等相續亦有依轉故作斯論如  
有色有情心相續依身轉無色有情心相續

依何轉耶答依命根衆同分及餘如是類心  
不相應行何者是餘不相應行謂得生老住  
無常等問欲色二界心相續轉亦依命根衆  
同分等此中何故但說依身答亦應說依彼  
轉而不說者是有餘說有作是說依義多故  
謂欲色界心相續轉依身義多非命根等為  
依義多謂眼根等無量色法與眼識等為所  
依故有餘師說以身麤故但說依身命根等  
細難示現故若生欲界眼識現在前此識以  
眼及無間滅意為依及所依以眼根所依大

種身根及身根所依大種命根衆同分得生  
老住無常等爲依非所依如眼識耳鼻舌識  
應知亦爾若身識現在前此識以身及無間  
滅意爲依及所依以身根所依大種命根衆  
同分得生老住無常等爲依非所依若意識  
現在前此識以無間滅意爲依及所依以身  
根及身根所依大種命根衆同分得生老住  
無常等爲依非所依如生欲界生色界亦爾  
差別者彼無鼻舌識若生無色界意識現在  
前此識以無間滅意爲依及所依以命根衆

同分得生老住無常等爲依非所依有作是  
說若生欲界眼識現在前此識以眼及無間  
滅意爲依及所依以身根及色香味觸命根  
衆同分得生老住無常等爲依非所依如眼  
識耳鼻舌識應知亦爾若身識神七現在前此識  
以身及無間滅意爲依及所依以色香味觸  
命根衆同分得生老住無常等爲依非所依  
若意識現在前此識以無間滅意爲依及所  
依以身根及色香味觸命根衆同分得生老  
住無常等爲依非所依如生欲界生色界亦



爾差別者彼無鼻舌識及香味生無色界如  
前說有餘師說若生欲界眼識現在前此識  
以眼及無間滅意爲依及所依以俱生四蘊  
爲依非所依如眼識耳鼻舌身識應知亦爾  
若意識現在前此識以無間滅意爲依及所  
依以俱生四蘊爲依非所依如生欲界生色  
界應知亦爾差別者彼無鼻舌識生無色界  
意識現在前此識以無間滅意爲依及所依  
以俱生三蘊爲依非所依問命根體爲是一  
物爲多物耶設爾何失若一物者何故斷手

等而不死斷頭腰便死耶若多物者何故手  
等被斷離身而無有命答應說命根體是一  
物問若爾何故斷手足等而不死耶答命根  
有二種一依具足身二依不具足身斷手足  
等令離身時依具足身命根滅依不具足身  
命根起命所依神身亦有二種未斷手等名具  
足身斷手等時名不具足斷手等已具足者  
滅不具足者生故命與身相依而轉問何故  
斷頭及腰便死斷手足等而不死耶答頭腰  
二處是大死節故斷便死手等不然復次欲

界有情依段食住喉通段食腹為食依故斷一處命根便斷復次頭是眼等多根依處斷之便壞眼等諸根腹是息風所依止處斷腰腹壞息無所依故斷二處命根便斷手等不爾不可為難有說命根體是多物手足等中命根各別所依能依數量等故問若爾何故斷手足等令離身時而無有命答以手足等繫屬身故彼若離身命便不起如手足等未離身時是身根依名有情數離身不爾命根亦然故彼離身命便不起評曰應說命根體

是一物有一命故名有命者如有一心名有心者有一心滅名無心者一受一想一思亦然如有情有一命故名有命者而此命根唯是異熟不相应行如心受等一有情身一刹那頃有一無二云何眾同分謂有情同分猶如命根體是一物徧與一切身分為依是不相應行蘊所攝惟無覆無記性惟有漏通三界問此眾同分為長養為等流為異熟答是異熟及等流作長養非色法故異熟者謂趣同分等如地獄趣有情展轉相似乃至天

趣等有情亦然等流者謂界同分等如欲界有情展轉相似乃至無色界等有情亦然有說異熟者謂初生時得如與父母等展轉相似等流者謂後時方得如與沙門婆羅門等展轉相似洲渚方土及族類等有情同分如理應知有餘師說有情同分通善不善無記性攝謂四向四果有情同分是善性攝造五無間業有情同分不善性攝諸餘同分無記性攝評曰彼不應作是說法雖有三種而有情同分唯無記攝由此應知前說為善問若

得衆同分彼捨衆同分耶答應作順前句謂若得衆同分彼定捨衆同分有捨衆同分而不得衆同分謂阿羅漢般涅槃時問若死此生彼時定捨衆同分得衆同分耶答應作四句有死此生彼而不捨衆同分不得衆同分如地獄死還生地獄乃至天死還生天等有捨衆同分得衆同分而非死此生彼謂入正性離生等位有死此生彼亦捨衆同分亦得衆同分謂地獄等死生異趣等有不死此生彼亦不捨衆同分不得衆同分謂除前相

無有愛當言見所斷修所斷耶乃至廣說問  
 何故作此論答為欲分別契經義故謂契經  
 說愛有三種一欲愛二有愛三無有愛契經  
 雖作是說而不廣分別亦不說無有愛是見  
 所斷是修所斷契經是此論根本彼所不說  
 者今應說之復次為止異執顯經義故謂或  
 有說契經所言無有愛者通見修所斷如分  
 別論者為止彼執顯經所說無有愛者唯修  
 所斷故作斯論無有愛當言見所斷修所斷  
 耶答應言修所斷無有者衆同分無常緣此

愛說名無有愛是故此愛唯修所斷以衆同  
 分修所斷故有作是說無有愛或見所斷或  
 修所斷云何見所斷謂於見所斷法無有而  
 貪云何修所斷謂於修所斷法無有而貪問  
 誰作此說答分別論者彼說意言三界無常  
 說名無有能緣彼貪名無有愛無常既通見  
 修所斷能緣彼愛亦通二種於此義中無有  
 愛但應言修所斷謂於此論隨順契經無倒  
 義中無有愛但應言修所斷此中有說若隨  
 經義說無有愛唯修所斷若隨實義說無有

愛通二所斷所以者何謂契經說如有一類  
恐怖苦受所逼切故作如是念若我死後斷  
壞無有豈不樂哉此經中說彼衆同分後時  
無常名爲無有如是無有唯修所斷故無有  
愛非見所斷此中論主說隨經義與分別論  
者競釋經義故說無有愛唯修所斷若隨實  
義如後當說三界無常說名無有三界無常  
通二所斷故無有愛亦通二種有作是說此  
無有愛若隨實義若隨經義俱應說言唯修  
所斷三界無常雖通二種而起愛者唯修所

斷以無有愛依厭苦生但愛當來苦器無有  
唯修所斷是衆苦器故無有愛唯修所斷斷  
見雖緣五部無有而無有愛不能通緣但緣  
當來衆同分斷是故尊者妙音說曰起無有  
愛補特伽羅唯緣執受蘊界處起爲彼逼切  
緣彼當來斷壞起愛無見所斷逼切有情令  
愛彼斷故無有愛唯修所斷前來略說無有  
愛唯修所斷此後應理論者與分別論者相  
對問答難通廣顯無有愛唯修所斷汝說無  
有愛唯修所斷諸預流者未斷此愛耶者是

分別論者問重定前宗若不定他宗說他過失則不應理答如是者是應理論者答謂順契經無顛倒義所立決定故言如是汝何所欲諸預流者爲起如是心若我死後斷壞無有豈不安樂耶者是分別論者將欲設難反定所宗顯違正義答不爾者是應理論者遮彼所問顯義無違問何故預流者不起此愛耶答見法性故謂預流者見諸法性因果相續故不愛斷復次信業果故謂預流者深信業果前後相續故不愛斷復次了達空故謂

預流者得空解脫門知無我我所今有後斷故不起愛貪後斷滅復次此無有愛斷見所長養要斷見後方現在前諸預流者已斷斷見故不起此愛復次諸預流者得無有愛非擇滅故必不復起聽我所說若無有愛唯修所斷諸預流者未斷此愛則應說預流者起神七如是心若我死後斷壞無有豈不安樂若預流者不起如是心若我死後斷壞無有豈不安樂則不應說無有愛唯修所斷諸預流者未斷此愛作如是說俱不應理者是分別論

者前後兩關翻覆設難前關顯順宗違義後關顯順義違宗二俱不可故總結言作如是說俱不應理應理論者後通意言我宗不說諸未斷者皆必現前或有未斷而不現前或有已斷可現前故若未斷者皆必現前是則應無解脫出離以未斷法無邊際故設起何時起之可盡此後反破分別論者以通前難因明論中說破他義有三種路一猶豫破二說過破三除遣破佛契經中明破他說亦有三路一勝彼破二等彼破三違宗破勝彼破

者如長爪梵志白佛言我一切不忍佛告彼曰汝亦不忍此自見耶彼便自伏等彼破者如波吒梨外道白佛言喬答摩知幻不若不知者非一切智若知者應是幻惑佛告彼言俱荼邑有惡人名藍婆鑄荼破戒行惡汝知之不彼言我知佛告彼曰汝亦應是破戒惡人彼便自伏違宗破者如鴉波離長者白佛言身業罪大非意業佛告彼曰彈宅迦林羯凌伽林等誰之所作豈非仙人惡意所作彼答言爾佛言身業能作此耶彼言不能佛告

彼曰汝今豈不違前所言彼便自伏於此三  
中應理論者依等彼破以通前難此有三種  
如後廣說汝等亦說地獄傍生鬼異熟愛唯  
修所斷諸預流者未斷此愛耶者是應理論  
者問審定他宗若不定他宗說他過失則不  
應理答如是者是分別論者答所問理定故  
言如是汝何所欲諸預流者爲起如是心我  
當作哀羅筏拏龍王善住龍王琰魔鬼王統  
攝鬼界諸有情耶者是應理論者將欲設難  
反定所宗顯違正義答不爾者是分別論者

遮彼所問顯義無違問何故預流者不起此  
愛耶答彼趣是愚聖有智故彼趣是異生聖  
非異生故彼趣惡意樂聖意樂善故彼趣多  
有破戒惡業聖者成就清淨戒故復次一切  
聖者得諸趣非擇滅故不愛生彼問聖者於  
惡趣皆不起愛耶答雖無生彼愛而有資具  
愛如天帝釋亦愛設支青衣藥叉哀羅筏拏  
善住龍等諸預流等聞父母等墮惡趣中亦  
生愛念今遮生愛故答不爾聽我所說若地  
獄傍生鬼異熟愛唯修所斷諸預流者未斷



此愛則應說預流者起如是心我當作哀羅筏拏龍王乃至廣說若預流者不起如是心我當作哀羅筏拏龍王乃至廣說則不應說地獄傍生鬼異熟愛唯修所斷諸預流者未斷此愛作如是說俱不應理者是應理論者前後兩關翻覆設難前關顯順宗違義後關顯順義違宗二俱不可故總結言作如是說俱不應理應理論者此初意言如惡趣愛聖者未斷而不現前無有愛亦應爾故彼所難不順正理汝等亦說諸纏所纏故害父母命

此纏唯修所斷諸預流者未斷此纏耶者是應理論者問餘如前說答如是者是分別論者答餘如前說汝何所欲諸預流者為起如是纏故害父母命耶者是應理論者將欲設難反定所宗顯違正義答不爾者是分別論者遮彼所問顯義無違問何故預流者不起此纏耶答若有上品惡意樂者能起此纏諸預流者意樂善故復次若有上品無慚無愧能起此纏諸預流者有慚愧故復次此纏邪見之所長養邪見後起諸預流者邪見斷故

不起此纏復次諸預流者已得此纏非擇滅故及得此業不作戒故畢竟不起聽我所說若纏所纏故害父母命此纏唯修所斷諸預流者未斷此纏則應說預流者起如是纏故害父母命若預流者不起如是纏故害父母命則不應說諸纏所纏故害父母命此纏唯修所斷諸預流者未斷此纏作如是說俱不應理者是應理論者前後兩闢翻覆設難餘如前說應理論者此中意言如此殺纏聖者未斷而不現前無有愛亦應爾故彼所難不

應正理汝等亦說於修所斷斷法無有而貪此貪唯修所斷諸預流者未斷此貪耶者是應理論者問餘如前說答如是者是分別論者答餘如前說此中修所斷法者謂有漏善法無有者謂彼善根斷若於此起貪名無有貪此善根斷修所斷故緣此起貪亦修所斷汝何所欲諸預流者為緣此起愛耶者是應理論者將欲設難反定所宗顯違正義答不爾者是分別論者遮彼所問顯義無違問何故預流者不起此愛耶答聖於善法恒樂成

就不欲遠離此善根斷不成善法令遠離善是故聖者不緣起愛復次聖於善法恒樂增進此善根斷能令善法損減衰退是故聖者不緣起愛復次此善法無有愛是邪見所長養邪見後起諸預流者已斷邪見故無此愛復次聖者於此得非擇滅故必不起聽我所說若於修所斷法無有而貪此貪唯修所斷諸預流者未斷此貪則應說預流者緣此起愛若預流者不緣此起愛則不應說於修所斷法無有而貪此貪唯修所斷諸預流者未

斷此貪作如是說俱不應理者是應理論者前後兩關翻覆設難餘如前說應理論者此後意言如善法無有愛聖雖未斷而不現前無有愛亦應爾故彼所難不應正理彼既應理此亦應然者是應理論者總舉彼三結成神七已義謂彼所說初中後三既應正理我前所說理亦應然不可為難無有名何法答三界無常問何故復作此論答為令疑者得決定故謂或有疑造此論者唯解隨經義不解隨實義欲令此疑得決定故顯此論者前來成

立隨契經義說無有愛唯修所斷今隨實義顯無有愛通二所斷三界無常通二斷故復次分別論者問應理論者言汝從前來雖以言辯伏我而於實理猶未審定今應定說無有是何而言此愛唯修所斷應理論者答分別論者言我從前來雖以言辯伏汝成隨經義今隨實義此無有愛通二所斷以三界無常通二所斷故有作是說前來說愛今說無有欲顯此二俱修所斷此中所說三界無常但說三界衆同分滅不說一切評曰如前所

說爲善三界無常言無簡故緣善法斷尚有起愛緣見所斷諸法無常寧不起愛以斷見者總計五部爲我我所當來斷滅後隨起愛雖不總緣而緣一一別別起愛於理何咎問諸無漏法亦有無常何故此中唯說三界答若無常相是愛所緣此中說之無漏無常非愛所緣故此不說復次若無常相愛所隨增此中說之無漏無常非愛隨增是故不說如世尊說心解脫貪瞋癡乃至廣說問何故作此論答爲欲分別契經義故謂契經說心

解脫貪瞋癡契經雖作是說而不廣分別何等心解脫為有貪瞋癡心解脫為離貪瞋癡心解脫契經是此論根本彼所不分別者今應說之復次為止他宗顯正義故謂或有執心性本淨如分別論者彼說心本性清淨客塵煩惱所染汚故相不清淨為止彼執顯示心性非本清淨客塵煩惱所染汚故相不清淨若心本性清淨客塵煩惱所染汚故相不清淨者何不客塵煩惱本性染汚與本性清淨心相應故其相清淨若客塵煩惱本性染

汚雖與本性清淨心相應而相不清淨亦應心本性清淨不由客塵煩惱相不清淨義相似故又此本性淨心為在客塵煩惱先生為俱時生若在先生應心生已住待煩惱若爾應經二刹那住有違宗失若俱時生云何可說心性本淨汝宗不說有未來心可言本淨為止如是他宗異執及顯自宗無顛倒理故作斯論如世尊說心解脫貪瞋癡何等心得解脫有貪瞋癡心耶離貪瞋癡心耶答離貪瞋癡心得解脫問離貪瞋癡心本來解脫何

故復說得解脫耶答雖約煩惱本來解脫而依行世及在相續今得解脫謂若身中煩惱未斷心未行世不在相續以心不能自在行世在相續故不名解脫若自身中諸煩惱斷爾時此心自在行世在相續故名得解脫有作是說貪瞋癡相應心得解脫十三問誰作是說答分別論者彼說染汚不染汚心其體無異謂若相應煩惱未斷名染汚心若時相應煩惱已斷名不染心如銅器等未除垢時名有垢器等若除垢已名無垢器等心亦如是彼

不應作是說若作是說理應違拒所以者何非此心與貪瞋癡相合相應相雜而貪瞋癡未斷心不解脫貪瞋癡斷心便解脫此中意說心與煩惱若相應者無解脫義同對治故若未斷時以未斷故不名解脫若彼斷已俱不成就 不名解脫相應諸法不可令其遠離伴性尚不名斷况名解脫故解脫心必無煩惱本相應義為證此義復引契經世尊亦說苾芻當知此日月輪五翳所翳不明不照不廣不淨何等為五一雲二烟三塵四霧五曷

邏呼阿素洛手此中雲者如盛夏時有少雲  
起須更增長徧覆虛空障日月輪俱令不現  
烟者如林野中焚燒草木率爾烟起徧覆虛  
空障日月輪俱令不現塵者如亢旱時大風  
旋擊蹶塵卒起徧覆虛空障日月輪俱令不  
現霧者如秋冬時山河霧起又聞外國雨初  
晴時日照川原地氣騰湧霧霏布散徧覆虛  
空障日月輪俱令不現曷邏呼阿素洛手者  
謂阿素洛與天鬪時天用日月以為旗幟由  
日月威天常勝彼時曷邏呼阿素洛常心忿

日月欲摧滅之由諸有情業增上力盡其智  
術不能摧壞遂以手障令暫隱没如契經說  
苾芻當知無大身形端嚴殊妙如曷邏呼阿  
素洛者此說變化非謂實身如日月輪非與  
五翳相合相應相雜彼翳未離此日月輪不  
明不照不廣不淨彼翳若離此日月輪明照  
廣淨如是非此心與貪瞋癡相合相應相雜  
而貪瞋癡未斷心不解脫貪瞋癡斷心便解  
脫此中意說如日月輪非與五翳從本已來  
相應相雜後時離彼明照廣淨心亦如是非

從無始與貪瞋癡相應相雜後時離彼名得  
解脫是故要離貪瞋癡心後彼斷時名得解  
脫其理決定何等心解脫過去耶未來耶現  
在耶乃至廣說問何故作此論答為止他宗  
顯正義故謂於三世不了別者撥無過去未  
來諸法為遮彼執欲顯實有過去未來或復  
有執無正生時及正滅時如譬喻者彼說時  
分但有二種一者已生二者未生復有二種  
一者已滅二者未滅除此更無正生正滅為  
遮彼執欲顯實有正生滅位復次前說離貪

瞋癡心得解脫未說何心為在何世於何解  
脫今欲說之故作此論何等心解脫過去耶  
未來耶現在耶答未來無學心生時解脫一  
切障言未來者即遮撥無過去未來實有法  
執無學心者顯無學心名得解脫生時者顯  
有正生正滅時神七遮譬喻者執解脫十五一切障者  
顯於一切障皆得解脫謂離非想非非想處  
修所斷下下品煩惱時於三界五部障皆得  
解脫集徧知故爾時總得諸無為故問爾時  
未來心一切得解脫何故但說未來生時答



且舉未來生時爲門類顯一切皆得解脫爾時皆於在身行世得自在故復次以生時心是解脫道此爲上首離一切障由此未來皆得解脫故偏說之復次解脫有二種一行世解脫二相續解脫正生時心具二解脫故偏說之餘未來心雖有相續解脫而無行世解脫故不說之問爾時五蘊皆得解脫何故但說心解脫耶答舉心爲門類顯一切未來五蘊皆得解脫復次就勝說故謂五蘊中心最爲勝說心解脫即說一切如說王來即說臣

妾復次爾時雖有心所法等皆依心故但說其心以心大故心所名爲大地所有由心所故起隨轉色不相應行依心等生故偏說心不說餘蘊復次心是王故若心清淨餘蘊亦然故偏說復次修他心通無間道時但緣心故此中偏說此如初品已廣說之問學及非學非無學心亦得解脫何故但說無學心耶答就勝說故謂若說勝法無學法勝非學法等若說勝有情無學有情勝非學有情等是故此中但說無學復次以無學心解脫多

故有勝德故無諸過故此中說之餘心不爾  
是故尊者妙音說曰多故勝故無諸過故唯  
無學心說名解脫復次以無學心具二解脫  
謂自性解脫及相續解脫故偏說之餘心不  
爾是故此中應作四句有心自性解脫非相  
續解脫謂學無漏心有心相續解脫非自性  
解脫謂無學有漏心有心自性解脫亦相續  
解脫謂無學無漏心有心非自性解脫亦非  
相續解脫謂學有漏心及異生心復次若心  
全分解脫此中說之學心唯有一分解脫非

學非無學心或全分不解脫或一分不解脫  
故不說之復次若心唯解脫唯無縛唯有智  
無無智此中說之餘心不爾是故不說復次  
若心解脫五部煩惱及五部法此中說之餘  
心不爾是故不說復次若心解脫五部障礙  
及五部所緣此中說之餘心不爾是故不說  
復次若心有正解脫無邪解脫有正智無邪  
智無怨敵者此中說之餘心不爾復次若心  
不爲八邪所伏此中說之餘心不爾學心雖  
復遠離八邪而猶被障故亦名伏復次若心

畢竟能斷後有得一切有非擇滅者此中說之餘心不爾復次若心解脫究竟圓滿此中說之餘心不爾復次若心已得解脫王位以解脫縊而繫頂者此中說之餘心不爾復次若心唯在解脫猶如摩魯多愛相續中者此中說之餘心不爾復次若心究竟剪拔三界猶如鬚髮諸煩惱者此中說之復次若心已斷依第一有煩惱頂者此中說之復次若心相應有輕安樂廣大微妙此中說之學心雖復有輕安樂而彼猶有煩惱怨敵未未盡故

十七

十七

不得名為廣大微妙譬如國王怨敵未盡或雖已盡而諸邊國未來朝貢爾時未為受大快樂學心猶未盡煩惱故三界善根未總修故彼輕安樂不得名為廣大微妙復次若心相應有輕安樂已捨重擔不為煩惱意言所伏名牟尼者此中說之復次若心捨熱惱處得清涼處捨煩惱依得善根依捨雜染蘊得清淨蘊捨染有情聚得淨有情聚永寂意言牟尼圓滿此中說之復次若入勝義福田數者此中說之學有煩惱未入勝義福田數中

如伽他說

貪欲壞衆生

如田有穢草

施無貪欲者

獲勝果無疑

復次若害彼命得無間罪此中說之復次若

功德過失不相雜行者此中說之復次若斷

諸著破諸堤塘除諸障者此中說之復次若

斷四食破四魔怨離四識住究竟超度九有

情居絕諸生路盡界趣生老病死者此中說

之復次此中不應責造論者以造論者依經

作論經說無學心得解脫非有學等故偏說

之問盡智時修三界善根亦解脫不答亦得

解脫永離障故問阿羅漢果退已還得爾時

何心名得解脫為過去者未來者耶答唯未

來者名得解脫非過去者更不在身及行世

故已解脫故今雖重得不名解脫

阿毗達磨大毗婆沙論卷第二十七

說一切有部持

智

音釋

鑄茶

鑄朱戍切  
茶除加切

也  
職吏切

也  
也切

也  
古切

亢

苦浪切  
極

永樂北藏

大毗婆沙論

第一〇六册

永樂北藏

大毗婆沙論

第一〇六册

阿毗達磨大毗婆沙論卷第二十八 神八

五百大阿羅漢等造

唐三藏法師玄奘奉詔譯

雜蘊第一中補特伽羅納息第三之六

其事如何答如無間道金剛喻定將滅解脫

道盡智將生若無間道金剛喻定正滅解脫

道盡智正生爾時名未來無學心生時解脫

一切障此中金剛喻定將滅者謂生相用時

盡智將生者謂臨至生相爾時猶名未得解

脫未定行世在相續故金剛喻定正滅者謂

滅相用時盡智正生者謂生相正用爾時乃

名今得解脫定能行世在相續故若金剛喻

定已滅盡智已生爾時名為已得解脫此中

且舉將解脫位顯正解脫問何故名為金剛

喻定答無有煩惱不斷不破不穿不碎譬如

金剛無有若鐵若牙若貝若珠石等不斷不

破不穿不碎是故此定名金剛喻假使具縛

有情身中能起此定爾時即能頓斷三界一

切煩惱云何知然金剛喻定現在前時頓證

三界見修所斷煩惱斷故問此無間道四蘊

五蘊爲自性何故但說定耶答定偏增故如見道五蘊爲自性見偏增故但名見道如現觀邊世俗智四蘊五蘊爲自性智偏增故但說名智如四通行四蘊五蘊爲自性通慧偏增故但名通行如是此道雖四蘊五蘊爲自性而定偏增是故但名金剛喻定問何故此道定偏增耶答非想非非想處下下煩惱難斷難破極難越度須堅固定爲所依止發大精進乃能除遣譬言如有人欲殺香象先安其足後發武勇方成其殺是故此道定用偏增

復次非想非非想處下下煩惱最極微細不明不顯難可覺知須依勝定令心澄細方能除斷如善射者欲射毛端依巧便法令心澄細發箭方中是故此道定用偏增問此金剛喻定有幾智耶答有六智謂四類智及滅道法智此中或有以苦類智思惟非想非非想處諸行作非常苦空非我行相得阿羅漢果或有以集類智思惟非想非非想處諸行因作因集生緣行相得阿羅漢果或有以滅法智思惟欲界諸行滅作滅靜妙離行相得阿



羅漢果或有以道法智思惟欲界諸行道作道如行出行相得阿羅漢果或有以滅類智或思惟初靜慮諸行滅乃至或思惟非想非非想處諸行滅作滅靜妙離行相得阿羅漢果或有以道類智思惟九地類智品道作道如行出行相得阿羅漢果如是皆名金剛喻定是謂此處略毗婆沙問此金剛喻定依何地有幾耶有作是說依未至定有五十二謂依未至定或有以苦類智思惟非想非非想處諸行作四行相中隨一行相得阿羅漢果

或有以集類智思惟非想非非想處諸行因作四行相中隨一行相得阿羅漢果或有以滅法智思惟欲界諸行滅作四行相中隨一行相得阿羅漢果或有以道法智思惟欲界諸行道作四行相中隨一行相得阿羅漢果三八如是四智有十六行相或有以滅類智三或思惟初靜慮諸行滅作四行相中隨一行相得阿羅漢果乃至或思惟非想非非想處諸行滅作四行相中隨一行相得阿羅漢果如是八智有三十二行相足前十六成四十八或

有以道類智思惟九地類智品道作四行相  
中隨一行相得阿羅漢果如是一智有四行  
相足前四十八成五十二金剛喻定如依未  
至定乃至依第四靜慮亦爾依空無邊處有  
二十八謂依空無邊處或有以苦類智思惟  
非想非非想處諸行作四行相中隨一行相  
得阿羅漢果或有以集類智思惟非想非非  
想處諸行因作四行相中隨一行相得阿羅  
漢果如是二智有八行相或有以滅類智或  
思惟空無邊處諸行滅作四行相中隨一行

相得阿羅漢果乃至或思惟非想非非想處  
諸行滅作四行相中隨一行相得阿羅漢果  
如是四智有十六行相足前八成二十四或  
有以道類智思惟九地類智品道作四行相  
中隨一行相得阿羅漢果如是一智有四行  
相足前二十四成二十八金剛喻定依識無  
邊處有二十四金剛喻定謂除思惟空無邊  
處諸行滅四行相餘如依空無邊處說依無  
所有處有二十金剛喻定謂除思惟識無邊  
處諸行滅四行相餘如依識無邊處說有餘

師說依未至定有八十金剛喻定謂依未至定或有以苦類智思惟非想非非想處諸行一作四行相中隨一行相得阿羅漢果或有以集類智思惟非想非非想處諸行因作四行相中隨一行相得阿羅漢果或有以滅法智神八思惟欲界諸行滅作四行相中隨一行相得阿羅漢果或有以道法智思惟欲界諸行道作四行相中隨一行相得阿羅漢果如是四智有十六行相或有以滅類智或思惟初靜慮諸行滅作四行相中隨一行相得阿羅漢

果乃至或思惟非想非非想處諸行滅作四行相中隨一行相得阿羅漢果如是八智有三十二行相足前十六成四十八或有以道類智或思惟初靜慮諸行道作四行相中隨一行相得阿羅漢果乃至或思惟非想非非想處諸行道作四行相中隨一行相得阿羅漢果如是八智有三十二行相足前四十八成八十金剛喻定如依未至定乃至依第四靜慮亦爾依空無邊處有四十金剛喻定謂依空無邊處或有以苦類智思惟非想非非

想處諸行作四行相中隨一行相得阿羅漢  
 果或有以集類智思惟非想非非想處諸行  
 因作四行相中隨一行相得阿羅漢果如是  
 二智有八行相或有以滅類智或思惟空無  
 邊處諸行滅作四行相中隨一行相得阿羅  
 漢果乃至或思惟非想非非想處諸行滅作  
 四行相中隨一行相得阿羅漢果如是四智  
 有十六行相足前八成二十四或有以道類  
 智或思惟空無邊處諸行道作四行相中隨  
 一行相得阿羅漢果乃至或思惟非想非非

想處諸行道作四行相中隨一行相得阿羅  
 漢果如是四智有十六行相足二十四成四  
 十金剛喻定依識無邊處有三十二金剛喻  
 定謂除思惟空無邊處諸行滅道八行相餘  
 如依空無邊處說依無所有處有二十四金  
 剛喻定謂除思惟識無邊處諸行滅道八行  
 相餘如依識無邊處說尊者妙音作如是說  
 依未至定有十三金剛喻定謂見道中有四  
 類智忍修道中離非想非非想處修所斷染  
 有九無間道是謂十三金剛喻定如依未至

定乃至依第四靜慮亦爾依空無邊處乃至無所有處皆但有九金剛喻定謂除四類智忍餘如依未至定說如是說者依未至定有百六十四金剛喻定謂依未至定或有以苦類智思惟非想非非想處諸行作四行相中隨一行相得阿羅漢果或有以集類智思惟非想非非想處諸行因作四行相中隨一行相得阿羅漢果或有以滅法智思惟欲界諸行滅作四行相中隨一行相得阿羅漢果或有以道法智思惟欲界諸行道作四行相中

隨一行相得阿羅漢果如是四智有十六行相或有以滅類智或思惟初靜慮諸行滅作四行相中隨一行相得阿羅漢果乃至或思惟非想非非想處諸行滅作四行相中隨一行相得阿羅漢果如是四神八八成六三十二足前十六成四十八如是或思惟初二靜慮諸行滅或思惟第二第三靜慮諸行滅或思惟第三第四靜慮諸行滅或思惟第四靜慮空無邊處諸行滅或思惟空識無邊處諸行滅或思惟識無邊處無所有處諸行滅或思惟無

所有處非想非非想處諸行滅各作四行相  
 中隨一行相得阿羅漢果如是四七成二十  
 八足前四十八成七十六如是或思惟初三  
 靜慮諸行滅或思惟第二第三第四靜慮諸  
 行滅或思惟第三第四靜慮空無邊處諸行  
 滅或思惟第四靜慮空識無邊處諸行滅或  
 思惟空識無邊處無所有處諸行滅或思惟  
 識無邊處無所有處非想非非想處諸行滅  
 各作四行相中隨一行相得阿羅漢果如是  
 四六成二十四足前七十六成百如是或思

惟四靜慮諸行滅或思惟第二靜慮乃至空  
 無邊處諸行滅或思惟第三靜慮乃至識無  
 邊處諸行滅或思惟第四靜慮乃至無所有  
 處諸行滅或思惟空無邊處乃至非想非非  
 想處諸行滅各作四行相中隨一行相得阿  
 羅漢果如是四五成二十足前百成百二十  
 如是或思惟四靜慮空無邊處諸行滅或思  
 惟第二靜慮乃至識無邊處諸行滅或思惟  
 第三靜慮乃至無所有處諸行滅或思惟第  
 四靜慮乃至非想非非想處諸行滅各作四

行中隨一行相得阿羅漢果如是四四成十  
六足前百二十成百三十六如是或思惟初  
靜慮乃至識無邊處諸行滅或思惟第二靜  
慮乃至無所有處諸行滅或思惟第三靜慮  
乃至非想非非想處諸行滅各作四行相中  
隨一行相得阿羅漢果如是三四成十二足  
前百三十六成百四十八如是或思惟初靜  
慮乃至無所有處諸行滅或思惟第二靜慮  
乃至非想非非想處諸行滅各作四行相中  
隨一行相得阿羅漢果如是二四成八足前

百四十八成百五十六如是或思惟初靜慮  
乃至非想非非想處諸行滅作四行相中隨  
一行相得阿羅漢果此四足前百五十六成  
百六十或有以道類智思惟九地類智品道  
作四行相中隨一行相得阿羅漢果此四足  
前百六十成百六十四金剛喻定如依未至  
定乃至依第四靜慮亦爾依空無邊處有五  
十二金剛喻定謂依空無邊處或有以苦類  
智思惟非想非非想處諸行作四行相中隨  
一行相得阿羅漢果或有以集類智思惟非

想非非想處諸行因作四行相中隨一行相  
 得阿羅漢果如是二智有八行相或有以滅  
 類智或思惟空無邊處諸行滅作四行相中  
 隨一行相得阿羅漢果乃至或思惟非想非  
 非想處諸行滅作四行相中隨一行相得阿  
 羅漢果如是四中八成十六足前八成二十四  
 如是或思惟空識無邊處諸行滅或思惟識  
 無邊處無所有處諸行滅或思惟無所有處  
 非想非非想處諸行滅各作四行相中隨一  
 行相得阿羅漢果如是三四成十二足前二

十四成三十六如是或思惟空識無邊處無  
 所有處諸行滅或思惟識無邊處無所有處  
 非想非非想處諸行滅各作四行相中隨一  
 行相得阿羅漢果如是二四成八足前三十  
 六成四十四如是或思惟空無邊處乃至非  
 想非非想處諸行滅作四行相中隨一行相  
 得阿羅漢果此四足前四十四成四十八或  
 有以道類智思惟九地類智品道作四行相  
 中隨一行相得阿羅漢果此四足前四十八  
 成五十二金剛喻定依識無邊處有三十六



金剛喻定謂依識無邊處或有以苦類智思  
惟非想非非想處諸行作四行相中隨一行  
相得阿羅漢果或有以集類智思惟非想非  
非想處諸行因作四行相中隨一行相得阿  
羅漢果如是二智有八行相或有以滅類智  
或思惟識無邊處神八諸行滅作四行相中隨一  
行相得阿羅漢果乃至或思惟非想非非想  
處諸行滅作四行相中隨一行相得阿羅漢  
果如是三四成十二足前八成二十如是或  
思惟識無邊處無所有處諸行滅或思惟無

所有處非想非非想處諸行滅各作四行相  
中隨一行相得阿羅漢果如是二四成八足  
前二十成二十八如是或思惟識無邊處乃  
至非想非非想處諸行滅作四行相中隨一  
行相得阿羅漢果此四足前二十八成三十  
二或有以道類智思惟九地類智品道作四  
行相中隨一行相得阿羅漢果此四足前三  
十二成三十六金剛喻定依無所有處有二  
十四金剛喻定謂依無所有處或有以苦類  
智思惟非想非非想處諸行作四行相中隨

一行相得阿羅漢果或有以集類智思惟非  
想非非想處諸行因作四行相中隨一行相  
得阿羅漢果如是二智有八行相或有以滅  
類智或思惟無所有處諸行滅作四行相中  
隨一行相得阿羅漢果或思惟非非想  
處諸行滅作四行相中隨一行相得阿羅漢  
果或思惟無所有處非非想處諸行滅  
作四行相中隨一行相得阿羅漢果如是三  
四成十二是前八成二十或有以道類智思  
惟九地類智品道作四行相中隨一行相得

阿羅漢果此四足前二十成二十四金剛喻  
定此中依無色定不起法智亦不緣下地苦  
集及滅以無色定唯緣自地及上地故前來  
所說生欲界者金剛喻定生上二界如應當  
知所起多少謂生上二界必不起法智以彼  
厭下苦集諦故不欲重觀神八既不觀下苦集亦  
不觀下滅道以滅道智用苦集智為上首故  
若生上地不依下地離餘煩惱上地自有勝  
下定故除生非非想處彼無自地無漏  
定故必須依下無所有處起無漏定離餘煩

惱若生上靜慮地必不緣下靜慮地苦集及滅以馱彼苦集故如法智說未解脫心當言解脫已解脫心當言解脫耶答已解脫心當言解脫問何故作此論答前雖說心解脫會瞋癡又說未來無學心生時解脫一切障而未說未解脫心當言解脫已解脫心當言解脫今欲說之故作此論問云何此心名已解脫答本性解脫貪瞋癡故問若已解脫貪瞋癡者何故復言今得解脫答依煩惱故名已解脫若依行世在相續故名今解脫今此位

中始能行世在相續故於如是義未通達者作是難言若已解脫不應言解脫若解脫不應言已解脫已解脫心而言解脫不應正理雖依前義此難已遣而今更引餘事釋之如契經說大王今者從何所來彼雖已來而說十一今來此亦應爾不應為難此中論主為顯此義復引餘經及詰難者今應問彼如世尊說若斷愛無餘如蓮華處水十二必勿捨此彼如蛇脫故皮汝許此說是善說耶彼答如是汝何所欲為

已捨言捨未捨言捨耶彼答已捨言捨聽我所說若已捨不應言捨若捨不應言已捨已捨而言捨不應正理此中論主反詰難者令彼自解是等彼釋如彼所解而釋通故然此頌中前二句顯已捨義已斷煩惱處在世間心無所著如蓮華故後二句顯今捨義不住此彼六根六塵如蛇脫皮無顧戀故彼於昔事而說今聲然無有失此亦應爾雖已解脫言今解脫而無有過爲證此義復引餘經反詰難者又世尊說

斷慢自善定 善心一切脫 一靜居不逸  
越死到彼岸  
汝許此說是善說耶彼答如是汝何所欲爲已到言到未到言到耶彼答已到言到聽我所說若已到不應言到若到不應言已到已到而言到不應正理此釋難意如前應知謂此頌中前二句顯已到義後二句顯今到義彼於昔事而說今聲然無有失此亦應爾故總結言彼既應理此亦應然即顯此中是等彼釋觀彼難者於諸契經應善分別了不了

義復作是言故於契經應分別義如世尊說  
獸歸林藪鳥歸虛空聖歸涅槃法歸分別如  
是四種至所歸處方得安樂是故智者應於  
契經善分別義不應如說而便作解若如說  
而解者則令聖教前後相違亦令自心起顛  
倒執如世尊說神八必芻當知依獸十二離染依離染  
解脫依解脫涅槃乃至廣說問何故作此論  
答爲廣分別契經義故謂契經說依獸離染  
乃至廣說雖作是說而不廣辯云何依獸離  
染乃至云何依解脫涅槃契經是此論所依

根本彼所不說者今應分別故作斯論如世  
尊說必芻當知依獸離染依離染解脫依解  
脫涅槃問一心聚中即具有獸離染解脫何  
故但說依獸離染依離染解脫不說依解脫  
離染依離染獸耶答生隨順勝故謂此三法  
雖復俱生而獸於離染生隨順勝離染於獸  
生隨順劣離染於解脫生隨順勝解脫於離  
染生隨順劣如觸與受雖復俱生而說觸緣  
受不說受緣觸此亦如是此中依有二種一  
能生二能得能生者謂依獸離染依離染解

脫能得者謂依解脫涅槃故於此中作順後  
句問若是依者亦是緣耶答若是緣者彼亦  
是依或有是依而非是緣謂依解脫而得涅  
槃復次依有二種一者相順二者相似相順  
者謂依馱離染依離染解脫相似者謂依解  
脫涅槃云何馱十八答若於諸行無學馱惡違逆  
是謂馱問馱亦通學及非學非無學此中何  
故唯說無學耶答亦應說學及非學非無學  
而不說者當知此義有餘復次此中就勝說  
故謂若說勝法則無學法勝若說勝有情則

無學有情勝故說無學復次若說究竟應知  
亦說初中故不說二復次無學法是諸善根  
本是故偏說謂諸善法皆依無學得生長故  
復次若有馱無欣有離染無染者有解脫無  
繫縛有智慧無無知者此中說之復次若有  
馱不復馱有離染不復離染有解脫不復解  
脫者此中說之復次若於馱等修圓滿者此  
中說之尊者妙音作如是說以無學法多勝  
無過是故偏說大德說曰若界趣生及老病  
死一切盡者此中說之學等不爾是故不說

問馱以何為目性為是慧為是無貪耶設爾  
何失若是慧者次後所說當云何通如說云  
何依馱離染答若馱相應無貪無等貪無瞋  
無等瞋無癡無等癡善根是謂依馱離染此  
中無貪無瞋可爾無癡云何無癡即慧豈慧  
與慧有相應義而說馱相應無癡善根耶若  
是無貪次後所說當云何通如說云何依馱  
離染答若馱相應無貪無等貪乃至廣說此  
中無瞋無癡可爾無貪云何若馱是無貪云  
何說無貪與馱相應自性與自性無相應義

故見蘊所說復云何通如說有事能馱非能  
離謂苦集忍智不斷諸煩惱有事能馱亦能  
離謂苦集忍智斷諸煩惱忍智是慧非無貪  
性云何說馱無貪為體有作是說馱以慧為  
自性問若爾次後所說當云何通如說云何  
依馱離染答若馱神八相應無貪無等貪乃至廣  
說答此文但應說無貪無瞋不應說無癡誦  
者言便乘作此說有餘師說馱以無貪為自  
性問若爾次後所說當云何通如說云何依  
馱離染乃至廣說答此文但應說無瞋無癡

不應說無貪而說無貪者顯示依處謂或有  
 依無貪故心解脫貪或有依無瞋故心解脫  
 瞋或有依無癡故心解脫癡或有依無貪故  
 心解脫二乃至或有依無癡故心解脫二或  
 有依無貪故心解脫三乃至或有依無癡故  
 心解脫三此中顯示依無貪故心解脫三故  
 說若獸相應無貪無等貪乃至廣說非謂別  
 有無貪善根與獸相應問見蘊所說復云何  
 通答獸非忍智與忍智相應故立忍智名彼  
 依相雜說能獸性評曰有別法名獸非慧非

無貪是心所法與心相應此說在復有所餘  
 如是類諸心所法與心相應然見蘊說苦集  
 忍智名能獸者由彼忍智與獸相應說名能  
 獸非獸自性此中所說是無漏獸有漏獸者  
 謂不淨觀持息念念住三義觀七處善煖頂  
 忍世第一法相應隨其所應及現觀邊世俗  
 智相應隨其所應并餘有漏靜慮無色無量  
 解脫勝處徧處如病如癱如箭等隨其所應  
 無量行相相應此中隨麤顯示少分若廣顯  
 示過四大海問若事能獸彼事所獸耶答應



作四句有事能厭非所厭謂無漏厭有事所  
厭非能厭謂除有漏厭諸餘有漏法有事能  
厭亦所厭謂有漏厭有事非能厭亦非所厭  
謂除無漏厭諸餘無漏法緣一切法非我行  
相雖亦緣所厭事而是欣行相不與厭相應  
如前已說云何依厭離染答若厭相應無貪  
無等貪無瞋無等瞋無癡無等癡善根是謂  
依厭離染此中等言顯示上品勢力周徧故  
說爲等復次若隨所應緣境徧者說名爲等  
復次貪瞋癡者緣有情數等貪等者緣非有

情數是共法故說名爲等有作是說此中但  
應說無貪善根以此善根近治貪染故名離  
染無瞋無癡是能誦者乘便而誦有餘師說  
無瞋無癡雖非正離染而是助離染故亦說  
之或有說者染言通說一切煩惱故離染言  
通攝一切有爲善法今隨強故但說無貪無  
等貪等云何依離染解脫答若離染相應心  
已勝解今勝解當勝解是謂依離染解脫此  
中解脫是大地所有心所法中勝解爲自性  
然一切法中有二解脫一者無爲謂擇滅二

者有為謂勝解此復二種一者染污謂邪勝  
 解二者不染污謂正勝解此復二種一者有  
 漏謂不淨觀持息念等相應二者無漏謂苦  
 法智忍等相應此復二種一者有學謂四向  
 三果七補特伽羅相續中起二者無學謂阿  
 羅漢果相續中起此復二種一者時心解脫  
 謂前五種性相續中起二者不時心解脫謂  
 不動種性相續中起無學解脫復有二種一  
 者心解脫謂離貪故二者慧解脫謂離無明  
 故問若此解脫勝解為體施設論說當云何

通如說云何離貪故心解脫謂無貪善根對  
 治貪欲云何離無明故慧解脫謂無癡善根  
 對治愚癡勝解非三善根所攝云何可說心  
 慧解脫是二善根答彼文應說云何離貪故  
 心解脫謂無貪善根相應解脫云何離無明  
 故慧解脫謂無癡善根相應解脫而不說者  
 應知彼文是有餘說復次心慧解脫實非善  
 根而善根相應故以善根名說復次此中顯  
 示解脫依處謂心解脫依無貪善根而得生  
 長以無貪善根對治貪欲心解脫故慧解脫

依無癡善根而得生長以無癡善根對治愚  
癡慧解脫故此於所依說能依體故不相違  
云何依解脫涅槃答若貪求斷瞋求斷癡求  
斷一切煩惱求斷是謂依解脫涅槃問有身  
見等隨一法斷皆是涅槃此中何故說貪求  
斷乃至一切煩惱求斷答雖一一法斷皆是  
涅槃而此中但說圓滿涅槃故不應責復次  
涅槃之名唯在無學學位未滿不名涅槃故  
作是說問以何義故名曰涅槃答煩惱滅故  
名為涅槃復次三火息故名為涅槃復次三

中八

十七

相寂故名為涅槃復次離臭穢故名為涅槃  
復次離諸趣故名為涅槃復次繫名稠林涅  
名為出出蘊稠林故名涅槃復次繫名為織  
涅名為不以不織故名為涅槃如有縷者便  
有所織無則不然如是若有業煩惱者便織  
生死無學無有業煩惱故不織生死故名涅  
槃復次繫名後有涅名為無無後有故名為  
涅槃復次繫名繫縛涅名為離離繫縛故名  
為涅槃復次繫名一切生死苦難涅名超度  
超度一切生死苦難故名涅槃問馱與離染

解脫涅槃有何差別答馱惡違逆名馱無所  
 希求名離染心無垢穢名解脫永捨重擔名  
 涅槃復次毀些煩惱名馱毀些惡行名離染  
 於緣離繫名解脫諸蘊永寂名涅槃復次訶  
 毀欲界名馱離色界名離染脫無色界名解  
 脫證永寂靜名涅槃復次馱見所斷名馱離  
 修所斷名離染至無學果名解脫證永寂滅  
 名涅槃尊者妙音作如是說馱謂薄地離染  
 謂離欲地解脫謂無學地涅槃謂諸地果尊  
 者迦多衍尼子隨順經義作是言根律儀戒

律儀無悔歡喜安樂等持是修行地如實智  
 見是見地馱是薄地離染是離欲地解脫是  
 無學地涅槃是諸地果是馱離染解脫涅槃  
 四種差別

阿毗達磨大毗婆沙論卷第二十八說一切有部發智

音釋

詰苦吉切 煖乃管切 稠林稠直由切 毀些  
問也 溫也 密也 衆也  
 毀虎委切 謗也 將几切 譏也

阿毗達磨大毗婆沙論卷第二十九 神九

五百大阿羅漢等造

唐三藏法師玄奘奉詔譯

雜蘊第一中補特伽羅納息第三之七

如世尊說有三界謂斷界離界滅界乃至廣

神九

說問何故作此論答為廣分別契經義故謂契經說具壽阿難往詣尊者名上座所問何故阿難往詣彼所答尊者阿難是樂法者是正法將攝受聖教御聖教船恒巡四眾教授教誡數數觀察諸苾芻等勿有懈怠耽著戲

論或於境界顛倒思惟令彼一生空過顛墜故往彼所復次阿難作如是念彼名上座恒樂寂靜居阿練若勇猛精勤證何妙德我應往問若能為我說所證德我當合掌隨喜讚歎若不爾者方便殷勤示其加行令速證得勿彼多時居阿練若空無所獲故往彼所如彼經說具壽阿難到已施設同分言論非不同分問何等名為同分言論答若居阿練若者問以阿練若法若持毗柰耶者問毗柰耶若誦素怛纜者問素怛纜若學阿毗達磨者

問阿毗達磨是名同分言論與此相違名不同分言論謂居阿練若者問以三藏持毗柰耶者問阿練若及餘二藏誦素怛纜者問阿練若及餘二藏學阿毗達磨者問阿練若及餘二藏或更問餘事皆名不同分言論尊者阿難所以唯作同分言論若作不同分言論者彼不解故便不能答既不能答心便羞恥以羞恥故鬪諍違拒不欲令彼起如是過是故唯作同分言論謂但問彼阿練若法如彼經說爾時阿難問名上座若有苾芻居阿練

若或居樹下或居靜室或在塚間應數思惟何等行法時名上座白阿難言若有苾芻居阿練若或居樹下或居靜室或在塚間應數思惟二種行法謂奢摩他毗鉢舍那所以者何若奢摩他熏修心者依毗鉢舍那而得解脫神九若毗鉢舍那熏修心者依奢摩他而得解脫若奢摩他毗鉢舍那熏修心者依三種界而得解脫云何三界所謂斷界離界滅界問依對法義於一心中有奢摩他毗鉢舍那云何建立如是二種行者差別答由加行故二

種差別謂加行時或多修習奢摩他資糧或多修習毗鉢舍那資糧多修習奢摩他資糧者謂加行時恒樂獨處閑居寂靜怖畏憤鬧見誼雜過恒居靜室入聖道時名奢摩他行者多修習毗鉢舍那資糧者謂加行時恒樂讀誦思惟三藏於一切法自相共相數數觀察入聖道時名毗鉢舍那行者復次或有繫心一緣不分別法相或有分別法相不繫心一緣若繫心一緣不分別法相者入聖道時名奢摩他行者若分別法相不繫心一緣者

入聖道時名毗鉢舍那行者復次若利根者名毗鉢舍那行者若鈍根者名奢摩他行者如利根鈍根如是因力緣力內分力外分力內正思惟力外聞他音力應知亦爾問斷離滅界體是無為無因無果云何乃說若奢摩他毗鉢舍那神九熏修心者依三種界三而得解脫答彼契經於緣涅槃勝解以界聲說謂修行者雖加行時精進勇猛修習止觀二種資糧若於涅槃不起勝解決定趣證畢竟不能斷諸煩惱心得解脫故緣涅槃勝解名界依此

界故心得解脫如彼經說爾時阿難問名上座何等斷故名爲斷界何等離故名爲離界何等滅故名爲滅界名上座言一切行斷故名斷界一切行離故名離界一切行滅故名滅界尊者阿難聞已合掌隨喜讚歎辭退復詣竹林道場以此事問五百苾芻彼復皆如名上座答問彼諸苾芻云何而答有作是說從少至老次第而答如法集時少者先問有餘師說從老至少次第而答如行施物自老至少復有說者一苾芻答餘皆隨喜脇尊者

言先作白已後次行籌受籌名答如彼經說爾時阿難聞已合掌隨喜讚歎辭詣佛所到已頂禮世尊雙足却住一面以此句義問佛世尊佛遂如彼上座等答問尊者阿難忍可上座五百苾芻所說義不設爾何失若忍可者何故復以問佛世尊若不忍可何故合掌隨喜讚歎答阿難忍可彼所說義問何故復以問佛世尊答如佛世尊知而故問尊者阿難亦復如是所以者何阿難欲顯善說法中同見同欲文義決定如大師說徒衆亦然如



親教說弟子亦然如軌範說受學亦然如是  
文義微妙決定依之修學乃至能證阿羅漢  
果非如外道所說文義師徒衆等展轉相違  
依之修學空無所證復次阿難欲以佛妙言  
印印所說義故重問佛若不以佛妙言印之  
則所說義猶可傾動當來四衆不敬信故如  
世文符若無王印則所行處人不敬受此亦  
如是故重問佛如彼經說佛問阿難汝知上  
座五百苾芻有何功德阿難白佛彼名上座  
五百苾芻皆阿羅漢諸漏已盡已捨重擔盡

諸有結縛得已利善辨聖旨心善解脫佛告  
阿難如汝所說問何故世尊問彼功德答爲  
欲開發少欲喜足所覆真實功德寶藏令諸  
世間知己敬養得勝果故如世伏藏雖多珍  
寶沙土覆之不得顯現若有開發令無量人  
採取受用得世富樂此亦如是故佛問之復  
次開覺施主勝思願故謂有施主恒以衣服  
等四種供具施彼上座及五百苾芻而不知  
彼有勝功德欲令知己歡喜踊躍起勝思願  
我等得遇如是福田已種善種定於來世受

大快樂是故世尊問彼功德復次爲止世間  
誹謗事故謂彼上座在母胎中經六十年既  
出胎已形容衰老無有威德故初生已立上  
座名後雖出家而被嗤笑少年強盛晝夜精  
勤尚難得果况此衰老氣力羸劣<sup>五</sup>能得果耶  
又彼上座所度<sup>九</sup>五百新學苾芻先隨天授衆  
人毀曰如是老叟貪著名利度五百人爲充  
自身驅役供侍不能教誡令從邪法五百苾  
芻先受邪化後雖歸正得無學果而有謗言  
此愚人輩先貪利養捨佛從邪雖後還來而

無所得爲止如是諸誹謗故問彼功德令世  
共知捨誹謗罪勤修敬養於當來世生天解  
脫彼經雖說斷等三界而不廣辨三界差別  
彼是此論所依根本彼不說者今欲說之故  
作斯論云何斷界答除愛結餘結斷名斷界  
云何離界答愛結斷名離界云何滅界答諸  
餘順結法斷名滅界此中先約阿毗達磨依  
世俗理說三界別近對治道有差別故餘結  
斷者餘八結斷順結法者謂除九結餘有漏  
法是一名三界差別復有說者若八結及

此相應并生等斷名斷界若愛結及此相應并生等斷名離界若諸餘順結法及此相應并生等斷名滅界即有漏善及諸有爲無覆無記名順結法復有說者若無明結斷名斷界若愛結斷名離界若諸餘結斷名滅界復有說者或有諸法能縛非能染彼斷名斷界或有諸法能縛亦能染彼斷名離界或有諸法非能縛非能染而是所縛是所染彼斷名滅界復有說者或有諸法是能繫非能染彼斷名斷界或有諸法是能繫是能染彼斷名

離界或有諸法非能繫非能染而是所繫所染彼斷名滅界有餘師說唯諸隨眠有自性斷問契經所說當云何通如說一切行斷故名斷界一切行離故名離界一切行滅故名滅界品類足說復云何通如說云何所斷法神九答一切有漏法云何徧知法答一切有漏法六彼作是答若諸隨眠緣八結起彼斷名斷界若諸隨眠緣愛結起彼斷名離界若諸隨眠緣餘法起彼斷名滅界評曰彼不應作是說諸有漏法先被繫縛離繫縛時皆得斷故有

作是說唯愛隨眠有自性斷問若爾前說契  
經及論當云何通彼作是答若愛隨眠緣八  
結起彼斷名斷界若愛隨眠緣愛結起彼斷  
名離界若愛隨眠緣餘法起彼斷名滅界評  
曰彼不應作是說諸有漏法先被繫縛離繫  
縛時皆得斷故尊者妙音作如是說煩惱體  
斷名斷界於境離繫名離界棄諸重擔名滅  
界脇尊者言無繫縛繫縛息名斷界無染汗  
染汗息名離界無彼果彼果息名滅界尊者  
設摩達多說曰諸煩惱斷名斷界無貪治貪

名離界果相續滅名滅界尊者左取作是說  
言相續斷故名斷界於緣離繫名離界離執  
受故名滅界復有說者過去煩惱斷故名斷  
界現在煩惱斷故名離界未來煩惱斷故名  
滅界如煩惱斷蘊斷亦爾復有說者苦受斷  
故名斷界樂受斷故名離界不苦不樂受斷  
故名滅界如三受斷順三受法斷亦爾復有  
說者若苦苦斷名斷界若壞苦斷名離界若  
行苦斷名滅界復有說者若欲界斷名斷界  
若色界斷名離界若無色界斷名滅界如是

等說皆依世俗隨就一門辯三界別皆非勝義諸斷界是離界耶答如是設離界是斷界耶答如是諸斷界是滅界耶答如是設滅界是斷界耶答如是諸離界是滅界耶答如是設滅界是離界耶答如是問何故復作此論答前約阿毗達磨依世俗理就近對治辯三界別今隨契經顯此三界體無差別謂有漏法一一斷時皆得一斷此一一斷約差別義說爲三界故此三界義雖有別而體無異如世尊說有三想謂斷想離想滅想乃至廣說

問何故作此論答爲廣分別契經義故謂契經說有三種想謂斷離滅契經雖作是說而不廣分別彼是此論根本彼所不說者今欲說之故作此論云何斷想答除愛結餘結斷諸想解名斷想云何離想答愛結斷諸想解名離想云何滅想答諸餘順結法斷諸想解名滅想此中廣釋如界應知問何故此中不說三想如前三界展轉相即答應說而不說者當知此義有餘復次此中欲顯異相異文故作是說若作異相異文說者易受持故復

次此中欲現二門二略二階二墮二光二炬  
二明二照二文相影如界相即想亦應然如  
想不相即界亦應然而爲相影故作是說問  
十六行相外有無漏慧不設爾何失若有者  
識身論及智蘊中何故不說若無者此文所  
說當云何通如說云何斷想答除愛結餘結  
斷諸想解名斷想乃至廣說此斷等想與何  
行相聖慧相應品類足論復云何通如說云  
何盡智謂如實知我已知苦已斷集已證滅  
已修道云何無生智謂如實知我已知苦不

復知乃至我已修道不復修如是二智何行  
相攝集異門論復云何通如說如實了知我  
已盡欲漏有漏無明漏是盡智不復當盡是  
無生智如是二智何行相攝此論見蘊復云  
何通如說受樂受時如實知受樂受是何行  
相契經所說復云何通如說如實了知我生  
已盡梵行已立所作已辦不受後有是何行  
相有作是說十六行相外無別無漏慧故識  
身論此論智蘊俱不說有問此中所說當云  
何通如說云何斷想廣說乃至此斷等想與

何行相聖慧相應答此約所緣建立三想不  
依行相由此三想皆作緣滅四行相故謂緣  
斷故名爲斷想不於此斷作斷行相餘二亦  
爾若作是說則此三想如前三界展轉相即  
闍品類足論復云何通如說云何盡智廣說  
乃至如是二智何行相攝答如實知我已知  
苦不復知者緣苦二行相攝謂苦非常我已  
斷集不復斷者緣集四行相攝我已證滅不  
復證者緣滅四行相攝我已修道不復修者  
緣道四行相攝問集異門論復云何通如說

如實了知我已盡欲漏廣說乃至如是二智  
何行相攝答六行相攝謂苦非常及緣集四  
問見蘊所說復云何通如說受樂受時如實  
知受樂受是何行相答彼於聖道說樂受聲  
即是緣道四行相攝問契經所說復云何通  
如說如實了知我生已盡廣說乃至是何行  
相答如實了知我生已盡者是緣集四行相  
梵行已立者是緣道四行相所作已辦者是  
緣滅四行相不受後有者是緣苦二行相謂  
苦非常復次由五緣故經作是說不說行相

云何為五一由意樂故謂加行時起此意樂云何當令我生永盡廣說乃至不受後有二由對治故謂修如是殊勝對治令生永盡廣說乃至不受後有三由所作故謂由如是殊勝所作令生永盡廣說乃至不受後有四相續故謂得如是殊勝相續令生永盡廣說乃至不受後有五由補特伽羅故謂此補特伽羅易現易施設一切生盡廣說乃至不受後有由此五緣故作是說非謂別有如是行相有餘師說十六行相外有別無漏慧問若爾

後說諸文善通識身智蘊何故不說答應說而不說者當知此義有餘復次若有行相現在和合能辦所作有作用者識身見蘊明了說之彼未來修畢竟不起是故不說復次若有行相能入見道得果離染盡諸漏者識身見蘊明了神九顯示彼無此用是故不說謂彼行相無學果後方起現前受現法樂遊戲神通觀本所作受用聖財復次若有行相加行無間解脫勝進四道可得識身見蘊明了顯示彼諸行相唯遠加行遠勝進道乃得現起是



故不說若作是說十六行相外有無漏慧者  
彼說此中依行相別建立三想謂斷行相相  
應想名斷想離行相相應想名離想滅行相  
相應想名滅想如是三想依行相別建立三  
種不約所緣謂於一一擇滅無為起此三想  
如於一的三箭所中其相各異依此所說斷  
等三想互不相應即作是說諸斷想是離想  
耶答不爾廣說乃至設滅想是離想耶答不  
爾評曰應作是說十六行相外無別無漏慧  
於理為善然此中說斷等三想若無漏者展

轉相即若是有漏容作斷等三種行相互不  
相即是故此中不決定說

雜蘊第一中愛敬納息第四之一

云何愛云何敬如是等章及解章義既領會  
已次應廣釋問何故作此論答為廣分別契  
經義故謂契經說若有修習慙愧圓滿應知  
愛敬亦得圓滿契經雖作是說而不分別云  
何愛云何敬契經是此論所依根本彼所不  
分別者今應盡分別之復次為欲訶毀非善  
士法令棄捨故為欲讚歎諸善士法令修習

故爲欲顯示五濁增時廣大有情甚難得故  
此中非善士法者謂有一類愛則妨敬敬則  
妨愛愛妨敬者如有父母於子寵極子於父  
母有愛無敬師於弟子應知亦然此等名爲  
愛則妨敬敬妨愛者如有父母於子嚴酷子  
於父母有敬無愛師於弟子應知亦然此等  
名爲敬則妨愛如是俱名非善士法善士法  
者謂有一類愛則加敬敬則加愛愛敬俱行  
名善士法若有此法增上圓滿應知即是廣  
大有情如有有情甚爲難得世若無佛此類

難遇設令有者是大菩薩諸大菩薩愛敬必  
俱爲顯此事及前所說三種因緣故作斯論  
云何愛答諸愛等愛信等喜樂等樂是謂愛  
此本論師於異文義得善巧故以種種文顯  
示此愛而體無別問愛以何爲自性答愛有  
二種一染汙謂貪二不染汙謂信問諸貪皆  
愛耶答應作順前句謂貪皆愛有愛非貪此  
即是信問諸信皆愛耶有作是說諸信皆愛  
有愛非信謂染汙愛應作是說信有二種一  
者於境唯信不求二者於境亦信亦求是故

此中應作四句有是信非愛謂信不求有是  
愛非信謂染汙愛有亦信亦愛謂信亦求有  
非信非愛謂除前相云何敬答諸有敬有敬  
性有自在有自在性於自在者有怖畏轉是  
謂敬此本論師於異文義得善巧故以種種  
文顯示此敬而體無別問敬以何爲自性答  
敬以慙爲自性云何愛敬乃至廣說問何故  
復作此論答前雖別說愛敬自性而未總說  
於一境轉今欲顯示愛敬二種於一境轉故  
作斯論云何愛敬答如有一類於佛法僧親

教軌範及餘隨一有智尊重同梵行者愛樂  
心悅恭敬而住若於是處有愛及敬是謂愛  
敬此中一類者謂異生或聖者異生於佛愛  
樂心悅恭敬住者彼作是念佛威力故我等  
解脫災橫王役種種苦事及得世間諸資生  
具聖者於佛愛樂心悅恭敬住者彼作是念  
佛威力故我等永捨諸惡趣因斷二十種薩  
迦耶見得正決定見四聖諦於無邊際生死  
輪迴諸苦事中已作分限復次彼二於佛愛  
樂心悅恭敬住者俱作是念佛威力故我等

出家受具足戒得苾芻性及餘利益安樂資糧是故尊者鄔陀夷言世尊於我有大恩德謂拔我無量苦與我無量樂滅我無量惡生我無量善復次彼二於佛俱作是念世尊開發我等慧眼故應愛敬是故尊者舍利子言若佛世尊不出于世我等一切盲生盲死復十次彼二於佛俱作是念佛為法王最初開示無上正法令諸有情無倒了達雜染清淨繫縛解脫流轉還滅生死涅槃餘無此能故應愛敬復次彼二於佛俱作是念世尊最初出

無明蔽宣說正法亦令無量無邊有情出無明蔽餘無此能故應愛敬復次彼二於佛俱作是念無始時來七依勝定隱蔽不現佛出世間無倒開示令無量衆依之趣入大涅槃宮餘無此能故應愛敬復次彼二於佛俱作是念佛威力故能令無量無邊有情修諸善法謂從不淨觀乃至無生智餘無此力故應愛敬復次彼二於佛俱作是念佛威力故令諸有情種諸善根成熟解脫餘無此力故應愛敬復次彼二於佛俱作是念佛威力故念

住正斷神足根力覺支道支三十七種菩提  
分等功德寶藏出現世間利益安樂無邊有  
情故應愛敬彼二於法愛樂心悅恭敬住者  
俱作是念我依此法解脫一切身心苦惱究  
竟安樂彼二於僧愛樂心悅恭敬住者俱作  
是念僧威力故我於正法毗奈耶中淨信出  
家受具足戒得苾芻性能正受持百一羯磨  
無所毀犯安樂而住由此速證究竟涅槃彼  
二俱於親教軌範及餘隨一有智尊重同梵  
行者愛樂心悅恭敬住者謂作是念此諸師

友爲我伴侶令我於法勤修正行速得成辦  
於前所說三寶師友殊勝境中具起愛敬餘  
則不定應作四句謂或有境起愛非敬如父  
母於子師於弟子等或復有境起敬非愛如  
於有德非己師長或復有境起愛及敬如有  
一類子於父神九母弟子於師等或復有境不起  
愛敬謂除前相問如是愛敬於何處有答三  
界五趣雖皆容有而此中說殊勝愛敬唯在  
欲界人趣非餘唯佛法中有此愛敬云何供  
養乃至廣說問何故作此論答爲廣分別契

經義故謂契經說

若於佛法僧 及所受學處 能供養恭敬

乃名為智者 若於不放逸 及勝三摩地

能供養恭敬 不退近涅槃

契經雖作是說而不廣分別云何供養云何

恭敬彼是此論所依根本彼不說者今應說

之復次為欲訶毀非善士法令棄捨故為欲

讚歎諸善士法令修習故為欲顯示五濁增

時廣大有情甚難得故此中非善士法者謂

有一類若供養則妨恭敬若恭敬則妨供養

云何供養則妨恭敬如在家者或有男女雖

具勢力能以種種資生珍饈供養父母而恃

此力心生輕慢如出家者或有弟子福德多

聞雖於其師能設種種財法供養而恃此事

遂於師所不生恭敬此等供養則妨恭敬云

何恭敬則妨供養神九如有一類懼他威力十五雖恭

敬之而不供養如是俱名非善士法善士法

者謂有一類若供養彼則加恭敬若恭敬彼

則加供養二事俱行名善士法若有此法增

上圓滿應知即是廣大有情如有情甚為

難得世若無佛此類難遇設令有者是大菩薩諸大菩薩此二必俱爲顯此事及前所說三種因緣故作斯論云何供養答此有二種一財供養二法供養財供養者問財供養以何爲自性有作是說爲饒益故捨諸財物即所捨財是此自性有餘師說能供養者身語二業是此自性或有說者即能發彼心心所法是此自性復有說者受者受已諸根大種及餘造色皆得增長是此自性評曰應作是說若所捨財若能捨者身語二業若能發彼

心心所法若受者受已諸根大種造色增長皆此自性如是財供養總用五蘊以爲自性已說自性所以今當說問何故名財供養財供養是何義答能爲緣義是供養義此以財爲初故名財供養若爲饒益故捨諸財物受者受已身心增益如是名施亦名供養若爲饒益故捨諸財物受者受已身心損減如是名施不名供養若爲損害故捨匪宜物受者受已或由神通或由呪藥或由福力身心增益此雖非施而名供養若爲損害故捨匪宜

物受者受已身心損減此不名施亦非供養  
問此財供養在何處有答唯在欲界非色無  
色唯在四趣非捺落迦問此財供養誰設誰  
受有作是說傍生趣設唯傍生趣受乃至天  
趣設唯天趣受有餘師說傍生趣設唯傍生  
受鬼趣設二趣受人趣設三趣受天趣設四  
趣受下不及上上及下故評曰應作是說四  
趣皆能展轉供養問施設論說天欲食時取  
空寶器以衣覆上而置座前經須臾頃隨其  
福力麤妙飲食自然盈滿既爾如何受他供

養答雖不受他飲食供養而有受餘香華資  
具法供養者問法供養以何為自性有作是  
說以說法者語為自性有餘師說以語所起  
名為自性或有說者以能發語心心所法為  
其自性復有說者受者聞已生未曾有善巧  
覺慧以為自性評曰應作是說若說法者語  
若能發語心心所法若受者聞已生未曾有  
善巧覺慧皆此自性如是法供養總用五蘊  
以為自性已說自性所以今當說問何故名  
法供養法供養是何義答能為緣義是供養



我此以法爲初故名法供養若爲饒益故爲  
他說法他聞法已生未曾有善巧覺慧如是  
名施亦名供養若爲饒益故爲他說法他聞  
法已不生未曾有善巧覺慧如是名施不名  
供養若爲損害故說譏刺他法他聞是已住  
正憶念歡喜忍受不數其過生未曾有善巧  
覺慧此雖非施而名供養若爲損害故說譏  
刺他法他聞是已發恚恨心不生未曾有善  
巧覺慧此不名施亦非供養問此法供養在  
何處有答此法供養在欲色界非無色界五

趣皆有地獄有者如慈授子生地獄中謂是  
浴室見諸苦具便說頌言

嘗聞世間受苦樂 非我非他之所作

受諸苦樂皆緣身 身若滅無誰復受

時彼地獄無量有情聞此頌已脫地獄苦從

彼命終生天受樂傍生有者如迦賓折羅鳥

自修梵行爲他說法鬼趣有者如發受鬼母

爲諸鬼子說是頌言

默然汝上勝 默然汝井宿 我得見諦時

亦當令汝見

人趣有者如今現見天趣有者欲界天中如  
 補處慈尊為諸天說法色界天中如手天子  
 來白佛言如此世尊四眾圍繞為說正法聞  
 已奉行我聞法已還無熱天為彼諸天說法  
 亦爾問此法供養誰設誰受有作是說地獄

趣設唯地獄趣受乃至唯天趣設唯天趣受  
 有餘師說地獄趣設唯地獄趣受傍生趣設  
 二趣受鬼趣設三趣受人趣設四趣受天趣  
 設五趣受評曰應作是說五趣皆能展轉供  
 養云何恭敬答諸有恭敬有恭敬性有自在

有自在性於自在者有怖畏轉是謂恭敬此  
 本論師於異文義得善巧故以種種文顯示  
 恭敬而體無別恭敬亦以慙為自性  
 阿毗達磨大毗婆沙論卷第二十九  
說一切有部發

音釋

阿練若 梵語也此云閑靜  
 素怛纜 梵語也此云契  
 愔 許里切與  
 捺落迦 梵語也此云不可樂  
 也獄名捺乃曷切

神九

十八

阿毗達磨大毗婆沙論卷第三十

神十

五百大阿羅漢等造

唐三藏法師玄奘奉詔譯

雜蘊第一中愛敬納息第四之二

云何供養恭敬乃至廣說問何故復作此論

答前雖別說供養恭敬自性而未總說於一

境轉今欲顯示此二於一境轉故作斯論云

何供養恭敬答如有一類於佛法僧親教軌

範及餘隨一有智尊重同梵行者施設供養

恭敬而住若於是處有供養及恭敬是謂供

養恭敬此中一類義如前說謂異生或聖者於佛施設供養恭敬而住者唯施設財供養恭敬而住非法供養所以者何佛於諸法已得究竟不復從他受學法故無有能為世尊說法令生未曾有善巧覺慧故於法施設供養恭敬而住者有本不說敬養法言以於涅槃無緣義故前說供養謂能為緣涅槃無緣是故不說而有本說者雖於涅槃無生長義而有於彼令顯了義謂以財法供養涅槃令諸有情恭敬求證由斯展轉斷障證得復次

法有二種一世俗謂名身等法二勝義謂究竟涅槃雖於勝義法無生長義而於世俗法有生長義是故於法亦有敬養問諸施法物誰應受之答施世俗法物說法師應受或應以此書寫正法施勝義法物應勤加守護猶如守護窣堵波物於僧施設供養恭敬而住者通財法二供養財供養者謂以香華衣食等物供養僧衆或設五年大會等事名財供養僧法供養者謂以三契聲等爲衆宣說正法或在衆中論議決擇或復處衆讚美功德

申述所願令衆歡悅諸如是等名法供養僧於親教軌範及餘隨一有智尊重同梵行者施設供養恭敬而住者亦通財法二種供養財供養者謂以衣鉢飲食湯藥及餘隨一沙門資具而供養之法供養者謂以三藏勸令受持或爲解釋神十令無疑滯或復勸請令修正行諸如是等名法供養於上所說三寶師友殊勝境中隨應供養恭敬而住於餘境中不決定有准前應說問供養恭敬何處具有答欲界具有非色無色界於欲界中四趣具有

非捺落迦以地獄中無財供養唯有法故問  
此財法供養誰設誰受答佛於一切有情能  
設財法二供養彼隨所應能受一切有情於  
佛隨應能設財供養非法供養無能爲佛說  
法者故及不能生佛未曾有善巧覺慧故獨  
覺除佛於一切有情能設財法二供養彼隨  
所應能受一切有情於獨覺隨應能設財供  
養非法供養舍利子除佛獨覺於一切有情  
能設財法二供養彼隨所應能受一切有情  
於舍利子隨應能設財供養非法供養大目

軋連除佛獨覺及舍利子於一切有情能設  
財法二供養彼隨所應能受一切有情於大  
目軋連隨應能設財供養非法供養乃至利  
根者於鈍根者隨應能設財法二供養彼隨  
所應能受<sup>十</sup>鈍根者於利根者隨應能設財供  
養非法供養彼隨所應能受<sup>三</sup>問若無以法供  
養佛者契經所說當云何通如說<sup>三</sup>慈芻善哉  
善哉汝乃能以和雅清妙明了易解美亮音  
聲諷誦正法令我歡喜答世尊欲令聞俱厭  
耳得無畏故作如是說非佛於彼受法供養

謂彼親教迦多衍那遣詣佛所爲居邊國寒地苾芻求請五事一常澡浴二以皮作觀身敷具三請恒著周足革屣四請持律爲第五人得受具戒五請若有苾芻遣使持衣與餘苾芻彼苾芻若不受我等當如何處分此衣聞俱胝耳承親教勅來詣佛所世尊威重釋梵護世尚不能側近正觀況彼輒敢申請佛知是事告阿難曰汝可將彼至我寢室敷設卧具而安置之阿難如教佛與同止至夜後分知彼倦息便告之言汝應爲我誦所解法

聞俱胝耳以三契聲誦所解法世尊歡喜爲欲令彼得無所畏能申所請是故讚言善哉善哉乃至廣說有作是說世尊讚彼過去所修業道清淨感得如是美妙音聲令人樂聞故作是說非爲於彼受法供養有餘師說世尊讚彼能善誦持波羅衍拏見諦經等故作是說非爲於彼受法供養或有說者以彼苾芻在豐馬國作諸佛事世尊讚彼更令彼國無量有情敬重受法故作是說非爲於彼受法供養復有說者佛讚弟子有多因緣非爲

受法或爲彼得無畏心故如今讚歎聞俱胝耳或爲遮彼誹謗事故如告無滅吾今背痛汝可爲諸苾芻宣說近堅固法唯汝能說如是勝事或欲令彼言威肅故如告目連唯汝能爲劫比羅城諸釋種等說微妙法或欲顯彼功德大故如佛讚歎舍利子言汝能說法如師子吼汝所說者是決定說問餘契經說復云何通如說佛告阿難陀言善哉善哉如汝所說精進速證無上菩提我聞汝言深生歡喜答佛以慶喜所說應時故說此言非爲

受法謂薄伽梵爲化有情曾涉遠路勞倦背痛詣一樹下四疊七條以爲卧具五條覆體枕僧伽胝如師子王右脇而卧告阿難曰汝可爲諸苾芻說法不應虛度爾時阿難承佛聖旨爲苾芻衆說七覺支言諸仁者念等覺支是我世尊自覺自說依猷離滅迴向於捨如是乃至捨等覺支廣說亦爾世尊聞彼說精進時便起前際憶念智見我於過去三無數劫由精進力所修加行速得圓滿疾證無上正等菩提念已發生殊勝歡喜由斯喜力

背痛便愈尋起整衣結加趺坐告可難曰汝  
爲大衆說精進耶阿難白佛唯然世尊佛讚  
彼曰善哉善哉我由精進速證菩提汝今說  
之故我歡喜讚應時說非受供養問毗柰耶  
說復云何通如說阿難我今增益出離善法  
極生歡喜若不受他法供養者如何增長出  
離善法答佛以他事爲已事故他善法增便  
作是說謂有情類多依佛法淨信出家受具  
足戒誦持三藏居阿練若寂靜思惟入正決  
定得果離欲乃至漏盡或種生天解脫種子

佛知是事甚大歡喜作如是念無量有情以  
我威力世出世間善法增長彼之所作即是  
我事深可慶喜故作是說然佛世尊定不於  
他受法供養法身功德極圓滿故生身必待  
衣食等資故有施他受財供養云何身力乃  
至廣說問何故作此論答爲止他宗顯正義  
故謂或有執身力身劣無別自體如分別論  
彼作是說心有力時說爲身力心無力時說  
爲身劣故身力劣無別自體故遮彼執顯身  
力劣有別自體觸處所攝或復有執身力自



體即是精進身劣自體即是懈怠如法密部  
爲止彼執顯示別有身力身劣非精進等有  
執身力及與身劣無定自體如譬喻者彼作  
是說象力勝馬馬力勝牛故知力劣無定自  
體爲遮彼執顯身力劣有定自體觸處所攝  
以一切法自性定故諸有爲法皆有勝劣自  
體決定如眼於色見明了者說名爲勝見不  
明了說名爲劣廣說乃至意知諸法亦復如  
是於中各有勝劣定性身力身劣應知亦爾  
問若身力劣各有定性譬喻者難當云何通

答雖象馬等相待勝劣名不決定而有定體  
謂馬對象劣大種多力大種少馬若對牛劣  
大種少力大種多如馬餘類當知亦爾以力  
與劣大種各異故相待時名雖不定而體恒  
別爲止如是他宗異執及爲顯示身力身劣  
實有別體故作斯論云何身力答諸身勇猛  
強健輕捷能有所辦是謂身力此本論師於  
異文義得善巧故以種種文顯示身力而體  
無異云何身劣答諸身不勇不猛不強不健  
不輕不捷無所能辦是謂身劣此本論師於

異文義得善巧故以種種文顯示身劣而體無異身力身劣幾處攝幾識識答一處攝謂觸處二識識謂身識及意識此中身識唯了彼自相意識了彼自相及共相此言即遮分別論者執身力劣無別自體顯示此二有別自體若無自體應非觸處攝及二識所識心力有無非觸處攝二識識故如二力士相撲撲時手腕纔交互知強弱此中論主引現事喻欲令愚智俱得解了由此即遮法密部執身力是精進身劣是懈怠顯身力劣非精進

等若不爾者手腕纔交寧知強弱精進懈怠非以手觸即能知故又如強者執弱者時力之勝劣相知亦爾此中論主引第二喻重顯斯義令易了知由此即遮譬喻者執身力身劣無定自體顯示此二有定自體若不爾者不應纔執即知勝劣相待假法定非身識所能了故問身力身劣以何爲自性有作是說以大種爲自性問何大種增名爲身力何大種增名爲身劣有說大種無偏增者然四大種有強勝者說名身力有羸弱者說名身劣

有說地界增故名爲身力水界增故名爲身  
劣外物亦爾檐山木等地界增故其體堅強  
抑瓜瓠等水大增故其體虛弱有餘師說身  
力身劣非四大種是所造觸問七所造觸中  
誰增故名身力誰增故名身劣有說重增故  
名身力輕增故名身劣外物亦爾重者體強  
輕者體弱有說此二是所造觸非七所攝謂  
七種外別有所造觸名身力身劣評曰應作  
是說即四大種及所造觸俱是身力身劣自  
性謂若調和俱名身力若不調和俱名身劣

如契經說菩薩身具那羅延力此力其量云  
何有作是說十凡牛力等一豪牛力十豪牛  
力等一青牛力十青牛力等一凡象力十凡  
象力等一香象力十香象力等一大諾健那  
力十大諾健那力等一鉢羅塞建提力十鉢  
羅塞建提力等半那羅延力二半那羅延力  
等一那羅延力菩薩身力與此力等有餘師  
說此量極少應說十凡牛力等一豪牛力十  
豪牛力等一青牛力十青牛力等一凡象力  
十凡象力等一野象力十野象力等一羯拏

魯訶象力十羯拏魯訶象力等一阿羅擇迦  
 象力十阿羅擇迦象力等一旃耆洛迦象力  
 十旃耆洛迦象力等一雪山象力十雪山象  
 力等一香山象力十香山象力等一青山象  
 力十青山象力等一黃山象力十黃山象力  
 等一赤山象力十赤山象力等一白山象力  
 十白山象力等一喞鉢羅象力十喞鉢羅象  
 力等一拘牟陀象力十拘牟陀象力等一鉢  
 特摩象力十鉢特摩象力等一奔荼利迦象  
 力十奔荼利迦象力等一鉢特莫迦象力十

鉢特莫迦象力等一大鉢特莫迦象力十大  
 鉢特莫迦象力等一大香象力十大香象力  
 等一大諾健那力十大諾健那力等一鉢羅  
 塞建提力十鉢羅塞建提力等一娑浪伽力  
 十娑浪伽力等一伐浪伽力十伐浪伽力等  
 一遮怒羅力十遮怒羅力等一伐羅遮怒羅  
 力十伐羅遮怒羅力等半那羅延力二半那  
 羅延力等一那羅延力菩薩身力與此力等  
 或有說者此量猶少應說菩薩身中有十八  
 大節一大節皆有一那羅延力復有說者

此量猶少應說菩薩身中有十八大節一  
大節有十八那羅延力或復有說此量猶少  
應說菩薩身中大小總有三百二十節其最  
小節有一那羅延力其次大節有二那羅延  
力漸次大者力倍倍增有餘復說此量猶少  
應說菩薩身力等千鵠羅伐拏龍象王力此  
象王力其量云何謂此象王舉身鮮白如拘  
牟陀白蓮華色七支善住具有六牙其頭紅  
赤如因達羅瞿博迦色左右邊脇各二踰繕  
那半身前後分各一踰繕那周圍身量七踰

繕那高下准一踰繕那半此是常身變化不  
定此有八千龍象眷屬身皆鮮白如拘牟陀  
具有六牙七支善住其頭紅赤如上煙脂若  
轉輪王出現於世此諸象中隨一來應三十  
三天將遊戲苑天福力故纔舉心時令大象  
王互現異色便作是念天帝釋等今須乘我  
入苑遊戲即便從此贍部洲沒至天帝釋宮  
前而現身上化出三十二頭皆具六牙如本  
頭色此頭并本有三十三一一牙上化作七  
池一一池中作七蓮華一一華上作七寶院

一一院內作七寶臺一一臺中作七寶帳一  
一帳內作七天女一天女作七侍者一  
侍者作七妓女奏諸妓樂作是化已時天帝  
釋及諸眷屬升彼本頭三十二天及諸眷屬  
升所化作三十二頭餘十千城諸天家族升  
彼背上其身輕舉猶如旋風吹蓮華葉或飄  
樺皮乘空往詣所遊戲苑爾時諸天都不自  
見有前後者到已俱下各詣戲林歡娛受樂  
時彼龍象亦自化身如天子形遊戲受樂謁  
羅伐拏其力如有作是言此力猶少應說

菩薩身中有十八大節一大節皆有如千  
萬羅伐拏龍象王力有餘復言此力猶少應  
說菩薩身中大小總有三百二十節其最小  
節有如千倍萬羅伐拏龍象王力漸次大者  
力倍倍增神+大德說曰此力猶少應說菩薩意  
力無邊身力亦爾云何知然謂昔菩薩吉祥  
人邊受吉祥草詣菩提樹自敷為座結加趺  
坐作是堅固願言若未諸漏未盡及證無上  
菩提我終不起此座無上菩提從未來世將  
入現在爾時三千大千世界六種震動菩薩

毛髮亦不動搖由此故知菩薩身力猶如意  
力量無邊際問若爾何故契經中說菩薩身  
有那羅延力答此力世間共所欽重故以為  
喻而實不然問菩薩何緣集此身力答欲現  
所有皆殊勝故謂諸色力族姓自在眷屬財  
位功德名聞智見威猛皆殊勝故憍傲有情  
歸伏受法復次欲為無上正等菩提作所依  
故集此身力謂佛無上正等菩提要依此身  
方得安住假使無上正等菩提置在妙高大  
山王頂彼便碎壞猶若微塵力無畏等甚尊

重故由此三千大千世界中瞻部洲有金剛  
座上窮地際下據金輪菩薩坐之成正等覺  
除此無有堅固依處是故菩薩初成佛時方  
欲經行徐足按地即令大地六種震動便起  
勝解乃得經行復次為欲引攝所化有情猶  
如遣使故集此力謂無上覺遣此力使摧彼  
慢已然後度之故在家時與諸釋種種種搆  
力無不得勝將般涅槃亦以身力伏諸力士  
而度脫之謂佛世尊化緣將盡欲入寂滅往  
拘尸城波波邑中五百力士聞已為佛修治

道路當彼路上有一大石長六十肘廣三十肘彼諸力士欲轉去之盡其身力不能令動世尊既至見已問言汝諸童子欲何所作彼聞惘然竊作是念我等勢力贍部推先如何世尊呼爲童子作是念已俱白佛言我爲世尊修治道路共轉此石不能令動頗能哀愍除此石耶佛言我能汝等遠避便以足指挑置掌中上擲虛空下還接取以口吹散令如微塵還使如本棄之路側力士驚歎得未曾有敬禮合掌復白佛言此是如來何等神力

世尊告曰舉石置掌復擲虛空後還接取棄之路側皆我父母生身之力以口吹散令如微塵是神通力還合如本是勝解力力士聞已歡喜踊躍復白佛言頗有餘力能勝世尊如是力不佛答言有謂無常力佛告力士謂我父母生身之力若神通力及勝解力今日中夜皆爲無常力之滅壞時諸力士聞佛所說皆於世間深生厭離佛便爲說如應法要令諸力士及餘無量在彼天人得法眼淨永離惡趣第八有等故爲引攝所化有情猶如



道使集此身力問菩薩何時身力圓滿答年  
一十五此後乃至年滿五十其力無減過是  
已後世尊身力漸漸衰退有說世尊身力無  
減猶如意力無衰退故評曰如來法身雖無  
衰退而生身力必有退減諸異熟果有衰退  
故是故尊者鄔陀夷言今見世尊色力衰減  
諸根變異謂五色根問諸餘有情有斯力不  
答此力不共一切有情唯最後身菩薩得有  
如最初說菩薩力量極為減少尚為難得況  
第二說第三說等餘有情類而得有耶然此

神十

十二

賢劫世界初成時有諸有情具那羅延力或  
有半那羅延力或有鉢羅塞建提力或有摩  
訶諾健那力此諸力士充滿世間過是已後  
漸漸減少乃至今時全無彼力佛在世時有  
三釋種具有鉢羅塞建提力謂阿難陀設摩  
釋子瞿波釋女爾時亦有具足摩訶諾健那  
力象力馬力牛力等人不可稱數若麟角喻  
獨覺亦有那羅延力若部行喻獨覺其力不  
可定說以彼多是聲聞種性後遇別緣得無  
學果雖樂寂靜而有衆居如五百仙一處得

果麟角喻者根極勝故樂獨出故當知如佛  
 必無有二並出世間如舍利子尚無並出况  
 麟角喻勝彼多倍諸聲聞人其力不定如部  
 行喻獨覺人說諸轉輪王力亦不定王四洲  
 者有那羅延力王三洲者有伐浪伽力王二  
 洲者有鉢羅塞建提力王一洲者有摩訶諾  
 健那力此四輪寶亦有差別王四洲者有金  
 輪寶其量正等四俱盧舍王三洲者有銀輪  
 寶其量正等三俱盧舍王二洲者有銅輪寶  
 其量正等二俱盧舍王一洲者有鐵輪寶其

量正等一俱盧舍如四輪寶有此差別應知  
 餘寶亦有勝劣謂王四洲者餘寶最勝乃至  
 王一洲者餘寶最劣問諸有情類身力既別  
 骨節安立有差別不答亦有差別謂凡常力  
 者骨節相遠有象馬力者骨節相近有大諾  
 健那力者骨節相接如接板等有鉢羅塞建  
 提力者骨節相鈎有那羅延力者骨節連鑱  
 菩薩骨節展轉相交如龍蟠結是故最勝已  
 說佛身力意力今當說謂佛世尊成就十力  
 四無所畏及與大悲三念住等不可思議無

邊功德隨用差別立種種名且於十種說名  
意力云何為十一處非處智力二業法集智  
力三靜慮解脫等持等至發起雜染清淨智  
力四種種界智力五種種勝解智力六根勝  
劣智力七徧趣行智力八宿住隨念智力九  
死生智力十漏盡智力問如是十力以何為  
自性答以智為自性謂佛意力是智所成以  
智為體智所攝故如契經說於處非處如實  
了知乃至廣說已說自性所以今當說問何  
故名力力是何義答不可屈義是力義不可

伏羲不可摧義不可害義不可轉義不可覆  
義能徧覺義能荷擔義堅固義最勝義能制  
他義是力義界者宿住隨念智力死生智力  
是色界繫餘力有漏者三界繫無漏者是不  
繫地者宿住隨念智力死生智力在四根本  
靜慮是通性故近分無色及不定地非通所  
依故無此二餘力有漏者在十一地謂欲界  
四靜慮四無色及未至定靜慮中間無漏者  
在九地所依者皆依欲界人瞻部洲大丈夫  
身唯依此身得成佛故行相者處非處智力

徧趣行智力十六行相或餘行相業法集智力苦集八行相或餘行相第三第四第五第六智力苦集道十二行相或餘行相宿住隨念智力死生智力是餘行相非十六行相漏盡智力諸有欲令緣漏盡境故名漏盡智力者彼說滅四行相或餘行相諸有欲令依漏盡身故名漏盡智力者彼說十六行相或餘行相所緣者處非處智力緣一切法業法集智力唯緣苦集第三第四第五第六智力緣三諦除滅諦徧趣行智力但緣四諦宿住隨

念智力緣欲色界前際五蘊死生智力緣色處漏盡智力若緣漏盡境故則緣滅諦若依漏盡身故則緣一切法念住者種種勝解智力宿住隨念智力唯法念住死生智力唯身念住漏盡智力若緣漏盡境故則法念住若依漏盡身故則四念住餘力皆四念住智者神十處非處智力徧趣行智力通十智業法集智力唯八智除滅道第三第四第五第六智力唯九智除滅智宿住隨念智力死生智力唯世俗智漏盡智力若緣漏盡境故則唯六智

謂法智類智滅智盡智無生智世俗智若依  
漏盡身故則通十智三摩地俱者處非處智  
力徧趣行智力三三摩地俱或不俱業法集  
智力緣苦集空無願俱或不俱第三第四第  
五第六智力緣苦集道空無願俱或不俱宿  
住隨念智力死生智力非三摩地俱漏盡智  
力若緣漏盡境故則無相俱或不俱若依漏  
盡身故則三三摩地俱或不俱根相應者總  
說皆與三根相應謂樂喜捨過去未來現在  
者此十力皆通三世緣過去未來現在者處

非處智力徧起行智力緣三世及離世第二  
第三第四第五第六智力緣三世宿住隨念  
智力過去現在者緣過去未來者緣三世死  
生智力過去者緣過去現在者緣現在未來  
生法緣未來若不生法緣三世漏盡智力若  
緣漏盡境故則緣離世若依漏盡身故則緣  
三世及離世善不善無記者此十力皆是善  
緣善不善無記者漏盡智力若緣漏盡境故  
則但緣善若依漏盡身故則緣三種餘九力  
皆緣三種有餘師說第三智力但緣善無記

彼不應作是說此力通緣雜染清淨有為法  
 改雜染法中有不善故繫不繫者宿住隨念  
 智力死生智力唯色界繫餘八力有漏者三  
 界繫無漏者是不繫緣繫不繫者宿住隨念  
 智力死生智力緣欲色界繫業法集智力緣  
 三界繫漏盡智力神十若緣漏盡境故則緣不繫  
 若依漏盡身故則緣三界繫及不繫餘力皆  
 緣三界繫及不繫學無學非學非無學者宿  
 住隨念智力死生智力唯非學非無學餘八  
 力無漏者是無學有漏者是非學非無學緣

學無學非學非無學者業法集智力宿住隨  
 念智力死生智力唯緣非學非無學漏盡智  
 力若緣漏盡境故唯緣非學非無學若依漏  
 盡身故則緣三種餘力皆緣三種見所斷修  
 所斷不斷者宿住隨念智力死生智力唯修  
 所斷餘八力有漏者修所斷無漏者是不斷  
 緣見所斷修所斷不斷者業法集智力宿住  
 隨念智力緣見修所斷死生智力緣修所斷  
 漏盡智力若緣漏盡境故則緣不斷若依漏  
 盡身故則緣三種餘力皆緣三種緣名緣義

者種種勝解智力根勝劣智力死生智力唯  
緣義漏盡智力若緣漏盡境故則但緣義若  
依漏盡身故則通緣名義餘力皆通緣名義  
緣自相續他相續非相續者處非處智力徧  
趣行智力緣三種漏盡智力若緣漏盡境故  
則緣非相續若依漏盡身故則緣三種餘力  
皆緣自他相續加行得離染得者此十力皆  
可言加行得三無數劫積集殊勝加行得故  
皆可言離染得離有頂染得盡智時得諸力  
故問如是十力加行云何答此加行有二種

一近加行謂順決擇分等二遠加行謂初不  
退菩提心等問業法集智力死生智力俱可  
緣業有何差別答從因入果是業法集智力  
從果入因是死生智力如因果如是細麤不  
現見現見遠近亦爾問無表業云何知答從  
因入果從麤入細從現見入不現見從近入  
遠如是知問宿住隨念智死生智二乘亦有  
何故唯佛建立力耶答前說不可屈義等是  
力義二乘雖有而無此義故不名力如舍利  
子雖入第四靜慮而不知人當所生處及所





阿毗達磨大毗婆沙論卷第三十一 疲一

五百大阿羅漢等造

唐三藏法師玄奘奉詔譯

雜蘊第一中愛敬納息第四之三

已說佛十力當說四無畏云何為四一正等

覺無畏如契經說我是諸法正等覺者若有

世間沙門梵志天魔梵等依法立難或令憶

念於如是法非正等覺無有是處設當有者

我於是事正見無由故得安隱無怖無畏自

稱我處大仙尊位於大衆中正師子吼轉大

梵輪一切世間沙門梵志天魔梵等所不能

轉二漏永盡無畏如契經說我於諸漏已得

永盡若有世間沙門梵志天魔梵等依法立

難或令憶念有如是漏未得永盡無有是處

設當有者乃至廣說三說障法無畏如契經

說我為弟子說能障法染必為障若有世間

沙門梵志天魔梵等依法立難或令憶念有

此障法染不為障無有是處設當有者乃至

廣說四說出道無畏如契經說我為弟子說

能出道修必出苦若有世間沙門梵志天魔

梵等依法立難或令憶念修如是道不能出  
苦無有是處設當有者我於是事正見無由  
故得安隱無怖無畏自稱我處大仙尊位於  
大衆中正師子吼轉大梵輪一切世間沙門  
覓志天魔梵等所不能轉問此四無畏以何  
爲自性答亦以智爲自性所以者何初無畏  
即初力第二無畏即第十力第三無畏即第  
二力第四無畏即第七力故已說自性所以  
今當說問何故名無畏無畏是何義答不怯  
弱義是無畏義不傾動義勇猛義安隱義清

淨義鮮白義不驚怖義是無畏義界者此四  
無畏有漏者三界繫無漏者是不繫地者此  
四無畏有漏者在十一地無漏者在九地所  
依者此四無畏皆依欲界人贍部洲大丈夫  
身唯依四身得成佛故行相者初無畏十六  
行相或餘行相第二無畏諸有欲令緣漏盡  
境故名漏盡無畏者彼說滅四行相或餘行  
相諸有欲令依漏盡身故名漏盡無畏者彼  
說十六行相或餘行相第三無畏苦集八行  
相或餘行相第四無畏十六行相或餘行相

所緣者初無畏緣一切法第二無畏若緣漏盡境故則緣滅諦若依漏盡身故則緣一切法第三無畏緣苦集諦第四無畏但緣四諦念住者第二無畏若緣漏盡境故則法念住若依漏盡身故則四念住餘三無畏皆四念住智者初及第四無畏皆通十智第二無畏若緣漏盡境故則唯六智謂法智類智滅智盡智無生智世俗智若依漏盡身故則通十智第三無畏唯有八智謂除滅道三摩地俱者初及第四無畏三三摩地俱或不俱第二

無畏若緣漏盡境故則無相俱或不俱若依漏盡身故則三三摩地俱或不俱第三無畏緣苦集空無願俱或不俱根相應者總說皆與三根相應謂樂喜捨過去未來現在者此四無畏皆通三世緣過去未來現在者初及第四無畏緣三世及離世第二無畏若緣漏盡境故則緣離世若依漏盡身故則緣三世及離世第三無畏但緣三世善不善無記者此四無畏皆是善緣善不善無記者第二無畏若緣漏盡境故則但緣善若依漏盡身故

則緣三種餘三無畏皆緣三種繫不繫者此  
四無畏有漏者三界繫無漏者是不繫緣繫  
不繫者初及第四無畏緣三界繫及不繫第  
二無畏若緣漏盡境故則緣不繫若依漏盡  
身故則緣三界繫及不繫第三無畏但緣三  
界繫學無學非學非無學者此四無畏無漏  
者是無學有漏者是非學非無學緣學無學  
非學非無學者初及第四無畏緣三種第二  
無畏若緣漏盡境故則緣非學非無學若依  
漏盡身故則緣三種第三無畏但緣非學非

無學見所斷修所斷不斷者此四無畏有漏  
有修所斷無漏者是不斷緣見所斷修所斷  
不斷者初及第四無畏緣三種第二無畏若  
緣漏盡境故則緣不斷若依漏盡身故則緣  
三種第三無畏緣見修所斷緣名緣義者第  
二無畏若緣漏盡境故則但緣義若依漏盡  
身故通緣名義餘三無畏皆緣名義緣自相  
續他相續非相續者初及第四無畏緣三種  
第二無畏若緣漏盡境故則緣非相續若依  
漏盡身故則緣三種第三無畏緣自他相續

加行得離染得者此四無畏皆可言加行得  
三無數劫積集殊勝加行得故皆可言離染  
得離有頂染得盡智時得無畏故問此四無  
畏加行云何答此加行有二種一近加行謂  
順決擇分等二遠加行謂初不退菩提心等  
如是所說十力四無所畏一一力攝四無畏  
一一無畏攝十力故則有四十力四十無畏  
然前說初無畏即初力第二無畏即第十力  
第三無畏即第二力第四無畏即第七力者  
依相顯說理實世尊成就四十力四十無畏

依根本說但言成就十力四無所畏問若十  
力攝四無畏四無畏攝十力者力與無畏有  
何差別有說此二無有差別互相攝故有說  
此二亦有差別且名即差別謂名力名無畏  
復次堅強是力勇決是無畏復次安住是力  
不可傾動是無畏復次不可屈伏是力不怯  
弱是無畏復次自利是力利他是無畏復次  
自攝受是力攝受他是無畏復次非他所勝  
是力能勝他是無畏復次非他所降伏是力  
能降伏他是無畏復次自相智是力共相智

是無畏復次智是力辯是無畏復次因是力  
 果是無畏復次自通達是力能為他說是無  
 畏復次通達義是力通達文是無畏復次法  
 義無礙解是力詞辯無礙解是無畏復次於  
 法義無礙解究竟明了是力於詞辯無礙解  
 究竟明了是無畏復次積集是力受用是無  
 畏復次如自豐財寶是力如能分施他是無  
 畏復次如解醫方是力如能療病是無畏復  
 次智慧明了是力不怯他難是無畏力與無  
 畏是謂差別

已說無畏當說大悲問大悲以何為自性答  
 以智為自性有說大悲別有自性非智所攝  
 如是說者評曰大悲是智無別有體知藥病  
 等而救療故已說自性所以今當說問何故  
 名大悲大悲是何義答拔濟有情增上苦難  
 故名大悲謂從地獄旁生鬼趣大苦難中拔  
 濟令出安置人天喜樂等處復次拔眾生出  
 增上淤泥故名大悲謂有情類沒在煩惱大  
 淤泥中授正法手拔之令出安置聖道及道  
 果中復次授諸有情增上義利故名大悲謂

教衆生斷三惡行修三妙行種植尊貴富樂  
種子感得尊貴大富樂果形色美妙衆所樂  
見膚體細軟光明清淨或爲輪王或作帝釋  
或爲魔王或作梵王展轉乃至或生有頂或  
復種植三乘種子引得三乘菩提涅槃如是  
皆由大悲威力復次大價所得故名大悲謂  
一切時於一切處捨施一切所愛身財及妻  
子等濟諸衆生匱乏苦難具足受持清淨禁  
戒寧捨身命終無毀犯打罵陵辱割截身肢  
乃至斷命曾無瞋忿精進苦行未嘗暫息恒

住寂靜專修靜慮爲勝慧故求法無怠如是  
福德智慧資糧大價圓滿乃得如是救衆苦  
難清淨大悲非如二乘或施一食持一宿戒  
乃至思惟一四句頌便得彼果復次大加行  
得故名大悲謂必經三無數大劫修習百千  
難行苦行方得如是無限大悲非如聲聞極  
利根者經六十劫修諸加行便得菩提非如  
獨覺極利根者唯經百劫修諸加行便得菩  
提復次依大身起故名大悲謂此大悲決定  
依止三十二種大丈夫相所莊嚴身八十隨

好間飾肢體身真金色常光一尋無能見頂  
衆生遇者無不獲益大悲依止如是勝身非  
如二乘所獲功德依止矧陋肢體不具諸根  
缺減無威德身亦能現起復次捨大安樂救  
大苦難故名大悲謂佛世尊棄捨殊勝增上  
熾盛無量無邊不共佛法大安樂事逾越百  
千俱胝大海輪圍山等諸險難處遊歷十方  
救衆生苦作安樂事如是皆由大悲威力復  
次爲度無量難化有情造作難爲大勛勞事  
故名大悲謂佛雖居極尊貴位爲衆生故或

作陶師或作商人或作力士或作獵主或作  
俳優或販華鬘或賃船棧作如是等諸猥雜  
類拔濟種種所化有情或將阿難遊歷五趣  
晝夜無間饒益有情或爲指鬘得度脫故延  
促他界時遠時近令其調伏然後化之雖復  
成就增上慚愧衆一而爲有情現陰藏相令彼見  
已誹謗止息無量有情聞皆從化雖復久斷  
輕躁調戲而爲有情現廣長舌乃至髮際遍  
覆面輪令諸有情因受佛化如是等事無量  
無邊一切皆由大悲威力復次傾軛大捨故



名大悲謂佛成就二種大法一者大捨二者大悲若佛安住大捨法時假使十方諸有情類一時吹擊大角大鼓或現雷震掣電霹靂諸山大地傾覆動搖不能令佛舉心視聽若佛現起大悲法時擊大捨山令其震動亦令無量那羅延力所合成身如大猛風吹小草葉處處飄轉作諸有情利樂勝事由斯等義故名大悲如是大悲界者唯是色界地者唯在第四靜慮所依者唯依欲界人瞻部洲大丈夫身唯依此身得大悲故行相者非十六

行相是餘行相所緣者通緣三界諸法有情念住者唯法念住智者唯世俗智三摩地俱者非三摩地俱根相應者捨根相應過去未來現在者是三世緣過去未來現在者緣三世善不善無記者唯是善緣善不善無記者緣三種繫不繫者唯色界繫緣繫不繫者緣三界繫學無學非學非無學者唯是非學非無學緣學無學非學非無學者但緣非學非無學見所斷修所斷不斷者唯修所斷緣見所斷修所斷不斷者緣見修所斷緣名緣義

者通緣名義緣自相續他相續非相續者雖通緣自他相續而多緣他相續加行得離染得者可言加行得三無數劫積集殊勝加行得故可言離染得離有頂染得盡智時得大悲故問云何名爲大悲加行答此加行有二種一近加行謂順決擇分等二遠加行謂初不退善提心等問此大悲何力攝答處非處智力攝以佛世尊不共功德多分攝在處非處智力中故問悲與大悲有何差別答應知略有八種差別一自性差別謂悲無瞋善根

爲自性大悲無癡善根爲自性二行相差別謂悲作苦苦行相大悲作三苦行相三所緣差別謂悲唯緣欲界大悲通緣三界四依地差別謂悲通依十地即四靜慮四近分靜慮中間及欲界地大悲唯在第四靜慮五所依差別謂悲通依三乘及異生身大悲唯依佛身六證得差別謂悲離欲界乃至第三靜慮染時得大悲唯離有頂染時得七救濟差別謂悲唯希望救濟大悲救濟事成八哀愍差別謂悲哀愍不平等大悲哀愍平等是謂悲

與大悲差別

已說佛大悲當說三念住云何爲三一者佛  
說法時若諸弟子恭敬聽受如教奉行如來  
於彼不生歡喜心不踴躍但起大捨住念正  
知隨宜教誨二者佛說法時若諸弟子不恭  
敬聽受不如教奉行如來於彼不生瞋恨心  
無悵恨不捨保任但起大捨住念正知隨宜  
教誨三者佛說法時一分弟子恭敬聽受如  
教奉行一分弟子不恭敬聽受不如教奉行  
如來於彼不生歡喜亦不瞋恨但起大捨住

念正知如是三種不共念住應知亦攝在處  
非處智力廣分別義如理應思問此十八種  
不共佛法幾於說法能爲勝支答除三念住  
餘十五種皆於說法能爲勝支所以者何佛  
由十力能立自論由四無畏能破他論由大  
悲故起說法欲由此三種說法事成三種念  
住無如是力但說法時於弟子衆不生憂喜  
發起大捨住念正知名不共法  
如契經說如來成就七種妙法云何爲七一  
者知法二者知義三者知時四者知量五者

自知六者知衆七者知補特伽羅勝劣差別  
問此七妙法誰幾智性答此七皆是世俗智  
性有作是說知法知量知衆三種唯世俗智  
知義一種諸有欲令唯有涅槃是勝義者六  
智爲性謂法智類智滅智盡智無生智及世  
俗智諸有欲令一切法皆是勝義者十智爲  
性知時自知八智爲性除滅智及他心智知  
補特伽羅勝劣差別九智爲性除滅智有餘  
師說知時亦以九智爲性謂除滅智評曰如  
是所說雖亦有理然契經中說此七種一切

皆是世俗智性皆知事法有差別故問此七  
妙法何力所攝答皆處非處智力所攝如契  
經說如來成就五聖智三摩地云何爲五一  
者有內證智生知此三摩地是聖離染二者  
有內證智生知此三摩地非愚者所近是智  
者所讚三者有內證智生知此三摩地現樂  
後樂四者有內證智生知此三摩地寂靜微  
妙是止息道令心一趣有所證得五者有內  
證智生知此三摩地正念故入正念故出問  
此五聖智三摩地誰幾智性答此五皆是世

俗智性有作是說皆入智性謂除滅智及他  
心智尊者妙音作如是說皆六智性謂除苦  
集滅他心智評曰如是所說雖亦有理然契  
經中說此五種一切皆是世俗智性皆知定  
事有差別故問此五聖智三摩地何力所攝  
答皆處非處智力所攝因釋身力傍論已了  
云何擇滅乃至廣說問何故作此論答爲止  
他宗顯正義故謂或有執擇滅非擇滅無常  
滅非實有體如譬喻者爲遮彼執顯三種滅  
皆有實體或復有執此三種滅皆是無爲如

分別論者爲遮彼執顯二滅是無爲無常滅  
是有爲故作斯論云何擇滅答諸滅是離繫  
謂諸法滅亦得離繫得離繫得是名擇滅云  
何非擇滅答諸滅非離繫謂諸法滅得不離  
繫不得離繫得名非擇滅云何無常滅答諸  
行散壞破<sup>十一</sup>殑<sup>十二</sup>退是謂無常滅此中散壞破  
殑<sup>十二</sup>退文字雖有差別而同顯無常滅又諸  
行散等言非如散穀豆等令往異處但顯由  
無常滅無復作用又散等言不顯諸行自性  
滅壞但顯諸行由無常滅無復作用謂有爲

法自性恒有由生相故有作用起由滅相故無復作用名為散壞破歿亡退

非擇滅無常滅何差別答非擇滅者不由擇力解脫疫癘災橫愁惱種種魔事行世苦法非於貪欲調伏斷越無常滅者諸行散壞破歿亡退是謂二滅差別此中解脫疫癘災橫愁惱種種魔事苦法者顯有漏法非擇滅解脫行世法者顯無漏法非擇滅非於貪欲調伏斷越者顯異擇滅問何故此中但說非擇滅無常滅差別不說擇滅耶答是作論者意

欲爾故乃至廣說復次此中應作是說擇滅非擇滅無常滅何差別答擇滅者由擇力故有漏法滅非擇滅者不由擇力解脫疫癘廣說如前無常滅者諸行散壞破歿亡退復次擇滅是解脫是離繫相非擇滅是解脫非離繫相無常滅非解脫非離繫相復次擇滅於三世有漏法得非擇滅於未來不生有為法得無常滅於現在一切法轉復次擇滅是善彼得亦善非擇滅是無記彼得亦無記無常滅通三種彼得亦三種復次擇滅是無漏彼

得通有漏無漏非擇滅是無漏彼得唯有漏  
無常滅通二種彼得亦二種復次擇滅是不  
繫彼得或色界繫或無色界繫或不繫非擇  
滅是不繫彼得唯三界繫無常滅三界繫或  
不繫彼得亦三界繫或不繫復次擇滅是非  
學非無學彼得或學或無學或非學非無學  
非擇滅是非學非無學彼得亦唯非學非無  
學無常滅通三種彼得亦三種復次擇滅是  
不斷彼得或修所斷或不斷非擇滅是不斷  
彼得唯修所斷無常滅通三種彼得亦三種

復次擇滅非擇滅俱不染汙彼得亦俱不染  
汙無常滅通染汙不染汙彼得亦二種如染  
汙不染汙有罪無罪退不退亦爾復次擇滅  
無異熟彼得或有異熟或無異熟非擇滅無  
異熟彼得亦無異熟無常滅通二種彼得亦  
二種復次擇滅是道果彼得或是道是道果  
或非道非道果非擇滅非道非道果彼得亦  
非道非道果無常滅或是道非道果或是道  
亦道果或非道非道果彼得亦爾復次擇滅  
滅諦攝彼得三諦攝除滅諦非擇滅非諦攝

彼得二諦攝謂苦集無常滅三諦攝除滅諦  
 彼得亦爾應作如是廣辯差別而不爾者前  
 已說故謂擇滅是離繫非擇滅無常滅非離  
 繫俱非離繫須辯差別有說二滅俱不用功  
 得須辯差別擇滅用功得與二有異故不須  
 說問已知擇滅離繫為體應說何故名擇滅  
 耶答擇者謂慧滅是彼果擇所得滅故名擇  
 滅復次一向勦勞一向加行一向功用揀擇  
 諸法方得此滅故名擇滅復次數數決擇苦  
 等得滅故名擇滅謂苦忍苦智決擇苦諦於

見苦所斷法得滅集忍集智決擇集諦於見  
 集所斷法得滅滅忍滅智決擇滅諦於見滅  
 所斷法得滅道忍道智決擇道諦於見道所  
 斷法得滅以苦等智數數決擇苦聖諦等於  
 修所斷法得滅故名擇滅問擇滅自性為是  
 一物為多物耶有說一物問若爾證見所斷  
 法擇滅時亦證修所斷法擇滅不若亦證者  
 修後對治應成無用若不證者云何一物少  
 分證少分不證有說二物一見所斷法擇滅  
 二修所斷法擇滅問若爾證見苦所斷法擇



滅時亦證見集滅道所斷法擇滅不若亦證者修後對治應成無用若不證者云何一物少分證少分不證有說五物謂見所斷法擇滅有四修所斷擇滅有一問若爾證欲界見修所斷法擇滅時亦證色無色界見修所斷法擇滅不若亦證者修後對治應成無用若不證者云何一物少分證少分不證有說擇滅有十一物謂見所斷法擇滅有八修所斷法擇滅有三問若爾證欲界修所斷上品法擇滅時亦證欲界修所斷後八品法擇滅

不若亦證者修後對治應成無用若不證者云何一物少分證少分不證色無色界修所斷九品法擇滅徵問亦爾有說擇滅有三十五謂見所斷法擇滅有八修所斷法擇滅三界各九為二十七足前八為三十五問若爾證初靜慮修所斷法擇滅時亦證後三靜慮修所斷法擇滅不若亦證者修後對治應成無用若不證者云何一物少分證少分不證四無色地修所斷法徵問亦爾有說擇滅有八十九謂見所斷法擇滅有八修所斷法擇

滅九地各九為八十一足前八為八十九問  
若爾見所斷法三界九地各有四部九品差  
別云何擇滅但有八種又見修所斷法一一  
地一一部一一品各有多種云何擇滅但有  
一種評曰應作是說隨有漏法有爾所體擇  
滅亦爾隨所繫事體有爾所離繫亦有爾所  
體故問已知擇滅隨所繫事有爾所量諸有  
情類證擇滅時為共證一為各別證設爾何  
失二俱有過若共證一云何涅槃名不共法  
又若爾者若一有情得涅槃時一切有情亦

應皆得若爾則應不由功用自然解脫若各  
別證云何涅槃名不同類又契經說當云何  
通知說如來解脫與餘阿羅漢等解脫無異  
答應作是說諸有情類證擇滅時皆共證一  
問若爾云何涅槃名不共法答涅槃體雖實  
是共而約得說名不共以離繫得一一有情  
自相續中各別起故問若一有情得涅槃時  
諸餘有情何故不得答若身中有涅槃得者  
名得涅槃無則不爾故無一時一切有情得  
涅槃失有餘師說諸有情類證擇滅時各各

別證問若爾云何涅槃名不同類答遮同類  
因故作是說謂諸擇滅無同類因名不同類  
非諸有情無別擇滅展轉相似問苦法智忍  
無同類因亦應名為不同類法何故有為皆  
名同類但說涅槃名不同類答苦法智忍雖  
無同類因而能與他作同類因故亦名同類  
涅槃不爾復次諸有為法同蘊界處三門所  
攝同墮三世同有生滅同下中上同有先後  
同從因生同能生果故名同類涅槃不爾名  
不同類復次一切法中唯有涅槃是善是常

餘不爾故名不同類謂所餘法有善非常有  
常非善有二俱非涅槃獨具善常二義是故  
獨名不同類法問契經所說復云何通如說  
如來解脫與餘阿羅漢等解脫無異答三乘  
身中解脫雖異而善常同故說無異復次此  
言顯示一相續中有三乘道同證解脫謂望  
他身所證解脫雖各有異而一身中有三乘  
性同證解脫隨依何乘引起聖道皆能證得  
此涅槃故評曰彼不應作是說應作是說諸  
有情類普於一一有漏法中皆共證得一擇

滅體前說擇滅隨所繫事多少量故由此前說於理為善

問於外物中為亦證得擇滅體不設爾何夫若亦證得擇滅體者既於外法無成就義云何成就彼擇滅耶又契經說當云何通如說尊者舍利子言我斷諸愛得內解脫十六若外物中不得擇滅契經所說復云何通如說一切行斷故名斷界一切行離故名離界一切行滅故名滅界答應作是說於外物中亦得擇滅問若爾既於外物無成就義云何於彼得

擇滅耶答雖於外物無成就者而亦於彼有得擇滅如不成就過去未來命等八根而有於彼證得擇滅外物亦爾何所相違問契經所說復云何通如說尊者舍利子言我斷諸愛得內解脫答說於內蘊得解脫故當知於外亦得解脫復次外物解脫依內得故亦名為內謂內身中修道方得復次外物解脫得是內故亦名為內謂得彼得是內蘊攝復次斷內煩惱而得彼滅故亦名內謂外物中有擇滅斷內能繫煩惱方得是故經言得內

解脫有餘師說外物中無擇滅可得唯斷能繫諸煩惱縛得擇滅故問若爾契經所說當云何通如說一切行斷故名斷界乃至廣說答彼經應說諸行斷故名為斷界乃至廣說不應言一切而說一切者當知彼說少分一切謂一切有二種一少分一切二全分一切彼經但說少分一切有作是說諸外物中雖有擇滅而不可得評曰彼不應作是說寧說為無不應說有而不可得既不可得何須如是無用滅為應作是說亦有亦得所以者何

諸有漏法無始時來煩惱所繫不得解脫若斷煩惱彼離繫故便得解脫如人被縛後解脫時人名解脫非謂繩等既於所繫證得解脫故外物中亦得解脫若不爾者與品類足所說相違如說云何得作證法答一切善法若外物中雖有擇滅而不可得應有善法非得作證便違彼說故外亦有擇滅可得問擇滅自性為即是蘊為但蘊無若即是蘊有情本來應得解脫以皆本來成就蘊故若但蘊無如何為無勤修聖道答應說擇滅非即是

永樂北藏

大毗婆沙論

第一〇六册

蘊亦非蘊無但於有漏諸蘊中得別有自性

阿毗達磨大毗婆沙論卷第三十一

說一切  
有部發

阿毗達磨大毗婆沙論卷第三十二 疲二

五百大阿羅漢等造

唐三藏法師玄奘奉詔譯

雜蘊第一中愛敬納息第四之四

如是擇滅亦名涅槃亦名不同類亦名非聚亦名非顯亦名最勝亦名通達亦名阿羅漢亦名不親近亦名不修習亦名可愛樂亦名近亦名妙亦名出離問何故擇滅亦名涅槃答槃名為趣涅名為出永出諸趣故名涅槃復次槃名為臭涅名為無永無臭穢諸煩惱

業故名涅槃復次槃名稠林涅名永離永離一切三災三相諸蘊稠林故名涅槃復次槃名為織涅名為不此中永無煩惱業縷不織生死異熟果絹故名涅槃餘如前說問何故擇滅亦名不同類答無同類因故亦非同類因故餘如前說問何故擇滅亦名非聚答離諸聚故謂說有為無住相者彼說有為法必四類共聚謂自體及三相若說有為有住相者彼說有為法必五類共聚謂自體及四相復次諸界諸趣諸生諸蘊諸世諸苦皆名為

聚擇滅異彼故名非聚問何故擇滅亦名非顯答顯謂稱讚涅槃功德智者極成不待稱讚故名非顯復次涅槃功德無邊際故不可稱讚如說此人技術無邊不可稱讚故名非顯復次顯名毀些涅槃功德究竟圓滿如末尼珠周圓光淨不可毀些故名非顯復次涅槃功德究竟安住如末尼珠體無增減隨所置處即便安住不可毀些故名非顯復次顯謂顯說涅槃是聖現量所證不可顯說故名非顯復次諸有爲法有因有果可得以因顯

說其果亦得以果顯說其因涅槃無爲無因無果不可顯說故名非顯復次顯謂顯示涅槃寂靜無婆羅門刹帝利等種姓差別可以顯示亦無青黃赤白等相可以顯示故名非顯復次顯謂顯現諸有爲法或體是色其相顯現或雖非色而依色轉亦可顯現涅槃不然故名非顯問何故擇滅亦名最勝答以上妙故如世上妙衣服飲食莊嚴具等名爲最勝涅槃亦爾尊者妙音作如是說擇滅涅槃於諸法中是最勝法於諸義中是最勝義於



諸事中是最勝事於諸理中是最勝理於諸  
果中是最勝果故名最勝問何故擇滅亦名  
通達答通達謂慧涅槃是慧果故亦名通達  
如九遍知是智果故亦名遍知亦如六處是  
業果故說名故業復次擇滅涅槃是通達果  
故名通達如天眼耳是通果故亦名為通問  
何故擇滅亦名阿羅漢答應受供養故謂阿  
羅漢總目應義無有世間上妙供具擇滅涅  
槃不應受者復次羅漢名應阿之言不擇滅  
涅槃於諸界趣不應流轉故名不應復次羅

漢名賊亦名為怨阿之言無涅槃中無煩惱  
怨賊是故擇滅名阿羅漢問何故擇滅亦名  
不親近答離親近本故謂有親近有為法者  
以貪其果如貪蔭涼華葉果等親近於樹涅  
槃無果可令彼貪名不親近問何故說涅槃  
智者應親近答智者謂佛及佛弟子彼應解  
了及起得證故名親近非貪其果故亦名不  
親近問何故擇滅亦名不修習答不在相續  
故若在相續數數現前漸漸增進名可修習  
涅槃不爾故亦名不修習問若爾頌說當云

何通

喬答摩樹下 靜慮不放逸 不久履道跡

涅槃在心中

答以涅槃得依心起故名在心中非謂涅槃有修習義問何故擇滅亦名可愛樂答聖所愛樂故謂諸聖者怖畏衆苦涅槃離苦聖者愛樂復次聖獸生死彼無生死故聖愛樂謂涅槃中永離一切流轉事故復次聖獸破戒彼無破戒故聖愛樂謂涅槃中永離一切破戒事故由涅槃故佛說無漏戒名聖所愛戒

此戒能證得離破戒滅故由此亦名時愛解脫待時愛樂得涅槃故問何故擇滅亦名爲近答得聖道者現證得故

如契經說精進成就十五法者名履學迹及近涅槃復次不選相續而證得故擇滅名近謂利帝利婆羅門等能修道者皆證涅槃復次不選處所而證得故擇滅名近謂在城邑或阿練若修習聖道皆得涅槃復次由勝解故擇滅名近謂諸聖者滅忍滅智現在前時由勝解力如對目前明了觀故復次如近事

故擇滅名近謂隨在處皆可證得如品類足說云何遠法謂過去未來法云何近法謂現在法及諸無為復次依近得故擇滅名近謂現在世說名為近依現在世起離繫得證得擇滅故名為近復次捨近入故擇滅名近謂現在世說名近法捨此近法而入涅槃是故涅槃亦名為近脇尊者曰勤修道者直趣涅槃故名為近復次聖道所依各有差別涅槃無定故名為近能修道者皆證得故問聖道亦妙如品類足說云何妙法謂學無學法及

擇滅無為何故涅槃獨名為妙答以涅槃是妙中妙故復次聖道雖妙而雜無常涅槃不爾故獨名妙復次聖道雖妙有能對治歇息善法謂空空等涅槃不爾故獨名妙問聖道亦是出離之法如品類足說云何出離法謂欲界善戒及色無色界離生善定并學無學擇滅無為何故涅槃獨名出離答涅槃是出離非有出離故聖道是出離亦是有出離般涅槃時出離彼故復次涅槃是真出離法故謂有漏法有二種捨一斷捨二棄捨無漏有

為雖無斷捨而有棄捨唯有擇滅二捨俱無  
名真出離復次涅槃是究竟出離功德故如  
契經說以色出離欲以無色出離色以聖道  
出離無色以涅槃出離一切有為法

問已知非擇滅體非離繫應說何故名非擇  
滅耶答不由擇慧得此滅故名非擇滅非擇  
果故復次此滅不由一向劬勞一向加行一  
向功用揀擇諸法得故名非擇滅復次此滅  
不要由數數決擇苦等得故名非擇滅問若  
爾此滅由何而得答由緣闕故如對一方餘

方所有色聲香味觸等境滅於彼能緣心心  
所法由緣闕故畢竟不生由此不生得非擇  
滅問於何世諸法得非擇滅耶有作是說於  
三世諸法皆得非擇滅是有為故問若爾於  
何不得此滅得與不得復有何異有餘師說  
但於過去未來諸法得非擇滅非於現在以  
現在法在身行故問若爾此滅應一一念得  
已還捨捨已復得謂未來法入現在時彼非  
擇滅得已還捨現在諸法入過去時彼非擇  
滅捨已復得然非擇滅無如是義或有說者

唯於未來法得非擇滅非過去現在所以者何過去諸法已在身行現在諸法在身行故問若爾此滅得已應捨謂未來法入現在時彼非擇滅得已捨故然非擇滅無如是義評曰此非擇滅唯於未來不生法得所以者何此滅本欲遮有為法令永生若法不生此得便起如與欲法繫屬有情現在正行過去已行未來當行皆有生義故於彼法不得此滅問擇滅與非擇滅何者為多有作是說擇滅多非擇滅少所以者何擇滅通於三世法

得非擇滅唯於未來不生法得故有餘師說非擇滅多擇滅少所以者何非擇滅通於有漏無漏法得擇滅唯於有漏法得評曰應作是說非擇滅多擇滅少所以者何非擇滅如有為法數量擇滅但如有漏法數量故若不爾者諸可生法文二若得不生應不得非擇滅六二滅自性多少雖爾而依得者應作四句有法於彼得擇滅不得非擇滅謂過去現在及未來可生有漏法有法於彼得非擇滅不得擇滅謂未來不生無漏法有法於彼得擇滅亦

得非擇滅謂未來不生有漏法有法於彼不得擇滅亦不得非擇滅謂過去現在及未來可生無漏法問諸有情類於非擇滅為皆共得不共得耶答比不決定於共有法非擇滅則共得於不共法非擇滅則各別得諸異生類若住一趣於餘趣法刹那刹那得非擇滅以色等境念念滅時緣彼眼識等畢竟不生故如住一趣一界一地一處亦爾

問由何善法諸修行者於諸惡趣得非擇滅答或由布施或由持戒或由聞慧或由思慧

或由修慧諸修行者於諸惡趣得非擇滅由布施者有雖十二年開門大施而於惡趣不得非擇滅如吠邏摩屈路羅等由彼不能厭生死故有雖於一施一團食而於惡趣得非擇滅由彼深能厭生死故由持戒者有雖盡壽持別解脫戒於二而於惡趣不得非擇滅如前說故有雖能持一晝夜戒而於惡趣得非擇滅如前說故由聞慧者有雖具解了三藏文義而於惡趣不得非擇滅如前說故有雖解了一四句頌而於惡趣得非擇滅如前說故

由思慧者有雖具思惟外內書論而於惡趣不得非擇滅如前說故有雖思惟少分觀法而於惡趣得非擇滅如前說故即不淨觀持息念等及諸念住由修慧者有雖具得八地世俗定而於惡趣不得非擇滅如前說故即是外道猛喜子等有雖修習少分觀門而於惡趣得非擇滅如前說故即煖頂忍極鈍根者得下品忍時於諸惡趣皆得非擇滅大德說曰要無漏慧覺知緣起方於惡趣得非擇滅離聖道不能越諸惡趣故評曰彼不應作

是說菩薩九十一劫不墮惡趣豈由以無漏慧覺知緣起應作是說或施或戒乃至下忍皆於惡趣得非擇滅問三惡趣非擇滅爲一時得爲別得耶有作是說必一時得問若爾天授如何已得二惡趣非擇滅非地獄耶答彼於地獄惟除一生餘一切生與二惡趣皆頓得非擇滅問既除一生豈非別得有餘師說施戒聞等若於惡趣得非擇滅或別或總順決擇分得必總得問天授豈不得順決擇分耶評曰應作是說忍位總得前位不定已

說惡趣得非擇滅當說善趣得非擇滅增上  
忍時惟除欲界人天七生色無色界一一處  
各一生於餘一切生皆得非擇滅預流者趣  
一來果時不起定者加行道時於欲六生得  
非擇滅若起定者要至第六無間道時於欲  
六生得非擇滅一來者趣不還果時不起定  
者加行道時於欲一生得非擇滅若起定者  
要至第九無間道時於欲一生得非擇滅爾  
時得欲界一切生擇滅不退法者離初靜慮  
染時不起定者加行道時於初靜慮二生得

非擇滅若起定者要至第九無間道時於初  
靜慮二生得非擇滅爾時於初靜慮一切生  
皆得擇滅若退法者離初靜慮染時若起定  
若不起定俱至第九無間道時得初靜慮一  
切生擇滅不得非擇滅可退生故乃至離無  
所有處染應知亦爾不退法者離非想非非  
想處染時不起定者加行道時於非想非非  
想處一生得非擇滅若起定者要至第九無  
間道時於非想非非想處一生得非擇滅爾  
時於一切生皆得擇滅若退法者離非想非



非想處染時不起定者加行道時於八地生  
得非擇滅若起定者要至第九無間道時於  
八地生得非擇滅爾時於一切生皆得擇滅  
已說生處得非擇滅當說煩惱得非擇滅增  
上忍時於三界見所斷煩惱得非擇滅至見  
道中隨無間道得彼擇滅聖於修道不退法  
者離欲染時不起定者加行道時於欲界修  
所斷煩惱得非擇滅若起定者隨至彼彼無  
間道時得非擇滅爾時得彼煩惱擇滅若退  
法者離欲染時若起定若不起定隨至彼彼

無間道時得彼煩惱擇滅不得彼非擇滅乃  
至離非想非非想處染隨所應當說問諸退  
法者何時於修所斷煩惱得非擇滅有作是  
說信勝解練根得見至時時解脫練根得不  
動時於修所斷已斷煩惱得非擇滅評曰應  
作是說若得決定不復退起彼煩惱時於彼  
煩惱得非擇滅問若時於彼得非擇滅亦得  
彼擇滅耶答應作四句有法先得非擇滅後  
得擇滅謂三界見所斷煩惱及不退法者不  
起定離三界修所斷煩惱等有法先得擇滅

後得非擇滅謂退法者離三界修所斷煩惱  
等有法俱時得非擇滅及擇滅謂不退法者  
若起定離三界修所斷煩惱等若退法者離  
欲界前八品染隨無間道現在前時彼品染  
汙眼等五識及相應法等於現所緣得非擇  
滅及彼擇滅離欲界第九品染無間道時彼  
品染汙及善無記眼等五識及相應法等於  
現所緣得非擇滅及彼擇滅離初靜慮前八  
品染隨無間道現在前時彼品染汙眼等三  
識及相應法等於現所緣得非擇滅及彼擇

滅離初靜慮第九品染無間道時彼品染汙  
及善無記眼等三識及相應法等於現所緣  
得非擇滅及彼擇滅有法或時於二滅俱不  
得謂除前相  
已說煩惱得非擇滅當說聖道得非擇滅隨  
信行者於隨法行道得非擇滅十一隨法行者於  
隨信行信勝解時解脫道得非擇滅信勝解  
者若決定依信勝解道得無學果於見至道  
得非擇滅見至者於信勝解時解脫道得非  
擇滅時解脫者若決定依時解脫道得究竟

者於不時解脫道得非擇滅不時解脫者於時解脫道得非擇滅聲聞種性於聲聞道得決定時於佛獨覺道得非擇滅獨覺種性於獨覺道得決定時於佛聲聞道得非擇滅佛種性於佛道得決定時於獨覺聲聞道得非擇滅呵羅漢果有六種性退法種性若依退道至究竟者於上五道得非擇滅思法種性若依思道至究竟者於上四道及下一道得非擇滅乃至堪達種性若依堪達道至究竟者於上一道於下四道得非擇滅不動種性

於下五道得非擇滅問若勝進時得非擇滅此滅何故非道果耶答不爲此滅而修道故謂爲涅槃及爲離染勤修於道以修道故於惡趣等得非擇滅若爲此滅而修道者於惡趣等不得此滅非於生死不深厭患可於惡趣得非擇滅故非擇滅不名道果如品類足論說云何果法謂一切有爲法及擇滅云何非果法謂虛空非擇滅問非擇滅得是何心果有作是說此滅得是引衆同分心果有餘師說此滅得是續生心果評曰應作是說隨

住何心得非擇滅即說此得是彼心果

問於何法得非擇滅耶答於三界繫不繫法  
得生欲界者於四法得生色無色應知亦然  
非擇滅得隨生何地即彼地繫惟是無覆無  
記性攝惟是等流隨所依力起此得故問非  
擇滅得於何法中漸漸增長答若生欲界於  
欲界繫五識身等非擇滅得漸漸增長亦有  
意識定緣現在於此等法非擇滅得亦漸增  
長然難知故不別顯示於色界繫三識身等  
及於無量解脫勝處遍處等法於無色界遍

處法中非擇滅得漸漸增長若生色界於欲  
界繫五識身等非擇滅得漸漸增長於色界  
繫三識身等及於無量解脫勝處遍處等法  
於無色界遍處法中非擇滅得漸漸增長生  
無色界於欲界繫五識身等於色界繫三識  
身等及於無量解脫勝處遍處等法於無色  
界遍諸法中非擇滅得漸漸增長問聖者生  
色界於欲色界何法得非擇滅耶答若欲界  
汲生初靜慮除欲界依上地起變化心品及  
所起法於餘欲界法及依欲界起色界法皆

得非擇滅若欲界没生第二靜慮除欲界初  
靜慮依上地起上三靜慮果變化心品及所  
起法并初靜慮依上地起四識身等於餘欲  
界初靜慮法及依欲界初靜慮起色界上地  
法皆得非擇滅若初靜慮没生第二靜慮除  
初靜慮依上地起上三靜慮果變化心品及  
所起法并初靜慮依上地起四識身等於餘  
初靜慮法及依初靜慮起上下地法皆得非  
擇滅若欲界没生第三靜慮除欲界初二靜  
慮依上地起上二靜慮果變化心品及所起

法并初靜慮依上地起四識身等於餘欲界  
初二靜慮法及依欲界初二靜慮起色界上  
地法皆得非擇滅若初靜慮没生第三靜慮  
除初二靜慮依上地起上二靜慮果變化心  
品及所起法并初靜慮依上地起四識身等  
於餘初二靜慮法及依初二靜慮起上下地  
法皆得非擇滅若第二靜慮没生第三靜慮  
除第二靜慮依上地起上二靜慮果變化心  
品及所起法於餘第二靜慮法及依第二靜  
慮起上下地法皆得非擇滅若欲界没生第

四靜慮餘欲界初三靜慮依第四靜慮起第  
 四靜慮果變化心品及所起法并初靜慮依  
 第四靜慮起四識身等於餘欲界初三靜慮  
 法及依欲界初三靜慮起第四靜慮法皆得  
 非擇滅若初靜慮没生第四靜慮除初三靜  
 慮依第四靜慮起第四靜慮果變化心品及  
 所起法并初靜慮依第四靜慮起四識身等  
 於餘初三靜慮法及依初三靜慮起上下地  
 法皆得非擇滅若第二靜慮没生第四靜慮  
 除第二第三靜慮依第四靜慮起第四靜慮

果變化心品及所起法於餘第二第三靜慮  
 法及依第二第三靜慮起上下地法皆得非  
 擇滅若第三靜慮没生第四靜慮除第三靜  
 慮依第四靜慮起第四靜慮果變化心品及  
 所起法於餘第三靜慮法及依第三靜慮起  
 上下地法皆得非擇滅問聖者生無色界於  
 欲色無色界何法得非擇滅耶答若欲界没  
 生空無邊處於欲色界法及依欲色界起無  
 色界法皆得非擇滅若初靜慮没生空無邊  
 處於四靜慮法及依四靜慮起上下界法皆

得非擇滅若第二靜慮沒生空無邊處於後  
三靜慮法及依上三靜慮起上下地法皆得  
非擇滅若第三靜慮沒生空無邊處於後二  
靜慮法及依上二靜慮起上下地法皆得非  
擇滅若第四靜慮沒生空無邊處於第四靜  
慮法及依第四靜慮起上下地法皆得非擇  
滅若欲界沒乃至生非想非非想處於欲色  
界下三無色法及依欲色界下三無色起有  
頂法皆得非擇滅若初靜慮沒乃至生非想  
非非想處於色界下三無色法及依色界下

三無色起上下地法皆得非擇滅乃至若無  
所有處沒生非想非非想處於無所有處法  
及依無所有處起有頂法皆得非擇滅問聖  
者生無色界已得欲色界法非擇滅不答不  
得先已得故問聖者生無色上地已得下地  
法非擇滅不答<sup>亦二</sup>不得先已得故問<sup>十</sup>為先般涅  
槃者得非擇滅多為後般涅槃者得非擇滅  
多耶答前般涅槃者得非擇滅多後般涅槃  
者得非擇滅少如飲光佛時般涅槃者得非  
擇滅多能寂佛時般涅槃者得非擇滅少能

寂佛時般涅槃者得非擇滅多慈氏佛時般  
 涅槃者得非擇滅少問何等阿羅漢住最後  
 心時成就非擇滅最多欲界耶色界耶無色  
 界耶答無色界阿羅漢住最後心時成就非  
 擇滅最多一切色法不現行故爾時雖無先  
 未得今始得非擇滅者而有無量非擇滅得  
 猶現在前名多成就有餘於此作問答言頗  
 有蘊界處不相續永滅於彼不得非擇滅耶  
 答有謂無色界阿羅漢住最後心時雖有無  
 量蘊界處不相續永滅而於彼畢竟不得非

擇滅評曰彼不應作是說所以者何無有蘊  
 界處不相續永滅於彼不得非擇滅者問無  
 色界阿羅漢住最後心時於不相續永滅蘊  
 界處豈非不得非擇滅耶答雖非今得而名  
 成就先已得故謂無色界阿羅漢若決定般  
 涅槃時除未來世正起刹那於餘蘊界處皆  
 得非擇滅夾二  
 如契經說有二涅槃界謂有餘依涅槃界及  
 無餘依涅槃界乃至廣說問何故作此論答  
 為廣分別契經義故謂契經說有二涅槃界



一有餘依涅槃界二無餘依涅槃界契經雖作是說而不廣辯云何有餘依涅槃界云何無餘依涅槃界彼是此論所依根本彼所不分別者今皆應分別之復次前說云何擇滅謂諸滅是離繫此離繫是涅槃然涅槃有二種一有餘依二無餘依今欲分別此二差別復次為止他宗顯正義故謂或有執有餘依涅槃界有自性無餘依涅槃界無自性為遮彼執顯二種涅槃界皆有自性或復有執有餘依涅槃界是有漏無餘依涅槃界是無漏

為遮彼執顯二種涅槃界皆是無漏或復有執有餘依涅槃界是有為無餘依涅槃界是無為為遮彼執顯二種涅槃界皆是無為或復有執有餘依涅槃界是善無餘依涅槃界是無記為遮彼執顯二種涅槃界皆是善性或復有執有餘依涅槃界是道非道果無餘依涅槃界是道果非道為遮彼執顯二種涅槃界皆是道果或復有執有餘依涅槃界是道果無餘依涅槃界非道果為遮彼執顯二種涅槃界俱是道果或復有執有餘依涅槃

界是諦攝無餘依涅槃界非諦攝為遮彼執顯二種涅槃界皆是諦攝或復有執有餘依涅槃界是無學無餘依涅槃界非學非無學為遮彼執顯二種涅槃界皆非學非無學由此所說種種因緣故作斯論云何有餘依涅槃界答若阿羅漢諸漏永盡壽命猶存大種造色相續未斷依五根身心相續轉有餘依故諸結未盡得獲觸證名有餘依涅槃界此中壽命者謂命根問何故不說眾同分耶答是作論者意欲爾故乃至廣說復次應說而

不說者當知此義有餘復次以命根眾同分俱是牽引業果命根一向是異熟故此中偏說依此有餘色心等轉於中大種是所依故最初說之依此大種所造色生依所造色心所起心是主故此中偏說大種造色者總顯色身依五根身心相續者顯心心所亦有生等不相應行難了知故屬前法故不別顯說如是諸法相續未斷所得諸結未盡名有餘依涅槃界有作是說大種造色是身五根是根心相續是覺此身根覺相續未斷諸結

永盡名有餘依涅槃界如契經說身根覺未  
斷名有餘依涅槃有餘依故者依有二種一  
煩惱依二生身依此阿羅漢雖無煩惱依而  
有生身依復次依有二種一染汙依二不染  
汙依此阿羅漢雖無染汙依而有不染汙依  
故所得諸結永盡名有餘依涅槃界得獲觸  
證文字雖別同顯一義云何無餘依涅槃界  
答即阿羅漢諸漏永盡壽命已滅大種造色  
相續已斷依五根身心不復轉無餘依故諸  
結永盡名無餘依涅槃界此中壽命已滅者

庚二

十七

顯命根及衆同分已滅俱是牽引業果故且  
舉命根當知亦即說衆同分大種造色相續  
已斷者總顯色身相續已斷依五根身心不  
復轉者顯心心所不復相續不說生等義如  
前說有作是說大種造色者顯身五根身者  
顯根心相續者顯覺如是色身心心所法或  
身根覺相續已斷諸結永盡名無餘依涅槃  
界謂阿羅漢將般涅槃身中風起令不調適  
不調適故內火羸劣火羸劣故所食不消食  
不消故不起食欲無食欲故不復飲食不飲

食故大種損滅大損滅故造色諸根亦隨損  
 減根損滅故心心所法無所依止不復相續  
 心心所法不相續故命根等斷命等斷故名  
 入涅槃無餘依故者無二種依一無煩惱依  
 二無生身依復次一無染汙依二無不染汙  
 依無餘依故諸結永盡名無餘依涅槃界問  
 此中何故不說得獲觸證言耶答依現在得  
 說得等言現在得斷是故不說復次依補特  
 伽羅故施設得獲觸證此中無有補特伽羅  
 惟有法性是故不說頗有阿羅漢不住有餘

依涅槃界及無餘依涅槃界耶答理雖無有  
 而依此中所說亦有謂此中說具有三事者  
 名有餘依涅槃界三事皆無者名無餘依涅  
 槃界生無色界阿羅漢無色身故非住有餘  
 依涅槃界有心轉故非住無餘依涅槃界生  
 有色界阿羅漢依二入滅盡定已無心轉故非住  
 有餘依涅槃界有色身故非住無餘依涅槃  
 界生欲界不具根阿羅漢不具五根故非住  
 有餘依涅槃界有色身故非住無餘依涅槃  
 界有說此文應作是說云何有餘依涅槃界

答若阿羅漢壽命猶存諸結永盡得獲觸證云何無餘依涅槃界答即阿羅漢壽命已滅諸結永盡若作是說則生三界阿羅漢若有色身若無色身若有心轉若無心轉若具五根若不具五根但有壽命皆名住有餘依涅槃界壽命滅已皆名住無餘依涅槃界應作是說而不爾者是本論師為欲饒益諸弟子眾令易解故作如是說問異生有學所得離繫彼是何等涅槃界攝答彼非二種涅槃界攝謂諸異生所得離繫但應名斷名離名滅

名諦不名遍知不名沙門果不名有餘依涅槃界不名無餘依涅槃界若諸有學所得離繫名斷名離名滅名諦有位名遍知有位不名遍知有位名沙門果有位不名沙門果不名有餘依涅槃界不名無餘依涅槃界若諸無學所得離繫名斷名離名滅名諦名遍知名沙門果有時名有餘依涅槃界有時名無餘依涅槃界

智

阿毗達磨大毗婆沙論卷第三十二

說一切有部發

音釋

些

將几切

也

數數

所角切  
類也

劬

共俱切  
勤也

吠邏

房吠

唐切  
郎佐切

阿毗達磨大毗婆沙論卷第三十三 疲三

五百大阿羅漢等造

唐三藏法師玄奘奉詔譯

雜蘊第一中愛敬納息第四之五

涅槃當言學耶無學耶非學非無學耶乃至

夜三

廣說問何故作此論答前雖說有二種涅槃  
界而未說涅槃為是學為無學為非學非無  
學今欲說之復次為止他宗顯正義故謂或  
有執涅槃有學有無學有非學非無學如犢  
子部為遮彼執顯涅槃唯是非學非無學故

作斯論涅槃當言學耶無學耶非學非無學  
耶答涅槃應言非學非無學學無學義不相  
應故謂為異果明了進修故名為學進修滿  
足更無異果可為進修是學種類而非即彼  
故名無學涅槃於此二義俱無故名非學非  
無學有作是說涅槃有學有無學有非學非  
無學如犢子部彼作是說涅槃自性有三種  
相一學二無學三非學非無學云何學謂學  
得諸結斷得獲觸證云何無學謂無學得諸  
結斷得獲觸證云何非學非無學謂有漏得

諸結斷得獲觸證彼說有過如何涅槃三得故便有三相一法不應有三種體相即體故爲止彼說故作是言於此義中涅槃但應言非學非無學謂於此論無倒義中但應說言涅槃唯是非學非無學性相常住無變易故此中論主齊此應止若作餘說唐指其功有說此中應作餘說問答決擇理更顯故謂應理論者辯分別論者所說有過顯自無失分別論者所說有二一說涅槃先是非學非無學後轉成學先是學後轉成無學先是無學

復轉成學二說涅槃有三種謂學者常是學無學者常是非學非學非無學者常是非學非無學若對前說釋此文者而汝說涅槃有學有無學有非學非無學耶者是應理論者問重定前宗若不定他宗說他過失則不應理答如是者是分別論者答我說涅槃轉變不定可有三種故言如是汝何所欲諸先以世俗道永斷欲貪瞋恚得非學非無學離繫得彼於四諦未得現觀修習現觀得現觀已證不還果轉成學耶者是應理論者問彼修



行者先是異生今轉成學或離繫得轉起學  
耶答如是者是分別論者答述前所問於理  
無違故言如是又汝何所欲諸先以世俗道  
永斷欲貪瞋恚得非學非無學離繫得後不  
還果時即彼離繫應轉成學者是應理論者  
詰彼所宗恐彼非理印述尋復以理難言若  
彼今時轉成學者先應是學體常住故未證  
不還果未有學得已名為學不應正理汝何  
所欲阿羅漢向學諸結斷證阿羅漢果彼轉  
成無學耶者是應理論者問彼修行者先是

學今轉成無學或離繫得轉起無學耶答如  
是者是分別論者答述前所問於理無違故  
言如是又汝何所欲阿羅漢向學諸結斷證  
阿羅漢果時即彼結斷應轉成無學者是應  
理論者詰彼所宗恐彼非理印述尋復以理  
難言若彼今時成無學者先應是無學體常  
住故未證阿羅漢果無學得已名無學不  
應正理汝何所欲諸阿羅漢無學結斷退阿  
羅漢果時彼轉成學耶者是應理論者問彼  
修行者先是無學今轉成學或離繫得轉起

學耶答如是者是分別論者答述前所問於理無違故言如是又汝何所欲諸阿羅漢無學結斷退阿羅漢果時即彼結斷應轉成學者是應理論者詰彼所宗恐彼非理印述尋復以理難言若彼今時轉成學者先應是學體常住故未退阿羅漢果無有學得已名為學不應正理若對後說釋此文者而汝說涅槃有學有無學有非學非無學耶者是應理論者問重定前宗若不定他宗說他過失則不應理答如是者是分別論者答我說涅槃

體類差別定有三種故言如是汝何所欲諸先以世俗道永斷欲貪瞋恚得非學非無學離繫得彼於四諦未得現觀修習現觀得現觀已轉成學耶者是應理論者問彼修行者先是異生今轉成學或離繫得轉起學耶答如是者是分別論者答述前所問於理無違故言如是又汝何所欲諸先以世俗道永斷欲貪瞋恚得非學非無學離繫得後證不還果時即彼離繫應轉成學者是應理論者難汝說涅槃隨學得成學今既有學得應轉成

學若彼今時轉成學者先應是學體常住故  
者是分別論者反詰通難我說涅槃學者常  
是學故未證不還果未有學得已名為學不  
應正理者是應理論者通彼所詰重成前難  
謂先未證不還果時未有學得得順五下分  
結斷彼結斷可不名學今既有學得得彼結  
斷何故不名學若有學得不名學者不應言  
涅槃隨學得說學汝何所欲阿羅漢向學諸  
結斷證阿羅漢果彼轉成無學耶者是應理  
論者問彼修行者先是學今轉成無學或離

繫得轉起無學耶答如是者是分別論者答  
述前所問於理無違故言如是又汝何所欲  
阿羅漢向學諸結斷證阿羅漢果時即彼結  
斷應轉成無學者是應理論者難汝說涅槃  
隨無學得成無學今既有無學得應轉成無  
學若彼今時成無學者先應是無學體常住  
故者是分別論者反詰通難我說涅槃無學  
者常是無學故未證阿羅漢果無學得已  
名無學不應正理者是應理論者通彼所詰  
重成前難謂先未證無學果時無無學得得

一切結斷彼結斷可不名無學今既有無學  
得得彼結斷何故不名無學若有無學得不  
名無學者不應言涅槃隨無學得說無學汝  
何所欲說諸阿羅漢無學結斷退阿羅漢果  
時彼轉成學耶者是應理論者問彼修行者  
先是無學今轉成學或離繫得轉起學耶答  
如是者是分別論者答述前所問於理無違  
故言如是又汝何所欲諸阿羅漢無學結斷  
退阿羅漢果時即彼結斷應轉成學者是應  
理論者難汝說涅槃隨學得成學今既有學

得應轉成學若彼今時轉成學者先應是學  
體常住故者是分別論者反詰通難我說涅  
槃學者常是學故未退阿羅漢果無有學得  
已名為學不應正理者是應理論者通彼所  
詰重成前難謂先未退無學果時未有學得  
得見所斷及修所斷一分結斷彼結斷可不  
名學今既有學得得彼結斷何故不名學若  
有學得不名學者不應言涅槃隨學得說學  
復次有別誦言汝說涅槃惟是非學非無學  
耶餘如前誦若依此誦應作是說此中具有

問答難通謂分別論者問應理論者答分別論者難應理論者通汝說涅槃唯是非學非無學耶者是分別論者問重定前宗若不定他宗說他過失則不應理答如是者是應理論者答我說涅槃唯是非學非無學稱理順經故曰如是汝何所欲諸先以世俗道永斷欲貪瞋恚得非學非無學離繫得彼於四諦未得現觀修習現觀得現觀已證不還果轉成學耶者是分別論者問義如前釋答如是者是應理論者答義如前釋又汝何所欲諸

先以世俗道永斷欲貪瞋恚得非學非無學離繫得後證不還果時即彼離繫應轉成學者是分別論者難如有為法與得相似既有學得得彼離繫即彼離繫應轉成學若彼今時轉成學者先應是學體常住故者是應理論者通諸有為法轉變不定及有作用六可隨得說涅槃常住無有作用不隨得變若今時是學先亦應是學恐彼非理印述尋復以理難言未證不還果未有學得已名為學不應正理此中二文前遮涅槃轉變者說後遮涅槃

槃決定者說俱顯涅槃體常住故惟是非學  
非無學性不應名學汝何所欲阿羅漢向學  
諸結斷證阿羅漢果彼轉成無學耶者是分  
別論者問義如前釋答如是者是應理論者  
答義如前釋又汝何所欲阿羅漢向學諸結  
斷證阿羅漢果時即彼結斷應轉成無學者  
是分別論者難如有為法與得相似既有無  
學得得彼結斷即彼結斷應轉成無學若彼  
今時成無學者先應是無學體常住故者是  
應理論者通諸有為法轉變不定及有作用

可隨得說涅槃常住無有作用不隨得變若  
今時是無學先亦應是無學恐彼非理印述  
尋復以理難言未證阿羅漢果無無學得已  
名無學不應正理此中二文前遮涅槃轉變  
者說後遮涅槃決定者說俱顯涅槃體常住  
故唯是非學非無學性不應名無學汝何所  
欲諸阿羅漢無學結斷退阿羅漢果時彼轉  
成學耶者是分別論者問義如前釋答如是  
者是應理論者答義如前釋又汝何所欲諸  
阿羅漢無學結斷退阿羅漢果時即彼結斷

應轉成學者是分別論者難如有為法與得相似既有學得得彼結斷即彼結斷應轉成學若彼今時轉成學者先應是學體常住故者是應理論者通諸有為法轉變不定及有作用可隨得說涅槃常住無有作用不隨得變若今時是學先亦應是學恐彼非理印述尋復以理難言未退阿羅漢果無有學得已名為學不應正理此中二文前遮涅槃轉變者說後遮涅槃決定者說俱顯涅槃體常住故唯是非學非無學性不應名學復次涅槃

不應先是非學非無學乃至廣說問何故復作此論答欲令前所說義得明了故謂前來雖廣分別而義意未甚明了今欲略說他宗有過自宗無失故作斯論復次涅槃不應先是非學非無學後轉成學先是學後轉成無學先是非學復轉成學者遮說涅槃轉變不定有三種者意若爾涅槃隨得變易應無常故不應正理又涅槃不應有學有無學有非學非無學者遮說涅槃體類差別有三種者意若爾涅槃隨位差別有雜亂故不應正理

謂異生位具三得一至有學位具三得二至  
無學位亦具三種若具得三應有學得若唯  
得二應非具足得涅槃者若無學位以無學  
得總得三種有學等位應亦如是則不應言  
學得諸結斷名學無學得諸結斷名無學有  
漏得諸結斷名非學非無學若言諸位雖各  
具三而隨得故各但名一是則涅槃隨得轉  
變應如前說有無常過是故此說亦不應理  
若如是者應成二分諸法不決定故應有雜  
亂是則不應施設諸法性相決定者總以正

理破前二說謂分別論者一說涅槃隨位不  
定一說涅槃三種性定是則涅槃體有常有  
無常故成二分復次彼後所說亦隨能有  
轉變義轉變非一故名爲二若不隨得而轉  
變者如何可說涅槃有三若二涅槃隨得轉  
變則一切法皆應不定若不決定應有雜亂  
若有雜亂不應施設常無常等性相決定佛  
亦不說涅槃有學有無學性者總引聖教破  
前二說謂契經中曾不說涅槃有學有無學  
故彼所說決定非理雖無處說涅槃唯非學



非無學而與學無學義不相應故定是非學  
非無學性以涅槃恒是非學非無學諸法決  
定無有雜亂恒住自性不捨自性涅槃常住  
無有變易是故涅槃但應言非學非無學者  
既說他宗有過失已顯自所宗無諸過失以  
涅槃唯一種故諸法性相決定無有雜亂涅  
槃常住無有變易其理善成此中得義如後  
定蘊得納息中當廣分別  
如契經說彼成就無學戒蘊定蘊慧蘊解脫  
蘊解脫智見蘊乃至廣說問何故作此論答

為廣分別契經義故如契經說彼成就無學  
戒蘊乃至廣說契經雖作是說而不廣分別  
云何無學戒蘊乃至解脫智見蘊彼是此論  
所依根本彼所不分別者今悉應分別之復  
次前說道果而未說道今欲說之復次前說  
無為阿羅漢果未說有為阿羅漢果今欲說  
之復次前說涅槃未說菩提今欲說之故作  
斯論問亦有成就學蘊或非學非無學蘊契  
經何故不說答應說而不說者當知此義有  
餘復次是佛世尊為諸弟子簡略之說復次

是佛世尊就勝而說謂諸法中無學法勝諸  
 有情中無學有情勝是故偏說復次是佛世  
 尊稱譽長子故作是說謂佛或時稱譽長子  
 或時稱譽中子或時稱譽幼子或時稱譽長  
 子者如伽他說

阿羅漢最樂 以永斷渴愛 亦永斷諸慢  
 壞裂無明網

或時稱譽中子者如佛稱譽七善士趣或時  
 稱譽幼子者如池喻經讚預流果今稱譽長  
 子故唯說無學復次若有戒蘊非惡戒所壞

定蘊非散亂所擾慧蘊非惡慧所覆解脫蘊  
 非煩惱所亂解脫智見蘊非無明所蔽者此  
 中說之學及非學非無學蘊無如是義是故  
 不說云何無學戒蘊答無學身律儀語律儀  
 故命清淨謂契經說無學支中正業即此中  
 身律儀正語即此中語律儀正命即此中命  
 清淨經說此三總名戒蘊問離身語業無別  
 正命云何此中建立三種答以黑白二法相  
 對建立故謂前七不善業道中瞋癡所起身  
 業名邪業瞋癡所起語業名邪語貪所起身

語業名邪命邪活命故遠離此三名正業正  
 語正命有說若為活命故作戲樂事起不善  
 身語業名邪命若為餘事故起不善身語業  
 名邪業邪語遠離此三名正命等有說若為  
 活命故作醫呪事起不善身語業名邪命若  
 為餘事起不善身語業名邪業邪語遠離此  
 三名正命等有說若由四種愛故起不善身  
 語業名邪命若由餘事起不善身語業名邪  
 業邪語遠離此三名正命等  
 有說若由諂誑等五起不善身語業名邪命

若由餘事起不善身語業名邪業邪語遠離  
 此三名正命等有說遮罪身語業名邪命性  
 非身語業名邪業邪語遠離此三名正命等  
 有說加行後起不善身語業名邪命根本業  
 道不善身語業名邪業邪語遠離此三名正  
 命等問云何此蘊名曰尸羅答尸羅者是清  
 涼義遠離破戒熱惱事故復次尸羅者是習  
 學義於三學中此在初故如說持戒故無悔  
 乃至廣說無學相續中無漏身語業名無學  
 戒蘊云何無學定蘊答無學三三摩地謂空

無願無相問定體惟一謂心所法中三摩地云何建立三種差別答以近對治三種障故謂空三摩地近對治有身見無願三摩地近對治戒禁取無相三摩地近對治疑復次行相別故謂空三摩地二行相俱即空非我無願三摩地十行相俱即苦非常集道各四無相三摩地四行相俱即緣滅四復次以三事故一以對治故二以意樂故三以所緣故以對治故建立空三摩地謂非我行相對治我見空行相對治我所見如我見我所見已見

已所見五我見十五我所見亦爾復次非我行相對治我愛空行相對治我所愛如我愛我所愛我慢我所慢亦爾以意樂故建立無願三摩地謂諸賢聖由意樂故不願有及聖道所以者何以諸賢聖由意樂故不願流轉及蘊世苦聖道依流轉及蘊世苦故亦不願緣道行相雖非不願而意樂故立無願名問聖者何故修聖道耶答為涅槃故謂除聖道更無異法能得涅槃故修習之非本意樂以所緣故建立無相三摩地謂滅諦中無有十

相故名無相五塵男女三有為相說名十相  
復次以滅諦中無上中下及蘊世相故名無  
相滅四行相此為所緣故名無相云何無學  
慧蘊答無學正見智此誦為善有異誦言無  
學八智謂四法類彼誦太總盡無生智亦此  
攝故有別誦言無學作意相應極揀擇法最  
極揀擇廣說乃至毗鉢舍那復有誦言無學  
智見明覺現觀彼亦太總盡無生智亦此攝  
故云何無學解脫蘊答無學作意相應心已  
勝解今勝解當勝解謂盡無生無學正見相

應勝解此蘊所攝故非無為解脫謂一切法  
中二法名解脫一者擇滅即無為解脫二者  
勝解即有為解脫於境自在立解脫名非謂  
離繫云何無學解脫智見蘊答盡智無生智  
問何故此二智名解脫智見蘊答解脫身中  
獨有此故最能審決解脫事故無學慧蘊與  
解脫智見蘊有何差別答無學苦集智是無  
學慧蘊緣繫縛法故無學滅道智是無學解  
脫智見蘊緣解脫法故復次無學苦集滅智  
是無學慧蘊此緣有漏無為解脫不緣緣解

脫無漏智故無學道智是無學解脫智見蘊  
此緣無漏有為解脫亦緣緣解脫無漏智故  
復次無學苦集道智是無學慧蘊不緣離繫  
法故無學滅智是無學解脫智見蘊緣離繫  
法故是謂差別者是謂世俗麤相差別若說  
勝義真實差別應如前說謂無學正見智是  
無學慧蘊盡智無生智是無學解脫智見蘊  
復次對治邪慧是無學慧蘊對治無知是無  
學解脫智見蘊復次若慧猛利推求尋覓加  
行不息是無學慧蘊若慧不猛不利不推不

求不尋不覓加行止息是無學解脫智見蘊  
如是五蘊界者非三界繫地者戒蘊在六地  
謂四靜慮未至中間餘四蘊在九地謂前六  
地下三無色間如是五蘊有上中下品差別  
不答一相續中無此差別異相續有謂佛上  
品獨覺中品聲聞下品復次利根者上品中  
根者中品鈍根者下品有為功德雖有無量  
此五最勝故立為蘊如世尊說苾芻當知唯  
一究竟無別究竟乃至廣說問何故作此論  
答為欲分別契經義故如契經說唯一究竟

無別究竟雖作是說而不分別為是勤勇究竟為是事成究竟經是此論所依根本彼不說者今欲說之故作此論問究竟有二如何言一脇尊者言此二究竟一一唯一故說一言謂唯有一勤勇究竟無別有餘勤勇究竟及唯有一事成究竟無別有餘事成究竟如世尊說唯有一諦無別第二彼亦一一唯有一種故說一言謂唯有一苦諦無別第二苦諦乃至唯有一道諦無別第二道諦此亦是故說一言有作是說為遮外道邪道邪解

脫故說一言謂諸外道妄執種種露形自餓卧衣服氣隨日而轉或惟服水噉果食糞著糞掃衣卧木礫石投巖赴火行生等行以為真道佛為遮彼作如是言彼是邪道愚人所習真道惟一無別第二真道即是勤勇究竟又諸外道妄執種種無身無邊意淨聚世翠堵波等為真解脫佛為遮彼作如是言彼是生處非真解脫真解脫惟一謂事成究竟有餘師說惟有一勤勇究竟能斷生死因惟有一事成究竟能捨生死苦故說一言非無二

種或有說者究竟惟一謂事成究竟為證此故修勤勇究竟故說究竟惟一無二復有說者外道各於自所宗處起究竟想佛為遮彼作如是言惡說法中無真究竟愚人所習不能永離貪瞋癡故善說法中有真究竟智人所習能永出離貪瞋癡故或復有說非佛欲顯真究竟故說惟一言但為顯示外道過失謂諸外道互興諍論起斷見者執斷為究竟撥常見為非起常見者執常為究竟撥斷見為非為顯彼失佛作是言若斷究竟常見應

非若常究竟斷見應非究竟惟一無第二故所執斷常俱非究竟此中何法名究竟耶答世尊或時於道說究竟聲或時於斷說究竟聲出世因果俱究竟故於道說究竟聲者如世尊說

一類聰慢者

度三

不能知究竟

十五

彼不證道故

不調伏而死

一類者謂外道彼實愚癡自謂聰慧而生憍慢名聰慧者究竟者謂勤勇究竟彼於此究竟不如實知見名不能知八支聖道說名為



道彼於此道不能證故不調伏而死謂有煩惱生有煩惱而死不得真實調伏道故於斷說究竟聲者如世尊說

已到究竟者 無怖無疑悔 永拔有箭故  
彼住後邊身 此是最究竟 無上寂靜迹

清淨不死迹 諸相皆盡故

究竟者謂事成究竟已能至彼名已到者無怖者謂善通達緣起法故善修習空解脫門故不畏惡趣及生死苦無疑者謂非如外道住惡律儀及邪智見發起種種猶豫言說疑

自所證無悔者謂已斷徧知戒禁取故及已生起究竟智故無有變悔有箭者謂二種有箭一者愛箭二者見箭善修聖道得斷徧知棄捨變吐永不復轉故名永拔最後自體名後邊身未斷因緣不復更受當來生死是故說彼住後邊身此是最究竟者謂事成究竟對勤勇究竟超過彼故名最無上寂靜迹者三火息故說名寂靜智立處故說名為迹迹中勝故說名無上清淨不死迹者迹如前說離諸煩惱隨煩惱故說名清淨常住無變故

名不死諸相皆盡故者謂涅槃中煩惱業苦  
 衆相寂滅又契經說有一梵志名數目連來  
 詣佛所請問佛曰喬答摩尊教授教誡諸苾  
 芻等彼受教已皆能證得最極究竟涅槃界  
 不世尊告曰此事不定一類能證一類不能  
 此亦於斷說究竟聲涅槃即是斷究竟故復  
 次有勤勇有勤勇究竟有事成有事成究竟  
 云何勤勇云何勤勇究竟云何事成云何事  
 成究竟答異生道是勤勇非勤勇究竟彼所  
 得斷是事成非事成究竟聖者道是勤勇是

勤勇究竟彼所得斷是事成是事成究竟復  
 次有漏道是勤勇非勤勇究竟彼所得斷是  
 事成非事成究竟無漏道是勤勇是勤勇究  
 竟彼所得斷是事成是事成究竟復次向道  
 是勤勇非勤勇究竟彼所得斷是事成非事  
 成究竟果道是勤勇是勤勇究竟彼所得斷  
 是事成是事成究竟復次學道是勤勇非勤  
 勇究竟彼所得斷是事成非事成究竟無學  
 道是勤勇是勤勇究竟彼所得斷是事成是  
 事成究竟

如契經說佛告苾芻有諸外道雖同施設斷  
知諸取而彼不能具足施設謂彼但施設斷  
知欲取見取戒取非我語取此有何義問何  
故作此論答爲廣分別契經義故如契經說  
佛告苾芻有諸外道乃至廣說契經雖作是  
說而不廣辯其義彼是此論所依根本彼所  
不說者今悉應說之故作斯論  
比中間意有三種別一問外道實不了知斷  
諸取義世尊何故說同施設斷知諸取二問  
外道實不能說斷知諸取世尊何故說彼施

設斷知三取三問外道亦能少分斷我語取  
寧不施設但說斷三於此三中先答中間謂  
諸外道實不能說斷知諸取世尊何故說彼  
施設斷知三取有作是說此是世尊率爾說  
法彼不應作是說所以者何世尊說法非全  
無因或少因故謂彼所說是謗世尊故應遮  
止訶諫違逆所以者何世尊永離無義言故  
所說稱量必饒益故依田依器雨法雨故有  
大因緣乃說法故由此世尊所有言說皆使  
有情獲大利樂故彼所說是謗世尊復有說

者此言顯彼少分斷者彼不應作是說所以者何異生亦有能斷少分我語取故謂彼所說不順正理故應遮止訶諫違逆所以者何如有異生離欲染位全斷欲取從離欲界乃至無所有處染位能少分斷見取戒取如是離初靜慮乃至無所有處染位亦能少分斷我語取若少分斷便施設者亦應施設斷我語取故彼所說不順正理然佛世尊爲人天等無量大衆廣說法要無倒開示令隨類解有諸外道竊聞佛說蘊界處蓋念住乃至覺

支等名或有具足或不具足是諸外道若有得聞欲取名者便作是言我亦施設斷知欲取若有得聞見取名者便作是言我亦施設斷知見取若有得聞戒取名者便作是言我亦施設斷知戒取此是論主依勝義答於理無違不謗佛故謂薄伽梵未出世時諸外道等<sup>三</sup>多獲名利佛既出世蔽諸外道如日出已<sup>八</sup>螢光隱沒名利徒衆漸漸減少便集一處而共議言喬答摩氏未出世時世間名利皆屬我等既出世已頽歸彼人然喬答摩無有實

德勝於我等但善經論形貌端嚴我等不及  
雖彼形貌難可奪之而其經論易可竊取我  
等若得還招名利復共議言蘇尸摩等聰慧  
強記若遣往詣喬答摩所求作門人彼必為  
其廣說經論聞已還來為我等說議已共詣  
蘇尸摩所慇懃勸之彼便受教往詣佛所方  
便竊法佛以十力四無所畏於大眾中廣說  
法要時彼外道隣側經行為竊法故其心虛  
怯於具足說不能具受或能具受而不解義  
然佛世尊所說法要或有具足或不具足於

所為事無不具足如契經說若諸有情能於  
內身住循身觀如爪上土若諸有情不於內  
身住循身觀如大地土此經所說於所為事  
雖名具足而於所說名不具足如契經說四  
種念住此經所說二皆具足如契經說六界  
五蓋七覺支等於三於所為事雖名具足而於所  
說名不具足如契經說十八界十蓋十四覺  
支等此經所說二皆具足如是佛說或有具  
足或不具足而彼外道不能具受或雖具受  
而不解義隨所受持便妄施設為證此義復

引契經如多苾芻集在一處有諸外道來作是言如喬答摩為諸弟子宣說法要謂作是說汝等苾芻應斷五蓋如是五蓋能染汙心令慧力劣損害覺分障礙涅槃於四念住應善住心於七覺支應勤修習我等亦能為諸弟子說此法要則喬答摩所說法要與我何別而今汝等獨歸彼耶然彼外道尚不能識五蓋名相況能了達住四念住修七覺支然竊佛語故作是說施設斷取應知亦然謂彼外道與蓋俱生與蓋俱死尚不識蓋況知能

治念住覺支為顯斯理復引別證又如外道摩健地迦不了自身眾病所集刹那不住苦空非我來詣佛所鼓腹而言吾今此身既無諸病應知即是究竟涅槃彼尚不知無病名相況能了達究竟涅槃然竊佛語故作是說施設斷取應知亦然謂彼外道身無楚痛執為無病得好飲食執為涅槃彼尚不知四大調適名為無病況能了達心調適故名為涅槃復次彼尚不知無漏聖道名為無病況能了達究竟道果名為涅槃但竊佛語妄作是

說施設斷取應知亦然答中間已次答後問  
何緣外道但有施設斷知三取非我語取此  
問外道亦能少分斷我語取寧不施設答彼  
於長夜執有真實我及有情命者生者能養  
育者補特伽羅彼既執有真實我等寧肯施  
設斷我語取謂諸外道執我為宗若彼施設  
斷我語取便捨自宗歸依他見故不施設斷  
我語取復次彼諸外道執有我故怖畏無我  
如臨深坑故不施設斷我語取復次彼諸外  
道作如是念有我故活若無我者無命者故

便為不活故不施設斷我語取復次彼諸外  
道作如是念我若施設斷我語取同梵行者  
尚輕賤我捨我而去何況餘人怖畏輕賤故  
不施設斷我語取答後問已次答初問說同  
施設斷知諸取斯有何義此問意言彼諸外  
道實不了知斷諸取義世尊何故說同施設  
斷知諸取答是佛世尊隨彼言說謂彼外道  
自言了知世尊述彼非自意說為證此義故  
復引經如世尊說彼諸外道施設實有有情  
斷壞然依勝義無實有情但隨彼言而作是

說此亦如是故無有過非述他言便同彼故

阿毗達磨大毗婆沙論卷第三十三 說一切有部發智

音釋

詰 苦吉切 諂 詭古况切 詐 詐也 敢 徒感切

礫 郎擊切 芻 寬隅切

小石也

芻芻也